

Gulielmi Heberden commentarii de morborum historia et curatione / Recudi curavit S. Th. Soemmerring.

Contributors

Heberden, William, 1710-1801.
Soemmerring, Samuel Thomas von, 1755-1830.
St. Thomas's Hospital. Medical School. Library
King's College London

Publication/Creation

Francofurti ad Moenum [Frankfurt am Main] : Varrentrapp et Wenner, 1804.

Persistent URL

<https://wellcomecollection.org/works/xsz5hzdd>

License and attribution

This material has been provided by King's College London. The original may be consulted at King's College London, where the originals may be consulted.

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.

**wellcome
collection**

Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>



Library

22.6.25.



Digitized by the Internet Archive
in 2015

<https://archive.org/details/b21304099>

LIBRARY OF THE
MUSEUM OF NATURAL HISTORY

CURRY

1850



22. b. 25.

GULIELMI HEBERDEN

COMMENTARII

DE

MORBORUM HISTORIA

ET

CURATIONE.

RECUDI CURAVIT

S. TH. SOEMMERRING.


Γέρων, καὶ κάμνειν οὐκέτι δυνάμενος, τοῦτο τὸ βιβλίον ἔγραψα, συντάξας τὰς μετὰ πολλῆς τριβῆς ἐν ταῖς τῶν ἀνθρώπων νόσοις καταληφθείσας μοι πείρας.

ALEX. TRALL. Lib. XII.

FRANCOFURTI AD MOENUM

APUD VARRENTRAPP ET WENNER

MDCOCIV.



1164947

Tomna



REGI AMPLISSIMO

GEORGIO TERTIO

QUA PAR EST REVERENTIA

GULIELMUS HEBERDEN GULIELMI F.

SALUTEM.

Cum videam, Rex maxime, omnium gentium oculos in Te versos, qui res Britannicas difficillimis temporibus armis defendisti, legibus sustinuisti, virtutibus ornasti; qui non modo rempublicam nostram, sed quod ultra fines Europae situm est, maximis periculis liberasti; pene me pudet huic operi tantum invocasse Patrum.

*Sed me impulit cum defuncti Patris memoria, tum consueta tua benignitas, ut expeterem Te, qui summa semper benevolentia vivum exceperas, qui favore affe-
 ras, beneficiis auxeras, mortui quoque famae fore defensorem. Quod equidem confidi Te eo libentius esse facturum, quia cognovisti eum doctrina liberali et virtute fuisse ornatissimum. Quippe Tu optimi cuiusque habeberis praesidium, qui optimi partes ipse vita exprimis; Tu Pater Patriae recte vocaberis, qui quicquid honestum est, quicquid ad utilitatem publicam accommodatum, in fidem tuam capis.*

Neque vero is es, qui cuicumque medicum se professo statim credas; sed naturae contemplationem, et studium Humanitatis sapientiaeque requiris. Quid enim? Artes aliae omnes longam disciplinam, magnumque exigunt laborem; una Medicina

sine ulla eruditione intelligi potest? Si qui sic sentiant; si qui putent, quod ad salutem suam pertinet, vel nulla ratione comprehendi posse, vel omnibus pariter apertum esse ac manifestum; nae ego illis hunc librum non commendo: ad quem conficiendum, varia genera doctrinae, et assiduus labor, et magna consuetudo exercitatioque medendi, et longa annorum series conspiraverunt; dum materia undique paulatim conquisita, singulari deinde industria electa et disposita est.

Absolutum tandem Commentariorum volumen cum autor iam senex factus edere noluisset, illius partes ad me delatas suscepi, et opus, qua fide potui, publici iuris facere properavi. In quo quidem aestimando, si me ultra modum extulerit optimi Patris reverentia, et amoris magnitudo; si id maioris fecero, quam oportebat,

*tuoque nomine dignius existimavero; Tu
tamen, Rex clementissime, virtutis dome-
sticae, sicut publicae, candide interpres,
pro tua humanitate precor, ut filii pietati
saltem condones.*

*Deum oro atque obsecro, ut populo tu-
to diu intersis, ac valeas.*

SAM. THOM. SOEMMERRING

LECTORI SALUTEM.

Quos Cl. Heberden, medicus vere Hippocraticus, reliquit *commentarios in historiam morborum*, adeo placuerunt doctissimis in arte salutari Britannis, ut Germaniae medicis gratissimam fore arbitrarer illorum recusionem. Impedito scilicet belliturbis commercio literario cum Anglia, non facile inde libros acquirere licet; et si liceret, multo maiori constarent pretio quam alio tempore.

Quo magis autem nostris diebus immensa fere farragine, indigestaque mole scriptorum medicorum quotannis obruimur, quae vel obiter evolvisse pudet piget-

que, eo magis delectamur lectione huius operis, auscultando quasi virum ingenuum, fida narratione ea docentem, quae per quinquaginta annorum seriem, ad lectum aegrotorum, sagaciter et vigilanter animadverterat, diligenter examinaverat, experientiaque teste saepissime confirmata viderat. Magnopere etiam mihi laudandus videtur auctor, quod omnia ista selecta absque ullo fuce literario non modo adcurato et conciso, sed etiam consueto sermone posteritati tradiderit.

Parta tueri, excolere, emendare, ampliare, perficere, magis profecto artem, inprimis salutarem promovet, quam nova sectari, praesertim si tantum circa minus usitata illepidaque vocabula versentur. Etenim hominum nostrorum nonnulli, nescio quo infelici fato, neglectis plerisque doctrinis solidioribus medicinae, iam non ad ea feruntur, quae omne aevum rata vidit, et rata videbit, sed potius ad levia commenta, quae ficta quadam simplicitate

sese commendare et desidia adulari videntur.

Diariorum praeterea cuiusvis generis nimiam copiam multum obesse medicinae, studiosis satis patet. Etenim dum tempus in perlustrandis istis teritur, parum restat, quod repetitae lectioni operum classicorum impendi possit. Quocirca potius de imminuendis quam augendis scriptis medicis, de seligendis quam coacervandis operibus, de confirmandis et perficiendis observationibus veris, quam indagandis inauditis et fere incomprehensibilibus cogitandum esset. Sed auri sacra fame ducti in eo magis allaborant, ut paginarum statutum sibi numerum repleant undiquaque correptis corrasisque scriptiunculis, quam ut notatu digna, doctrinam medicam ullo modo promoventia exhibeant.

Nisi ergo mole sua omnia ista in oblivionem ruerent, maius omnino damnum inde emergeret.

At in egregio hoc libro multa inveni,

quae natura duce ad lectum aegrotorum pari modo animadvertere mihi visus eram, quamquam dubius adhuc haererem, palam ea pronuntiare, quippe receptis fere ubicunque dogmatibus, ne dicam vulgari opinioni, apprime adversantia. Huc inter alia pertinent, quae de victu et ratione medendi audacter proposuit, porro quae de admodum inimico corporibus hominum frigore, de arthritide, de hemicrania, de coxae morbis, de febre, de dignitate, valetudine et morte ventriculi, de haemorrhoidibus, de inepta mercurii instillatione ad tollendum ileum, de paralyti et apoplexia docuit. Admodum etiam placent, quae de diro diabete suspicatur: scilicet non esse solummodo renum vitium, sed indicium potius morbi haerentis in parte aliqua ad vitam necessaria, prouti in libro de morbis vasorum absorbentium innueram. Nec minori attentione digna quae de mammaram morbis in medium protulit: nimis enim crudeliter, et minus iudiciose illos saepe-

numero tractatos vidi. Mira profecto hunc auctorem per corticem Peruvianum praestitisse mirabuntur ii, qui nobile hoc medicamentum vix unquam adeo genuinum administrarunt ut in Anglia adhiberi solet; mirabuntur alii, eum tantas vires floribus chamomillae tribuere: hi quidem monendi videntur, ne ante experimentorum repetitionem festinanter rem decidant.

Pauca tantum offendi, in quibus minus assentiri licet Cl. viro, v. c. oborienti dysenteriae nimis reformidare videtur opium opponere, cuius tamen ope, nisi omnia me fallunt, nascentem dysenteriam in partu quasi suffocavi, et natam penitus profligavi, functione nimirum cutis eius auxilio restituta. Digitalem purpuream maxime enervare, verum quidem, nihilo tamen secius cauta eius adhibitio saluberimos effectus praestare vidi, in ipsa phthisi pulmonali debellanda. Variolarum vaccinarum in capite de variolis nullam factam esse mentionem non est quod mireris,

quippe opus absolutum erat, antequam praestantissimum illud praesidium ubicunque terrarum publicis privatisque testimoniis corroboraretur. Taceo insignem numerum casuum rarissimorum, qui non nisi celebratissimo medico, et non nisi in tanta urbe, Londini scilicet, occurrere solent, e quibus ea, quae ad Baillie anatomiam pathologicam addidi, augeri poterunt.

Atque iam istis commentariis frui mecum, Amice Lector! sedulo enim curavi, ut diligenter et nitide impressa tibi offerrentur.

Dabam Francofurti ad Moenum
a. d. 12. Aprilis MDCCCIII.

Guilielmus Heberden natus est Londini A. D. 1710, in qua urbe usitatis pueritiae literis institutus est. Exeunte anno 1724 missus est Cantabrigiam, et in Collegio S. Johannis studiis academicis imbutus, post sex annos eiusdem collegii socius electus est. Ex illo partim Cantabrigiae partim Londini, medicinae discendae operam dedit. Factus M. D. annos circiter decem artem suam Cantabrigiae exercuit, et simul Materiae Medicae historiam et usus iuventutem academicam quotannis docuit. Anno 1746 cooptatus est in Collegium Regale Medicorum Londinense. Biennio post relicta Cantabrigia Londinum se contulit, et in Societatem Regiam adscitus est. In hac denique urbe triginta amplius annos inter aegrotos occupatissimus vixit; nimirum donec aetas iam grandior, ut a tantis laboribus paulatim se subduceret, monebat. Coepit itaque otio indulgere per aestivos menses in domo quam habuit Vindesoriae ad vigesimum ab urbe lapidem: hieme interea in urbem redux aegrotantium domos obire plures annos non destitit. Anno 1766 autor fuit Collegio Medicorum, ut commentarios vulgarent earum rerum, quas fors aut ratio cuique obiecisset, unde ars sua amplificaretur: quod consilium cum sociorum consensu comprobatum est, duo volumina, et postea tertium, edita sunt. Anno 1778 Societas Regia Medicinae Parisiis eum quoque in suorum numerum cooptavit.

Nonnullae eius observationes in Actis Philosophicis Regiae Societatis, aliae in Actis Medicis Collegii Medicorum Londinensis, reperiuntur.

Mos illi fuit in aegrorum cubiculis pauca quaedam annotare, quae vel ex ipsorum, vel ex assistentium ore audierat, vel quorum ipse testis fuerat. Haec ibi raptim scripsit, ut potuit. Quicquid autem in codicillum sic retulerat, singulis mensibus perlegit, ut exciperet ea, quae videbantur aut morbi alicuius naturam, aut remedii vires illustrare. Haec in alium librum transtulit sub titulis morborum ad quos pertinebant. Denique ex hoc libro, secundum et septuagesimum annum agens, Commentariorum volumen de Historia et Curatione Morborum confecit. In quo adornando religio illi fuit quicquam literis mandare praeterquam quod in chartis annotatum inveniret. Maluit enim hanc morborum doctrinam mancam et inchoatam relinquere, quam aliorum libros exscribere, vel etiam quam ex memoria, quod deesset, supplere, nisi rarissime, et ubi posset memoriae certam fidem adhibere.

Haec de se autor scripsit. Commentarios filiorum alteri medicinam profitenti in manus tradidit; noluit tamen, ut se vivo ederentur. A. D. 1801, cum iam annos plus nonaginta complevisset, qua animi tranquillitate vitam semper egerat, eadem mortem obiit. Vir fuit singularis virtutis, modestiaeque; non modo studiis humanitatis ac literarum ornatus; sed integritate vitae, suavitate morum, pietate erga Deum, amore erga omnes bonos, praestans.

ORDO CAPITUM.

CAP.	PAG.	CAP.	PAG.
I. Victus . . .	1	XXVII. Diarrhoea . . .	112
II. Ratio Medendi . . .	4	XXVIII. Digitorum No- di . . .	115
III. Abdomen . . .	10	XXIX. Dolor . . .	115
IV. Abortus . . .	12	XXX. Dolores vagi . . .	118
V. Alvus . . .	13	XXXI. Dysenteria . . .	118
VI. Aneurysma . . .	15	XXXII. Ebrietas . . .	120
VII. Angina, et Febris rubra . . .	15	XXXIII. Epilepsia . . .	121
VIII. Aphthae . . .	25	XXXIV. Erysipelas . . .	129
IX. Arthritis . . .	26	XXXV. Essera . . .	131
X. Ascarides . . .	50	XXXVI. De Experrectis cum terrore . . .	133
XI. Asthma . . .	51	XXXVII. Febris . . .	134
XII. Aurium Morbi . . .	57	XXXVIII. Febris inter- mittens . . .	139
XIII. Aqua Bathonica . . .	58	XXXIX. Febris hectica . . .	143
XIV. Aqua Bristolica . . .	63	XL. Fistula Ani . . .	151
XV. Bronchocele . . .	63	XLI. Fluor Albus . . .	153
XVI. Calculus . . .	64	XLII. Gonorrhoea Mi- tis . . .	156
XVII. Capitis Dolor . . .	73	XLIII. Graviditas . . .	158
XVIII. Capitis Dolor in- termittens . . .	78	XLIV. Haemorrhoides . . .	159
XIX. Carbunculus . . .	81	XLV. Hernia . . .	163
XX. Chorea Sancti Viti . . .	82	XLVI. Hydrocephalus . . .	163
XXI. Coxae Morbus . . .	84	XLVII. Hydrophobia . . .	164
XXII. Crurum Vitia . . .	85	XLVIII. Hydrops . . .	165
XXIII. Cutis Vitia . . .	87	XLIX. Hystericus Af- fectus . . .	171
Herpes . . .	99	L. Icterus . . .	182
Porrigo . . .	100	LI. Ileus . . .	193
Scabies . . .	101	LII. Inflatio et Ructus . . .	202
XXIV. Destillatio . . .	105		
XXV. Devoratio . . .	108		
XXVI. Diabetes . . .	110		

CAP.	PAG.	CAP.	PAG.
LIII. Insania . . .	203	LXXVI. Pruritus Cutis	297
LIV. Intestinorum Do-		LXXVII. Puerperium	298
lor . . .	206	LXXVIII. Purpureae Ma-	
LV. Ischuria . . .	209	culae . . .	299
LVI. Linguae et Oris		LXXIX. Rheumatis-	
Dolor . . .	211	mus . . .	300
LVII. Lipothymia	212	LXXX. Semen Virile	306
LVIII. Lumborum Do-		LXXXI. Singultus	307
lor . . .	213	LXXXII. Sitis . . .	308
LIX. Lumbrici . . .	214	LXXXIII. Spasmus	309
LX. Lymphaticae Glan-		LXXXIV. Sputa cruenta	312
dulae . . .	216	LXXXV. Steatomata	315
LXI. Mammae . . .	217	LXXXVI. Stranguria	315
LXII. Menstrua . . .	222	LXXXVII. Struma . . .	318
LXIII. Morbilli . . .	232	LXXXVIII. Tenesmus	323
LXIV. Narium Haemor-		LXXXIX. Testiculus	324
rhagia . . .	240	XC. Torpor . . .	325
LXV. Nausea . . .	241	XCI. Tremor . . .	327
LXVI. Oculorum Mor-		XCII. Tussis . . .	328
bi . . .	242	XCIII. Tussis convul-	
Nyctalopia	249	siva . . .	330
LXVII. Ozaena . . .	249	XCIV. Valetudo con-	
LXVIII. Palpitatio Cor-		quassata	332
dis . . .	250	XCV. Variolae . . .	332
LXIX. Paralysis et Apo-		XCVI. Variolae pu-	
plexia . . .	251	sillae . . .	341
Catalepsia	270	XCVII. Ventriculi Morbi:	
LXX. Pectoris Dolor	271	§.1. Ardor et Acor	343
LXXI. Pedicularis Mor-		§.2. Dolor . . .	345
bus . . .	278	§.3. Lienis Morbi	348
LXXII. Phthisis Pulmo-		§.4. Pancreatis Mor-	
nis . . .	278	bi . . .	349
LXXIII. Pictonum Coli-		XCVIII. Vertigo . . .	350
ca . . .	290	XCIX. Vomitus . . .	354
LXXIV. Pituita . . .	295	C. Vox . . .	357
LXXV. Prostatae Scir-		CI. Urina . . .	358
rhus . . .	296	CII. Uterus . . .	363

COMMENTARIORUM
DE
MORBORUM HISTORIA
ET
CURATIONE

CAPUT I.

De Victu.

Quomodo sanis, quomodo aegris vivendum sit, medici saepenumero videntur nimis curiose et subtiliter disputare. Quorum praeceptorum sollicita atque anxiosa observatio secundae valetudini non raro nocuit, et adversae incommoda auxit. Usus iamdudum docuit humanum genus, qualis victus, et quae vivendi ratio plerisque omnibus hominibus conveniat; et inter ea quae vulgo sunt salubria, nullum cibi genus fugiendum est. Illud autem vix admonendi sunt qui student se praestare liberos a morbis, eo vero minus qui iis tentari coeperunt, cavendum esse a varietate ferculorum et condimentis exquisitioribus, quibus, cum cibi cupiditatem nimiam faciant, praegravatur stomachus, et corpus omnigenis morbis sit opportunum. Assa vero, an elixa eli-

genda sint, olerumve utrum utro sit utilius, sibi quisque, modo communi iudicio non caret, quam alius quilibet, tutius meliusque deprehendet.

Potui aptissimae sunt cerevisia tenuis, et aqua pura. Spiritus, qui vocatur vini, et vinum aqua mixtum, cane peius et angue sunt vitanda. Etenim plures cognovi, qui horum usu sensim sese assuefecerunt liquoribus vinolentis, quibus indies meracioribus sumptis brevi omnino carere non potuerunt, donec ex sobriis et sanis facti sunt ebriosi et valetudinarii; tam animorum, quam corporum debilitate, gravissimas huius erroris poenas luentes.

Febrientibus profecto cautio quaedam maior est adhibenda; attamen vix tanta, quanta saepe imperatur. Nam sponte illi sua cibum ex animali materie, maxime robustiorem et acriorem, fastidiunt, et comedere non possunt sine gravi offensa ventriculi, et morbi incremento, quamdiu febris intendatur; inclinata vero ea et decedente, aegri saepe expetunt carnes leniores, et impune iis utuntur.

Britanni, dum valent, cibum ex animali materie copiosius, quam pleraeque aliae gentes, assumere dicuntur; quem tamen iidem morbo occupati maxime omnium fugiunt. Hunc nostrum morem sua etiam aetate obtinuisse scribit Erasmus. Sed, ut maxime febris saevierit, tuta erunt iuscula tenuiora, et gelatinae ex carne, et quicquid in hortis et in agris colitur, si excipiamus ea quae

sunt acria aut aromatica. Lac, et ova, nescio qua de causa, a nonnullis interdicuntur in omni febre; quae tamen vel in pessima, ut mihi videtur, tuto assumuntur, modo aegris ipsis fuerint iucunda.

Sitis febrilis optime restinguitur aqua pura; neque referre puto, tepida, an frigida bibatur. Tantum etiam utriusvis dari debet, quantum ipsi libitum fuerit. Neutiquam vero autor essem, ut plus liquoris ingeratur, quam aut cupiat, aut ventriculus facile ferat. Sin aqua nimis fatua videatur, licebit in ea dissolvere conservam ribesiorum, et varios syrupos, vel in eam immittere poma assa vel cruda concisa, vel tamarindos, salviam, melissam, aut panem tostum. Eodem valet aqua, in qua semen farinaceum decoctum est, vel cum qua contrita sunt semina oleosa, item lac aqua mixtum. Quae omnia, et alia huius generis multa, vix mutant aquam, nisi quod saporem illi gratiorem conciliant.

In omnibus morbis, et per totum eorum spatium, ipsi aegro permittendum est, modo neque deliret, neque insaniat, tenebitne se in lecto, an ab eo abstinebit. In hac re vires et voluntas aegroti unice sunt respiciendae; et quis illo melius noverit quid ferant vires, aut unde solatii plurimum percipiatur?

Dubium multis fuit, nescio quid timentibus, de mutandis aegrorum liateis; pari quidem iure ac alii timuerunt aërem cubiculi foedum noxiuni-

que puriori ac salubri mutare. Nullum certe periculum instare debet, ne frigus aegrum laedat: nam famula, nisi prorsus inexperta sit, lintea nova aegrotanti ita inducet, ut frigido diutius non obiiciatur, quam tuto fieri novimus in multis aliis necessariis ministeriis. Nonnulli etiam mira narrant de odore saponis pernicioso, quem lintea recens lota spirant; quapropter monent infirmos, si lintea sint mutanda, iis solis uti, quae alii prius induerunt *. Quo quidem pacto odor saponis tolli potest; nemo tamen, cui munditia cordi est, hoc pretio incolumitatem sibi emere non gravaretur. Quod si saponis vapor adeo esset corpori inimicus, quicumque in sapone conficiendo, vel in linteis lavandis occupantur, incommoda valetudine conflictari necessarium esset. Verum longo usu didicimus, aegros, dum lintea foeda mundis commutant, adeo non laedi, ut summo inde perfundantur solatio, in somnum blandum et recreantem non raro desinente.

CAP. II.

De Ratione Medendi.

In morbis levandis principio considerare oportet, locusne sit exinanientibus; id est, num consenserint plurimi medici in similibus casibus utilia esse quae vomere faciunt, quaeve movent alvum, urinam, sudorem, salivam, aut sternuta-

* Diemerbroeck de Peste, l. ii. c. 3.

menta, sanguinis missionem (per hirudines, cucurbitulas, vel lanceolam), denique exurentia, aut exulcerantia.

2. Deinde, an dentur specifica quae vocantur, sive illa quae propriam vim habent adversus morbum quo aeger laborat. Multa huius generis ubique vendita sunt, quorum paucissima fautorum promissis, et medicorum votis responderunt. Nusquam magis convenit vetus illud, *νᾶφι καὶ μέμνασ' ἀπιστεῖν*. Huius tamen nominis honor merito tribui potest argento vivo ad morbos Veneris, cortici Peruviano ad febres intermittentes, sulphuri ad scabiem, opio ad quasdam distentiones, et aquis Bathoniae ad ebriosorum fastidium.

Praeter haec pauca, dubito an medicamenta decem alia possint reperiri, quae ab idoneis autoribus in specificorum, id est, certorum remedium classem relata fuerunt, quorumque fama postea usu comprobata est. Non sum nescius quanto studio decantata fuerunt borax ad aphthas, pulvis Portlandicus ad arthritidem, scilla et gummi foetida ad asthma, aqua kali puri ad calculum urinae, cicuta ad carcinoma, electrificatio ad caecitatem, antimonium ad febres continuas, cerussa acetata ad sanguinis profusionem, et nonnulla forsitan alia adversus alios morbos. Ex quorum medicamentorum numero si exemeris quae vel nullas habent vires, vel exiguas, vel inconstantes, vel etiam periculosas, vix unum et alterum relictum iri crediderim.

Fieri tamen potest, ut quorum facultates dubiae sunt, aut inconstantes, ea, modo tuta sint, medicus interdum non invitus experiatur.

3. Tum, saepe vomitum, aut alvum fusam, aut dolorem, et alia signa adversa, ubi maiorem in modum aegros exercent, remediis idoneis lenire oportebit. Quem ad finem opium saepenumero optimum auxilium est.

4. Tum, in morbis longis, qui diu traxerunt, interdum non abs re erit, confugere ad ea quae vim habent corpus vehementer afficiendi; si forte per hoc malus eius habitus in saniozem mutari possit. Huius generis sunt argentum vivum, antimonium, cicuta, electrificatio.

5. Postremo, ubi nullus praedictis locus fuerit, ibi illud solum moliri oportebit, ut vires, quantum fieri potest, conserventur, utque omnes naturales actiones quam minime laborent; verum ut ciborum cupiditas, et concoctio, ut alvus, et somnus, et quae sunt huiusmodi, quam maxime fiant, quemadmodum naturaliter esse debent.

Hoc, quod interdum unicum auxilium superest, nequaquam ita accipi velim, tanquam quod non imprimis necessarium est in omnium morborum curatione. De quo quidem praecepto, cum permagni refert ad aegrotantium salutem, paulo fusius disserere libet.

Τὸ ἐνορμῶν—Ψυχὴ—Archaeus—spiritus animales—Natura——His et aliis quibusdam vocabulis usi sunt medici ad designandum principium

illud vitae, sive incognitam ἐνέργειαν, qua animalia ab inanimatis distant.

In physiologia, et in pathologia humani corporis explicanda, modo haud satis, modo nimium tributum est principio et fonti vitae animalis. Quippe alii de facultate hac obscura loquuntur, tanquam de re bene cognita et perspecta, cuius administratione contendunt se omnium corporis actionum, et remediorum, rationem reddituros; ingeniis suis multo magis confisi, quam experientia et rerum usu docti. Alii contrarium errorem errantes, praetermissis facultatibus, quae vitae propriae sunt, nodos omnes per rerum inanimatarum leges student expedire.

Quicquid demum sit illud, quo vita animalis continetur; usu instructi sumus variis rebus, quae vires eius vel augere possunt, vel minuere. Nempe enervant omnia, quae dicuntur narcotica, tum maxime herba digitalis. Contrarios edunt effectus vinum, et potiones meraciores, et quicquid ventriculum reficiat, aut fortiter sensus irritet. Illud tamen tenendum est, nimio vino obrui vires, quae a quibusdam narcoticis parce adhibitae haud mediocriter recreantur.

Ex narcoticis quaedam vulnere infusa nocent; plura, ac fere omnia quae erigunt animum, nihil agunt nisi in ventriculum demissa: quae quidem pars tantam habet dominationem in universum corpus, ut res quaedam iucundae, aut noxiae, quamprimum stomachum contingant, recreant

nos penitus, et reficiunt, vel affligunt, aut etiam occidunt.

Medici profecto est, signa morbi quaecunque adversa depellere, vel levare, quantum id tuto fieri potest; attamen primum omnium studere oportet, ut vita ipsa, quae in omni aegrotatione aliquid detrimenti capit, sustentari, et incolumis adversus impetum morbi praestari possit.

In iis rebus quae vitam iacentem erigunt excitantque, numerantur quaecunque sensus irritant; quae quidem praesenti, at brevi auxilio sunt ad defectionem animae, et debilitatem repentinam. Diutius movent vinum, et aromata; et proinde utiliter adhibentur in multis morbis, ubi vires iacent: sed videndum, ne usus liberalior nimium faciat calorem, aut etiam ebrietatem. Mortonus centum fere abhinc annos in non levem reprehensionem incurrit, propterea quod aromatibus praeter modum usus est ad refocillandos, ut ait ipse, exsuscitandos, erigendos, instaurandos, et stimulandos spiritus animales. Tutius simul et efficacius praesidium ventriculo vitaeque petitur ex medicamentis amaris, aut leniter astringentibus. Flos chamaemeli in pulverem tritus plerisque satis iucundus est, aut certe tolerabilis. Cortices, ligna, et radices, in aquam immittere praestat, vel ex aqua decoquere; qui humor colatus ipsis medicamentis contritis saepe antefendus est. Bene est, quod inter ea quae terra gignit, huius generis multa sunt. Nulli vero cedit cortex

Peruvianus. Huius corticis unciae, et radicis zingiberis drachmae, si aquae ferventis libra superinfundatur, fiet liquor, cuius sesquiuncia, vel unciae binae, in quolibet fere morbo tuto et utiliter dari possunt. Sed cortici Peruviano a quibusdam obiecta sunt crimina, nescio quae, inflammationem augendi, et reprimendi pituitam: aiunt enim vim astringendi in hoc cortice tantam esse, ut fibras, quae in omni inflammatione nimis tenduntur, adhuc magis intendat, impediatque ne faucium et pulmonis membranae pituitam expellant. Cui quidem doctrinae, satis speciosae, in scholis medicinae forsitan assentimur; cum autem ad usum et experientiam ventum fuerit, assentio illa omnis, nisi fallor, elabatur. Iamdiu enim est, quod cortex in pessimo inflammationis gradu, cum prope abest a gangraena, tutissime datus fuit, ita ut huic malo multi putant nullo modo melius succurri posse; tum quoque interdum vidi illum non parca manu adhibitum ad variolas, sine ulla pituitae remissione; quin etiam in quodam asthma fere deploratum per annos aliquot multo mitius factum est, dum sumeret quotidie huius medicamenti scrupulos duos mane et vespere. Ubi diligentia adhibita est, ne ventriculum praegravet, opprimatque, nullus dubito quin in quocunque fere morbo tutum saltem, si non efficax remedium sit.

Quod attinet ad facultatem confirmandi stomachum, viresque, crediderim hunc corticem

idem valere, ac plurimas alias herbas amaras. Hoc tantum nomine caeteris anteferendus est, quia corpori, sub febre intermittente, proprie amicus esse cernitur. Tamen si quis medicus vel aegrorum, vel suas ipsius suspiciones penitus tollere non potest de veneno nescio quo in hoc cortice latente, illi non deerunt multa alia medicamenta amara huic cognata, quae, cum pariter stomachum excitant, corpus universum confirmabunt, facientque, ut cum morbo feliciter contendat.

Quod modo praeceptum est, mihi videtur principem locum tenere in ratione medendi. Ad hoc medici animus in omnium morborum curatione attendendus est; in multis nihil potest moliri praeterea.

Maximum instat periculum in omni aegrotatione, ubi stomachi vires adeo debilitantur, frangunturque, ut res omnes respuat, et aversetur; tanquam conscia foret natura vitam ad finem properare, et nulla ope revocari posse, et proinde omnem reiiceret. Hanc, ut ita dicam, mortem ventriculi, totius vitae interitus brevi subsequi consuevit.

CAP. III.

De Abdominis malis.

Hydrops, graviditas, scirrhi, et inflatio intestinorum, sunt quidem praecipuae tumentis abdominis causae; aliae tamen interdum incidunt. Venter puerorum durus et intentus diutius perse-

erat, quam qui inflationi; et medicamentis purgantibus citius cedit, quam qui scirrhis tribui possit. Menstrua in vetulis penitus finita, vel in iunioribus diutius suppressa, non raro excipiuntur tumore ventris menses aliquot manente. Post gravem capitis dolorem venter tumuit horae spatium; item complures dies post abortum, atque post puerperium.

Credibile est has ventris intentiones similes esse earum quas multa venena in corpore excitant, perturbatis, uti conicio, nervorum officiis. Utcumque hoc fuerit, in quibusdam huiusmodi tumor triennium perduravit.

Abdomen in quadam turgidum semel atque iterum subsidit die secundo vel tertio ab exactis menstruis, protinus ut aquae libra ex utero effluxisset. In alia, cuius abdomen ultra biennium tumuerat, tumor saepe repentinus exoriebatur etiam in aliis corporis partibus, nempe femoribus, dorso, pectore, et collo, ad dimidii capitis infantis magnitudinem; et quanquam ventris moles semper foret iusto maior, mane interdum naturalem modum haud multum superaret; mox tamen momento temporis in tantum assurgebat, ut aegrae persuasum esset cutem mox ruptum iri. Eadem saepe percipiebat motum quendam propagari a ventriculo ad artus, qui protinus convellebantur.

Abdomen saepe patitur dolores similes eorum qui solent molesti esse in variis partibus pectoris;

scilicet non pertinentes ad viscera, sed proxime accedentes ad rheumatismum. Hi dolores diu aegros trahunt. Remedia sunt linimentum ammoniacae *, cum, vel sine tinctura opii, emplastrum cymini, vel cantharidis; et ulceratio diutius servata: haec sunt extrinsecus admovenda. Intus convenit medicamentum ex oleo, cui tantum salis volatilis adiectum sit, quantum os et fauces facile tulerint; postremo opium.

CAP. IIII.

De Abortu.

Mulier quaedam quinquies et trigesies abortum fecerat. Abortus tertio plerumque mense contingit; quibusdam tamen foeminis perpetuum est ut quinto vel sexto mense partus elidatur; et in his lac stillans ex uberibus abortum iamiam adfuturum indicat. Quaedam, gravida gerellis, alterius abortum fecit, alterum reservavit, qui iusto tempore in lucem editus ad aetatem adultam pervenit.

Corporibus gravidarum collisis, aut vitiatis, aut debilitatis, saepe incidunt abortus. Qui si crebrius fiant, profluvium album fere semper inferunt: quin etiam valetudinem conquassant, atque totam illam malorum cohortem invitant, quibus affectus continetur hystericus.

* Medicamentorum compositiones explicabit Pharmacopoeia Londinensis.

Foemina crebros passa abortus, postquam iterum gravida esset, coepit uti cortice Peruviano, cuius tres drachmas quotidie sumsit diutius, et iusto tempore enixa est infantem omnibus, quos antea pepererat, valentiolem.

CAP. V.

De Alvo.

Homines frequentia alvum exonerandi plurimum inter se differunt. Alteri semel tantum singulis mensibus venter solutus est; alteri duodecies quotidie descendit per triginta annos, ut ipse mihi narravit, et dein septies quotidie per septem annos; neque vir hic interea macuerat, quin potius aliquanto habitior factus erat.

Tam foeminis quam viris contigisse novi, ut stercora multos menses restarent coacervata in intestino recto, ubi coacta sunt in molem duram, maiorem quam quae corporis viribus expelli possent sine auxilio chirurgi. Signa huius mali sunt dolores ventris, et perpetua desidendi voluntas etiam statim post deiectiones; tum vero stercora non nisi liquida redduntur, et simul est difficultas urinae.

Interior intestini recti tunica adeo interdum laxatur, ut cum stercore semper descendat, aut etiam inter equitandum; nec redeat, donec manu fuerit reposita. Fomentum astringens post singulas deiectiones utiliter adhibetur.

A taenia, et ascaridibus, fit prurigo ani vespere molestissima.

Nonnullos tentant sine causa manifesta haud mediocres ani dolores, qui interdum mulcentur, saepius exasperantur deiectionibus; non raro saeviunt magis in lecto, et noctu, quam aut interdiu, aut inter ambulandum, aut equitandum. Per multos annos non cessarunt aegros fatigare.

Exulceratio facta per exiguum emplastrum cantharidis imo femori admotum, et tres menses servata, profuit adversus hoc malum.

Similes his dolores oriuntur ex inflammatione ani, aut vicinarum partium, solentque sedendo, et stando, tussiendo, sternuendo, meiendo, maiorem in modum intendi. Si huiusmodi inflammatio solvi nequeat, verum suppuret, et fiat abscessus, sanato demum ulcere saepe eveniet, ut valetudo, ubi fuerit tenuior, intra breve spatium prorsus perdita sit, vel aliis de causis, vel a tabe pulmonali ingruentibus; sive quod morbus initio fuerit totius corporis, seu quod habitus longa suppuratione fuerit vitiatus, priusquam per se, vel ferro, pus emitteretur. Ut praecaveatur exitus huiusmodi infaustus, utile fuit ulcus excitare prope genu in femoris parte interiore, quamprimum anus spectaverit ad sanationem*.

* Vide quae de fistula ani infra praecepta sunt,

CAP. VI.

De Aneurysmate.

Tumores colli aneurysmatici durarunt multos annos sine aliis incommodis praeter tumorem et spirandi difficultatem; tandem vero in mortem repentinam desierunt. Haud pauci tumores vel aneurysmatici, vel certe manifesta pulsatione aneurysmatum aemuli, post multos tandem annos sponte sua coeperunt imminui, et fere finiti sunt.

CAP. VII.

De Angina, et Febre rubra.

Consueta aliarum febrium signa in febre etiam rubra incipiente nascuntur; porro die primo vel secundo cutis praeter solitum rubet, et fauces plerumque leviter dolent; simul in nonnullis fiunt tumores glandularum, cum in aliis locis, tum maxime post aures, et modo discutiuntur, modo maturescunt. In aliis vero brachia, et praecipue digiti, tumuerunt; id quod nullo discrimine experti sunt et illi, quos levissime attigit hic morbus, et quos occidit.

Tertio vel quarto die faucium dolor fere conquiescit; sexto autem rubor cutis incipit se subducere; et ubi omnia rite procedunt, morbus post septimum diem festinanter recedit.

Interdum rubor per universam cutem diffunditur; interdum pectus et brachia solummodo rubent; et non raro vidi exteriorem carpi partem levi rubore suffusam, cuius nusquam alibi repe-

riri vestigium potuit. Cutis nunc rubet sine ullis maculis, aut aspredine; nunc in moleculas attollitur, similes iis quae ex urtica nascuntur; interdum quoque color in aliis locis saturior, in aliis dilutior est; vidi etiam pustulas exiguas hic illic sparsas, morbillorum speciem satis accurate repraesentantes.

Morbo finito tota cuticula solet renovari; nam vetus vel in squamas furfureas abiens deteritur, vel eius iam mortuae, et cuti subiectae male haerentis, maiores laminae decidunt. Color parum refert ad aegrotantis salutem. Vidi eum insigniter auctum sine fructu, et imminutum sine detrimento. Lecti tepor non semper utilis est ad eliciendum hunc ruborem; memini enim illum in quadam languidiorém fuisse, dum in lecto iaceret, et postquam surrexisset semper magis viguisse. Huic colori saepe accedit cutis pruritus satis molestus.

Hic morbus haud multum dissimilis est morbillorum; a quibus tamen sollicite discernendus est, cum medendi rationem longe diversam postulet. Sub hac febre rubor late inficit cutem; qui in morbillis dividitur in multas distinctas maculas, inter quas naturalis color conspicitur. Tum vero in morbillis maculae illae rubrae paululum eminent supra reliquam cutem, sic ut digito super eas leniter moto quaedam scabritia deprehendatur; quae maximam partem nulla est in febre rubra, nisi forte exigua aspretudo in brachiis. Deinde
tussis,

tussis, stérnutamenta, oculorum mador, et palpebrarum tumor, quae signa sunt morbillorum propria, in hac febre desiderantur. Postremo, morbilli tertio fere die in facie oriuntur, et quinto vel sexto in brachiis; quod in febre rubra contra fit, ut modo dictum est.

Languor et sollicitudo sunt quidem plerorumque omnium febrientium communes; hos tamen, de quibus sermo est, maiorem in modum fatigant. Quin etiam acer humor copiosus in fauces et nares interdum depluit, partim salivae specie exspuendus, partim e naribus distillans, unde aegri fiunt surdastri, rauci, vel fere muti, et interea sapor omnium rerum, et odor, illis perit. Hoc profluvium acre, interdum exulcerat intus nares, et totum labrum superius, sicut crusta obducta multos dies perseveret post morbi fugam.

Febris modo descripta saepe quidem mortífera est; saepius vacat periculo; et interdum adeo mitis est, ut haud ultra paucas horas duret, et forsitan inobservata praeteriret, nisi brevis quidam languor, et nonnullus cutis rubor, et alii in eadem domo hoc morbo impliciti, de natura languoris dubitare nos non sinerent, etiam in iis qui tam leviter laborant.

Haud temere alium morbum repereris, in quo aegri saepius desipiunt, et cum minore periculo. In caeteris febribus mens raro turbatur, donec aegri iam in malis sunt; ideoque hoc signum non iniuste terret: sed in febre rubra aegri vel ipso

primo die delirant; atque interdum, licet omni alio periculi indicio vacent, tamen non cessant aliena loqui singulis noctibus ab initio morbi usque ad finem.

Inter impuberes utriusque sexus contagione facillime propagatur haec febris. Mares vigesimum annum egressi parum illi sunt opportuni; quanquam unum atque alterum vidi, qui post trigesimum annum in eam inciderant. Foeminas autem non modo adultas, sed etiam vetulas non paucas, eadem tentatas curavi; quo tamen aetate fuerint proVectiores, eo securiores erunt ab hoc malo.

Nondum satis exploratum habeo, quamdiu semen huius affectus in corpore delitescat, priusquam accendat febrem, et alia sui indicia prodat: memini tamen sanam puellam accessisse ad puerum hoc morbo implicitum, quae quinto post die coepit ipsa aegrotare; et fieri potest ut idem ubique spatium intercedat inter contagionem et febris initium. Nam in variolis novimus certam huius intervalli legem in omnibus fere aegrotis servari.

In iis, qui hoc morbo perituri sunt, fieri solet circa quintum vel sextum diem, torpor, aut spirandi difficultas, et cum hac interdum sputa cruenta, licet pulmones antea integri fuerint. Nonnullis quidem, sed perpaucis, contigit esse tam infelicibus, ut signis periculosis omnigenis fatigati intra triduum succumbant.

Qui ex hoc morbo convalescunt, iis, febre

iam inclinata et pene victa, glandulae sub auribus nonnunquam tument, et non leviter dolent; interdum quoque in pus abeunt. Neque vero testiculi semper fuerunt liberi a tumoribus; artusque diutius vexati sunt doloribus, quales sunt rheumaticorum, et aqua inter cutem.

§. 2. *De Angina.*

In febre quae modo descripta est, aliquis semper est cutis rubor, et plerumque nonnullus, sed obscurus faucium dolor. Quod si fauces exiguis ulceribus obsessae paulo vehementius doluerint, tum, utcunque cutis colorata sit, morbus non ab hoc colore, sed a faucium affectu nomen habet, et angina maligna vulgo dicitur. Quin etiam multi existimant cum nomine naturam quoque febris mutari. Qua de re iudicet lector, postquam morbi utriusque historias secum animo perpenderit.

Saepe equidem dubitavi, febrisne in quibusdam antecessisset faucium crustas et ulcuscula, an ea secuta esset. Etenim vel primo febris die interdum vidi fauces istiusmodi ulceribus occupatas, quae vix credibile erat intra dieculae spatium in tantum crescere potuisse. Ortus autem harum crustarum aegros facile latet, cum dolor initio est satis modicus, neque comparandus cum illo qui fit ex faucium inflammatione. Devorandi etiam labor vix est ullus, aut saltem opinione multo minor, si quis ex faucium conditione illum aestimaret.

In locis mox ulcerandis cuticula videtur solito pallidior, et brevi postea fit alba, aut cineritia, quae avulsa, vel sponte sua rimas agens, sordidum exhibet ulcus sine ullo pure. Hae crustae solent occupare tonsillas, velum pendulum palati, uvulam, oesophagum, tracheam, et totas intus nares; ex quarum partium tumore, ubi ulcera fuerint alta et numerosa, aeger fit raucus, vel vox illi fere supprimitur. Aliquando etiam guttur extrinsecus, et tota facies, tument.

Vidi ego primo morbi die cutem universam rubore suffusam. Interdum brachia tantum rubuerunt, et pectus. In aliis hic color non nisi quarto morbi die in conspectum venit: denique in quibusdam nullus omnino rubor fuit per totum morbum. Colore vigente aeger non relevatus est, et decedente non peius habuit.

Inspectis faucium crustis coniectura quidem fieri potest de periculo aegri, quod eo maius erit, quo latius illae manent, quo altius carnibus insideant, quo haereant pertinacius, quo saepius renascantur, et magis ad gangraenam spectent. Conditio tamen harum crustarum index est, non autem causa periculi. Febris enim istiusmodi est, et in tantum affliguntur vires, ut liceat praeclare intelligere gravius multo subesse malum, quam uvulae, aut tonsillarum affectum, quas in aliis morbis saepe videmus sine vitae discrimine erodi, quas etiam novimus tuto posse excidi. Haec itaque ulcera, non secus ac in peste bubones et car-

bunculi, cum morbum quidem indicant, tamen periculum a febre sola pendet.

Morbus hic modo tam mitis est, ut nulla remedia postulet; modo tam gravis, ut omnia vincat. Nonnulli secundo die torpent, et difficulter spiritum trahunt, reflexo, quantum maxime fieri potest, capite; atque ita, mucosissimo et graveolente e naribus fluente, faucibusque fere putribus, perierunt. Contra alii, postquam levissima huius morbi signa per biduum experti sunt, nullo negotio convalescerunt. At plerisque febris accenditur non mediocris, quae vix septimo vel octavo demum die in melius mutari coepit. Simul in quibusdam salivae cursus notabilis ex ore fertur.

Languor est his aegrotis, et debilitas, et iactatio, maiores quam pro ratione febris. Morbo in peius verso intenditur sollicitudo, et non raro accedit torpor; tum quoque mucus sordidus e naribus distillat, spiritus olet, et resupinato collo aegre ducitur; cibi etiam et medicamenta respuntur, neque tamen ideo quia devoratio molesta est, quae saepe ad mortem usque, quod miratus sum, satis facilis manet, quamvis fauces sordidissimis ulceribus fuerint undique circumtectae, et spiritus pene interclusus. Tracheam forsitan magis quam oesophagum occupant haec ulcera.

Inter signa rariora numerari potest sanguis e naribus ubertim profluens. Finito morbo, nonnullos adoriuntur dolores, et tumores rheumatici.

Novi quos hic morbus bis tentaverit; quod tamen perpaucis accidit.

Anginam in morbis ineuntis aetatis recte numeraveris. Mares certe, qui iam adulti sunt, raro cum ea conflictantur. Duos curavi iuvenes, qui annum vigesimum attigerant; item virum unum robustum, qui trigesimum annum excesserat. Praeter hos autem neminem marem adolescentia egressum in hoc morbo me vidisse memini. At usu didici foeminas nunquam prorsus securas esse ab hac valetudine; quanquam vetulae sint illi minus opportunae, quam iuniores. Quae autem huic febre maxime subiecta est, eadem aetas tenera gravissime periclitatur; contra ac fit in variolis et morbillis.

Inciso pueri cadavere sexto morbi die extincti, velum pendulum palati plane putre erat, tonsillae vero extrinsecus fuscae, sordidissimae, intus lividae; uvula muco crasso, membranam dixisses, contegebatur; epiglottis et oesophagus integri erant. Mucus autem ille tracheam quoque velabat usque ad eius divisionem, in cuius superiore parte fere in membranam coërat, in inferiore muco similior erat.

Ex iis quae de febre rubra, et angina memorata sunt, longe vero simillimum videtur, unum eundemque morbum, hoc, vel illo nomine appellatum fuisse, prout indicia alterutra gravius incubuerint. De quo etiam id nos facit certiores, quod ambo una semper fiunt vulgares. Atque

haec procul dubio vincet sententia, modo illud concedatur, cuius, ni fallor, ipse testis fui, nimirum inter plures pueros et puellas, qui, ut saepe fit, in unis aedibus simul correpti sunt, hōs febrem rubram, illos vero anginam fuisse expertos. Verum, ut maxime fuerint hī morbi diversi, meo quidem iudicio, utriusque curatio eadem esse debet; sī exceperis illa remedia, quae, ut quibusdam visum est, faucibus sunt admovenda.

Paulo magis interest, hic affectus, tanquam variolae, nunquamne repetat. Equidem nullus dubito, quin nonnulli bis illo fuerint impliciti. Patet tamen hoc raro fieri, cum aliter in tam vulgari morbo secunda contagio non minus certa esset, quam in scabie, aut morbis venereis.

Aliquos curavi adultos, qui saepe vexati fuerunt dolore faucium, et ulcusculis prorsus similibus illis quae in angina nascuntur. Tamen febris vel nulla, vel levissima fuit, et color cutis naturalis. Et siquidem incommodi aliquid habuerit hic affectus, tamen adeo vacavit periculo, ut haud sciam an quoquo modo pertineat ad anginam.

Quod attinet ad curationem febris rubrae et anginae, levis iste faucium dolor, longe alius quam qui fit ex inflammatione, sanguinis missionem certe non postulat; quam etiam horum aegrorum tenera plerumque aetas, et habitus corporis infirmus, non obscure prohibent. Interdum tamen iuvat modica sanguinis missio initio morbi, cum ardor et dolor capitis vehementius fatigarint

aegrum cibus lautioribus assuetum. Sed eam in plerisque tutius omitti putaverim, et in paucissimis utiliter repeti posse; quanquam non negaverim me adfuisse nonnullis, quibus sanguis bis deductus fuerit impune. Alvus semel quotidie soluta nemini, quantum scio, nocuit; at nunquam autor essem ut saepius moveatur. Quod si sua sponte fuerit solutior, quantocyus erit cohibenda. Morbo tamen mitigato, praesertim in pueris, utiliter adhibentur ea, quae alvum leniter movent. Emplastrum cantharidis non mediocriter prosunt: ideoque illis carere aeger non debet, donec morbus inclinatus sit.

Aqua in qua decoctus est cortex Peruvianus, utilis est in hoc morbo; cui adiici possunt pauca grana cuiusvis iucundi pulveris aromatici, ubi aeger fuerit languidior. Ex decocti huius, et decocti hordei compositi, singulorum pari mensura, fit quoque gargarisma, quo saepe est gargarizandum; quod etiam in fauces infantum per fistulam infundi debet. Nec tamen hoc moleste repetendum est, ultra quam aegri libenter ferant; etenim auxilium inde sperandum non multo maius est, quam ex crebra sorbillatione huius vel iucundioris cuiuslibet succi, qui, dum per fauces transit, abluat illas, abstergatque. Adulti quidem sordibus ablutis gargarismata reddunt: infantibus autem quicquid sic sorbeatur, sive infundatur, in stomachum pariter descendit. Idem fit, ubi aliquid in nares infusum est; quod igitur vix tuto facere licebit, ne

scilicet sordes ablutae plus noceant in ventriculum demissae, quam si in naribus restitissent.

Omnia alia faucium curatio praeter gargaris-
mata, ut mihi videtur, est repudianda, utpote
taedii multum, auxilii parum aut nihil allatura.
Multi tamen docti expertique medici aliter de hac
re sentiunt, et multum ad aegri salutem conferre
putant ea remedia quae faucium propria sunt.
Quapropter non cessant incidere satis altis plagis
crustas illas circa tonsillas, et uvam, ubicunque
ferrum admovere licet; quo facto, palatum un-
gunt medicamento, quod habet mellis rosae unciam,
oxymellis aeruginis drachmam; atque hoc etiam
fauces saepe quotidie illinunt. Postremo, etiam
vi quadam non dubitant carnem fungosam sordi-
damque a partibus ulceratis avellere; quae tamen
usque renascetur, donec febris constiterit. Do-
lendum interea est iis, qui hanc viam insistunt,
vix locum esse huiusmodi medicinae in aetate pue-
rili, ubi morbus hic praecipue acutus esse consue-
vit; nec in qualibet aetate, modo crustae illae
nares, tracheamve occupent, quibus maxime opus
est remedio,

C A P. VIII.

De Aphthis.

Aphthae praecipue nascuntur in pueris, et
senioribus, et iis qui febribus longis fuerint debi-
litati. Accedunt dolor faucium, difficultas devo-
randi, raucitas, tussis, singultus, et cupiditas

exspuendi pituitam, ut aegris videtur, quam aphthae mentiuntur. Adversus hunc morbum cortex Peruvianus tuto adhibetur, et fortasse utiliter.

Ulcuscula aphtharum vulgo existimantur non solum os et fauces occupare, verum etiam in stomachum descendere, et totum intestinorum canallem obsidere. Hoc non semper ita fieri constitit incisis cadaveribus duorum lentis febribus peremptorum, quorum ora diu contacta fuerant aphthis, licet nullum earum vestigium infra fauces deprehendi posset.

Praeter aphthas illas quae in morbis acutis oriuntur, ubi corporis habitus est infirmior, dantur etiam aliae, longas vocaveris, quae os interdum male habent multos non solum menses, sed etiam annos, sine febre, aut alio graviore malo. Huiusmodi aphthae consecutae sunt paralysin faciei, et triennium manserunt. Indiae occidentalis incolae interdum secum reportant hoc vitium in Angliam, ex quibus didici illud in istis insulis aliquando fieri frequentissimum, et non raro desinere in alvum fusam, aut dysenteriam, mortiferam.

C A P. IX.

De Arthritide.

Arthritis incipit a dolore primi articuli pollicis pedis, qui brevi saturrime rubet, et paulo post tumet. Vehementia primi doloris raro perseverat ultra quatuor et viginti horas: at cruciatu nondum

penitus finito, dolor similis vel eandem, vel aliam partem pedis occupat, totidem circiter horas duraturus. Huiusmodi accessiones redeunt vel quotidie, vel post duos, tres, quatuorve dies, modo per mensem unum aut alterum, modo vix dimidium mensem. Quin etiam interdum post longiores inducias, cum tumores in artubus fere subsederint, et vires multum restitutae fuerint, dolores reversi sunt, et pristinas sedes occupaverunt, claudicatione et tumore iterum infesti, deluso interea aegro, qui speraverat morbum fuisse finitum. Fit etiam interdum, ut dolor initio levis, per aliquot dies quotidiana capiat incrementa.

Arthritidis prima accessio raro perseverat plus octo vel decem diebus, et toto hoc tempore vix vagatur extra locum, quem principio tenuerat. Idem quoque plerumque obtinet in secunda et tertia accessione. Postea vero ubique et pedes, et manus, et genua pererrabit, priusquam hominem valere iubeat. Postremo nullus erit corporis locus a vi morbi securus.

Noctu post primum somnum dolor maxime saevit. Numquid igitur arthritidi commune est cum iis malis, quae nervorum propria existimantur; quae fere omnia hoc ipso tempore exasperantur? Verum hoc non est perpetuum; nam in aliquibus dolor interdum, quam noctu, maior est.

Principio arthriticus non raro duorum, aut plurium annorum intermissionibus fruitur. Postquam malum inveteravit, semel quotannis, vel

saepius revertetur. Quo vetustior est arthritis, eo minus doloris secum ferre consuevit; trahit tamen longius, et artus quoque magis, diutiusque debilitat. Ubi semel accesserit, pergit plerumque aegrum revisere per reliquam vitam. Nondum mihi contigit videre quenquam, quem sine dubitatione pronunciare possim podagram expertum esse ante pubertatem.

Quanquam vera podagra fere semper prima sua accessione pollicem pedis occupet, fit tamen aliquando, ut oriatur in calce, vel in superiore parte pedis, vel in malleolo; quod si prima sedes in quovis alio loco fuerit praeterquam in pede, duratio doloris, et reditus eius, et quae consequuntur, adeo diversa erunt ab iis quae arthritidis propria sunt, ut huiusmodi affectus, si dici nequeat rheumatismus, alio novo nomine notari debet, quo ab arthritide pariter ac rheumatismo distinguatur. Hi quidem dolores non solum, tanquam rheumatismus, primo suo adventu universum corpus pervagati sunt, et duos tresve menses permanserunt; sed, quod vix unquam cernitur in rheumatismo, redierunt bis vel ter eodem primo anno, et deinde toties per aliquot annos. Et quanquam multo mitiores sint, quam quos infert arthritis, tumor tamen maior est, et, quod in hoc morbo praecipue notatu dignum est, artus inde magis debilitati fuerunt intra biennium, quam aliorum, qui cum iusta atque gravi podagra viginti annos conflictati sunt. Haud inepte dixeris

hunc affectum naturam obtinere inter rheumatismum et paralyzin mediam. Mihi visi sunt sexagenarii saepius eo laborare quam iuniores; licet non defuerint exempla aegrorum, quorum artus ante annum trigesimum hoc vitio facti sunt pene inutiles*.

Podagra cum ortum suum a parentibus arthriticis, et ab intemperantia saepe ducit, tum quoque ab aliis causis incognitis, a quibus non tuti sunt sobrii et temperati, a sanis maioribus oriundi. Foeminae multo minus opportunae sunt huic morbo, quam viri; neque tamen rarum est, ut foeminae quoque podagra tententur. Memini arthriticorum parentum liberos omnes hoc domesticum malum vitasse, praeter unam e filiabus. Aliam cognovi doloribus arthriticis, nec non ulceribus cretam fundentibus miserrime vexatam, quamvis ipsa ab omni intemperantia longe abhorreret, et nemo propinquorum ex artibus laborasset.

Quem morbus articularis creberrime revisit, eum, praeter alia mala, tumores exigui, duri, non raro fatigant, maxime in digitis manuum et pedum, qui, ut videtur, calculis pleni sunt. Tandem tumoribus inflammatis, et exulceratis, exit humor albus, in quo coëerunt quaedam tanquam creta, et diu trahit. Haec ulcera, et crebrae inflammationes, ad extremum faciunt artus rigere, aut omnem eorum motum tollunt.

* Vide caput 79, de Rheumatismo.

Distentiones leves musculorum in arthriticorum malis saepe numerandae sunt. Inflatio, ardor et acor stomachi, cruditas, fastidium, nausea, vomitus, dolores ventriculi et intestinorum, vertigo, sonus intus in auribus, torpores, iactatio, dolores vagi, macies, languor virium et animorum, sunt ea mala, ex quibus modo haec, modo illa instante podagra accedunt, vel sequuntur decedentem. Omnia fere in vetusta arthritide nascuntur, quorum miser arthriticus posteros suos haeredes fore luget.

Podagra quanquam initio rarius aegros revisat, tempore tamen fit familiarior, et accessiones eius cum crebriores tum longiores esse consueverunt, donec vix ullum spatium datur vel ad oblectandam vitam, vel ad reliqua eius munera et negotia obeunda. Quamdiu aeger in dolore est, aliorum auxilio, tanquam infans, eget: sed multa obstant, quo minus hoc auxilium tam facile, tamque alacriter ministretur. Inter podagrae mala vix debet recenseri, quod omnibus vitae solatiis corruptis, viribusque vel sensim perditis, vel incidente paralyti aut apoplexia subito deletis, immaturam mortem inferat.

Paucos tamen vel pudet, vel piget, tam tetrae valetudinis; quin multi ambiunt hunc morbum, et si forte aegrotaverint, arthritidem subesse libenter existimant, et se consolantur quod aliquando fiant arthritici: quem etiam in finem multa ultro moliuntur: tamen bene evenit ut plerumque excidant votis.

Haud facile dictu est, unde evenerit, ut nonnulli morbi in quibusdam regionibus et saeculis existimati fuerint honesti et expetendi; dum alii turpes et probrosi sunt; licet neque in ipsis morbis insit iusta aliqua honoris aut infamiae causa, neque in modo quo contracti sunt. Epilepsia summum terrorem veteribus Romanis videtur incussisse: herniae quoque adhuc dedecori sunt. Suus quibusdam affectibus honos accessit, eo quod viro cuidam magno contigerint; vel quia praecipue invadunt beatos illos, qui otio et omnibus bonis affluunt. Ludovicus XIV Galliae rex, cum forte fistula ani laboraret, non pauci ex subditis eius sibi persuaserunt se eodem vitio fuisse correptos, et non leve negotium facesserunt chirurgis, qui tum vivebant, ficto suo morbo petentes auxilium. Quod si in Gallia fuisset aqua medicata quae fistulam potuisset inferre, illuc puto haud minus cupide properatum esset, quam Bathoniam nostri petunt, ut reportent podagram. Hic enim est ille morbus, qui nunc apud Britannos in honore est; quem exoptant ii, quibus est incognitus; de quo etiam gloriantur, qui se iam iam ab eo occupatum iri autumant: quem autem serio deplorant, quotquot cum hoc acerbo malo revera conflictantur. Hinc fato singulari evenit, ut hodie plus operae detur ad gignendam, vel excitandam arthritidem, quam ad sanandam, et penitus fugandam. Quippe tantum honoris huic morbo tributum est, ut omnia alia mala quae arthritici experiuntur, praeter do-

lorem, ideo oriri existimentur, non quia nimium podagrae passi fuerint, sed quia nondum satis. Et profecto arthritidis non modo non culpatur ut horum causa malorum, sed exoptatur tanquam in cuius repetitis accessionibus unica spes sanitatis reponitur.

Propter cupiditatem vitae, vel mortis timorem, plerique homines valetudinis suae conquassatae et perditae signa sentire pariter ac fateri nolunt; quae itaque cuius causae tribuuntur, potius quam appropinquanti et inevitabili morti. Hinc, ubi vires coeperint deficere, homines facile se sinunt persuaderi aegrotationem suam latenti podagrae deberi, et nihil deesse ad corporis animique robur restituendum, nisi iustam podagrae accessionem. Verum, ut nihil dicam de levibus rationibus quibus plerumque innititur spes latentis arthritidis, quaerere velim an certo constet, quod fidenter dicitur, morbum articulare, ubi saevit, omnes alios morbos expellere? et ubique licere vel gignere, vel excitare podagram, sine ullo periculo cumulandi priora recentibus malis? Sunt quaedam regiones ubi psora est morbus frequentissimus; atque ibi quoque salutaris esse existimatur. Febris etiam intermittens olim a quamplurimis medicis credebatur esse ministra salutis; et idem etiamnum nonnullis persuasum est. Itaque eius adventum sibi et amicis gratulantur, et, quantum in ipsis est, cavent ne nimis cito se propriat. Has quidem opiniones in Anglia iam fere delevit

delevit dies; et ubi remedium podagrae haud minus praesens inventum sit, quam quae ad modo memoratos morbos adhibentur, cognoscemus tandem, quam tuto et utiliter morbus quoque articularis in perpetuum summoveri possit.

Si quis tamen contendat arthritidem esse conatum corporis, quo humores nescio quos corruptos expellat; ad experientiam provocandum est, quae sola erit idonea huiusce litis iudex et arbitra. Et fateor nonnullos reperiri qui primo podagrae adventu gaudent, tanquam qui omnia fausta secum ferat; qui nihil iam nisi valetudinem integerrimam somniantes, facile credunt hanc primam accessionem mire profuisse; qui mos est hominum, quoties novos medicos, et novas medendi rationes experiuntur. Sed, his missis, illos consulamus, qui diu et saepe ex artubus laborarunt, et intime norunt hunc affectum. Inter plurimos quos vidi, quorumque historias literis mandavi, ut minimum dicam, duplo plures sunt, in quibus podagra aliis morbis supervenit sine minima eorum levatione, vel in quibus nova mala attulit prioribus, quam quibus profuisse visa est: et, meo quidem iudicio, quae mala podagrae imputata fuerunt, multo certius ab ea profluxerunt, quam quae bona. Interdum quidem fieri videmus, ut alii morbi conquiescant podagra superveniente; quod etiam fit accedentibus febribus, paralysi, asthmate, variolis, et insania, quorum omnium non pauca exempla vidi, licet hos morbos dixerit nemo salu-

tares. Contra morbus articularis saepe invasit vertiginosos, asthmaticos, fastidientes, et melancholicos, quos adeo non levavit, ut mala eorum multum exasperaverit. Porro haec omnia in nonnullis aegris simul cum podagra semper accesserunt, et per totum eius spatium perseveraverunt.

Quos arthritis raro occupat, et deinde brevi relinquit, illi leviter, aut vix omnino laeduntur; haud secus ac fit interdum, ut epilepsia, quae raro accedit, haud impediatur quo minus epilepticus senectute tandem, potius quam morbo suo, pereat. Veruntamen in nonnullis valetudo a prima usque podagrae accessione perturbari coepit, et ex illo in peius ruere, donec prorsus conquassata sit, et plane perditam. In quibus, licet dubitare possimus, podagra necne fuerit horum malorum causa; de illo tamen certi sumus, quod non fuerit remedium.

In vetusta arthritide, quod ante memoravi, dolor mitior esse consuevit, quam in recenti; et hinc forsitan creverit opinio, illam valetudinem ab imminuta ac deficiente podagra oriri, quae vel aetati ingravescenti, vel aliis morbis, vel repetitis ipsius podagrae accessionibus tantummodo debetur.

Memini quendam per quindecim annos arthritide quotannis laborasse, et eodem tempore difficultate spirandi semper fuisse tentatum: tandem vero corporis constitutione admodum infirmata, et fractis omnino viribus, per quinquennium,

tamdiu enim languit priusquam moreretur, nec asthma, nec arthritidem expertum esse. Quod si nemo sibi persuasisset, hanc perditam valetudinem ideo supervenisse, quia asthma cessasset venire; cur magis credibile est, eam ad podagram subsistentem referri oportere? Vehementia doloris articularis non modo non prodest sanitati, verum aliqua ex parte videtur efficere, ut in his, citius quam in illis, artuum motus pereat, et alia consequantur incommoda, quae huius affectus propria sunt; unde evenit ut nonnulli post septem annos facti sint infirmiores, quam alii post annos triginta.

Vera podagra post paucas accessiones adeo plerumque infigitur, ut deinde in singulos annos, vel saepius, aegrum revisat. Interdum tamen, postquam quotannis reversa fuerat diutius, scilicet per decem, duodecim, quatuordecim, viginti, aut etiam octo et viginti annos, tandem inducias dedit; atque hae induciae servatae sunt annos tres, vel decem, vel duodecim, vel etiam triginta, sine minima salutis iniuria, quae podagrae conquiescenti iure obiici posset. Huiusmodi exempla declarant, ubi semel, aut saepius, aliquis ex artibus laboraverit, tamen repetitas eiusdem morbi accessiones non esse ad sanitatem necessarias; quandoquidem arthriticus tuto illis caruisse compertus est, etiam ubi morbus adeo penitus insederat, et inveteraverat, ut ex vulgi opinione valetudo et vita sine eius auxilio recte procedere non possent.

Verum, ut maxime utile fuerit latentem podagram excitare, vel crudam et imperfectam, ut aiunt, maturare; medici tamen omnes fateantur necesse est, signa huiusmodi podagrae esse admodum obscura, et vix ulla dari quibus eam vel nosse, vel iure suspicari possimus, nisi accesserint dolor et rubor, et tumor pedis, vel aeger ipse, vel parentes eius antea tentati fuerint hoc affectu. Atamen, quamvis horum nihil est, haud raro contingit, ut principia multorum morborum longorum, et nonnullorum acutorum, ad podagram relata sint. Error autem in hac re, ubi tam pronum est errare, multa secum mala trahit; quorum non minimum est, quod multos induxerit longe nimium bibere vini et potionum meraciorum, sic ut vidi aegros qui biduum triduumve fere ebrii iacuisent, propterea quod, ut ipsis videbatur, opus esset podagra, quam hoc potissimum modo excitare sperabant. Sed licet concesserim ex vita intemperanter acta hunc tristem morbum facile gigni posse; tamen quisquis per dies duos, vel tres, nimio se cibo potuque ingurgitet, ille certe franget opprimetque corporis vires, in procinctu stet podagra, necne; et pauci inficias ibunt perniciosam esse huiusmodi intemperantiam, modo alius subsit morbus, quem aeger falso suspicatur esse articulare. Saepius multo quam vellem, vidi non solum ossa cariosa, scirrhos et carcinomata cerebri, pulmonum, et viscerum abdominis, aliosque morbos longos, verum acutos etiam, in-

flammationes scilicet pulmonum, stomachi, et aliorum viscerum, qui appellati sunt arthritici, cui consequens fuit, ut aromata, vinumque, caeteraque eius generis adhiberentur, donec nullus vel remedio, vel allevamento locus relictus esset. Quam quoque curationem etiam ad veram arthritidem tantum auxilii praestitisse non puto, quantum detrimenti, dolores febremque augendo, ubi hic morbus fuerit falso suspectus.

Multum quidem abest ut podagra sit morbus insolitus; neque tamen ubique obviam fit, quod nonnullis videtur persuasum. Usu doctus rarissimum esse crediderim, ut sub initio, relictis artibus, cerebrum, pulmones, aut ventriculum occupet; quanquam in vetusta arthritide hoc interdum contigerit, at opinione rarius. Ubicunque autem dubii simus, affectus arthriticusne sit, an ex inflammatione, quique poscat refrigerari; ibi praestabit cunctari, donec de natura mali constiterit: quod si periculum praeceps fuerit, et omnis morae impatiens, longe perniciosius erit venam non incidere in morbo ex inflammatione, quam in arthritide sanguinem detrahere. Licet enim id improbetur a Sydenhamo, et quidem plerisque foret inutile, non tamen est semper et ubique periculosum. Novi podagricum, cui in more positum erat singulis morbi accessionibus venam incidere; quod sex et triginta annos facere consueverat. Alius quoque saeviente dolore arthritico ad sanguinis missionem semper confugit, unde dolor

illico delinitus est, et somnus placidus recreansque inductus. Neque, quantum intellexi, aut hunc aut illum poenituit tam abnormis curationis. Pauci autem negabunt, ubi pulmones vehementer laborant, venae incisionem sine summo periculo omitti non posse, quanquam certissime constet malum ad arthritidem pertinere. In morbis longis, qualiscunque detur podagrae suspicio, conveniet neque aquas Bathonienses imperare, neque alia quaevis remedia, quae arthritidem arcessere existimantur, modo eadem periculosa essent, si ab aliis causis aegrotatio proveniat: optime vero aegro consuletur, si nihil aliud moliamur, quam omnia sic ordinare ut naturaliter esse debent, aut, ubi grave aliquid inciderit, id levare.

Haud mihi in animo est expendere facultates aquarum Bathoniensium, et medicamentorum calefacientium, qualia ex aromatibus et vino petuntur, ad excitandam podagram, sicubi hoc esset expetendum. Post brevem usum, fama, nisi fallor, minores deprehenduntur. Leves illi vagique dolores, qui sumtis remediis antarthriticis sentiuntur, et vocantur podagrae rudimenta, nunquam fortasse non sentirentur in aetate inclinata, si quis attentè animum ad eos adverteret.

Usum longissimum, et maximam animi intentionem in indagandis morborum naturis, et remediis eorum, per se frustra esse, nisi fors etiam aliqua accesserit, cum ex aliis morbis intelligimus, tum maxime ex arthritide. Quanquam enim

hic morbus prior extiterit quam antiquissimorum medicorum scripta, et nulli genti nec saeculo pepercerit; quanquam etiam, ut Sydenhamo videtur, praecipue occupet viros mentis acumine et ingenii viribus praestantes, qui, ut vellent, sic etiam possent qualescunque notitias a consilio vel forte profectas arripere; nulla tamen adhuc obscurior quaestio est, quam quae versatur de huius morbi causis, effectibusque, et remediis. Veruntamen, cum omnibus iam persuasum est, arthritidem sine summo periculo fugari non posse, aequum est ut hic morbus medicis haud amplius obiiciatur tanquam artis suae opprobrium, donec aegri metus suos, nescio quos, deponant, et velint sanari. Utinam tam in promptu esset invenire, quam tutum adhibere podagrae remedium.

In arthritide, non solum artus, verum etiam cerebrum, ventriculus, et intestina, saepe laborant. Fonticuli videntur impedire quo minus cerebrum laedatur. Ventriculo praesidio sunt amara, et quae alvum leniter movent. Atque horum utilitatem remediorum usus mihi confirmavit.

Vinum meracum, multumque, arthriticis valde convenire existimatum est. Quam opinionem crediderim percrebuisse, non tam quia persuasum sit id ita esse, quam quia verum esse optaverint qui vinum amant. Verum isti velim meminerint usum vini largiorem seorsim laedere ventriculum, et concoctionem impedire; tum quoque eos potis-

simum gignere atque alere morbum articulare, qui vino dediti sunt; dum pauperioribus, quibus aqua est fere unicus potus, cupiditas cibi maior est, et concoctio digestioque facilior, et arthritis fere incognita. Mihi sane contigit paucissimas videre absolutas et perfectas huius morbi sanationes: unus autem et alter, qui animali cibo vinoque ex toto abstinerant, restituti fuerunt ex summa debilitate et miseria in valetudinem adeo firmam, ut vita non amplius esset vel aliis inutilis, vel sibi ipsis iniucunda. Attamen rara nimis sunt haec exempla, quam ut confidam, vel etiam multum sperem fore, ut aliis liceat esse aequae felicitibus.

Ambigitur invadentine podagrae, quasi victus, manus dare aeger debeat, otio et vestibis mollissimis eam excipiens; an summis viribus contendat artus affectos movere, hostemque, si qui fieri possit, excutere. Quo magis indulgetur, eo diutius podagra manet; quod aegris saepe quidem in votis est; quod etiam medicamentis cupiunt efficere. Nempe in ea sunt opinione, materiam arthriticam in quibusdam corporibus gigni, et indies coacervari; cui nisi debito tempore facilis et liber exitus sit, valetudo omnigenis malis erit opportuna. Alii contra, ducti non tam ratione, quam impatientia doloris, nihil non moliti sunt, ut arthritidem incipientem reprimerent, et in ipsis quasi incunabulis extinguerent. Magnus ille Harveyus, circumeuntis sanguinis repertor, ut a propinquis eius accepi, protinus ut podagram adve-

nientem sentiebat, crura affectum in frigidam immittere solitus est, et eo pacto dolorem avertere. Alios itidem novi, qui podagram incipientem tepore et otio fovere valde recusarunt, ac potius maxima contentione animi, et virium, artum affectum movere, et exercitare, non cessarunt, donec sensim recederet dolor, et potestas movendi reverteretur; id quod tandem consecuti sunt. Neque, quantum scio, haec morbi propulsatio, vi et armis facta, ullis postea gravioribus malis pensata est. Quantum autem fieri potest ad excutiendam podagram, si quis omnes nervos in eo contendat, declarant historiae arthriticorum non dubiae, qui membris omnibus capti, cum movere se prorsus non posse viderentur, metu subito incendii, aut hostium, percussi, illico obliti sunt podagrae, et satis agiliter se in fugam coniecerunt.

Nollem laudare Harveii exemplum, et aliis ad imitandum proponere; quamvis ad octogesimum annum vixerit, et non tam morbo, quam senectute extinctus sit. Tamen non comperi illos aegrotos male sibi consuluisse, qui artum exercitando impedierunt quo minus arthritis ibi sedem suam figeret. Siquidem accessio podagrae revera sit corporis quaedam exoneratio, per quam materia morborum iam summe accumulata foras proiciatur; qui fit, ut medicamentum purgans mox a decessione eius sumtum, toties fecerit morbum recrudescere, et parivehementia, ac ante, saevire? Quod ut ita sit, usu cognitum est non mihi solum,

sed et aliis medicis, quorum autoritas et est, et esse debet, summa. Idem quoque interdum evenit, ubi membrum ab arthritide iam convalescens, ictu aliquo, aut distortionem, aut etiam culicis punctione, laesum fuerit. Quae res certe faciunt, ut aegre intelligi possit doctrina de arthriticae materiae cumulo, cui huius morbi accessiones tribuantur.

Plerique ex illis, qui fovent podagram, caventque ne quid eam maturius summoveat, saepe vestiunt artus ingenti pannorum laneorum apparatu, etiam sub coeli temperie calidissima, donec qui antea fuerunt debiles, iam fiunt prorsus immobiles. Haec multiplicia involucra semper sunt molesta, et, ut mihi quidem videtur, supervacua. Fateor partem quamlibet corporis, ubi dolet tumetque, sensu acutiore esse praeditam, et frigoris minus patientem: verum nulla ideo integumenta requiruntur, praeterquam quae sufficiant arcendo frigori, si quid offensum sit.

Late celebrantur facultates aquarum Bathonicarum ad mala arthritica moderanda. Quae tamen vulgo perhibentur, satis inconstanter dici videntur, et vires contra podagram his aquis tribui efficaciores, quam aut usus, aut ratio confirmat. Fontes Bathonicae sine dubio prosunt adversus multa ventriculi mala, et proinde utiles esse possunt arthriticis, quoties vexantur, ut saepe fit, dolore stomachi, acore, aut cruditate. De aliis horum fontium viribus ad excitandam, et moderandam,

et sanandam podagram, perdifficilis est, et per-
 obscura quaestio. Nondum compertum habeo has
 aquas extrinsecus admotas, vel saeviente morbo,
 vel conquiescente, fuisse auxilio. Quin artuum
 debilitatem balneo Bathonico auctam esse vidi; et
 multo praesentius fuisse remedium in mare de-
 scendere: quod multa me exempla docuerunt.

Ubi morbus ex articulis in ventriculum tra-
 iectus fuisse iudicatur, ibi consuetum est aegrotis,
 si non ipsis medicis, dolorem nauseamque, et vo-
 mitum levandi spem omnem in vino ponere et
 potionibus meracioribus. Sed in hoc ancipiti
 malo, opium, et aromata, meo iudicio, non
 solum minus detrimenti secum trahunt, verum
 etiam sunt auxilia multo potentiora. Opium etiam
 tuto datur omnibus arthriticis, quoties vigilia,
 aut dolor urgeat.

Pulvis Portlandicus * unum est ex multis,
 quae vocantur, remediis specificis, quorum ortum,
 et splendorem, et occasum vidi. Fama eius nimis
 rapide crevit, et in altius evecta est, quam ut lo-
 cum suum tueri posset. At nunc, censeo, aura
 popularis depressit eum haud minus immerito,
 quam antea extulerat. Antequam cortex Perua-
 nus inventus est, homines, longo usu docti, istis
 medicamentis coeperant confidere, quorum vires
 ad sanandas febres intermittentes proxime ad illum

* Pulvis Portlandicus habet radicis aristolochiae rotundae,
 radicis gentianae, summitatum et foliorum chamaedryos,
 chamaepityos, centaurei minoris, singulorum par pondus.

corticem accedunt, aut in quibusdam etiam superant. Atque in aliis quoque morbis incerta quaedam fama de vera medendi ratione antecessit, quae non nisi longo post tempore ab omnibus demum recepta est, et firme stabilita. Neque exigua est commendatio alicuius medicamenti, aut parvam eius expectationem movere debet, quod de eo bene sperare variae gentes, et plurima saecula, consenserint. Ad hunc fere modum pulvis Portlandicus ad famam pervenit. Nam medicamenta simplicia, quae habet is pulvis, antarthriticorum remediorum nomen adepta sunt a variis scriptoribus tam veteribus quam hodiernis *. Cum vero arthritidis maxime nocet stomacho, ut nec appetat aeger, neque concoquat cibos sicut assuevit; veri non dissimile est, morbum hunc adeo coerceri ac reprimi posse ab iis rebus quae vim addant ventriculo, ut si ipsa salus non sit reditura, saltem multum allevamenti inde iure sperari possit.

Pulvis Portlandicus infamis factus et magna ex parte ob grandem eius molem, quam cum pauci devorare possent, tamen fautores eius omnibus devorandam imperabant; tum quia non morbo, sed remedio eius, imputata sunt omnia illa mala quae propria sunt arthritidis, et praecipue paralyses et apoplexiae; quae quidem mihi non dubium est quin ad arthritidem revera pertineant, quoniam in non paucis secutae sunt longas et vehementes

* Vide Medical Observations and Enquiries by a Society of London Physicians. Vol. I. art. 14.

podagrae accessiones. Eae certae sunt huius pulveris potestates, ut operae pretium fuerit, quae in illo parva sunt, corrigere et emendare. Etenim dum fama eius vigeret, in tot aegris, qui eo usi sunt, podagra vel mitior facta est, vel rarius repetiit, ut vix possit dubitari hos effectus isti medicamento esse tribuendos. Quod autem ulla mala ex illo orta sint, praeter fastidium, quod modus nimius attulit, mihi quidem nec certum unquam visum est, nec veri simile. Pulvis autem ille tandem neglectum et infamiam subiit, non tam quia nihil fecit, quam quia nimium. Homines enim magis metuunt a sanando morbo articulari, quam ab eo tolerando; et lubenter se tradunt huic tyranno excrucianos, ne forte saevior in eius locum sufficiatur.

Quod si constiterit pulverem Portlandicum vim habere aliquam mitigandi aut differendi podagrae accessiones, propterea quod stomacho et concoctioni amicus est; illi compositioni utiliter subtrahi possint simplex unum et alterum, quae credibile est huic fini haud multum inservire. Tum vero idem omnibus modus nequaquam est adhibendus; at diligenter videndum ne ventriculus offendatur. Scilicet absurdum est velle vim addere stomacho per medicamentum, quod vel mole sua nimia, vel sapore iniucundo nauseam et fastidium movere non desinit: id quod saepe evenit ex imperito pulveris Portlandici usu.

Inter medicamenta simplicia, quae languenti

ventriculo opitulantur, sunt chamaedrys, chamaepitys, absinthium, carduus benedictus, trifolium paludosum, marrubium album, centaurium minus, flores chamaemeli, cortex aurantium Hispanensium, cortex Peruanus, et radices colombae, gentianaeque. Quae omnia in pulverem trita fortasse valentiora erunt, quam aqua in qua decocta sint. Pauci vero invenientur adeo fastidiosi, ut eorum aliqua, in tanta medicamentorum varietate, non fuerint tolerabilia, et stomacho satis iucunda. Quod tamen non nisi experiendo discere poterimus. At ne forte unum aliquod privatim sit nauseosum, optabilius erit pulverem ex tribus aut pluribus componere; quo pacto fiet ut rite iuvetur ventriculus, et licet ex his aliquid minus arrideat, tamen tantula erit eius mensura, ut aegroto nullum praestet detrimentum.

Necessarium erit, ut arthriticus pergat sumere huiusmodi medicamentum multos menses, aut etiam aliquot annos. Atque hac etiam de causa diligenter providendum est, ut et modus eius, et sapor, omni offensa careant. Interea aegrotum moneri oportet, ut tantumumat, quantum ferre sine nausea potest. Minimus modus bis quotidie sumendus, erit quindecim granorum; pauci plus quam scrupulos duos devorare valent. Pulverihuius amaro aromatis cuiusvis iucundi grana tria quatuorve utiliter adiiciuntur; unde medicamentum fiet non modo minus nauseosum, sed et valentius. Praeterea aromate identidem mutato

novus conciliabitur sapor, fastidiumque praecavebitur, et aeger diutius perseverare poterit.

Priusquam huic capiti finem imponam, haud supervacuum erit dicere, quibus praecipue notis arthritidis a rheumatismo discernitur.

Prima accessio arthritidis raro fit longior viginti diebus: tum morbus primo articulo pollicis pedis insidet, vel saltem ultra pedem non transit. Non est perpetuum ut febris, vel languor, vel quaevis aegrotatio antecedit; quanquam hoc interdum fiat.

Locus podagra occupatus saturate rubet, et adeo impense dolet, ut levissimo pondere premi non sustineat.

Arthritidis raro quemquam corripit, quem non intra paucos annos revisit: mox reditus fiunt crebriores, et accessiones longiores; tum quoque priores terminos excedit, et nullam non corporis partem invadit; et quam invaserit debilitat, aut ulceribus foedat, vel repetitis inflammationibus reddit duram et immobilem.

Dolores arthritici, relictis artubus, interdum in ventriculum, pulmones, cor, aut cerebrum vertuntur.

Hi dolores vel nunquam, vel rarissime vexant quemquam ante pubertatem.

Postremo, qui ex artubus multum laborarunt, posteris suis miseram hanc haereditatem plerumque transmittunt.

Haec mihi videntur signa esse, quae veram

arthritidem indicant; quorum ne unum proprium est acuti rheumatismi. Nam neque is pedes potius quam alias partes invadit; neque diu in eodem loco manet; verum prima sua accessione universum corpus saepe pererrat, et interdum menses aliquot perseverat.

Locus rheumatismo occupatus haud multum dolet, nisi moveatur. Dum quiescit, non tam angitur et torquetur, quam lassitudinis sensu molesto vexatur.

Cutis color si forte mutetur, leviter modo erubescit, non vehementer coloratur.

Saepissime fit, ut quos rheumatismus gravissime cruciavit, quanquam diu postea vivant, in eum nunquam iterum incidant. Ubi autem revertitur, reditus sunt inordinati, nullis certis temporibus astricti.

Rheumatismi acuti dolores rarissime relinquunt musculos, et in viscera transeunt.

Denique hic morbus nequaquam parcat impuberibus, qui eo interdum graviter laborant; nescio an illi praesertim, qui haereditario iure futuri sunt arthritici.

Hae profecto, meo iudicio, praecipuae notae sunt, quibus hi duo morbi discernuntur: sint licet aegroti, in quibus signa arthritidis et rheumatismi adeo commiscentur, et confunduntur, ut haud dictu proclive est ad utrum dolores sint referendi.

Hos morbos, cognatos sane, quanquam facies

cies non utrique una, vel multum, vel parum nostra intererit accurate definire, prout ratio eos curandi similis, vel diversa esse censebitur. Ple-rique autores olim consenserunt remedia arthritidis esse prorsus contraria iis quae prosunt adversus rheumatismum. Etenim contendunt calidissima quaeque illi convenire; ab hoc omnigena refrigerantia postulari. Sydenhamus sanguinem mittere prohibet in arthritide; quem idem in rheumatismo quater, aut saepius, copiose detrahendum praecepit. Attamen in iis quae postea scripsit *, videtur aliquid remittere voluisse de tantis sanguinis missionibus, quae in uno aegroto non bene cessisse compererat.

Usus centum annorum (tot enim sunt a Sydenhami aetate ad hanc nostram) fecit tandem medicos minus confidere purgantibus vehementioribus, et repetitis sanguinis missionibus contra rheumatismum. Et veniet forsitan dies, cum remedia refrigerantia iudicabuntur non tam pernicio-
ciosa esse in arthritide, neque in rheumatismo tam utilia, quam vulgo feruntur; et proinde morbi utriusque curationes ad se invicem propius accedant. Pulvis Portlandicus prae se fert aequae ad-
versus utrumque prodesse; neque negaverim huiusmodi medicamenta, simul cum opio adhibito sic ut opus fuerit, fieri posse praesentissima ant-
arthritica pariter et antirheumatica remedia.

* Sub finem Epist. Respons. primae.



CAP. X.

De Ascaridibus.

Ex quibusdam signis coniecturam aliquam facere, nunquam autem certi esse possumus de lumbricis ventrem occupantibus, nisi in stercoreibus fuerint conspecti. Oportet vero cavere, ne decipiamur specie mucii tenacis, quem nonnulli putant esse ipsos vermes, vel saltem eorum vaginam quandam et involucrum, etsi nunquam constiterit eos huiusmodi vagina donari. Lumbrici teretes deiecti fuerunt a nonnullis, qui non meminerunt se levissimum incommodum ex illis unquam percepisse. Alii contra diu questi sunt multa mala, quae propria lumbricorum existimantur, et tamen nullos excreverunt.

Ascaridibus fere semper accedit prurigo ani, quae vespere praecipue molesta est. Atque hoc est certissimum huius pestis signum. Prurigo autem provocat fricationem, unde tubercula saepe oriuntur circa anum, multum diversa ab haemorrhoidibus, seu venis turgentibus. Nausea, tormina, defectiones animae, cruditas, vertigo, dolores capitis et ventriculi, cupiditas cibi vel naturali maior, vel nulla, prurigo narium, somnus perturbatus, dentium stridor, tussis, et spiritus odor foedus, nonnunquam ex lumbricis nascuntur. Cum tamen usu constat, nulla ex his signis necessaria et certa esse, dubium erit, etiamsi omnia in eodem aegro reperiantur, fors an morbi natura hunc concursum effecerit. Ascarides non

solum cum stercore expelluntur, sed etiam sponte sua exeunt, idque per nares, uti ab aegrotis accepi. Interdum perseverarunt triginta annos sine magno valetudinis detrimento.

Purgantia lenia saepe repetita minuunt huius morbi incommoda; quem tamen prorsus depellere nulla, quantum scio, medicamenta valent. Fumus tabaci, aut aqua in qua liquatus est hydrargyrus muriatus in alvum infusa, parum vel nihil profecerunt.

CAP. XI.

De Asthmate.

Prima accessio asthmatis nulla non aetate contigit. Senectuti quidem praecipue infestum est; tamen adultos, adolescentes, et infantes interdum occupat. Pleuritides, peripneumoniae, et crebrae destillationes, non raro desinunt in hunc morbum. Prava pectoris conformatio, et tussis hieme quotannis recurrens, et in singulos annos vehementior facta, difficultatem spirandi insanabilem pariunt. In quibusdam repente incidit hoc malum sine ulla manifesta causa. Interdum quoque inter accessiones graves et periculosas longa spatia sunt omni spirandi difficultate libera. Interdum septimo quoque die spiritus difficilis factus est; interdum semel in mense; vel quater in anno; vel vere et autumnno quotannis; tum saepissime omni hieme; vel etiam altero quoque anno; et memini unum aegrotum, qui ex in-

tervallis septem annorum, sexies laboraverat hoc morbo. Plerumque tamen inordinate, et incertis prorsus temporibus revertitur. Paucos novi, qui postquam eo conflictati fuerant aliquot annos, dein per triginta annos nullum reditum experti sunt. Rarissimae quidem sunt hae longae intermissiones: nam plerumque quotannis redit, et singulis accessionibus vires acquirit. Quidam asthmaticus, ex longis atque incertis intervallis, cum morbo suo unum tantummodo diem luctabatur, et singulis huius diei horis iam iam strangulandus videbatur; qui tamen inter accessiones belle valebat. Interdum spiritus aegre trahitur in quibusdam locis, non autem in aliis, sint licet vicini, et omnino consimiles. Alii superfuerunt quinquaginta annos; alios paucis mensibus morbus interfecit. Quibusdam contigit esse tam felicibus, ut vel corporis, vel medicinae beneficio, asthma ex toto victum sit. Semel, postquam summum periculum intentaverat, valetudo adeo confirmata est, ut vir biennio post consuetis negotiis occupari facile sustinuerit. In alio idem morbus post quatuor annos substitit, et prorsus finitus est. Puer crebris et vehementibus accessionibus tantum non succubuit, et tamen ad senectutem pervenit, morbo interea multum mitigato, et per quatuor annos fere conquiescente. Non est perpetuum, verum saepissime fit, ut tussis quoque accedat, et aegri molestiam haud parum adaugeat. Arthritis et asthma coëerunt in uno ho-

mine, quem in annos quindecim quotannis affligebant; perdita deinde valetudine, integro quinquennio, scilicet quoad vixit, nec asthma, nec arthritis redierat. Astmatici fere experiuntur morbi accessionem mane, cum primum expergiscantur. Alyus asctrieta nocet; fusa tamen longe magis est formidanda, quoniam inhibet usum remediorum maxime efficacium, quae fere omnia ventrem emolliunt; ad hoc, indicium est habitus corporis vitiati, morboque succumbentis, tum praecipue si venae simul concitentur.

Accessiones modo exiguam horae partem, modo multas horas manent. Difficultas spirandi gravis plures etiam menses permansit, quae deinde sponte sua mitior facta est, et post quatuor annos pene finita. Quod cum aliis quoque contigisse possit, nos facit incertiores, quantum corporis ipsius viribus, quantum medicamentis sit tribuendum. Interdum asthma ordinate rediit, tanquam febris intermittens, et cortici Peruviano cessit.

Motus hunc affectum augere consuevit, qui interdum prorsus conquiescit, nisi tum, cum aegroti moveantur, aut ex alto somno expergiscantur.

Cubantibus spiritus saepe laborat, et vix elucatur per horam, aut plus eo, antequam pulmones officium suum rite facere queant. Quibusdam etiam surgere, et lecto residere necessarium est, quo situ levatur malum, maxime si corpus paulum flectatur: neque tamen hoc adeo perpetuum

est, ut non aliquando viderim asthmaticos qui resupinato corpore tolerabilius se habuerint.

Spiritus nonnullis difficilius ducitur ruri, quam in urbibus frequentibus; multo plures impatientes sunt urbium, et facilius spirant ruri. Aër frigidior plerisque solatio esse consuevit; novi tamen asthmaticum unum et alterum, quos iuabat accedere ad ignem luculentum, quoties morbus urgeret. Quaevis mutatio coeli quibusdam auxilio est. Semel atque iterum asthma fuit tolerabilius in Anglia, quam in regione tepidiore; quod plerumque contra fieri videmus. Hiems quoque, quae plerisque inimica est, nonnullis tolerabilior fuit, quam aestas. Navigatio longa plurimum mensium hunc morbum non solvit. Venter cibo repletus saepius obfuit, interdum tamen iuvat. Oborto pituitae cursu assiduo, aut tumore in artubus inferioribus repente facto, quidam ab instante morte erepti sunt. Destillationes copiosae, et in senioribus sputa cruenta, inflammatio cruris desinens in exulcerationem, paralysis superveniens, dolores ventriculi et artuum cutis vitia, et accessio podagrae, spiritui difficili praesidio fuisse visa sunt. Verum, ut nihil est perpetuum in hoc morbo, podagra, quae in aliis vim morbi levavit, in aliis illum induxit, vel certe non impedit, quo minus asthma continuo exciperet podagram. Fonticuli interdum profuerunt; saepe fuerunt supervacui. Saepe vomitus spiritum laborantem expedit. Purgantia vix tentanda sunt,

utpote rarissime adiuvantia. Haud paucis opitulata est seminis sinapeos semuncia singulis auroris, sumta. Argentum quoque vivum, et cinnabaris, famam aliquam adepta sunt; merito necne, non habeo dicere; at inunctio certe mercurialis non raro arcessivit hanc pestem. Potiones meraciores, quaeque fiunt ex baccis coffaeae, fumus tabaci, allium, scillae radix, et gummi foetida, vehementiam morbi deliniunt; exiguus etiam sanguis interdum detrahitur, ubi maiorem in modum furit, et strangulationem intentat; ubique alias sanguinis missio nocet, cum vires inutiliter minuat, properetque hydropem, in quem asthma consuevit desinere. Interdum opium est praesentissimum huius morbi remedium, ubi omnia alia aegrotum frustrata sunt. Vidi asthmaticos animam fere agentes, qui usu docti sibi ipsis medebantur, sumtis, secundo exitu, duobus vel etiam tribus opii granis, qualem equidem modum dare non ausus essem. Asthma divisum est in convulsivum et pituitosum; et opium dicitur huic nocere, at illi convenire.

In phthisi, ubi pulmones exulcerati sunt, et maximam partem absumti, spiritus quidem fit creber, et in movendo aegre ducitur; sed phthiisici easdem strangulationis minas, ac asthmatici, nequaquam experiuntur: licet pulmones eorum, qui asthma teperierunt, interdum nullo vitio occupati sunt. Porro si animadvertamus longa spatia, quibus morbus omnino conquiescit; tum naturam

plerorumque eius remediorum; quodque somno, moerore, ira, metu, gaudio, risuque arcessatur; verisimillimum videbitur, quamvis aliae fieri possint huius mali causae, saepe tamen id oriri ex quadam perturbatione officiorum quae nervorum propria existimantur.

Quaedam mulier implicita erat asthmate indies ingravescente octo menses; sedebat corpore paulum inclinato; pulsus erat inordinatissimus; tumbant crura, sinistrum autem magis quam dextrum, et vulnuscule inflicto multum aquae effluebat. Ad haec, paulo ante mortem saliva mali odoris os implebat. Cadavere inciso, nulla aqua aut in abdomine, aut in pectore reperta est; pulmones integri erant, neque cum pleura omnino connexi: tantummodo cordis auriculae et ventriculi pustulis quibusdam asperae erant, et valvulae inter auriculam et ventriculum sinistri lateris extenuatae, et induratae in tubercula informia. Quidam quoque asthmate vehementer laboraverat, cuius pulmo erat integerrimus, cor etiam sanum, neque erat ullum vitium diaphragmatis, nec in pectore aqua, aut pus, aut aliquid alieni, praeter quasdam exostoses vertebrarum thoracis. Alio cadavere inciso, pulmones inflati manebant, atque extrinsecus contegebantur bullulis aëre plenis, aliquantulum eminentibus, et tenuissima membrana inclusis, quarum una aperta aliae non collabebantur; nullum aliud vitium in pectore deprehensum est.

De Aurium Morbis.

Frequens puerorum vitium est, interdum quoque adultorum, in quo humor mali odoris post aures exit, unde tument auriculae et loca vicina, et cuticula in furfures decedit. Quod si humor acrior fuerit, cutis altius exulceratur. Auris etiam intus malo simili interdum afficitur, ex quo aeger fit surdaster. Medicamenta exsiccantia extrinsecus imposita nocent, vertendo humorem in partes interiores. Nulla alia curatione opus est, nisi ut loca affecta saepe abluantur aqua tepida, et ut pannus unguento aliquo leni delibutus interponatur, ne partes exulceratae vel sibi invicem agglutinentur, vel haereant vestibus.

Interdum aures intra se ipsae sonare perseverarunt multos annos, adeo ut neque attentius cogitare liceret interdiu, neque noctu tranquille dormire; tamen sine surditate, aut alio quovis malo. Interdum vero tinnitus aurium a graviore causa oritur, et secum trahit mentis perturbationem, surditatem, caecitatem, defectionem animae, vertiginem, oblivionem, levem mentis alienationem, epilepsiam, paralysin, aut apoplexiam. Gummi foetida, opium, et emplastra quae erodunt sub ipsis auribus imposita, radix valerianae sylvestris, pulveres sternutamenta moventes, hunc affectum interdum levant, non semper vincunt.

Capite, vel aure, vehementius icto, bis terve accidisse novi, ut aqua multa ex aure flueret, modo

pallida, modo cruenta, praecipue si caput inclinaretur. Unus ex his aegris retulit mihi, haud minus quam libram huius aquae, quantum coniectare posset, ex aure quotidie effluxisse.

Polypus non solum in naribus, sed interdum etiam in auribus nascitur.

Surditati, quae cerae aurium induratae debetur, medebitur aqua ex floribus chamaemeli in aurem infusa; quod si surditas oriatur ex resolutione nervorum per quos facultas audiendi est, emplastra cantharidis imponenda sunt post aures, et singulis noctibus instillandae sunt guttae quatuor misturae camphoratae, in cuius unciis duabus soluta est magnesia vitriolatae semuncia. Sternutamentum quoque movendum est per granum unum foliorum asari exsiccatorum et in pulverem tritorum, naribus quotidie haustum. Fatendum tamen est, haec, et caetera omnia auxilia, nimis saepe parum, vel nihil iuvare. Quod si surditas non fuerit plerumque morbus insanabilis, propria eius remedia numeranda sunt in iis quae adhuc desiderantur in arte medica.

CAP. XIII.

De Aqua Bathonica.

Nullus ex Hippocratis aphorismis iustior est, quam in quo deplorat tantum temporis requiri ad stabiliendam veritatem in medicina, et tantum impendere erroris periculum etiam cum videmur ipsam experientiam ducem sequi. Quod nusquam

magis cernitur, quam in quaestione de viribus aquarum Bathonicarum. Etenim cum earum facultates medici sagacissimi in tot aegris experti sunt; tamen alii affirmant earum usum paralyticis certam salutem, alii certam necem afferre. Sententiae tam contrariae faciunt aegros pendere anxios et incertos, et non leve dedecus medicis incurrunt. Tamen quibusdam unânimi omnium medicorum consensu istae aquae auxilio sunt. Altis quidem prosint necne, dubium est; at nemo dubitat, quin tutae sint. Aliis omnes earum usum interdiciunt. Quid autem aegrotis illis faciendum est, quibus hi Bathoniam utilem, illi perniciosam fore contendunt? Profecto, ut mihi videtur, ubi medici prudentes in tam diversas sententias eunt, ibi censendum est hos fontes esse exiguarum vel nullarum virium. Quippe verisimile est huiusmodi aegrotos, dum illos biberent, vel corporis, vel aliorum remediorum beneficio fuisse restitutos; vel morbo suo succubuisse sine harum aquarum crimine. Taceo chemicorum analyses, ut parum idoneas ad vires quorumcunque medicamentorum explorandas; quae vix aliunde petendae sunt, quam ab ipsis aegrotis, quibus fuerint adhibita.

Usus horum fontium vel extrinsecus, vel intus est. Tum quoque vel totum corpus immergitur, vel in exiguam eius partem aqua impellitur; quo pacto contractionibus musculorum, et aliis distentionibus succurritur. Adversus levia cutis

vitia balneum aliquid prodest, vix remedii nomen meretur. Nondum mihi constitit debilitatem, quae rheumatismum, arthritidem, aut paralytin sequitur, ocyus finiri per balneum Bathonicum quam sine illo. Nonnulli mihi visi sunt infirmiores esse facti lavatione tepida; quibus frigida longe fuit utilior. Quicquid est, nihil interesse puto aqua Bathonica, an quaevis alia pariter tepida corpori extrinsecus admoveatur.

Aqua Bathonica potata certissime medetur nauseae matutinae et vomitui, fa tidio, doloribus ventriculi, atque aliis ebriosorum malis, nisi haec eo usque creverint, ut vel hepar factum fuerit scirrhosum, vel hydrops immineat; tunc enim adeo non proficit, ut res aegri faciat deteriores, mortemque properet. Adversus alia quoque ventriculi et viscerum mala saepissime profuit, sic ut operae pretium fuerit omnibus ad eam confugere, quotquot laborant cruditate, diarrhoea longa, singultu, inflatione, vomitu, et qualibuscunque distentionibus, vel doloribus, vel debilitate horum viscerum, modo pulsus sit naturalis. Etenim ubi nulla fuerint febris hecticae signa, locus mihi datus est nunquam suspicandi Bathoniam his aegris nocuisse; quanquam eorum votis non semper responderit. Tamen haud facile est intellectu, quam ob causam exitus prosper quibusdam defuerit.

Multi periti et sagaces medici intus uti praecipiant aqua Bathonica contra vagos dolores, rheumatismos, et icterum simplicem, ubi hepar est

integrum. Verum, ut propriam consulam experientiam, Bathonia in his morbis tuta quidem est, at supervacua. Plus laudis obtinuit in colica Pictaviensi; et tamen difficile est dictu, quo demum huius morbi statu Bathonia sit adeunda. Nam initio, dum intestina torminibus dilacerantur, longe valentiora remedia necessaria sunt, ad dolorem compescendum, et periculum summovendum. Finito autem impetu, si artus non resolvantur, aeger iam valet, et medicina omnino non eget, modo in posterum aditus plumbi in ventriculum possit intercludi.

Prorsus enim assentior sententiae viri summi (Georgii Baker, qui invictis rationibus stabilivit plumbum esse unicam eius morbi causam; quamquam haud ubique liceat investigare, qua via intus receptum sit. Post gravissimas colicae accessiones, e quibus aeger tandem assurrexit, modo causa manifesta sit, et potuerit vitari, corpus ad integram sanitatem venisse vidi, et multos annos permansisse nullis obnoxium torminibus; sic ut par fuit credere nulla morbi semina superfuisse. Quia etiam ubi morbus longus fuerat, artusque resoluti, eorum debilitas paulatim imminuta est, et dolores non reversi sunt, postquam aeger vinum Ulyssiponense potare desiisset, cuius libram quotidie potam colicos dolores intulisse conieceram. Quod si introitus huius veneni in corpus detegi et praecaveri non possit, tum neque Bathonia, nec quaevis alia remedia impedient quo minus redeant

tormina, et aeger lenta morte pereat. Cum vero tantum in ventriculum demissum est, ut accessiones colicae faciat repetitas, et tandem artus resolvat; si quis tunc putet aquam Bathonicam morbum posse extinguere, et vires amissas restituere, his equidem coniecturis nihil habeo quod vellem opponere, et nemini sane aquam Bathonicam interdicerem: procul dubio enim tuta est, neque aliud cognovi remedium, quae huius morbi semina, si quae restent, efficacius extinguat. Praeterea in omnibus morbis longis, aquae istae, modo tuta sint, et aeger non gravetur ire Bathoniam, multa secum commoda ferent. Scilicet mutatio coeli, et intermissa vitae consuetudo minus salutaris, depositaeque curae et negotia, ut fit Bathoniae, multum conferent ad valetudinem a morbis confirmandam.

In scirrhis et exulcerationibus pulmonum, aut ventris, aquae Bathonicae sunt perniciosissimae. Nam intendunt calorem febrilem, qui his malis fere semper accedit, atque omnem spem salutis funditus tollunt. Quapropter huiusmodi aegroti iterum iterumque monendi sunt Bathoniam fugere longe, nisi se velint, in summo semper periculo versatos, reddi deploratos, ac prope depositos.

In affectibus qui vocantur hypochondriaci et hysterici, aegri sive extrinsecus, seu intus utantur his fontibus, plerumque ex iis peius habent. Nullos memini adiutos fuisse, nisi eos, qui vexati

fuerant doloribus ventris, inflatione, aut acore, quod genus malorum illis interdum morbis accedit. Neque sane vita, qualis Bathoniae agitur, negotiis omnibus soluta, convenit aegrotationi, quae ex otio nimio, saepius quam ex nimis occupationibus, consuevit oriri. Fit tamen interdum, ut negotiosi quoque affectu hypochondriaco exercentur. Vexationes enim in rebus agendis natae, animum interdum adeo implicant et irretiunt, ut sese expedire non possit, nisi in quodam tranquillo recessu, qualis est Bathonia; ubi vacuitas molestiae et curarum aegris medetur, quamvis aqua ferat honorem. Idem contigit in languore illo, et virium defectione, quae morbos longos sequuntur; quibus spatium et quies unice medentur.

C A P. XIV.

De Aqua Bristolica.

Aqua Bristolica nomen obtinuit eximiae puritatis, et habetur in numero celebriorum remediorum ad phthisin, et ad alios morbos. Sed nemo, proppinor, qui non hospes sit in chemicorum scholis, defendet puritatem huius aquae; et nescio an multo potiore iure vindicabit sibi famam medendi phthisi, vel alii morbo cuicunque.

C A P. XV.

De Bronchocele.

Tumor glandulae thyroïdae frequens est in quibusdam Britanniae partibus; et aliquando oc-

cupat eos qui alia quoque loca habitant. Foeminae, maxime iuniores, huic morbo praecipue sunt opportunae. Eiusdem generis esse videtur, ac tumidum guttur in Alpibus; quod quamvis multa saecula familiare fuit earum regionum incolis, nondum tamen compertum est vel vitae periculum intentare, vel valetudinem multum perturbare, vel ullum omnino malum inferre, praeter deformitatem. Vidi tamen aliquos, qui suspicati sunt hunc tumorem, quodam corporis situ, fecisse spiritum paulo difficiliorem. Causam bronchoceles quaerendam esse censeo in aqua, cuius proinde investigatio chemica multum desideratur. Nunquam novi huiusmodi tumorem suppurare.

Aqua marina, vel in qua liquatum est sal aliquod purgans, diutius pota, mutatio loci, aut ubi id commode fieri nequit, potio alterius cuiuslibet aquae purae, qualis est distillata, vel Malvernensis, plurimum valebunt ad summovendum hoc vitium, et ad prohibendum ne revertatur.

CAP. XVI.

De Calculo Urinae *.

Foeminae minus opportunae sunt calculo urinae quam viri; neque enim tam aptae sunt ad calculos gignendos, et, cum genuerint, promptius expel-

* Calculi in aliis quoque corporis partibus interdum nascuntur. Mulier vehementer doluerat decem dies, cum tumor inter dentes molares et linguam ruptus est, et exiit calculus ad magnitudinem pisorum duorum.

expellunt, priusquam grandiores facti molesti esse coeperint.

Non semper facile est discernere calculus sit necne, aut si fuerit, sedem eius certo definire. Tumor prostatae scirrhus adeo similis est calculi, ut noverim summi iudicii viros, et in arte sua exercitatissimos, post omnigenas inquisitiones diligenter factas, inter se dissensisse de natura morbi, quem hi prostatae scirrhum, illi calculum vesicae esse iudicabant. Etenim calculus sic latere potest in vesica, ut eludat catheterem; cuius rei cum plura exempla vidi, tum praecipue in quodam, cuius vesica saepe explorata fuerat a chirurgis peritissimis, et calculus nunquam reperiri potuit; tamen de mortuo extractus est qui pendebat fere duas uncias cum dimidio. Verum quanquam prostata sit in morbo, tumor eius et durities minores esse possunt, quam ut manu comprehendi, et certum de iis iudicium ferri possit; praesertim cum prostata perhibetur aliquanto fieri tumidior, quodocunque cervix vesicae calculo saepius vexata fuerit. Scirrho huius glandulae semper accedit crebra cupiditas urinae; et simul insolita copia mucii redditur, qui quidem eo abundantior est, quo peius aeger habuerit. Ad haec, stranguria quoque et tenesmus sunt. Urina raro fit cruenta ex prostatae scirrho; aut si forte cruor aliquis cum urina misceatur, non nisi exiguus est, et non augetur equitando. Tum stercora dura cum dolore excernuntur, et testiculi interdum tument;

quae signa propria sunt huius scirrhi. Verum nescio an optimum huius morbi indicium sumatur ex universi corporis perturbatione, quae perquam notabilis est: etenim macies est, et cibi fastidium, et debilitas, et frequens horror, concitantur venae, et morbus indies augetur fere sine remissione. At calculosorum dolores diutius conquiescunt, et absque his esset, valetudo foret integra: qua praecipue nota discernitur calculus ab ulceribus renum, aut vesicae. Urina cruenta sine ullis signis ulceris intus latentis, maxime si motu et exercitatione augeatur, fere semper indicat calculum in urinae viis haerentem. In libris medicorum multae aliae urinae cruentae memorantur causae, quas cum egomet vix unquam potui suspicari, opinione rariores fieri crediderim.

Postquam constiterit calculum esse, haud in promptu est definire, qua parte situs sit; quae tamen res non multum interest curationis: nam eadem medicamenta ubique convenient, nisi quod interdum opus erit, cathetere ad calculum a ceruice vesicae movendum. In impetu autem doloris, ubi ubi is fuerit, opium est unicum remedium.

Urina nigra, vel cruenta, seu fuerit sine ullo dolore, sive cum hebetate, aut interdum acuto paulum supra coxam, referenda est ad calculum renis. Cum doloribus quoque nephriticis saepe, sed non semper, vomitus est. Torpor femoris, vel crucis, dolor in flectendo corpore, testiculus sursum

tractus, et dolor extremæ urethrae, adhuc minus certa sunt eiusdem mali signa.

Non constat, unde fiat ut calculus renum in aliis tam atroces dolores moveat, dum in aliis renes materia calculosa referciantur sine minimo doloris sensu. Facies, et situs calculi videntur esse prae-cipuae huius discriminis causæ; sed et in nonnul- lis hominibus acutior sensus his partibus inest: cognovi enim aegros qui distincte perciperent to- tum calculi descensum per ureterem a rene usque ad vesicam; cuius alii ne minimam habent cog- nitionem. Hi calculi in descensu suo ad vesicam saepe moras faciunt, et in iis locis ureterem dila- tant, quod didicimus incidendo cadavera calculo- sorum.

Dum vel renes ipsi, vel partes vicinae dolent, multum muci gignitur, qui simul cum urina red- ditus nonnullos terret vano metu ulceris. Impe- tus doloris calculosi, quod post mortem manifes- tum fuit, levem inflammationem potest excitare, quae, quanquam nullum sit ulcus, faciat humo- rem purulentum a cavitate renum exsudare, qui specie cremoris subsidens in urina, multo propius pus refert. Ulcus autem revera subesse ostendent puris copia, et assiduus cursus, tum vero maxime humoris odor malus. Ulcera renum, ut par fuit credere, perseverarunt multos annos, et totus ren tabe consumtus est; quemadmodum saepe fit in pulmonibus. At vero ulcus alterutrius renis, modo spectet neque ad gangraenam, nec ad carcinoma,

longe minus periculosum est, quam ulcus pulmonum; et plus spei est huiusmodi aegrum restitui posse in valetudinem non incommodam.

In foeminae cuiusdam urina per decem menses subsidebat ingens copia mucii foetentis, tam tenacis, ut fundo vasis fere agglutinaretur. Postea lineae sanguineae conspiciebantur in urina sine ullo dolore, aut stranguria, ne quidem cum in curru veheretur. Valetudo interea satis firma videbatur. Biennio post, cum gravida facta est, simul cum urina expulsa sunt nigra quaedam corpuscula male olentia, et deinde brevi subsecuta sunt urina cruenta, singultus, abortus, et mors. Inciso cadavere, ren dexter materia calculosa plenus apparuit, pelvis erat gangraenosa, et pure foetido plena, totus ureter erat multum dilatatus, crassusque, et induruerat fere in cartilaginem. In sinistro etiam rene calculus repertus est; nullus autem in vesica. Hinc docemur, primo: mucum tenacem et male olentem cum urina posse excerni, quamvis nullum fuerit ulcus: etenim cum primum is repertus est in urina huius aegrae, ren quidem calculo vexabatur, at vero simillimum videtur caetera fuisse integra. Deinde, intelligitur ex hac historia, calculum renis interdum nec dolorem, nec stranguriam excitare.

Signa calculi in vesica sunt, crebra cupiditas urinae, quae in medio quoque cursu saepe subito interrumpitur, dolor et calor mox post urinam, item tenesmus, et dolor extremae urethrae, et

urinae vel incontinentia, vel suppressio, dum pulsus interea est naturalis, et valetudo caeteroquin bona. Omnia haec mala plerumque exasperantur equitando, et interdum, sed rarius, ambulando; quilibet etiam motus nonnunquam urinam cruentat. Nonnullis, sed perpaucis, contigit, incommoda ex calculo, quanquam gravia, vix omnino aucta fuisse vel ambulando, velequitando; in quibus tamen post mortem constitit calculum fuisse unicam dolorum causam. Idem aeger modo in curru vehi optime sustinuit, cui hic motus alio tempore fuit prorsus impatibilis. Tormentum ex calculo ortum non tam deberi magnitudini eius videtur, quam faciei, et loco in quo situs est. Sunt procul dubio quidam calculi positus tales, ut grandis licet et asper sit, levem tamen, aut nullam molestiam, sive renibus, seu vesicae afferat. Quod nisi ita esset, calculosus assiduo dolore torqueri necessarium esset, nulla interposita quiete; quod quidem inter hos aegros inauditum est.

Qui semel natus et aptus fuit ad gignendam materiam calculosam in viis urinae, is per totam vitam arena et calculis vexari consuevit; et posteris etiam suis eundem corporis habitum saepe transmittit. Neque tamen desunt exempla eorum, e quorum vesicis, dum pueri essent, calculus extractus est, qui deinde vixerunt quinquaginta annos ab omni morbi indicio liberi. Alios etiam novi, qui, quanquam saepe experti fuerant dolores calculosos, et multos calculos expulerant, tamen

vesicam et renes habuerunt integros, nullo vestigio calculi, neque morbi cuiuslibet, post mortem invento. Veruntamen, ubi quis arenam, et exiguos calculos expellere cum urina diu consuevit, deinde repente nullos videt per annum aut amplius, suspectae illi esse debent hae induciae. Nam in eo casu plerumque fit, ut omnis calculosa materia ad nucleum aliquem adhaerescat, et ibi coacervetur, donec tandem iustus calculus fiat, et signa consueta edat. Tunc non supervacua erunt illa remedia, quae prosunt adversus arenae generationem, quaeve impediunt saltem, quo minus haec arena in urinae viis subsistat. Calculum pendentem octo et viginti grana simul cum urina viri cuiusdam expulsum fuisse memini; foeminis etiam multo grandiores exprimuntur. Horum unum vidi, figurae ovatae, cuius minor ambitus erat quatuor pollicum; atque eadem mulier die sequente infantem enixa est conatu et dolore minoribus quam a calculo passa fuerat. Motus omnis sollicitate vitandus est, quoties urinam cruentat, quoniam arena circum cruorem facile concrevit, et fit rudimentum calculi.

Remedia ad calculum sunt vel illa quae impetum doloris leniunt, vel quae reddunt urinam idoneam ad calculos dissolvendos. Inter remedia priora nihil aequè valet ac opium. Tincturae opii guttae viginti, vel quantum opus est, cum aquae tepidae sex unciis in alvum infusae, multo efficacius tollunt dolorem, quam medicamenta ex oleo,

vel ex seminibus oleosis. Uva ursi famam aliquam obtinuit omnem difficultatem urinae sanandi; sed ad spem meam parum respondit. Neque tamen iners prorsus est herba, et destituta omni potestate in corpus humanum: quippe in quodam, qui eam saepe sumserat, semper infecit urinam colore viridi. Praeter hunc vero, neminem vidi in quodam contigisse audiverim. Aqua calcis in multis urinam imbuit vi materiam calculosam dissolvendi. Tutum certe est hoc remedium. Etenim vidi, quibus hic fuit unicus potus per aliquot annos, et consuetudine etiam factus est non iniucundus. Quidam calculosus, qui prae dolore vix omnino auderet ambulare, postquam diu sumserat hanc aquam, et ab omni alio potu abstinuerat, in curru vehi per vias lapidibus inaequalibus stratas facile sustinuit: praeterea, urina eius intra paucos dies comminuit, et in nihilum redegit, calculi fragmentum, quod antea immersum erat in urinam aliorum per aliquot menses sine minima ponderis diminutione. Sed, ut quod res est fatear, neque aqua calcis, nec aqua kali puri, ubique medetur huic morbo. Effectus horum medicamentorum in omnibus calculis tardus est, in aliquibus nullus: sunt etiam qui in ipsam aquam kali puri immissi vix aliquid de pondere suo amittunt. Veruntamen, si saepe impediunt quo minus calculi nascantur; aut si eorum compaginem, ubi nati sunt, laxent, ut verisimile videtur, solvantque; spinas quoque et aspretudines aliorum expo-

liant, praecipuas doloris causas; utique remedia erunt haud contemnenda. Memini calculosum, qui aquae kali puri semunciam quotidie sumsit in decem annos, sine minima suspitione mali, aut incommodi: et vix dubitari potest quin calculorum compaginem laxavisset; quippe cum urina exierunt unciae aliquot fragmentorum, quorum facies altera convexa erat, altera concava. Interea vir hic, quem morbus diu domi detinuerat, iam patiens esse vehiculi coepit, et per ultimos vitae annos parum doloris expertus est; licet antea crebras ac vehementes accessiones pati solitus erat. Quanquam autem tantus huius medicamenti modus tot annos sumtus multum sane egisset ad mitigandum morbum, multum tamen supererat agendum: post mortem enim reperti sunt in vesica duo calculi, quorum maior pendebat grana quatuor et quadringena, minor autem centum triginta duo; item ren alter calculis plenus erat. Dubium est aqua kali puri, et aqua calcis, prosint adversus calculos renum, necne. Quaeritur etiam an usus horum remediorum intermitti debeat, quoties urina est cruenta, aut nova nascitur doloris accessio; necdum enim constat urinam inde fieri acriorem, sic ut exasperet haec mala. Attamen, cum accessionum tempora paucos fere dies non excedunt, cumque alia medicamenta tunc necessaria sunt, tutius omittentur, donec isti tumultus conquieverint. Quamdiu sumitur aqua calcis, aut aqua kali puri, plerique sollicite cavent a cibis po-

tionibusque acidis, ne scilicet vim medicamento-
rum hebetent. Nescio tamen, an fuerint iusto
severiora medicorum de hac re praecepta. Facul-
tas enim concoquendi et digerendi cibos nondum
adeo cognita et perspecta est, ut possimus delinire
quantum spatii intersit, priusquam acida suam
naturam in ventriculo exuant, et alkalinos sales in
se trahere haud amplius valeant; id quod perbreui
tempore fortasse efficitur. At possit maius impen-
dere periculum ab aëre illo fixo, qui abundat non
solum in visceribus, sed etiam in omnibus corpo-
ris humoribus; qui si cum istis medicamentis mis-
ceatur, illico tollit vim eorum extricandi aërem
ex urinae calculis. Ecquis autem tam consultus
fuerit legum, quibus corpus humanum admini-
stratur, ut medicamentorum facultates explicare
audeat?

CAP. XVII.

De Dolore Capitis.

Natura dolorum capitis perquam obscura est.
Variae sunt eorum causae, et saepe sibi invicem
contrariae. Officia cerebri parum intellecta ne-
cessario offundunt tenebras morbis huius partis.
Multi ex iis videntur aliquid commune cum cere-
bro habere: nam dolor proprius est capitis, et
longe diversus ab illo qui alia parte qualibet sen-
titur; quamvis, demto cerebro, eadem prorsus
capitis, ac reliqui corporis, conformatio est. Porro
cadaverum incisiones demonstrarunt eum saepe ex

cerebri ipsius vitiis oriri. Huius profecto morbi sedes, et longa eius mora, et crebri reditus, iure possent incutere metum magni cuiusdam detrimenti subsequendi; quod tamen contra fit. Atroces enim capitis dolores nonnullos fatigarunt per totam fere vitam, absque eo, ut vel mors acceleraretur, vel ingenii vires minuerentur; at ubi dolor conquieverit, aegri omnes res, sicut antea, ministrarunt. Paralyseos levissima accessio longe plus detrimenti affert, quam capitis dolores vehementes, crebrique, a pueritia usque ad senectutis initium. In hoc longo certamine valetudo corporis adeo non succumbit, ut morbum tandem ipsum vincere videatur, quem quidem ex innumeris aegris didici aetate ingravescente fieri mitiorem, et demum prorsus finire. Quae res vicem remedii implere debet, ubi omnia remedia frustra fuerunt: haud leve enim aegro solatium est, nosse morbum suum, qui medicamentis cedere recusat, tempori tandem esse cessurum. Idem quoque exitus est istius doloris capitis, qui incipit a caligine oculorum.

Hemicrania, sive dolor dimidii capitis, nomen inter medicos veteres obtinuit, quo ab aliis capitis affectibus distinguitur; tamen ex tam longa experientia nondum didicimus, praeter sedem, quodnam sit discrimen inter hunc et alios eiusdem partis dolores. Mihi profecto hemicrania a latere sinistro, saepius quam a dextro, visa est; sive id casu acciderit, quod potius credo, seu lege quadam naturae. In multis aegris subinde redire con-

aevit per totam vitam; et morbo articulari super-
 veniente non levata est: saepe quoque secuta est
 tum oculorum affectum, in quo dimidium rerum
 interit. Dolor alius capitis interdum sentitur su-
 pra laevum oculum, et multo adhuc minus spa-
 tium occupat, nempe ad magnitudinem pollicis
 unius. Diem unum et alterum hic perseveravit,
 : bis terve singulis mensibus reversus est. Foe-
 minae videntur opportuniore huic malo, quam
 viri, tum maxime illae quae affectu hysterico
 tentantur. Dolores alii sinciput, alii occiput
 occupant, alii quoque in aliis locis fixi sunt; quos
 omnes sollicite numerare vix operae pretium foret,
 nisi inde certiores fieremus, quid morbos hos fa-
 ciat, aut quid tollat. Taceo dolores capitis Ve-
 tereos, qui signis istius morbi propriis discernun-
 tur, et propriis eius remediis sanantur.

Nonnulli capitis dolores vere, vel autumnno,
 vel etiam tempestate utraque redeunt. Pauci
 aestate, plures hieme molesti sunt: quidam exper-
 ientis somno. Plerique vero prorsus inordinati
 sunt, nulla certa tempora observantes. Neque
 minus incertum est quamdiu dolor mansurus sit;
 modo enim paucas horas, modo diem integrum,
 modo plusculos dies perseverat; interdum vix con-
 quiescit per aliquot annos. Interdum habitu cor-
 poris maiorem in modum mutato finitus est huius-
 modi affectus, qui fuerat ab ineunte aetate. Item
 asthmate superveniente cessavit; et foeminis gra-
 vidis pepercit, quas semper alias vexabat.

Dolori huic, satis per se molesto, alia interdum mala accedunt: nimirum vertigo, quae aliquando antecedit, maxime in vetustis capitis doloribus, oculorum perturbatio, flammulae, nubila aut color aliquis ante oculos versatus, stupor, et caput quasi cingulo compressum; item affectus hysterici varii, quales sunt horrores, sudores frigidi, animae defectiones, frigus pedum, torpor veteris, sonitus, vocis atque luminis breves amissiones, nervi in artubus tracti, et mens turbata. Accessione graviore finita, caput interdum in diem unum leniter dolet. Capite laborante, ventriculus etiam saepe tentatur inflatione, distentione, angore, dolore, ardore, nausea, vomitu, deiectionibus frequentibus, aut lumbricis. In non paucis aegris caput et ventriculus vicissim, aut male aut bene se habent. Constat itaque consensum quendam inter has partes intercedere, atque altera aegrotante, in altera esse causam morbi posse. Sanatis ulceribus veteribus, aliisque cutis vitiis aut menstruis foeminarum perturbatis, credibile est ventriculum primum affici, et ex hoc deinde in caput malum transire.

Plerique capitis dolores vacant periculo; ubi autem ad hos accedant stupor, aut colli universus tumor, aut mentis alienatio, aut distentione membrorum, res aegri nequaquam in tuto sunt. huiusmodi enim mala subsecutae sunt epilepsiae, paralyses, et apoplexiae.

Ex cephalaeis mortiferis nonnullae, quod in

pecto post mortem cerebro didici, ortae sunt ex
 agenti copia humoris cerebrum distendentis, vel
 ex partibus cerebri suppuratis, vel ex tumoribus
 a illo natis; unde primo dolor excitatus est, et
 postea, cerebro vehementius presso, nervorum
 facultates aut turbatae sunt, aut perierunt. Multa
 huc pertinentia in scriptis medicorum reperiuntur,
 quae, cum mihi propositum est historiam morbo-
 rum literis mandare, non a libris, sed a natura
 petitam, silentio praeteribo.

Adeo nihil perpetuum est in curatione horum
 morborum, ut eadem ratio medendi, nulla ma-
 nifesta de causa, diversos plane, et contrarios
 exitus habeat, et modo levet, modo exasperet
 dolores per omnia, ut visum est, simillimos.
 Quaeenam itaque vera sit ratio sanandi hunc affec-
 tum, viderint sagaciores, vel feliciores posteri;
 nobis profecto, haud semper dictu proclive est,
 quae sit maxime probabilis.

Angor, et perturbatio animi, sonitus vehe-
 mentior, defatigatio animi aut corporis, lux
 splendida, aër conclavis turba hominum calefac-
 tus et inquinatus, cruditas, tussis, fere semper
 attendunt capitis dolores. Cutis vitia, cibus,
 somnus, calor foci, aestas, hiems, regio tepida,
 podagra, et sub diu versari, in diversis homini-
 bus diversos effectus edunt. Tamen vitia cutis,
 somnus, corporis tepor, aestas, regio tepida, et
 sub diu agere, maximam partem auxilio fuerunt.
 At lavatio frigida, sanguinis detractio per hiru-

dines, vel incisa vena, cutis exulcerationes diu servatae, fonticuli, et quae movent sternutamenta, si nihil nocuerunt, quod nonnulli suspicati sunt, at certe saepissime non profuerunt: in eodem censu sunt medicamenta nervorum propria et balneum, et opium. Quanquam autem omnia quae vulgo iactantur, huius valetudinis remedia interdum fuerunt supervacua, at spem meam rarius fefellerunt emplastrum quod erodit capiti admotum, sanguinis sex unciae per cucurbitulas singulis mensibus detractae prope occiput, et pilulae dormituro datae, quae habent aloës granum unum, radicis colombae grana quatuor. Vomitus quoque saepe profuit; et vomendi conatus opinione minus dolorem auget: itaque singulis mensibus utiliter elicitur. Vomitus seu voluntarius, sive medicamento excitatus, haud contemnendum fuit praesidio contra illum capitis dolorem qui initio febrium incidit; quem etiam certissime tollit emplastrum cantharidis inter scapulas impositum. Fomenta calida capiti, aut pedibus, admotum, semper minuunt, saepe tollunt hunc affectum; interdum illum tuto solvit opium.

C A P. XVIII.

De Dolore Capitis intermittente.

Cortex Peruanus remedium fere certum est ad febres intermittentes, in quibus universum corpus aegrotat. Quod si partis alicuius dolores certum habent circuitum, non solum hic cortex, ve-

rum alia omnia medicamenta, quae huc usque tentavi, saepe frustra fuerunt. Hoc eo magis molestum est, quia cum huiusmodi affectus occupet caput aut faciem, ut saepe fit, aegri angore conficiuntur, qualem in paucis aliis morbis inveneris, siquidem aestimetur querelis, a quibus vix patientissimus quisque temperare potest.

Hic morbus modo occupat caput universum, quemadmodum alii capitis dolores, modo occiput, modo sinciput, saepissime partem aliquam faciei; et quanquam ambae in eodem aegro tentatae sint, tamen pars sinistra saepius afficitur, quam dextra. Non impetu doloris labrum superius, vel gingivae, vel gena, et musculus temporalis, vel haec simul omnia adeo anguntur, ut aegri non sustineant manducare, nec devorare, nec loqui: verum os saliva, oculus impletur lacrymis, refugitque lumen; palpebrae quoque tument, et rubent, atque interdum prae summo dolore fiunt coeruleae. Interdum calor faciei, et rubor, et insolitus salivae coursus antecedunt; et ad haec in nonnullis accedunt vomitus, et distentiones nervorum leves, et tremores partium affectarum. Accessiones modo horam unam, modo plures horas, vel etiam biduum manserunt, et circuitum habuerunt non minus certum, quam febres quotidianae, aut tertianae. Quinetiam rediit haec pestis decimo quoque die, vel singulis mensibus, vel bis in anno. Plerumque tamen paulo inordinatior fit. Nonnullis contigit esse tam infelicibus, ut morbus

potius esset continuus, quam intermittens, a levis-
simo quoque conatu loquendi, aut edendi, exci-
tatus, motuve vehiculi, aut aurae frigidioris afflatu;
sic ut in annos plures raro liberi fuerint ab hoc
tormento. Uterque sexus obnoxius est huic
morbo; maxime autem foeminae. Nulla aetas
secura est, a pueritia usque ad octogesimum vitae
annum. Torpor quidam interdum fuit ad horas
aliquot post accessiones; saepius, ubi earum tem-
pora praeterierunt, omnia mala conquiescunt.

Quod ad curationem attinet, quaecunque cor-
pus exinaniunt, aut supervacua fuerunt, aut per-
niciosa; nulla autem magis quam sanguinis missio.
Cataplasmata molesta sunt, et aegrotantium cala-
mitatem potius augent. Cortex Peruanus saepe
fallit, pariter ac radix valerianae sylvestris, gum-
mi foetida, myrrha, moschus, camphora, opium,
succus cicutae, pulveres sternutamenta moventes,
emplastra cantharidis, ulcera alte inusta, electri-
ficatio, fomenta ex cicuta, lavatio pedum tepida,
aether faciei illitus, vel spiritus vini, linimentum
saponis cum, vel sine, tinctura opii, oleum suc-
cini, arteria temporalis incisa, dentesque reflexi;
neque plus profuit superveniens podagra. Atta-
men cortex cinchonae interdum auxilio fuit, ne-
que tam raro, quin primus locus huic medicamento
iure tribuendus sit; huius unciam quotidie su-
mere oportet in dies septem. Emplastra quae
erodunt sub auribus imposita interdum doloris
impetum mitigarunt; neque tantum succi cicutae,
quantum

quantum sine vertigine sumi possit, non aliquando
 prosperum exitum habuit. In quibusdam aegris,
 ubi nihil aliud auxilio fuit, quarta pars grani an-
 timonii tartarisati, cum tincturae opii guttis qua-
 draginta, sex noctes sumpta morbum prorsus fuga-
 vit. Fuit quoque ubi lavatio frigida non poeni-
 tendam opem attulerit. Quod si aeger vel nequeat
 devorare, vel aversetur corticem Peruanum, aquae
 in qua is decoctus est unciae sex, et eiusdem in-
 pulverem triti drachmae binae, semel vel bis quo-
 tidie in alvum infundi debent, et, ubi opus est,
 his adiacere licet tincturae opii guttas quadraginta.

C A P. XIX.

De Carbunculo.

Carbunculus dicitur tumor magnus ruber,
 plerumque in dorso enatus, cuius fundum spon-
 giosum humore purulento madet, qui per omnes
 rimas copiose manat. Brevi accedit febris, cum
 inactatione multa, debilitate, fastidio, vigilia, et
 anormacie. Quae cum sit eius conditio, manifestum
 est eum vel causam esse, vel effectum valetudi-
 nis maiorem in modum perturbatae. Seniores,
 et valetudinarii, maxime opportuni sunt carbun-
 culo. Dicitur urina in hoc morbo super potionum
 modum mingi; quod tamen usus mihi non con-
 firmavit. A quibusdam solita tantum copia red-
 dita fuit, et in ea aliquid plerumque subsedit: in
 uno prorsus suppressa est biduum ante mortem.
 Hoc malum semper periculi plenum est, et non

raro mortiferum. Oportet dare tantum corticis cinchonae, quantum sine fastidio sumi potest. Ad iactationem, et vigiliam, opium est tutum atque unicum remedium.

C A P. XX.

De Choreia Sancti Viti.

Chorea quae dicitur Sancti Viti praecipue implicat pueros et puellas, ab usque decimo aetatis anno ad quindecimum. Neque tamen hoc adeo perpetuum est, quin curaverim sexennem hoc morbo laborantem; qui porro alteri contigit anno vigesimo. Ex aegris quos vidi, tantummodo quarta pars fuere mares. Crura et brachia nolentibus agitantur; brachia autem magis quam crura. Tum sua voluntate hos artus movere aegri non possunt, nisi paululum, et fere ridicule. Alterum latus corporis plerumque afficitur gravius quam alterum, sicut fit in hemiplegia; sed tamen in eodem aegro morbus modo hoc, modo illud latus infestat. Debilitas quaedam, et breves nervorum distentiones, atque alia levia huius affectus signa, non raro menses aliquot exercuerunt hos aegros, antequam vera facta sit chorea: in aliis post vehementes nervorum distentiones repente nata est: saepe genua prius dolent et impediuntur. Fit quoque lingua morbi particeps, unde omnes sic occupati balbutiunt; atque nonnulli adeo parum distincte loquuntur, ut animus vix possit intelligi; aliis vox ex toto suppressitur. Puero cui-

dam cum crura vehementer agitabantur, motus involuntarii superabant omnes movendi conatus leniores; membris autem fortius impulsis morbus superabatur: ergo currere potuit, qui non potuit ambulare; quod etiam in ebriis fieri consuevit.

Ad hoc distentionum genus accedunt vertigines, torpores, angores ventriculi, somni perturbati, et macies, licet aviditas cibi non multum minuatur; postremo mens et ingenium fiunt infirmiora, et magis puerilia. Morbus rarissime periculosus est; trahit vero diutius. Paucissimi intra mensem restituuntur; et plerique aegrotant in menses duos, ves tres: unus et alter annum integrum laboraverunt. Quanquam raro repetat, interdum tamen contigit, ut qui ab eo convaluerant, distentiones eiusdem generis leviores vere et autumno experti sint in annos tres aut quatuor. Perturbatio quoque animi gravior identidem revocavit obscura quaedam eius indicia per decennium; nisi forte ad hystericum aut paralyticum affectum potius pertinuerint, quibus chorea Sancti Viti est cognata, non solum externa morbi facie, verum etiam remediis.

Sanguinis missio, et purgantia valentiora haud bene conveniunt, ubi nullus est calor, aut inflammatio, et ubi morbus proprius est tenerae aetatis, et sexus infirmioris, atque etiam nullis adhibitis medicamentis sponte sua plerumque conquiesceret, illaesa corporis constitutione. Haec, quae ratio dictat, usus confirmavit. Nam sanguis copiose de-

tractus, aut alvus vehementius mota, nunquam mihi visa sunt profuisse; et vix dubitare licet, quin interdum nocuerint. Pulveris myrrhae compositi grana quinque, et pulveris opii grana duo, adiecto syrupi quantum satis est ut fiant pilulae, singulis noctibus dare iuvabit, et simul quaecunque alvum lenissime movent, ubi ea nimis dura est; postremo aquae ex herba aliqua amara cyathus semel vel bis quotidie sumendus est. Haec remedia convenient, ubi quidem remediis opus sit. Cum vero aeger morbo se colligere coeperit, tunc in frigidam descendere iuvabit; quod etiam morbo nondum inclinato utiliter tentatum novi.

C A P. XXI.

De Coxae Morbo et Exulceratione.

In coxa aliquando fit vitium longum, aliud a sciatica, aut rheumatismo, in quo quamvis dolor modicus, periculum tamen summum est. Nascitur in articulo femoris; genu vero est in dolore, quo ipsa pars affecta fere vacat, etiam tum, cum tumor insignis est, et indicia puris manifesta. Femur extenuatur, et crus impar est corpori sustinendo. Hi aegri febre hectica et macie confecti interdum pereunt priusquam tumor vel per se, vel scalpello, aperiatur; saepius pus in partem exteriorem fertur, ubi fit ulcus humorem multum fundens, quod aegrum antea ruentem praecipitat. Paucissimi illi qui ex hoc morbo evadunt, semper claudicant.

Hoc vitium in nonnullis indies auctum est per tres annos, priusquam occidit. Praecipue fit a sexto ad decimum sextum annum; qua etiam aetate articuli, et partes corporis exteriores, maxime affliguntur malis strumosis, quae postea in pulmones et abdominis viscera verti solent. Coxae autem exulceratio ad strumam pertinet, et cum aliis eius signis saepe simul incidit. Cortex Peruvianus, cicuta, opium, ulcera diutius servata, et quae alvum leniter movent, praecipua sunt ex iis quae existimantur vel sanare, vel levare hoc anceps malum.

CAP. XXII.

De Crurum Dolore, Tumore, Inflammatione, et Ulceribus.

Dolores rheumatici et arthritici, et debilitas, communes sunt cruribus, et reliquis corporis partibus. Quaedam illis propria sunt. Primo, tumores sine dolore: tum, acer humor, qui cutem facit densam, duram, et intentam, cum intolerabili prurigine, quique exit per omnes rimas cutis, sive fissa, seu unguibus lacerata fuerit: denique inflammationes de genere erysipelatis, cum dolore acuto, quibus nonnulli vexantur semel vel bis in anno, praecedentibus horrore et calore; huiusmodi inflammatio consuevit esse molesta aliquot dies, et interdum desinit in ulcus sordidum multos annos insanabile.

Haec crurum vitia non semper intus nascuntur

tur, sed interdum ex ictu. Foeminae multo magis, quam viri, illis opportuna sunt, praeter inflammationem illam erysipelatodem quae paucos dies manet. Adolescentulae, quibus integra valetudo est, interdum experiuntur tumores in pedibus, praesertim aestate; quod raro, aut nunquam iuvenibus sanis contingit. Graviditati fere semper accedit crurum tumor. Rubor totius cruris cum cute crassa, duraque, et impatibili prurigine, et humoris acris profusione, non raro vexat mulieres, quae annum quadragesimum excesserint, atque omnem chirurgorum artem diu fallit. Multo pauciores viri tentantur vel hoc morbo, vel ulceribus crurum.

Quod si huiusmodi tumores, et inflammationes, et ulcera, propria fere sint crurum, tum praecipue fiant, ubi sexus, et aetas, aut casus aliquis, universum corpus, vel has partes reddiderint infirmiores; auxilio esse debet quicquid vim atque firmitatem vel augeat, vel imitetur; id quod pollicentur fasciae cruribus arcte obvolutae. Quam tuto hoc fieri possit, ex eo manifestum est, quod qui in lecto se continent, impune dissipant hos tumores. Quin et ulcera sic redduntur multo tractabiliora, et tuto consanescunt. Nempe imbecillitas crurum, pondere humorum deorsum latorum oppressa, eo corporis situ levatur, perinde ac fieret per tibialia arctiora. Neque tamen est dissimulandum tumores atque ulcera in cruribus saepe deberi nimiae humorum acrium abundantiae, qui

medicamentis reprimentibus tuto repelli non possunt. Difficultas spirandi, quae ex aqua in pectore fortasse orta erat, et in horas mortem intentabat, coepit mitescere protinus ut in artubus inferioribus ingens aquae copia cutem subiisset. Calores quoque, et multa ventriculi et aliarum partium mala, exulceratis cruribus soluti sunt. Contra, ulceribus his temere sanatis, secuti sunt dolores in capite, vertigo, torpor, spirandi difficultas, cibi fastidium, et ventriculi viscerumque angores. Quamobrem animo diligenter attendendum est, qualis hodie sit aegroti valetudo, et qualis olim fuerit, unde optime discernet medicus, haec vitia tuto sanari possint, an consultius fuerit patienter ferre praesens malum, ne in eius locum gravius subeat.

Sales purgantes alternis auroris sumti, sic ut alvus bis vel ter descendat; corticis Peruani scrupuli duo singulis noctibus dati, quibus, si visum fuerit, sexta pars grani hydrargyri calcinati adiecta est, remedia sunt apta ad educendos vel corrigendos humores vitiosos; atque haec continuare oportebit in mensem unum aut plures. Ulcus supra genu excitatum modo utile est in his affectibus, modo supervacuum.

CAP. XXIII.

De Cutis Vitiis.

Vitiorum cutis multiplex est natura et facies. Si modo color eius mutatur, at neque eminent ali-

quid, nec dolet; vix morbus dici meretur. Huius generis sunt maculae purpureae similes earum quae in febribus nascuntur, quas in pueris nonnullis vidi ubique sparsas, hic exiguas, illic latiores, sine febre, aut ulla valetudine adversa: post paucos dies sua fere sponte decedunt *. Nec maioris intersunt illae maculae coeruleae, vel lividae, quibus seniorum artus interdum notantur.

Pustulae exiguae saepe nascuntur in cute, et mox recedunt. Interdum vero manent, et serpunt latius, et fiunt furfureae, vel squamosae, vel crustam habent, quae rimas agit, et humorem profundit. Hoc saepe fit in facie, et cruribus; interdum quoque, sed multo rarius, totum corpus huiusmodi scabie, foeda pariter ac molesta, occupatum est. Pustulae modo rubrae sunt, modo eiusdem cum reliqua cute coloris, modo humidae, modo aridae, tum aquosae, vel purulentae, vel cum dolore, aut prurigine, vel utroque vacantes; quaedam etiam prope accedunt ad furunculos. Denique, ungues fiunt asperi, crassi, et squamosi. Pustulae confertae, exiguae, aqua plenae, postquam ruptae fuerint, punctis cruentis cutem notaverunt, non sine prurigine et dolore.

Vitiis cutis modo memoratis nomina imposuerunt medici veteres; quod vero cuique nomen datum est, hodie nec scitu facile est, neque multum refert scire. Quamobrem distributiones ho-

* De his, vide quae praecepta sunt cap. 78.

rum morborum in varias species, et titulos, quae olim obtinebant, nunc fere negliguntur. Ex his plurimi, qui proprio nomine carent, vulgo, sed parum recte, appellantur scorbutici. De vero scorbutico, et lepra, nihil habeo quod dicam, cum alter rarissimus est in urbibus, altera in Anglia pene ignota: unde factum est, ut hos morbos nunquam curaverim. Praeter hos autem, scabies, herpes, et porrigo, sunt fere sola cutis vitia, quae plerique medici iisdem nominibus nominare consenserunt.

Nonnulli cutis morbi a parentibus derivantur; et ubi hoc non fit, tamen saepe habent initium, non tam a cutis ipsius vitio, quam a malo corporis habitu; quales sunt, qui infantes nascentes occupant, et cum paucis intermissionibus usque ad mortis diem perseverant. Post morbillos et variolas interdum subsequuntur cutis deformitates, quae antea nullae fuerant; sive ortae sint ex labe quadam, quam isti morbi impresserant; seu tantum demum excitata fuerint earum semina, quae diu delituerant; seu denique casu et fortuito factum sit, ut hoc potissimum tempore prodirent. Etenim id frequentius eventurum credibile est, siquidem ea foret morbillorum et variolarum natura, ut gignerent aut alerent cutis vitia.

Pustulae maxime vernis temporibus oriuntur, aut increscunt. Secundum ver, autumnus his temporalis infamis est. Tamen hoc non est perpetuum. De aestate et hieme, nihil certi affirmare possum,

cum in utraque tempestate morbos, de quibus sermo est, modo auctos, modo mitigatos esse comperi. Calor lecti, aut foci, exanthemata nonnulla fecit recedere, quae reverterunt protinus ut corpus frigebat. In aliis, et forsitan pluribus, contrarii sunt caloris effectus.

Humor post aures infantibus frequentissimus est; et interdum, vel ob acrem eius naturam, vel ob sordes non rite ablutas, per caput universum et faciem serpit. Furfureae aspretudines ad magnitudinem pollicis unius, aut amplius, corpus saepe et membra hic illic deformant, et non raro initium habent super olecranon. Impatibilis fere prurigo, sine ulla cutis mutatione, frequens est in ictero, et senectutis quoque incommoda saepe non mediocriter auget*. Quibusdam mulieribus pustula exigua in naso orta est, quam super crusta innascitur, et serpit late, donec nasum totum, faciem, et collum contexerit, atque multos annos vincit omnia omnium medicorum et circulatorium remedia. Inter mares haec species rarior est, neque tamen prorsus ignota. Furfures, et squamae, in diversis corporis partibus, maxime in capite, nonnullos male habent per totam vitam.

Inter veros cutis morbos, haud facile alium inveniemus contagiosum, praeter scabiem, et poriginem. Foemina, cuius cutis maculis latis fureis quinquennium vitiata fuerat, lactabat in-

* De cutis pruritu, vide infra cap. 76.

infantem a materno morbo prorsus liberum. Est quoddam cutis vitium per omnia scabiei simile, et quod habuit initium ex vera scabie, tamen contagione alios non afficit, neque cedit usitatis psorae remediis, tum quoque in quibusdam redit quotannis per multos annos. Dum auriculae tument, et erubent, et humorem multum fundunt, saepe fit, ut glandulae quoque in cervice tumeant; quod etiam fieri consuevit, ubi emplastro cantharidis immposito aqua abunde exit. Sed hi tumores sine spee aliena facile subsidunt.

Omnibus in confesso est malum corporis habitum varia cutis vitia inferre; et, uti suspicor, quae principio erant cutis solius iniuriae, eae tandem communicatae sunt cum corpore universo. Vidi enim exempla cutis ambustae, aut collisae, in quam secuta sunt signa omnia istius habitus, qui vulgo appellatur scorbuticus, vel strumosus, quantumquam valetudo antea fuisset integerrima. In aliis etiam vidi morbos cutis adeo non profuisse valetudini, ut secum attulerint languores, et capitis dolores, qui simul semper accesserunt, decesseruntque. Haec autem rariora sunt. Multo saepius fit, ut, pustulis enatis, totum corpus levetur, ut tanquam illud, quicquid nocebat, in cutem verteteretur. Quod si pustulae vel recessissent ultro, vel repulsae fuissent, protinus incubuerunt dolores in capite, vertigo, languor animi, vigilia, tussis, cibi fastidium, ardor stomachi, inflatio, nausea, angores ventris, dolores vagi, febricula,

et macies. Dubium est in nonnullis, asthma, phthisis, et paralysis referenda sint ad vitia cutis intus versa, an utraque causam habuerint communem. Etenim fieri potest, ut grave aliquod malum undecunque invectum, vires corporis in tantum affligerit, ut amplius non valeat se levare aegritudine illa, quam in cutem traicere consuevisset.

Humor qui exit post aures puerorum per quatuor primos vitae annos, aliam curationem non postulat, nisi ut partes illae saepe colluantur aqua tepida; quod si cuticula attrita sit, linteum unguento quovis leni delibutum inter auriculam et caput erit interponendum. Reprimentia omnia vitanda sunt; quoniam intulerunt difficultatem spirandi, nervorum distensiones, atque alia mala, quorum nihil accidisset, si soli naturae res fuisset permissa, quae, sine auxilio artis, quicquid est mali, summovebit, quamprimum conveniat. Ubi vero ex usu medicamentorum exsiccantium puer coeperit aegrotare, utile erit unguentum cantharidis, quod humorem revocet in loca consueta.

In adultis non quidem periculosa, sed saepe difficillima sanatu sunt ea mala, quibus cutis obnoxia est. Multa enim sunt, quae insederunt penitus, et inveteraverunt, sic ut omnia superent remedia extrinsecus, vel intus adhibita: saepe quoque falso existimantur sanari, quae modo ad tempus subsistunt. Neque in proclivi est discernere, medicina vincantur, an sponte sua, ut solent,

recesserint, mox iterum reditura. In quibusdam
postquam conquievissent viginti annos, demum
reversa sunt, et indomito furore saevierunt; palam
facientia causam tamdiu intus latentem non tan-
tum minutam, nedum sublatam esse.

Ubi sudor abunde exit, et difflari nequit,
sicut in inguine, et sub mammis foeminarum, at-
que in collo, et aliis partibus infantium pinguium,
libi mora saepe fit acer, et cuticulam vicinam ex-
est. Praesidio sunt ablutio frequens, et pulvis
amyli aut argillae aspersus, denique unguentum
adene exceptum linteo et interpositum sic, ut partes
attritu ne laedantur. In mulieribus gravidis mul-
tae deformitates cutis, antea insanabiles, sponte
cessarunt, quae tamen omnes post partum re-
cruduerunt. Exulcerationes nonnullis subvenisse
visae sunt, evocando et expellendo humores per-
niciosos, qui cutem foedabant: aliis autem illae
fuerunt supervacuae.

Quod attinet ad remedia extrinsecus admo-
venda, illud sedulo tenendum est, acriora plerum-
que convenire, ubi pruritus est; sin dolor fuerit,
lenia esse adhibenda, quae solvant potius quam
intendant dolorem, ne forte inflammationes mo-
destae, vel etiam periculosae, moveantur. In
hunc finem vel aqua pura haud prorsus contem-
nenda est; nam interdum aquae calidae vapor, et
fomenta, aut lavatio tepida, aut frigida, vicem
remedii implent. Sic enim diluuntur humores
acres qui cutem mordendo exasperant; tum quo-

que furfures, squamaeque, emolliuntur, et detergentur. Hae aquae facultates fieri possunt valentiores adiecto vel sale, vel sulfure, aliisque simplicibus. Itaque aqua marina, et fontes medicati, vim habent maiorem, quam aqua pura. Medicamenta e plumbo, quanquam minime acria sint, tamen principem locum tenent inter ea quae extrinsecus adhibentur; idque non solum adversus calorem, et dolorem, sed etiam ubi tantummodo prurigo est. Aqua, unguentum, aut emplastrum, quae habent lithargyrum, aut cerussam, cum aceto, in quotidiano usu sunt; et, quantum adhuc didici, pares sunt eorum vires. Unguentum picis prodest etiam non modo ad illos cutis morbos quibuscum prurigo est, sed etiam ubi rimae sunt et exulcerationes: nam plerumque nullum dolorem excitat; nonnullis tamen nimis exsiccans visum est, non sine aliquo doloris sensu. Sulfur quidem adversus unum cutis morbum proprie valet, ideoque in plurimis aliis, cum extrinsecus, tum intus, tentatum est: quo eventu, viderint alii: mihi certe, praeterquam in psora, parum respondit. Semina staphidos agriae, et radix hellebori albi, sunt acria admodum; et videndum est ut eorum modus accuratissime definiatur, si quando intus dentur; quod proinde raro factum fuit. Tamen radicis hellebori albi granum unum tuto sumitur. Staphis agria vero an impune et utiliter sumi possit, nondum didici. Quae ex helleboro albo fiunt, si extrinsecus adhibeantur,

adeo sunt efficacia, ut, praeter vim suam adu-
 scendi, facultates proprias ad sanandam cutem ha-
 bere videantur. Medicamentum ex staphide agria
 fit immittendo seminum contritorum semunciam
 in aquae ferventis libram, cui, ubi egelida est,
 addicitur spiritus vini rectificati selibra: humore
 colato partes affectae madefaciendae sunt mane et
 vespere. Quod ex helleboro albo fit, habet radi-
 cis semunciam, aquae ferventis uncias viginti,
 quibus frigefactis et colatis adiciendae sunt tinc-
 turae veratri unciae quatuor: hoc etiam mane et
 vespere est adhibendum. Ubi cutis tenerior est,
 haec interdum calorem et dolorem nimium exci-
 tabunt; sed his occurritur aquam adiciendo, do-
 nec calor et dolor fiant tolerabiles. Cum vero
 cutis in diversis hominibus tam diversa est, nec
 staphidos agriae, aut hellebori vis ubique eadem;
 itaque pondus aquae superinfundendae, nisi expe-
 rimento, definiri vix potest. Earundem herba-
 rum pars una commode miscetur cum unguenti
 simplicis partibus tribus; quo loca affecta singulis
 noctibus sunt inungenda. Piper quoque, et alia
 medicamenta acra, inter remedia cutis recensentur;
 item unguenta et emplastra quae habent can-
 tharidas, quarum tamen vires non satis cognitae
 habeo et perspectas. Alumen, et vitriolum, ex
 aqua liquata, cutis pruriginem, quae sine pustulis
 fit, minuunt; et praeterea squamas cutis semi-
 mortuas deterunt, et nitorem eius reddunt. Ius-
 tum horum ad aquam pondus ostendent ardor et

dolor quem excitant: qui si non sint immodici, illud non erit nimium. Ad hanc rationem confi- cienda sunt omnia medicamenta acria, quae cuti admoventur.

Medicamenta ex hydrargyro, praeter acre illud, quod chemici adiiciunt, propria quadam vi pollent morbis cutis medendi. Argentum vivum, per se lenissimum tactu, contritum cum adipe donec apparere desinat, deinde unguenti vel emplas- tri modo impositum, auxilio est adversus multa pustularum genera. Medicamenta chemica ex eo- dem confecta vim habent naturali maiorem. Ho- rum elegantissimum simul ac valentissimum est hydrargyrus muriatus in aqua, vel spiritu vini, dissolutus; qui etiam colore et odore omni vacat. Ex reliquis medicamentis mercurialibus, quae in aqua, aut spiritu vini dissolvi non possunt, fiunt unguenta et emplastra: semper vero oportet ca- vere, non solum ne dolorem nimium inflamma- tionemque moveant, sed etiam ne salivae cursum excitent, quae vis est argenti vivi propria, quo- cunque modo adhibeatur. Hydrargyri muriati drachma ex aquae libra liquari debet. Quod si eidem modo aquae adiiciatur hydrargyri muriati semuncia, medicamentum fiet longe nimis acre, ex quo dolorem notabilem tumoremque natos esse vidi, quamvis exiguae tantum corporis parti fuis- set admotum. Praestat dissolvere hydrargyrum muriatum in aqua pura potius quam in aqua cal- cis, cum haec malum colorem inducat, et reme- dii

dii vim minuat; quod certe multo commodius fieri potest detrahendo aliquid de modo hydrargyri, ubi dilutius medicamentum postulatur. Permagnum interest ad salivam excitandam, hydrargyrus exiguae, an ampliori corporis parti, admoveatur; atque ad hoc animus attendendus est, haud minus quam ad vim ipsam medicamenti. Unguentum hydrargyri nitrati toti faciei quotidie inunctum est per plurimas dies sine praesente dolore, aut subsequente salivae cursu. Quam tutum sit unguentum calcis hydrargyri albae, intelligitur ex usu quem hydrargyrus nitratus praestat chirurgis sine periculo movendi salivam. Calces bismuthi, aut zinci, aspersae, seu contritae cum adipe et inunctae cuti, sunt potius ad cutis mulierum gratiam custodiendam idonea, quam remedia ullius vitii, quod morbus dici meretur.

Remedia intus data, vel expellunt, vel emendant humores vitiatos. Purgantia valentiora his aegris non bene conveniunt, quorum vires prius exhauriri possunt, quam causa morbi tolli. Quae lenius alvum solvunt, longo spatio sumta, optime facere censeo adversus cutis morbos. Inter haec sales purgantes usu comprobantur, et aliis medicamentis anteferuntur, cum tuti pariter ac commodi sint; neque enim propterea tanquam aegros agere expedit, verum caetera omnia quemadmodum sanis facienda sunt: nam sales non offendunt ventriculum, neque vires affligunt; quin novi mulierem infirmi corporis, quae, ex usu quoti-

diano aquae marinae per annum, robustior et habilior facta est. An praestent sales naturales, quales sunt in aqua marina, vel in fontibus salinis, an qui cura nostra comparantur dissoluti in aqua pura; an etiam ex his aliquis, magis quam reliqui, humano corpori amicus sit, cutisque sordes potentius tollat; haec cum nulla adhuc experientia comperta sint, proinde omnes in eodem loco sunt habendi. Modus horum salium tantus esse debet, qui bis terve alvum moveat. Interea attendendum est ad vires corpusque aegroti, quae ubi amittuntur, purgantia erunt aliena.

In medicorum libris innumera inveniuntur remedia ad emendandos humores qui cutem foedant. Ex his cortex Peruvianus, quaeque e mercurio conficiuntur, principem locum tenent. Ad vitia leviora, drachmam unam, vel scrupulos binos, eius corticis in pulverem triti, quotidie sumere oportebit per aliquot menses; qui quidem postquam hoc modo diutius sumtus est, non solum cuti, sed etiam universo corpori praesidio fuisse visus est, excitando cibi cupiditatem, concoctionemque, et amovendo assuetas destillationes. Adversus mala inveterata et vehementiora, sexta pars grani hydrargyri calcinati data fuit quotidie tres aut quatuor menses tuto et utiliter. Eodem fere valet octava pars grani hydrargyri muriati dissoluta in aqua, aut in spiritu vini. Haec ratio mendum mihi visa est caeteris anteferenda. Verum

haec, et alia omnia quae expertus sum remedia, interdum vicerunt inveterati cutis affectus.

De Herpete.

Herpes incipit a dolore, qui perseveravit biduum triduumve antequam cutis mutata est: tum vero in conspectum veniunt perexiguæ pustulae, sive vesiculae aqua plene, quae initio aliquantulum pruriunt: interdum quasi zona totum corpus cingunt, unde etiam cingulum morbus vocatus est. Ad haec interdum febris quoque accedit. Pustulae acu aperiendae sunt, partesque affectae emplastro quovis molli contegendae, ne vestes attritu dolorem intendant, qui aliquando parum levis est. Raro fit, ut hae pustulae desinant in ulcera mala; quanquam in corpore senili, aut mali habitus, tarde sanentur. Sed maxima pars morbi saepe restat, postquam pustulae prorsus consanuerint, et cuti color naturalis fuerit restitutus. Quippe interdum subsecutus est dolor pungens et ardens, qui aegrum fatigavit per aliquot menses, vel etiam in annos duos vel tres, neque linimentis quibuslibet oleosis aut opiatis leniri potuit. Loco huius doloris quidam sentiunt cutem torpere. Memini aegrum, in quo herpes ei parti insederat, qua clavicula cum humero committitur, ubi in tantum acuebatur sensus, ut non sine summo dolore brachium movere posset, aut patulum plumam linimento lenissimo tinctam: soluta quadam veste corpus contegebat, cum tunicam con-

suetam induere per triennium non sustineret. Parem tamen huic dolorem alias nunquam mihi contigit videre. Foeminae quinquaginta amplius annos natae claviculam dextram herpes occupavit, febrim movens, et dolores, qui totum brachium torquebant; herpes et febris diu trahebant; dolor quoque cum cute squamosa multos menses perseverabat, donec brachium resolutum esset, digiti assidue tremerent, atque omni motu voluntario interdum carerent; quae mala post tres annos nondum cessaverant, et nescio an per totam aetatem forent mansura.

De Porrigine.

In porrigine, seu tinea, nascuntur squamulae exiguae, quae pruriunt cum capillorum deflexu. Sensim serpit vitium, et tandem totum caput contegit. Interdum altius penetrat in cutem, quam exulcerat, et scabie humida foedat. Aetas puerilis opportunior est huic morbo, quam adulta; et pueri magis quam puellae: ex adultis multas vidi foeminas, sed paucos viros hac peste occupatos. Morbus est contagiosus, et facillime cum aliis communicatur, qui pectinibus, aut pulvinaribus, aut capitis integumentis iisdem utuntur, quive, ut fit inter pueros, aegrorum capitibus sua admovent. Ubi autem haec omnia caute vitata fuerint, novi pueros una esse, et ludere in unis aedibus, absque eo, ut ille qui porrigine implicitus erat, alios inficeret.

Quaedam corpora istius habitus esse videntur, ut humores acres specie porriginis in caput facile transeant. Aliquando tussis cessavit protinus, ut hoc vitium caput occupaverit; quo etiam decedente, morbus in pectus iterum inclinatus est, et spiritus creber et difficilis factus. In sexu muliebri porrigo nonnullas infestavit a prima aetate usque ad mortis diem, neque ulla victus aut mendi ratione tolli potuit. Saepe sanatu difficilis est etiam in pueris qui ex aliis eam contraxerint, quique alioquin integri sint. Ante duos tresve menses raro summovetur; atque in nonnullis post totidem annos vix finitus est.

Principio caput radendum est, et unguento picis superimposito vesica suilla contegendum. Hoc medicamento porrigo intra duos vel tres menses saepe fugatur. Quod si squamulae denuo renascantur, utile erit caput mane et vespere lavare aqua in qua helleborus albus dedoctus est, donec nullae amplius conspiciantur. Ubi malum altius penetraverit, cutemque exulceraverit, tum oportebit alutae illinere et superiniicere unguentum calcis hydrargyri albae; idque tamdiu admove, donec ulcus ad sanitatem fuerit perductum. In corpore sano vix opus est medicamentis intus datis, ubi constat porriginem recenti contagione contractam esse.

De Scabie.

In psora, vel scabie, nascuntur pustulae exi-

guae aqua plenae: licet interdum maiusculae sint cum fundamento rubro, et pure impleantur, fere tanquam variolae. Species utraque cum molestissima prurigine fit; tum praecipue occupat manus, et articulos; interdum corpus fere universum obsidet, praeter faciem, quae nunquam, vel certe rarissime, nullis scabiei indiciis maculatur. Contactu hic morbus facillime contrahitur. Quaedam est etiam eius species, quae quanquam in ipso corpore non genita sit, sed aliunde advecta, quanquam et consuetis remediis primo sanata fuerit, tamen non cessat redire semel vel bis quotannis: atqui alios tunc non inficit, ne quidem eiusdem cubilis consortes; et nescio an ullis medicamentis citius fugari possit, quam per se fuisset finita.

Scabies dicitur oriri ex vermiculis, acaros vocant, qui sub cute agunt cuniculos, unde fiunt prurigo et vesiculae. Hos equidem vermiculos nunquam vidi; sed ut revera subsint, a viris fide dignis accepi, qui eos se vidisse testati sunt. Nescio tamen unde fieri potuit, ut accuratus ille explicator naturae, Johannes Canton, sedulo, sed frustra, illos quaesivisset; quod ab ipso audivi; et memini me idem audivisse ab Henrico Baker, qui in utendo microscopio excelluit, et librum de eo conscripsit, qui in omnium manibus est.

In quibusdam regionibus scabies existimatur salutaris esse, et proinde ocyus sanari non debere. Quod quidem adeo ridiculum est, ut vix mentione, nedum confutatione dignum sit. Hanc

tamen sententiã aequè veram esse censeo, ac illam, quam multi viri graves tuentur, de salubritate podagrae. Inter remedia huius morbi principem locum tenet sulfur, quod specificam, eam aiunt, seu propriam quandam facultatem habet illi medendi. Hoc semper tutum est, et nunquam nimis cito adhiberi potest; itaque omnibus aliis est antefendum. Sed illud odiosum est, quod odor malus, et foeditas huius medicamenti, delicatioribus et fastidiosis offensae esse solent. Unguentum sulfuris locis affectis inunctum quotidie, morbum hunc plerumque tollit intra decem dies. Idem unguentum pedibus solis illitum, aut etiam sulfur indusio aspersum, eodem valere feruntur.

Argentum vivum videtur privatim efficax esse contra hoc vitium. Etenim si cum ovi albo, aut quolibet succo glutinoso conteratur, deinde zonae laneae illinatur, et corpori circumdetur, saepe morbum solvit. Tamen mirum videtur unde evenerit, ut in morbis Venereis, postquam corpus sesquimensum inunctum fuerit unguento hydrargyri, scabies interdum maneat invicta. Dubium quidem est, medicamenta ex hoc metallo laboriosius composita, propria quadam vi fiant antipsorica, an tantum ratione naturae suae acris et exedentis, quae haec, non secus ac alia ulcera impura, sordidas et semimortuas partes consumendo, sanationi apta reddat. Horum pulcherrimum est, quod habet hydrargyri muriati

drachmam unam vel duas ex aquae purae libra; quo partes scabiosae saepius madefieri debent. Unguentum calcis hydrargyri albae tutum quoque est, neque inelegans, et singulis noctibus illinendum est. Nonnulli, qui languore animorum, et doloribus ventris, et vagis, conflictati sunt, postquam per haec medicamenta scabiem depulissent, culpam omnem in argentum vivum contulerunt. Cum vero perpauci eorum qui hac medendi ratione usi sunt, in similia mala inciderint; cumque aliis de causis longe plus argenti vivi corpori admotum fuerit impune; iure licet suspicari languores et dolores ad mercurialia remedia non pertinere.

Radix hellebori albi non infimum locum obtinuit ad sanandam scabiem, cum inodora est, et omni vacat periculo, et in plerisque efficax est. Medicamenta ex illa facta adeo acria esse debent, ut levem excitent dolorem, et non moveant inflammationem. Ad hunc finem, una pars radice in pulverem tritae cum unguenti partibus octo miscetur. Hoc autem unguentum eodem, quo unguentum sulfuris, modo adhibendum est. Iuvat etiam partes affectas bis aut saepius quotidie madefacere aqua in qua haec radix decocta est.

Morbi contagiosi alii, tanquam variolae, et morbilli, hominem semel tantum in vita occupant; alii, velut angina mala, et tussis convulsiva, rarissime, interdum tamen bis invadunt; alii corporum tempestatumque habita ratione incidunt,

ocuiusmodi sunt dysenteria, et febris castrensis, et pestis. Scabies autem, et lues Venerea, nunquam ita desinunt, ut non toties redire possint, quoties contagionis occasiones novae nascantur. Bene itaque factum est, quod ex tribus illis specificis remediis, quae nobis divina bonitate tributa sunt, duo fuerint horum morborum propria. (Quod nisi ita esset, morbi profecto turpes, indies serpentes, tandem universum genus humanum implicuissent.

CAP. XXIV.

De Destillatione.

Necessarium est os, et fauces, et nares, atque oculos assidue madere; quapropter humor manat de quibusdam glandulis, et membranis; qui si modum naturalem excedat, dicitur destillatio, gravedo, vel catarrhus. Hoc profluvium potest oriri vel ex resolutione, et debilitate glandularum; vel ex abundantia nimia humoris, qui hac via commodissime expellitur; vel denique ex pituita tenui atque acri, quae oculos facit debiliores, nares ad assidua sternutamenta irritat, tracheamve ad tussendum cum raucitate, dum istae partes omnes leniter dolent non sine quadam capitis gravitate. Quamdiu destillatio oculos tantum, naresque infestat, sine tussi est: quod si glandulis quae in faucibus sunt, insideat, tum non solum tussis erit importuna interdium, sed tantum humoris noctu destillabit et colligetur, ut aeger excitetur e somno.

fere strangulatus, nec sine magno certamine spiritus vias expedire valeat; interdum forsitan vi humoris oppressus, subito extinctus sit. Tamen in quibusdam, qui subinde expergiscuntur animam agentes, et quasi iamiam strangulandi, is affectus ad spasmum quendam, aut distentionem nervorum, referendus esse videtur, tenuisque illa quam exspuunt pituita, dum mortem instantem propulsare certant, effectus esse potius quam causa mali.

Ubi destillatio paucos tantum dies manet, ad frigus collectum refertur, et fere negligitur. Interdum tamen fit morbus longus, et paucis intermissionibus perseverat, modo aliquot menses, modo annos quatuor; modo redit singulis noctibus per decennium; modo bis in mense per multos annos. Quinque aegris contigit graviter laborare hoc morbo per mensem omni aestate: alium totam aetatem afflixit quotannis: alius nunquam nisi aestate ab eo liber fuit. Malis graviditatis interdum accessit destillatio, et exinde in una foemina perseveravit quatuor annos. Menstruis inordinatis, inter alias valetudinis perturbationes, subsequutum est immodicum salivae profluvium; quod etiam mulieres hystericæ expertae sunt in duos tresve menses, perinde ac si vivo argento delibutae fuissent. Anginam malam interdum excipit importuna spuendi necessitas, quæ aegrum diu fatigavit. Glandulas quæ salivam excernunt, argentum vivum, ut vulgo notum est, privatim sollicitat, et profluvium earum in immensum auget.

occidit igitur quibusdam, qui hoc medicamento modice tantum usi sunt, in menses aliquot sputis molestissimis vexari; interdum etiam ultra triennium. Hydrargyrus cum sulfure similem habuit exitum, et semel, postquam sumtus fuerat quatuordecim dies, salivae cursum excitavit, qui non nisi triennio post supprimi posset. Mulieres haud paucas novi, quae sumtis medicamentis mercurialibus hoc modo afflictae sunt; sed neminem marem esse laborasse memini.

Ex hoc tanto pituitae profluvio corpus atque vires interdum minuuntur; interdum constiterunt, licet id diutius permanserit. Gravitas et dolor capitis toties levantur destillatione copiosa, ut dudum sit morbus, an remedium dicatur; et proinde non temere, et vi, supprimi debeat. Morbus in principio pondus et lenis dolor capitis est, cum febre, et tenuis pituitae destillatione, interdum fit frequentissimus, unde aegri admodum languent; et nonnulli quidam inciderunt in febrem lentam, et sudores nocturnos, et fastidium, et ulcera pulmonum, et tabem, quae biennio vel triennio interceperunt.

Destillatio, quae diu infesta fuerat, anno aetatis septuagesimo sponte sua finita est. Interim paralysi supervenienti cessit. Saepius desiit et asthma. Medicamenta reprimentia parum proceperunt. Cursus humoris extrinsecus, vel intrinsecus, ab auribus, minuit destillationes, sive casu fortuito, seu per emplastrum cantharidis ex locis vi-

cinis elicitus sit. Pilulae, quas catarrhales vocant, ex opio atque aloë compositae, saepe quidem aver-
tunt hos molestissimos humores, inflammationem-
que leniunt. Ubi os dolet, mucilago seminum
Cydonii mali iucunda est, et iuvat. Adversus
glandulas resolutas, aqua gargarizandum est in qua
cortex quercus decoctus est cum exigua parte alu-
minis. Podagra supervenit sine profectu. Unus
et alter, cum aliis de causis sumerent drachmam
corticis Peruviani quotidie per multos menses,
interea liberati sunt gravedine et destillationibus,
quibus maiorem in modum vixerant obnoxii.

C A P. XXV.

De Devorandi Difficultate.

Facultas devorandi variis de causis modo de-
bilitatur, modo prorsus amittitur. In hysterici
morbi impetu saepe fit, ut nihil quicquam fauces
intrare possit. Difficultas quoque cibum aut potio-
nem capiendi in nonnullis foeminis semper secuta
est graviditatem. Malum aliud est, in quo inter
edendum fauces repente occludantur, et nihil
transmittere possint, donec post ingentes conatus,
qui multum pituitae, cibi vero comesti nihil ex-
pellunt, brevi ad pristinum statum reversi sint.
Huiusmodi spasmus nonnullos saepe infestat; nul-
lum tamen certum circuitum habet; sed modo
redit post decem dies, modo ter quaterve in anno
per multos annos. Musculi quoque eius partis in-
terdum paralytice resolvuntur, et devorare neque-

ant. Omnium vero periculosissima est ista faucium angustia, quae initium habet ex tumore glandularum strumoso, qui in nulla parte oesophagi non potest oriri. Is tumor in dies auctus tandem penitus intercludit viam ad ventriculum; aut aliquando spiritum in pulmones attrahi prohibet.

Vitia modo memorata viam per fauces omnibus rebus pariter impediunt. Alia autem sunt, quae non omnes, sed paucas tantummodo res excludunt. Nonnulli facile devorant omnigenos cibos praeter carnem: alii potionem, non autem cibum, assumere possunt; et, quod magis mirum est, in aliis facilis et aperta via cibus est, dum potiones aegre descendunt.

Contigit mihi identidem videre mala praefecta, nullum tamen proprium eorum remedium invenire potui. Nihil visum est praestabilius, quam istam medendi viam insistere, quae maxime conveniret morbis ad quos singula proxime accedant. Omnibus nota est utilitas eorum quae in lavum infusa nutriunt; quorum beneficio vires et vita ad tempus sustineri possunt, donec quaedam ex his malis vel recesserint, vel sanata sint.

Puella annos duos et dimidium nata devoravit nummos duos aereos, quorum alter pollicis latitudinem excedebat, alter erat paulo minor. Male se habuit puella septem dies, et difficulter transivit cibos; quippe fauces, ut credibile est, debebant a vi facta, dum nummi per eas eluctarentur; deinde autem bene valuit. Oleum ricini saepe

datum est; et nummi vigesimo nono die a quo devorati erant, cum stercore deiecti sunt, neque fuerunt omnino exesi aut rubiginosi.

C A P. XXVI.

De Diabete.

Diabetes est morbus paulo rarior; quamobrem historia eius in libris medicorum manca est, et obscurior. Neque quod in aliis desideratur, ex propria experientia, ut vellem, haurire potui. Vix mihi oblata est occasio videndi aegros viginti, quorum morbus appellatus fuit diabetes; et interdum parum recte ad hunc titulum relatus est. In febribus mortiferis semel atque iterum vidi urinam frequentissime et copiosissime reddi, cum siti insedabili. At plerumque hoc urinae profluvium tale est, ut omnino in morbis longis numerandum sit. Primum eius indicium est sitis insolita, cum lingua aspera et sordibus tecta, et in ore gustu malo; tum cibi cupiditas perit, arteriae concitantur, vires et corpus amittuntur, et calor urens cutis est sine levissimo sudore: postremo urina super potionum modum mingitur, et saporis mellei est.

In hominibus sanis urina solet quinta parte minor esse, quam potiones: nec tamen raro fit, ut in diem unum multo parviori copia reddatur; interdum per idem spatium super potionum modum mingitur, et simul fit diluta ac tenuis, colore, sapore, et odore fere omni expers. Urinam in

diabete omnes norunt esse plerumque saporis mel-
 leei; tamen in nonnullis, qui vero diabete labora-
 bant, urina mihi visa est potius fatua, et gustu
 omni destituta, propter abundantiam potionum
 quibus se ingurgitaverant. Novi urinam in diabete
 huiusmodi modum potionum implevisse. Hic morbus
 modo gravior, modo levior, in tres annos et am-
 plius perseveravit; et denuo reversus est postquam
 miri prorsus visus esset.

Profluvium urinae diabete nomen dedit; at-
 que in illo naturam eius contineri existimatur: nes-
 cio vero sitisne sit maxima morbi pars. Tamen
 neque glandulas salivales, neque renes in culpa
 esse crediderim: verum ambo haec signa oriri ex
 potius corporis perturbatione a gravi quodam malo
 profecta, eoque in diversis hominibus fortasse di-
 versis *. Seniores, et infirmiores, praecipue op-
 portuni sunt huic affectui; in quibus profecto
 aetas, aut morbus vires adeo attrivit, laesitque,
 ut mors brevi subsequenda sit, nimiamne, an vix
 illam urinam aegri reddant. Qui enim morbus
 aliquantisper dubius fuerit, potest tandem re le-
 vicula impelli, ut sub specie diabetis, potius quam
 hydropis, aliusve affectus, hominem tollat: neque
 porro si is posset sanari, continuo aeger conva-
 sceret.

** Iuvenis, qui vero diabete iam annum laboraverat, febre
 acuta correptus periit. Cadaver, cum diligentissime
 lustratum est, nihil fere contra naturam exhibuit. Re-
 nes erant sanguine vix coacto paulo pleniusculi, et ve-
 sicula fellis prorsus vacua. E.

Quod si diabetes non fuerit renum vitium, sed indicium potius morbi haerentis in parte aliqua ad vitam necessaria, praesidium petendum erit ab illis medicamentis, quae morbo principi medentur, quo sublato ipse finietur. Quamobrem parum opis esse putaverim in alumine, aut cortice Peruviano, aut acido vitriolico, aut aqua Bristolica, aut aqua calcis, aut vomitu frequenti, aut omnino aliis quibusvis remediis, quae habent facultatem firmandi renes, quibus robur suum deficere existimatur.

CAP. XXVII.

De Diarrhoea, sive Alvo fusa.

Alvus fusa oritur ex variis causis, quarum pleraeque vacant periculo, et promte summoventur. Interdum inducitur ab illa corporis facultate, quae ubique praesto est, et quicquid nocet conatur expellere. Non solum cibi et potiones natura sua vel copia peccantes, et ventriculum gravantes, per alvum emittuntur; sed multis quoque aliarum partium vel totius corporis malis, qualia sunt initia febrium et pestilentiarum, in intestina versis, periculo corpus subtrahitur.

His perpensis, utiliter praeceperunt medici cavendum esse a coërcenda alvo, quae recenter ac sua sponte fluxerit; et saepe praestare ut manus demus naturae, et medicamentis quoque deiectiones moliamur. Igitur radix rhabarbari meritas laudes obtinuit in hoc morbo. Loco autem rhabarbari,

barbari, non raro dedi salis purgantis drachmas
 duas vel tres, qui mihi visus est non minus pro-
 fuisse quam rhabarbarum, et interdum fuisse uti-
 lior; quippe ocysus et efficacius humores nocentes
 expellit, et minorem nauseam movet. Vomitus
 convenit, ubi nausea molesta est; quae si nulla
 esset, is erit supervacuus.

Postquam alvus rite purgata fuit, quanquam
 nihil quod nocuerat restet, intestina tamen infirma
 saepe manent, unde fiunt inflationes, cruditas,
 ardor atque acor ventriculi, metusque morbi re-
 versuri. Creta, atque pulvis e testis piscium,
 emendant quidem acorem: sed in his parum auxi-
 lii est ad alvum firmandam, ubi morbus est paulo
 gravior, et remedia postulat. Longe efficaciora
 sunt nux moschata, cortex cinnamomi, cortex
 granati, et alia huiusmodi; neque vero haec sem-
 per satis sunt, nisi misceantur cum gummi Ara-
 bico, amylo, aut opio, quibus intestina commo-
 tiora deliniantur. Medicamentum quod habet
 testarum ostreorum semidrachmam, corticis gra-
 nati grana quindecim, nucis moschatae semiscru-
 ppulum, et tincturae opii guttas tres, ex potione
 quolibet sumtum semel aut bis quotidie, multum
 prodest adversus longas et inveteratas deiectiones;
 sed in recentiore ac vehementi morbo illud sexta
 quaque hora dare oportebit. Ad haec, multum
 juvabit tinctura opii potioni cuilibet instillata sic,
 ut sumantur guttae tres vel quatuor post singulas
 deiectiones liquidas. Tincturae etiam opii guttae

viginti, aut quadraginta, ex aquae in qua semen Cydonii mali, vel amyllum decoctum est, unciis quinque, in alvum utiliter infunduntur. Gummi quoque Arabici uncia dissoluta in aqua vel pura, vel adiecto lacte, utiliter hauritur quotidie. Postremo, adipis ovilli cochlearium ex lactis calefacti unciis quatuor liquatum, bis in die epotum proficit et ad sanandum, et ad nutriendum aegrum.

Ratio medendi quam proposui, saepe quidem respondet, ubi morbus sanabilis est, et ubi omnino opus est medicamentis. Alvus autem fusa interdum inveteravit, et multos annos omni vacavit periculo, nec non levissimis ex causis subinde reversa est per hominis aetatem. Cuidam alvus fluxit vigesies quotidie per tres menses, valetudine secunda. In huiusmodi casu difficile est, et vix expetendum, tollere hoc incommodum potius quam morbum, cum interdum vim habeat insignem tuendae sanitatis. Quamdiu nec cupiditas cibi, nec corpus, neque robur amittuntur, ibi cunctatio, et remedia pauca, et mitiora, rem aegritutissime restituent. Quod si accesserit cibi fastidium, et macies, alvus sine mora comprimere debet.

Inter varias ventris fusi causas, quaedam, sed paucissimae, morte sola terminantur, postquam vicerint omnigena remedia, quae vel medici, vel circulatorum proposuerint, ut fit in morbis ubi revera medicinae locus non est. In quibusdam ex his aegris glandulae mesenterii, et intestinorum, in scirrhus induruerunt. In aliis anatomici

expertissimi viscera abdominis omnia diligentissime rimati sunt, et nullum morbi vestigium potuerunt deprehendere. Quidam in hoc casu praesidium petunt a navigatione, et ab aqua Bathonica, quae spem meam toties fefellerunt, ut in iis parum auxilii esse putaverim, aliasque sanitatis recuperandae causas subfuisse, ubi aeger his restitui visus est.

CAP. XXVIII.

De Nodis Digitorum.

Nunquam rite intellexi naturam tumorum, qui interdum nascuntur, ad pisi magnitudinem, prope tertium digitorum articulum. Nihil certe illis commune est cum arthritide; quoniam in multis reperiuntur, quibus morbus ille est incognitus. Per hominis aetatem manent; vacant omnino dolore, neque spectant ad exulcerationem. Proinde deformitas maior est, quam incommodum: quamquam motus digitorum aliquantulum impeditur.

CAP. XXIX.

De Doloze.

Dolor plurimis quidem morbis accedit, tum interdum ipse per se morbus est; nomenque habet modo ex certo circuitu quem servat; modo ex corporis parte quam occupat, velut hemicrania, lumbago, sciatica, et capitis dolor. Caeterae quoque partes omnes, quae sentiunt, dolori sunt obnoxiae; cum vero is neque frequens, neque vehemens esse consuevit, proprium vocabulum

non habet. Rarius quidem fit, tamen interdum corpus universum in dolore vidi, et acerbo, et longo, sine tumore, aut inflammatione, aut cutis colore mutato. Isque in uno loco permansit modo aliquot menses, modo annum, modo annos decem, quindecim, sedecim, septendecim, denique quatuor et viginti, et etiam triginta.

Dolores longi plerumque leviores sunt: veruntamen nonnulli, qui per annos aliquot perseverarunt, identidem in tantum saevierunt, ut aegre tolerari possent. Sexus uterque illis opportunus est, foeminae tamen magis quam viri, tum maxime iuniores, et infirmiores, et praegnantes. Pectus, et hypochondria, praecipue invadunt huiusmodi mala: et quanquam interdum parte corporis aliqua interius corrupta nascantur, interdum tamen reperiuntur, ubi pulmones, hepar, atque alia viscera extra omnem culpae suspicionem sunt. In plerisque his aegris nulla certa doloris causa investigari potuit; in aliis ortus est a terrore, et moerore, et manifeste revocatus fuit auctusque a qualibet mentis perturbatione.

Saepe quidem parum aut nihil praesidii fuit in lavatione frigida, fomentis, linimentis sine tinctura opii, vel cum illa, emplastris calefacientibus, aut exedentibus, cucurbitulis, vomitu, purgantibus, et quae movent sudores; setacea quoque, et abscessus voluntarius prope partem affectam, perinde supervacua fuerunt; item aquae Bathonicae, et navigatio marina. Credibile est sedem

huius affectus haud magnopere laedi, siquidem
 tamdiu perseveret malum sine decoloratione cutis,
 et sine tumore: tamen ubi emplastrum cantharidis
 superimpositum fuerat, semel atque iterum secuti
 sunt furunculi mali, et metus gangraenae: quam-
 obrem corpus nequaquam sanum fuisse censeo;
 licet, excepto dolore, nulla alia morbi indicia fue-
 rint. Ex iis quae extrinsecus adhibentur, saepius
 defellerunt emplastra vel cantharidis, vel cymini,
 et lavatio frigida. Tincturae opii guttae decem,
 vel plures, intus datae aliquoties profecerunt ad
 sanitatem; et cum hac quidam miscent lactis am-
 moniaci cochlearium, vel quartam partem grani
 antimonii tartarisati. Succus cicutae nonnun-
 quam visus est doloris impetum minuere; atque
 interdum profuerunt cucurbitulae. Omnis alia
 sanguinis detractio, ut et vomitus, et purgatio
 alvi, est aliena.

Praeter illos dolores, qui vel assidue urgent,
 vel incertis temporibus redeunt, alii sunt, quo-
 rum accessiones haud minus certum circuitum ha-
 bent, quam febres tertianae, aut quartanae. Tales
 novi infestare intestina, ventriculum, pectus,
 lumbos, brachia, et coxas; hi tamen sunt rario-
 res. Caput autem, et facies, saepe affliguntur
 dolore qui ex certis intervallis revertitur; et non
 minimum est ex iis malis, quibus vita humana
 opportuna est. De hoc vero a me supra prae-
 ceptum est *.

* Caput 18.

CAP. XXX.

De Doloribus vagis.

Dolores vagi cognati sunt rheumatismo; a quo tamen discerni possunt, quia neque tumor est, neque color cutis mutatur. Illos maxime affligunt quos debilitaverunt morbi diuturni, ingentes sanguinis profusiones, iniuriae, duri labores, vel senectus. Diu permanere solent, et in annos fiunt paulo molestiores. In perpaucis movendi facultas, indies minor, tandem prorsus amittitur. Balneum, et vestis tepidior, interdum iuvant; medicinae vix locus est.

CAP. XXXI.

De Dysenteria.

Dysenteria saevit in castris, raro autem illos infestat, qui loca salubria incolunt; licet hos quoque epidemica facta interdum invadat, tum maxime iuniores, vetulas, et homines infirmiores, inter quos strages magnas edit. Signa huius pestis sunt, desidendi frequens cupiditas cum dolore gravi, deiectio autem crebra exigui mucii inodori subcruenti, et interdum sanguinis, sine allevamento, et dolor infra umbilicum, quibus accedunt febris, cibi fastidium, vigilia, et in nonnullis vomitus.

Quandoquidem hic morbus ex aëre castrorum impuro nascitur, et contagione cum aliis communicatur (raro tamen duos in unis aedibus hoc morbo aegrotantes vidi); munditia, atque aër pu-

rursus maximi erunt et ad aegrum restituendum, et
 ad tuendam sanitatem assistentium. Ratio me-
 dendi quam didiceram saepe profecto fefellerat
 et spem meam leniendi dolores, et impediendi, ne in
 gangraenam intestinorum mortiferam desinerent.
 Cogitanti itaque mihi de natura dysenteriae, visa
 est contineri in humoribus vitiosis inclinatis in in-
 testina, quae inde vehementer perturbata sunt, et
 in motus inordinatos coniecta, sic ut intus laeden-
 tia exitum non habeant. Cum vero nullum me-
 dicamentum alvum promptius solvat, quam sales
 purgantes (quorum praecipuus est magnesia vi-
 triolata), cum quoque facultatem habeant aliquam
 componendi motus intestinorum perturbatos, cum
 rarissime nauseam et vomitum moveant; spera-
 bam fore, ut non contemnendam opem praebe-
 rent. Primum itaque dedi magnesia vitriolatae
 drachmam sexta quaque hora; qui brevi levabat
 dolores, etiam priusquam alvus purgata est. Aliis
 maiorem modum imperavi, ex quo non solum
 fructus praesens perceptus est, verum, deiectioni-
 bus copiosis excitatis, ipsa morbi causa sublata est.

Postquam vis morbi transierit, aeger quan-
 quam in tuto sit, tamen vexari solet molesta de-
 sidendi cupiditate, propter levem dolorem, qui
 in recto intestino manet. Huic optime medetur
 iusculi ovilli pinguis selibra, cui instillatae sunt
 tincturae opii guttae viginti, in alvum infusa: at-
 que hac sola occasione censeo opium in hoc morbo
 tuto et utiliter dari posse. In principio certe,

ventre nondum purgato, maxime noceret. Singultus accessit, et aqua foetida deiecta est, ubi dysenteria morte finita est.

C A P. XXXII.

De Ebriosorum malis.

Ebriosi solent tandem pati fastidia, vomitus matutinos, inflationes, maciem, debilitatem, tremores, dolores ventriculi, icterum, hydropem, memoriae et attentionis defectionem, vertiginem, alvum fusam, somnosque breves et tumultuosos.

Remedia tempestive adhibita, et vita dein sobrie continenterque acta, plurimum valent ad salutem ebriosorum restituendam. In plerisque morbis optabilius est, ut extrinsecus, quam intus nascantur. Cum tamen intemperantiae maxime se dedunt, qui viribus plurimum praestant; illis salus quoque multo facilior est, propter firmam corporis constitutionem, cui nimium confidentes in hoc vitium inciderunt.

Aqua Bathonica praecipue efficax est in mendendis ebrietatis malis; modo prius assumatur, quam iecur et ventriculus altius vitium contraxerint. Neque enim nascenti morbo tantummodo occurrit, sed magnam quoque vim habet ad penitus submovendam istam valetudinem, nam amicissima est stomacho, quem tepore suo benigno fovet, recreatque, tollens omnem illum frigoris sensum, et angorem, qui imperiosissime cogunt ebriosum ad potiones meraciores confugere, ut ad

breve saltem tempus sopiantur lenia quidem illa,
sed intolerabilia tormenta. Prosunt etiam medi-
camenta modice calefacientia, quae alvum tardam,
cibi opus est, solvant; et amara, quae stomacho
infirmo robur atque cibi cupiditatem concilient.

CAP. XXXIII.

De Epilepsia.

Epilepsia, pari iure ac arthritis, opprobrium
medicorum dici potest: nam ante tempora Hip-
pocratis nota est, et tamen certam medendi ratio-
nem nondum recepit. Ingens numerus remedio-
rum ad epilepsiam, quae in libris medicorum in-
veniuntur, et in omnium ore sunt, suspicionem
morbi insanabilis movere debet. Quam difficul-
ter removeatur, sive prudentibus consiliis eorum
qui famam suam amittere timent, seu temerariis
avis aliorum qui existimationem aliquam obtinere
student, manifestum esse puto ex eo, quod per-
severavit usque ad mortem in multis, quorum ea
fuit fortuna, ut possent, ea vero desperatio et
credulitas, ut vellent nihil non experiri. Ratio
conge plus fecit, quam medicina, ad mitigandum
hoc herculeum malum; quippe obsoluerunt tan-
dem fabulae illae fictae et commentitiae, quibus
popinio hominum hunc morbum praeter omnes
accumulaverat; nec diutius timor et superstitio,
praeterquam quas habet ipse calamitates, suas ad-
ducunt. Iamdudum cessarunt homines epilepsiam
ad iram daemonis referre, tantumque illam por-

tentum existimare, ut propterea comitia dissolverentur, et quicquid negotii in manibus esset, continuo omitteretur: neque coniuncti et amici epilepticum iam, ut olim, horrent atque refugiunt, et aegrum gravius affligunt quam vehementissimae morbi ipsius accessiones *.

Accedente epilepsia, aeger concidit sine sensu, et mox muscoli universi motibus inordinatis sine voluntate agitantur, tanquam omnes corporis vires maximo conatu contenderent capitale quoddam periculum propulsare. Hae vehementes nervorum distentiones interdum urinam, stercus, aut semen expellunt, et simul ex ore spuma movetur, quae cruenta est, ubi lingua mordetur, quod saepe evenit. Haec miserrima rerum facies spectaculum exhibet omnibus horrorem incutiens, maxime vero amicis et propinquis; licet ipse nihil sentit.

Morbus non paucos invadit sine ullo signo antecedente. Alii venientem praevident, et hor-

* Veteribus in more positum erat, si quis epilepsia concidisset, ut adstantes despuerent, modo in sinum suum, modo in aegrum; sive ut omen a se averterent, sive ut huius incantamenti beneficio aeger citius ad se rediret. *Morbus qui sputatur.* Plaut. Captiv. act. III. sc. IV. 18. *Eum morbum mihi esse, ut qui me opus sit insputarier.* v. 21. *Multos iste morbus macerat, quibus insputari saluti fuit.* v. 22. *Μαινόμενον τὸ ἴδαν, ἢ ἐπιληπτικόν, φριξάσ εις κόλπον πύσσαι.* Theophrast. *Περὶ Δεισιδαιμονίας.* Hinc nonnullis in mentem venit, S. Pauli *spinam in carne*, 2 Cor. XII 7. et *infirmitatem carnis*, Gal. IV. 13. et *tentationem in carne*, v. 14, fuisse epilepsiam; et, proinde, verbum *ἐξεπύσασαι*, v. 14, non metaphorice, sed proprie usurpari. Vide Plin. XXVII. 7. et Theocr. Idyll. 7.

ent. Sed is horror pensatur spatio quod conce-
 ditur tutandi se a periculis quae aliis impendent,
 qui improvise corruunt. Non raro accidit, ut ini-
 tio praesentiantur morbi accessiones, quae postea
 haec opinantes prosternunt. Signa epilepsiae remo-
 tiora sunt iactatio, perturbatio animi, capitis do-
 lor, vertigo, aliaeque perceptiones molestae,
 sopor, et ventriculi debilitas; atque haec nonnul-
 los fatigant biduum, triduumve, priusquam conci-
 dunt. Alia paucas tantum horas accessionem prae-
 cedunt; cuius generis sunt levis mentis alienatio,
 vapor e ventriculo ad caput assurgens (qui etiam
 nonnullos percellit gustu et odore moschi), dolo-
 res intestinorum, torpor in brachiis et manibus,
 perceptio nescio quae ex artibus extremis sensim
 per universum corpus diffusa, caligines oculorum,
 vox balbutiens, et inexplanata, aut ex toto sup-
 pressa, singultus, deiectiones alvi, vomitus, do-
 lor dorsi, extremarum partium frigus, pituitae
 profluvium, facies nigrescens, et spirandi diffi-
 cultas; postremo animae defectio levis, quae modo
 antecedit iustam epilepsiam, modo quasi vicem
 eius implet, dum nihil aliud aeger sentit praeter
 oblivium quoddam et delirium adeo breve, ut fere
 ad se redeat, priusquam ab adstantibus animadver-
 tatur. Hae sunt accessiones omnium brevissimae.
 Alias manent haud minus quam horae quadrantem,
 et interdum tres horas. Memini unum fere exa-
 minem iacuisse per tres dies cum crebris distentio-
 nibus, qui tandem resipuit, et restitutus est.

Vertigo, et maculae nigrae ob oculos volitantes, a quibusdam epilepticis vix unquam absunt.

Spatia inter accessiones sunt incertissima. Leviores redierunt saepius eodem die, aliae invadunt semel quotidie, vel quater in mense, vel singulis mensibus, vel bis tantum, aut ter in anno. Epilepsia conquievit tredecim annos, et postea gravior et crebrior reversa est. Intermisiones fuerunt etiam his diuturniores, verum cum istiusmodi minis recidivi mali, quae palam facerent, causam eius non esse sublatam. Finita distentione membrorum, cum aeger iam coeperit se recipere, in somnum incidere consuevit, qui durat horam unam, aut plures. Vix licet dubitare quin hic somnus recreet hominem motibus tantis fatigatum; et unum tantummodo vidi qui se illo laedi putaret, ideoque moneret adstantes, ut eum excitarent, quoties eo tempore dormiturus videretur. Constat quidem epilepsiam, perinde ac alios morbos qui nervorum proprii existimantur, per quietem vires acquirere; et proinde accessiones eius initio plerumque fiunt noctu, dum membra alto sopore vinciuntur.

Accessiones tantillum nocent quibusdam epilepticis, ut cum ipsi nullius rei conscii fuerint, aegre persuaderi possint se aliquid eiusmodi passos esse. Alii autem postquam resipuerint, experti sunt gravitatem universam et torpores in aliquot horas, vel capitis dolorem, nauseam, vomitum, languorem, et sensuum stuporem, sic ut mens et

memoria vix prorsus restitutae fuerint post tres dies. Igitur haec singulas accessiones sequuntur. Verum, ubi morbus inveteraverit, labefactat memoriam, aciem ingenii hebetat, corpus universum debilitat, vel accessit paralytin, aut apoplexiam. Alii cito experiuntur quaedam ex his malis; alii postquam diu cum morbo conflictati sunt, illaesi supersunt. Itaque nonnullis contigit esse tam felicibus, ut, quanquam epilepsia implicari coeperint, dum pueri essent, et crebris deinde accessio- nibus vexati sint, ad summa tamen reipublicae munia, summosque honores, propter eximias ingenii dotes evecti fuerint. Nemo nescit Iulium (Caesarem, belli pacisque artibus excellentem, fu- isse epilepticum.

Uterque sexus, atque omnis aetas, huic mor- bo obnoxius est: eo tamen saepius laborat aetas puerilis, et promptius sanatur. Foeminae, cum sint viris infirmiores, videri possent etiam epilep- siae opportuniore; quod tamen contra fieri obser- vamus. Quanquam enim pueri et puellae iuxta corripantur, foeminae tamen rarius, quam viri in eam incidunt. Distentiones membrorum adeo familiares sunt infantibus ab ipso natali die ad ter- tium vel quartum annum, ut credibile est eas oriri ex variis levibus causis, quales sunt, cruditas, lumbrici, dolores repentini intestinorum, et alia- rum partium. Proinde semper spes erit, distentio- nes infantum, ubicunque fiunt, non deberi iisdem obstinatis principiis, quibus adultorum epilepsiae.

Multi ante quartum annum subinde hoc modo laborarunt, in quibus nullum mali vestigium postea repertum est. Morbus comitialis plerumque incipit tempore pueritiae, aut adolescentiae; sed nec adulta aetas, neque senectus, prorsus securae est. Nullo enim vitae anno prima eius accessio non contigit. Novi qui coeperunt esse epileptici quolibet anno inter vigesimum et quinquagesimum: paucos morbus adortus est anno sexagesimo; et unum vidi qui in eum incidit anno septuagesimo quinto, et deinde singulis annis concidit, in sex septemve annos, et forsitan usque ad mortem.

Opinio inveteravit in medicorum scholis, eas epilepsias, quae in pueritia nascuntur, saepe finire circa pubertatem: sed hoc mihi usus nequaquam confirmavit. Equidem hac occasione ne unum sanatum fuisse memini; at plures eo ipso tempore in morbum incidisse. Ubicumque inhaeserit ultra quintum vel sextum annum, ibi diu trahere consuevit, et ad adultam aetatem fere permansit. Quamobrem, si satis considerem, me iam quadraginta amplius annos inter aegros versatum de hac re sententiam ferre posse, crediderim vel ingeniosorum hominum commentum, vel vanas amicorum spes, huic opinioni ortum dedisse, potius quam ipsius morbi naturam. Sicut autem nullum est vitae tempus, quo hoc malum non inceperit; ita vix est ullum, quo non desierit *. At potest

* Nicolaus Leonicensis a cunabulis ipsis ad trigesimum annum morbo comitiali adeo laborabat, ut pertaesus vitae

edubitari, secunda valetudo, medicinae, an corporis beneficio, contigerit; etenim nulla sunt remedia, quae non toties spes nostras fefellerunt, ut incertum sit quantum illis debeatur, ubi visa sunt profuisse.

Epilepsia est ex illis morbis, qui a quibusdam parentibus in posteros suos transferuntur: cum tamen interdum vel sanata fuerit, vel sponte sua reliquerit quos diutius occupaverat; iure sperari potest vim eius saepe adeo debilitari posse et exhauriri, ut nihil mali supersit, cuius alii fiant haeredes. Quod quidem usu venire constat; quoniam plurimi vixerunt ab hoc paterno malo proorsus liberi.

Instante accessione epileptica diligenter providendum est, ut omnes illae vestium partes, quae collum cingunt, quamprimum laxentur; hoc enim interdum adeo tumet, ut strangulationis metus impendeat. Deinde in cubili aeger collocandus est, et observandus ne se devolvat, artusve laedat, dum inordinate iactantur. Quicquid ultra moliuntur adstantes, vel supervacuum erit, vel alienum. Huiusmodi sunt potiones in os vi ingerere, sales volatiles acres naribus admovere, tempora fricare, pugnum arcte compressum magno conatu dilatare. Aegris multo adhuc peius consulunt, qui venam

pene sibi manus afferret: sed post trigesimum annum plane eo malo defunctus, omnibus membrorum ac sensuum officiis integer, nulla morbi suspitione ad quartum et nonagesimum annum pervenit. — *Jos. Scal. ep, 19.*

incidunt; quod corporis quidem vires minuat, non autem morbi. Remedia nunquam opportune adhibentur, nisi inter accessiones. Cum vero nulla certa adhuc reperta sunt, quibus multum confidere possimus, praestabit plerumque nihil aliud moliri, nisi ut vires quam maxime integrae et incolumes conserventur. Quod si vel medicina, vel ratio victus id effecerit, ut habitus corporis firmior fiat, sperandum est facultatem illam sui conservatricem valentio rem fore, et epilepsiae causas promptius amoturam esse.

Radix valerianae sylvestris primum locum inter epilepsiae auxilia diu tenuit, et nonnullis prodesse visa est; aliis tamen drachmae quindecim in singulos dies datae fuerunt cum exiguo, aut nullo fructu. Podagra superveniens nihil ad sanitatem contulit; neque multum laudare possum emplastra cantharidis, aut alias exulcerationes, neque lavationem frigidam, nec aquas ferreas. Argentum vivum et extrinsecus, et intus adhibitum est; quod, si uni aegro aliquantulum opitulabatur, alteri certe erat inutile. Duo epileptici ab omni cibo animali abstinerunt, et sanati sunt: tertius eadem vivendi ratione incassum usus est. Aquae in qua radix valerianae decocta est unciae quinque cum moschi drachma in alvum infusae sunt octava quaque hora per tres dies, et restitutus est epilepticus qui toto hoc spatio fere exanimis iacuerat, nisi quod subinde convelleretur. In aetate puerili membrorum distentiones saepe
fiunt

fiunt ex lumbricis, aliisque intestinorum affectibus, quibus proinde medicamenta leniter purgantia auxilio erunt, et causam mali expellent. Alios epilepticos purgare alienum est. In quadam puella accessiones semper secutae sunt alvi solutionem. Vomitus quoque, et sanguinis detractio nocent. Cum epilepsia vires acquirit per somnum, illi nimis indulgere impune non licebit. Diligentissime cavendum est ab omni occasione terroris, qui possit non solum accessiones arcessere, verum ipsum morbum creare. Intemperantia, et praecipue immodicus Veneris usus, alit, nec non interdum genuit hunc morbum. Cum vero innumera remedia, quae in libris medicis celebrantur, usu multo fretus magnopere laudare non possum; satius esse puto tacere, et famam eorum aliis tuendam relinquere.

CAP. XXXIV.

De Erysipelate.

Rubor subitus cutis cum aliquo tumore, calore, et dolore, et interdum cum vesiculis aqua plenis, vocatur erysipelas. Cum his plerumque febris est, cuius signa consueta antecedunt die uno, vel duobus, vel etiam tribus. Erysipelas fere occupat faciem, caput, collum, vel humeros; graves tamen inflammationes aliarum partium exulceratarum, tum maxime crurum, erysipelas quodammodo referunt, atque eo nomine appellantur.

Hoc vitium incipit a macula exigua rubra in aliqua ex iis partibus quae memoratae sunt, et sensim serpit, atque ex alio in alium locum transit. Interdum ea cuti noxa imprimitur, ut brevi fiat ulcus non nisi tarde ad sanationem venturum. Ex vesiculis praedictis, ubi numero plures fuerint, nascitur, postquam ruptae sint, exulceratio dolens, quae ceratum lene postulat, quo a vestibus defendatur. Praestat autem nihil omnino imponere super loca affecta, nisi exulceratio poposcerit. Febris, quae fere semper accedit, maior est quam pro modo inflammationis, et non raro in tantum urget ut mens turbatur; nonnunquam etiam mors consequitur; quam subesse indicabit pallor earum partium, quae antea rubuerunt. Quorundam corpora ita videntur comparata, ut maiorem in modum subiiciantur huic morbo, et crebros reditus experiantur. Et sane quicumque illo semel tentatus fuit, eum puto deinceps esse repetenti opportuniorem. Quidam erysipelate semel aut bis quotannis correpti fuerunt per multos annos. Nequaquam securi sunt iuvenes, et robusti; multo tamen saepius tentantur, qui aetate sunt inclinata, quorumque valetudo coepit conquassari. Erysipelas nunquam, quantum scio, humores supervacuos evocando, ad valetudinem profuit; quin contra illi officit.

Natura huius morbi videtur esse plerumque maligna, ut medici loquuntur, potius quam inflammatoria: id est, neque postulat, neque ferre

potest, purgationem alvi, aut sanguinis detractio-
nem. Vidi res aegri in peius ruere, non sine
periculo, non solum ex incisa vena, sed etiam ex
dato medicamento, quod leniter alvum solvit, id-
que cum morbus iam inclinatus esset. Non
tamen negaverim eam interdum inflammationem
esse, ut opus sit sanguinem detrahere, quod in
hoc casu prospere cedit. Sanguis etiam ultro
erumpens ex naribus salutaris fuit. In hac, ut
in omnia alia febre, oportet vigilare, et quicquid
mali oritur, idoneis remediis succurrere. Quod
si nihil eiusmodi acciderit, convenient decocti
corticis Peruviani unciae binae cum tincturae opii
camphoratae guttis triginta, vel tincturae opii
guttis duabus, octava vel sexta quaque hora
sumendae.

C A P. XXXV.

De Essera.

Tumores interdum nascuntur in cute similes
eorum, qui fiunt ex urticae contactu, unde apud
Anglos nomen habent. Recentiores medici *essere*,
vel *esseram*, appellarunt; qua voce Arabes desig-
narunt quoddam vitium cutis, et fortasse hoc
ipsum de quo sermo est. Hi tumores interdum
duos, vel tres pollices longi sunt, tanquam vibri-
ces a scutica factae. Prurigo vix patibilis accedit.
Repente oriuntur, maxime ubi corpus fricetur,
aut unguibus leviter scalpatur. Raro perseverant
multas horas, plerumque exiguum tantum horae

partem. Nulla pars corporis secunda est ab hac peste; si qua autem vehementius affecta fuerit, ea tota tumet, ut fit praecipue in facie, brachiis, et manibus. Essera alia atque alia cutis loca infestare consuevit in horam unam, aut plures, bis terve in die, et interdum fere totum diem, in dies paucos, vel aliquot menses; novi quos male habuerit biennium cum paucis intermissionibus; alios vero septem, aut etiam decem annos vexavit.

Pueri et adulti, mares et foeminae, pariter obiiciuntur huic morbo; item quibus integer corporis habitus est, non minus quam quorum valetudo infirma aut adversa est. Quidam sani fuerunt vigente hoc affectu; quo recedente, dolore capitis et ventriculi affligi coeperunt. Contra alii malis similibus tum solum occupati sunt, dum essera adesset. Maxima vero pars hominum nihil queruntur praeter molestissimam pruriginem, quae interdum somnos quoque abrumpit, maciemque inducit, et vitam reddit vix vitalem.

Emplastrum cantharidis in quibusdam genuit hunc affectum, in aliis radix valerianae sylvestris intus data. Anni tempestates nullius sunt momenti vel ad levandam, vel ad exasperandam esseram: tantundem valent calor, et frigus. Tepor lecti modo auxit, modo cohibuit morbum et pruriginem. Lavatio marina frigida, vel calida, omni profectu saepissime caruit; et paucos illos falsos esse puto, qui suspicati sunt haec vel utilia fuisse,

vel perniciosā. Medicamenta ex hydrargyro, aut sulphure, nihil profecerunt; et radix hellebori albi in pulverem trita, vel aqua in qua ea decocta est, tantummodo id egerunt, ut ad breve tempus mutaverint pruriginem in dolorem. Molestia huius affectus aliquantulum levata est, postquam cutis illita fuit oleo, vel aceto, vel spiritu vini.

Tumores qui in hoc morbo nascuntur, nullum humorem intus tenent. Atque hac conditione essera et psora inter se distant; nam in psora pustulae sunt aqua, aut pure plenae. Saepe autem fit ut in essera, tumorum apicibus scabendo detritis, subsequatur crusta, quae, nisi ex signo proposito, aegre discernitur a vera psora. Essera non est contagiosa; quod me plurima exempla docuerunt. Semel tantum dubitavi, an vir illam ab uxore contraxisset.

Haud crediderim humores, aut habitum corporis vitari in hoc morbo. Proinde nulla alia opus est medendi ratione, quam quae pruriginem tollat. Verum certum ad hoc remedium adhuc, quantum scio, desideratur.

CAP. XXXVI.

De his qui cum Clamore et Terrore expergiscuntur.

Qui conflictantur cum arthritide, paralyti, aut malis hystericis, interdum expergiscuntur maxime perturbati, et quasi territi exclamant. Idem in puerili aetate saepissime contingit, ubi lumbrici, ventris tormina, aut nervorum disten-

tiones vexant. Pueri hoc modo experrecti interdum desipiunt horam integram priusquam ad se redeant.

C A P. XXXVII.

De Febre.

Febris, sive languor cum arteriarum pulsu concitato, interdum aliis morbis accedit, quibus sanatis ipsa conquiescit. Ubi nullus alius morbus est praeter febrem, huius tamen natura varia est, neque eadem ubique medendi ratio convenit. Ad eam rite instituendam oportet intueri aetatem aegri, et corporis habitum, consuetudinemque vivendi, et anni tempestatem, et morbos tum temporis frequentes.

Febres ardentes, quales fiunt ubi peripneumonia, pleuritisve est, aut faucium, intestinorum, aut aliarum partium inflammatio, raro sanantur sine detractioe sanguinis copiosa et repetita. Febres castrenses, et quae harum similes sunt, rarissime postulant, aut ferunt venam incidi; sed in initio permagni interest vomendo ventriculum purgare, quod non obscure indicat nausea quae illo tempore aegrum fatigat. Ad hoc utilis est ipecacoanhae in pulverem tritae scrupulus cum antimonii tartarisati grano uno; unde non solum stomachus vomendo, sed plerumque etiam alvus deiiciendo purgatur, non sine multo febrientis commodo. Hoc medicamento nausea penitus discuti solet, et eodem repetito vix unquam opus

est. Saepe etiam principio dolor est in capite molestissimus, ad quem emplastrum cantharidis inter scapulas impositum praesentissimum remedium est. In dolore faucium, pleuritide, et peripneumonia, emplastra quoque cantharidis multum conferent ad inflammationem mitigandam: neque minori praesidio sunt in febribus malis, ubi maiorem in modum aegri languent; animos enim addunt, et vires iacentes excitant. Stranguriam, quae ex his interdum oritur, levabunt olei, vel aquae, unciae sex et tincturae opii guttae viginti in alvum infusae. Si venter profluat, iis remediis comprimendus est, quae capite XXV. supra proposita sunt. Quod si nimis astrictus sit, infundenda est aquae libra in qua liquata est salis purgantis semuncia. Iactatio, et vigilia saepe solvuntur fomentis aquae tepidae, capiti, vel pedibus admovendis; iuvant etiam guttae binae vel tres tincturae opii sexta quaque hora sumtae. Calorem, sitimque cohibebunt aqua pura, et quaelibet potiones tenues. Languor, atque animi iacentes vinum postulant, aut misturae camphoratae cochleare plenum subinde bibendum. Singultus, et leves artuum distentiones, agitationesque, moscho interdum levantur; quanquam autem moschus aliquantum valuerit ad distentiones compescendas, quanquam et camphora in quibusdam somnum movisse visa sit, multo tamen saepius et haec et ille fuerunt prorsus inutiles. Memini camphorae scrupulum datum esse febrienti sexta quaque hora, et simul Moschi tantundem

quater etiam in die horis inter priores mediis, neque ventriculum gravabant haec medicamenta, sed nihil profecerunt vel ad tollendas distentiones, vel ad somnum moliendum. Cuiuscunque generis febris fuerit, aegri ipsius iudicio permittendum est, modo mens constiterit, surgat, an in lecto se contineat.

Remedium febrium continuarum proprium, seu specificum quod aiunt, adhuc, nisi fallor, desideratur; licet id diligenter quaesitum sit, maxime inter ea quae fiunt ex antimonio. Sed in tanta febrium varietate non verisimile est unum aliquod medicamentum posse reperiri, quod omnibus pariter conveniat. Primis huius morbi diebus, remedia ex antimonio mitiora, quae vomere faciant, et ventrem solvant, summo certe sunt auxilio; nec tamen comperi ea magis prodesse, quam quaevis alia, quae pari vi alvum et stomachum sollicitent. Multis expertis et sagacibus medicis persuasum est antimonium non solum exinanendo ventriculum, et principio morbi, sed quovis tempore utile esse, licet nec vomitus, neque deiectiones, neque sudores sequantur. Nimirum in ea sunt opinione, antimonium secreta quadam facultate praeditum esse, qua fit ad febres proprie efficax. Horum itaque iudicio tantum tribui, ut antimonii tartarisati granis quatuor in aquae distillatae unciis quatuor dissolutis, dederim drachmas duas ex aquae sesquiuncia sexta quaque hora. Pauci ferent maiorem modum sine nausea. Quod

si duae etiam drachmae, ut interdum fit, vomitum moveant, commode dividuntur in partes duas, quae interposita semihora sumendae sunt. Hoc equidem medicamentum in multis aegris expertus sum; tamen vis antimonii febrifuga mihi parum comperta est.

Corticem Peruvianum dare, nisi absente febre, medici diu metuerunt; sed et urgente febre recentiores saepissime illum dederunt in gangraena, atque ad suppurationem benignam promovendam. Unde didicimus suspicionem periculi a cortice, etiam sub ipsa febre adhibito, fuisse non minus vanam, quam multas alias suspensiones, quas maiores nostri de utilissimo hoc remedio sparserunt. Itaque copia, quae annis abhinc centum in Angliam advecta est, decies minor, quam quae nunc, erat. Quo autem magis eum cognovimus, eo minus periculi, plus vero auxilii afferre credimus. Quamobrem intra hos paucos annos saepe tentatus est in febribus quoque continuis; ad quas quantum profuerit incertus sum; detrimentum autem inde provenisse nunquam suspicatus fui, ne quidem cum drachma assumpta fuerit quarta quaque hora.

In omni febre plurimum interest, ut aër cubiculi sit purissimus. Nam auram salubrem hauriendo maxime recreantur animi; et vereor ne quidam aegroti non tam morbo suo perierint, quam halitibus putribus, quos discuti vetuit praepostera alicorum cura.

Britanni, nescio quibus de causis, summo-
 pere metuunt ne aegrotantes frigus colligant: tan-
 quam gravedo, si alteri morbo superveniret, cer-
 tam necem afferret. Expetendum est profecto,
 ut aegri nullo novo malo onerentur, et proinde
 aliqua cura adhibenda est, modo non sit nimis
 sollicita, ne fiant gravedinosi. Qui autem iam in
 morbo sunt, non ideo frigori colligendo magis
 sunt opportuni, quam sani; neque porro destil-
 latio, si accidat, morbos alios in tam certum peri-
 culum praecipitat, ut non saepe expediat ei ae-
 gram obiicere, potius quam aditum omnem aëri
 puro ac salutari intercludere. Cognovi aegrotum,
 qui erumpentibus variolis delirus factus artus suos
 corpusque adeo iactabat, ut nullo modo detineri
 potuerit, quin saepe nudus esset, et frigus quo-
 que colligeret, quod manifestum fecerunt destil-
 latio atque raucitas; tamen, quantum intellexi,
 hoc adventitium malum neque maturitatem vario-
 larum impediit, nec febrem auxit, neque sana-
 tioni omnino obstitit. Nec vero tantummodo
 utile est, aërem cubiculi saepe renovare, sed etiam
 vapores putres corrigere, instillato aceto in vas
 ferreum calefactum, donec exhalatione acida to-
 tum cubiculum repleatur.

Urina pallida et diluta infausta est in febri-
 bus, nisi ubi aeger potionibus tenuibus immodice
 indulserit. Optabilius est, ut crassa fiat; quippe
 tum plerumque morbus coepit inclinari, atque
 aeger est in bona spe. Quid praeterea ex crebra

atque anxia urinae inspectione colligi possit, necesse. Idem fere de stercore dicendum est: nimirum quo magis naturaliter se habet, eo maior fiducia erit, ut e morbo aeger assurgat. Qualiscunque eius conditio fuerit, meo iudicio, parum inde colliget medicus, quam medendi rationem vel fugiat, vel sequatur.

In febribus longis et periculosis pueri solent tandem obmutescere, et vox per dies aliquot supprimitur postquam extra omne periculum fuerunt; semper tamen redit, neque omnino triste augurium censendum est. Tuto etiam fit, ut febrientes, tam adulti, quam pueri, ad tempus graviter studeant.

Febres aduulorum plerumque leves sunt, ubi arteriae moventur non crebrius quam centies in sexagesima horae parte, nisi torpor est. Quod si centies et vigesies moveantur, morbus non vacabit periculo.

De capite puerorum obstipito ex febre, quaedam infra praecipientur, ubi de spasmo loquendum est.

CAP. XXXVIII.

De Febre Intermittente.

Accessio febris intermittens raro manet amplius viginti horis, et plerumque brevior est. Horror et frigus, a quibus incipit, perseverant modo semihoram, modo horas duas; tum consequuntur calor et iactatio, quae sudore solvuntur.

Sudor vero maior erit, vel minor, et ocyus vel tardius finiatur, prout aeger plus, minusve, portionis tepidae assumserit, et pro ratione caloris in quo tenetur. Accessiones sunt vel quotidianae; vel tertianae, scilicet quae alternis diebus redeunt; vel duo dies interponuntur, quae febris appellatur quartana. Intermissiones adhuc longiores interdum fiunt, sed tam raro, ut huius generis febres nec nomen, nec locum in libris medicorum aut adeptae sint, aut meruerint.

Praeter consueta febrium signa, alia interdum accedunt; qualia sunt dolores rheumatici, mentis alienatio, pustulae in cute, dolores ventris, defectiones animae, dolor et tumor testiculorum, postremo imbecillitas fere paralytica. Haec omnia mihi usu cognita sunt, et cum febre simul accesserunt, decesseruntque, et tandem illa sanata protinus conquieverunt.

Magna quaestio est, seu potius tum erat, cum certum febrium intermittantium remedium nondum repertum esset, tuto sanari possent, necne. Etenim hae febres censebantur esse naturae conatus, quibus latentia morborum semina expellerentur; quae scilicet, si illae praemature sublatae essent, nescio quas tragoedias in corpore excitarent. Medicis magni nominis placuit haec sententia; de qua igitur, cum primum medicinam facerem, dubitare me non sinebat tantorum virorum autoritas. Sed hanc opinionem indies levavit usus; et iam diu mihi persuasum est febrem in-

intermittentem tuto finire, quamprimum id fieri potest. Multa autem mala oriri vidi, ubi aegri diutius cunctati sunt accessiones prohibere. Omnes agnoscunt corticem Peruvianum esse insigne illud remedium humano generi munere Dei tributum adversus hunc morbum; et sicubi prima accessio casualis fuerit, ut nullus locus relinquatur dubitationi esse natura mali, hoc medicamentum illico dare conveniet sic, ut aeger a secunda securus praestetur. Ubi intercedit spatium ad sumendum sex drachmas huius corticis, febris vel multum minuetur, vel prorsus conquiescet. Deinde drachma una sumta quater quotidie per decem dies omnem aetatem recidivae plerumque tollet. Nunquam tamen nocuit, et saepe utile fuit, eundem modum huiusmodi quotidie sumere per decem alios dies. Qui ad hoc praescriptum cortice utantur, rarissime spe sua frustrabuntur. Quod si pulverem respuat parvum, vel stomachus, aquae in qua cortex decoctus est unciae duae idem fere valebunt ac drachma pulveris, et vicem eius implebunt. Exitus adhuc certior erit, si per aegrum liceat singulis his potionibus adicere extracti cinchonae scrupulum, vel semidrachmam. Pueri qui febre intermittente complicantur vix sustinebunt huius medicamenti fervore quod satis est ad febrem tollendam. His optime convenient extracti corticis, sacchari, singulorum scrupulus, aquae cochleare, et sesquicochleare lactis. Ubi autem vel in puerili, vel in senectute aetate, stomachus hoc ferre remedium

nullo modo potest, ut ut temperatum novis misturis, tum infundere oportet ex inferioribus partibus decocti cinchonae uncias tres, vel quinque, bis quotidie, quibus licebit adiicere pulveris, aut extracti aliquid, et paucas insuper guttas tincturae opii, ut eas alvus retineat. Quidam speraverunt hos aegros sanare immittendo pedes per horam, aut amplius, in aquam in qua cortex Peruvianus decoctus est; quod tamen frustra tentatum vidi. Cortex, quanquam rite sumtus, interdum parum efficax est: quo in casu suspicio erit ventriculum sordibus onustum vim remedii impedire. Itaque vomere oportet; quo facto febris raro non cedit. Quod si redire perseveret, confugiendum est ad flores chamaemeli, quorum contritorum scrupulus dandus est loco drachmae cinchonae, et ad idem praescriptum repetendus. Hos flores sic sumtos semel atque iterum profecisse expertus sum. In quibusdam affectibus qui certum circuitum habuerant, calami aromatici scrupuli duo interpositis spatiis idoneis repetiti aliquantum iuverunt. Tincturae quoque opii guttae viginti instante accessione utiliter sumtae sunt.

Febris quartana sanatu longe difficilior est, quam vel quotidiana, vel tertiana; et saepe diu resistit cortici Peruviano, et quibuslibet aliis medicamentis. Interdum drachmae duae corticis paulo ante accessionem datae, quartanam summo-
verunt; nec raro tamen fuerunt inutiles.

Multi sibi fingunt nescio quae pericula, si

cortex prius sumatur, quam febris ex toto decesserit: cui vano timori consequens est, ut, magno suo detrimento, nimis diu cunctentur hoc uti remedio. Attamen, nisi fallor, cortex vel in media accessione devoratus, non aliter noceret, quam quod ventriculus eo tempore imbecillior posset eum respicere; unde nausea atque vomitu aeger fatigatus ab eodem medicamento postea abhorreret. At febre inclinata, meo iudicio, cortex Peruvianus nimis cito dari non potest, modo stomachum non gravet.

C A P. XXXIX.

De Febre Hectica.

Febris hecticae mentio saepe fit in medicorum libris, neque raro etiam in sermone quotidiano: tamen haud facile inveniemus eam adeo certis signis descriptam, ut manifestum sit, quid inter hanc et alias febres intersit, utque omnis de eius natura dubitatio tollatur. Mihi non alia esse videtur, quam quae dicitur symptomata, vel inordinata intermittens, vel febris suppurationis. In hac saepe proxime accedit ad veram intermittentem; a qua tamen longe diversa est, aliamque prorsus curationem postulat, et multo praesentiori periculo obiicitur.

In febre intermittente accessiones sunt longiores, tum tria illa tempora horroris, caloris, et sudoris, accuratius definiuntur, et in decessione febris ex toto intermittit. Verum hectica

nunquam adeo remittit, quin arteriarum motus concitetur, decem minimum ictibus in sexagesima horae parte superans modum naturalem. Porro hectica raro sui similis est per tres accessiones; verum horror et frigus modo excipiuntur calore, modo sudore sine calore; calor quoque interdum invadit sine ullo horrore antecedente; et aeger non raro horret, nullo vel calore, vel sudore subsequente. Brevior itaque est hecticae accessio, non solum quia tria eius tempora citius plerumque peraguntur, sed etiam quia ex his unum, aut forte duo interdum desiderantur.

Qui hectice aegrotat, oborto sudore parum vel non omnino levare se sentit; saepe vero haud minus perturbatus est et anxius, postquam sudare coeperit, quam dum horrebat, aut incalescebat. Sudore finito, febris interdum manet; et vigente febre, frigus, atque horror interdum redeunt; quod quidem est certissimum huius febris signum. Etenim cum pleraeque aliae febres incipiant quidem ab horrore, is tamen redire intra tertiam vel dimidiam horae partem, febre consistente, non consuevit, nisi in hac, de qua sermo est.

Hic morbus interdum tempora sua servat per duas vel tres accessiones non minus accurate, quam fieri solet in vulgari quotidiana, vel tertiana: deinde autem fit inconstans, et circuitus perturbatur. Vix memini spatia inter quatuor accessiones eadem fuisse. Hectica modo mitis erit, et fere nulla, in dies duodecim; modo, ubi gravior mor-

bus

bus subest, plures accessiones eodem die venient, adeo ut horror instantis cum sudore decedentis iungatur. Neque insolitum est experiri horrores leviores multos intra paucas horas. Accessiones interdum desinunt in cupiditatem somni.

Nemo nescit urinam in iusta intermittente per accessiones dilutam esse, et per decessiones crassam; at in hectica facies urinae est inconstantissima: modo enim pariter erit vel tenuis, vel crassa, adsit febris, seu absit; modo erit diluta in decessione, in ipsa febre crassa; interdum, sicut in aliis febribus, tenuis in accessione, in decessione crassa.

Ad malorum cumulum in hectica saepe accedunt dolores rheumaticis non absimiles, qui vel per corpus universum vagantur, vel in una parte permanent; et, quod mireris, pertinax huiusmodi dolor saepe longe abest a morbi ipsius sede, cum qua, ut videtur, nihil habet commune. In quibusdam aegris hi dolores adeo importuni sunt, ut haud minima morbi pars sint, nec nisi opio tollerabiles reddi possint. Quantum adhuc intellexi, praecipue molesti sunt, ubi morbus oritur ex ulcere externo aëri patente, veluti in carcinomate faciei, aut mammae. Illud quoque in hac febre notabile est, quod tumores interdum momento temporis assurgunt in artubus, vel reliquo corpore, et paucas horas manent, sine ullo vel dolore, vel durtie, vel coloris mutatione.

Huiusmodi febris illos interdum repente et

graviter occupat, quorum valetudo antea satis fuerat commoda; urgetque perinde ac vehemens febris orta ex inflammatione; vitamque aegri in propinquum discrimen brevi adducit. Interiectis deinde paucis diebus remittit, et spes rediturae sanitatis affulget. Quanquam autem tumultus conquieverit, et febris haud multa remanserit, morbi tamen reliquiae, gravi intus subsistente malo, nulla arte expugnabiles sunt, donec paulatim valetudinem corrumpant, atque interimant. Verum rarius fit, ut ad modum hunc morbus incipiat; multo saepius vires suas initio dissimulat, atque adeo tarde subrepat, ut quos arripuerit sentiant quidem se haud omnino recte valere, tamen ad menses aliquot vix suspicentur gravem morbum subesse; et nihil fere querantur praeter lassitudinem aliquam, et cibi cupiditatem viresque aliquantum minutas. Quae quanquam haud magni interesse videantur, tamen ubi motus arteriarum simul sit dimidio celerior solito, medicus sollicitus esse debet de exitu aegrotationis. Pauci etenim morbi sunt, in quibus plura nos docet arteriarum motus. Sed in hoc quoque qui nimis secure illis confidit, nae ille se interdum haud mediocriter delusum sentiet. Uni ex viginti, ut coniiicio, licet omnia insanabilis mali signa sint, et vires atque valetudo indies consumantur, arteriae usque ad mortis horam neque celeriter, nec quocunque modo inordinate moventur, sed prorsus ut in optima sanitate.

Suppuratio, in quacunq̄ue demum corporis parte orietur, febrem propositam excitabit, quae tamen maiorem in modum propria est glandulae scirrhosae inflammatae, idque ab ipso inflammationis initio: febris vero *indies* augebitur pro modo inflammationis, aut ulcerationis, aut gangraenae. Ea est glandularum natura, ut huius generis affectus non solum in multos menses, sed interdum in annos aliquot aegros trahant.

Ubi inflammatio ex scirrho oculis patet, occupatve pulmonem, aut alia viscera quorum cognita officia sunt, causa quidem morbi manifesta erit. Quod si pars vitiosa sensibus nostris subtrahitur, vel facultatem habet obscuram et ignotam, febris, quae tunc incidit, ab incautis existimatur esse morbus praecipuus, vel solus.

Puerperae, propter vim utero, et partibus vicinis adhibitam, hac febre fere moriuntur.

Mulieres, quae annum quinquagesimum impleverunt, vel excesserunt, huic morbo opportuniores sunt. Etenim, menstruis finitis, scirrhus in glandulis mammaram, ovariorum, aut uteri, facilius nascitur, et saepe in carcinoma desinit. Eodem tempore glandulae quoque omnium viscerum quae in abdomine sunt huius generis vitiis subiectiores esse videntur, et initium adversae valetudinis faciunt.

Similes affectus ebriosorum ventres occupant, et aequè perniciosi sunt.

Vulnus levissimum scalpello acuto, aut telo

quovis factum, maximas interdum turbas, et gravissima mala, vel et mortem ipsam excitabit. Si quidem non tantummodo pars laesa tumet doletque; sed varia corporis loca, etiam quae longe absunt a vulnere, vehementer laborant, aut ad suppurationem nonnunquam spectant. Ad haec semper accedit febris inordinate intermittens, quae non prius extinguitur, quam omnis tumultus compositus sit. Quod licet plerumque fiat intra breve spatium; interdum tamen huius generis aegrotatio perseverat in duos tresve menses, aut etiam morte finitur.

Febris haec nunquam minus periculosa est, quam ubi ex suppuratione nascitur, in qua quicquid laesum fuerit, in pus aequale resolvitur, et cilem exitum habet.

Inflammationes glandularum, sive in mammis, seu intus in visceribus, medicamentorum aut corporis beneficio interdum recedunt, quaeque ex iis pendebat febris finitur: multo vero saepius ex inflammatione fit carcinoma, et insana bilis gangraena.

Vix fieri potuit, ut febris, quae tot diversas causas habet, neque eadem ubique mala infert, uni medendi rationi semper cederet. Quandoquidem febris hectica ab alio morbo pendet, quicquid hunc levat, id quoque adversus illam maxime valebit. Ubi a vulnuscule orta est, multum erit praesidii in medicamento, quod habet asam foetidam et opium. In plerisque aliis casibus cura me-

dici praecipua, si non omnis, erit, levare quaecunque acciderint mala. Calor nimius refrigerantibus temperandus est; alvus potius tenera, quam astricta, servanda; somnus inducendus; sudores pestiferi cohibendi; denique opera danda, ut aëre salubri, exercitationibus, cibisque convenientibus, valetudini quam optime consulatur: quibus factis, reliqua spes omnis erit in facultate illa sui conservatrice naturaliter innata omnibus, quae aegros etiam in morbis deploratis haud prorsus desperare sinit. Ubi enim omnia fuerunt signa visceris cuiusdam insanabili morbo impediti, atque omnigena remedia frustra tentata sunt, corpore viribusque in tantum afflictis ut vix aliquid spei reliquum esset, tamen nonnulli ex his malis convaluerunt. Nam tumor natus est haud procul, uti coniciebatur, a morbi sede, licet ad ipsam pervenire non videretur; quo suppurato protinus motus arteriarum conquievit, et cibi cupiditas, et corpus, et robur, in integrum restituta sunt. Quod in his effecit natura, imitari conatus sum, excitato ulcere prope morbi sedem; sed hoc spei quam habueram parum respondit.

Nuper percrebuit opinio inter medicos, ubi incidat gangraena, vel suppuratio non bene procedat, praesens esse remedium in cortice Peruviano: et omnes fateantur necesse est, aliud remedium non inventum esse, quod his aegris valentius subveniat. Itaque hic cortex, medico vel suadente, vel certe non repugnante, semper fere

datur in febribus inordinatis, ubi gangraena aut abscessus est. Et quamvis nullum fuerit ulcus, cum tamen haec febris intermittenti simillima est, aegri, et eorum amici, non cessant expetere hoc medicamentum; quod medicus quoque suo saepe iudicio experiri movetur. Sed aegrotantium et medicorum votis nequaquam par fuit. Nam nihil prorsus adversus hanc febrem proficit, modo nulla fuerit exulceratio. Quinetiam in ipsis gangraenis toties spem nostram destituit, ut dubium sit in istis qui convaluerunt, sanitasne ad alias potius causas fuerit referenda.

Quanquam non ausim venditare vim corticis Peruviani adversus huiusmodi aegrotationes, tamen nullus dubito, quin tutus sit. Nisi enim alvum fusam forte excitet, nauseamve levem in stomacho infirmiore, ubi maior eius modus datus est, tum praecipue ubi in catapotia dura coactus est, nihil praeterea mali aut hic, aut alibi, ex illo profectum memini. Idem audivi ex medico sagace Edwardo Hulse, qui per annos quadraginta plus huius corticis dederat quam alius quisquam medicus extra Angliam, vel fortasse in Anglia ipsa. Usus indies magis magisque confirmavit hanc sententiam. Cuius rei non leve indicium est, quod per proximos annos decuplo plus corticis consumtum est, quam ante annos centum. Itaque quo magis viri eius exploratae sunt, eo magis deletae sunt ex hominum mentibus suspiciones istae, quibus hoc magnum remedium

immerito infamatum fuerat. Nec tamen ad hunc usque diem desunt medici, maxime quidem extranei, quorum alii initio febris intermittens, alii toto eius tempore corticem dare metuunt. Nimirum illis, ut mihi videtur sine iusta causa, persuasum est febrem intermittentem esse conatum naturae, quo humores supervacuos, et morborum semina expellat; et ubi haec amica febris praeproperè sanetur, ibi gravissima mala in viscera inclinatum iri, et hydropem, mortemque mox subsequiturum esse. Crediderim hos metus inanes existis aegris ortos esse, quorum febrem medicus falso iudicasset esse intermittentem, cum revera hectica esset; glandularumque vitia non facta esse ex cortice Peruviano, verum ipsam fuisse febris causam.

In morbis longis qui aliis remediis non cedunt, aegri ad aquas Bathonicas confugere, et voluntate sua, et amicorum hortatu solent. Verum, ut nihil dicam de incommodis itineris faciendi, et in domo aliena vivendi, quibuscum aegroto conflictandum est, aquae Bathonicae prorsus alienae sunt in febre hectica, quam semper intendunt, auctis simul aegri malis, et morte properata.

o. CAP. XL.

De Fistula in Ano.

Scirrhi, ulcera, et fistulae in ano, et intestino recto, inferunt tormina, tenesimum, cupi-

ditatem et simul difficultatem urinae, incontinentiam quandam alvi, deiectiones mucosas aut cruentas, et stercora figurae compressae, horrores, testiculorum tumores aut interdum gangraenam, dolores vagos, etiam remotis partibus artuum inhaerentes.

Ulcera intestini recti saepe perperam iudicantur esse haemorrhoides, ideoque negliguntur. Ex illis autem, dum inflammantur, dolor longe maior est, quam ex haemorrhoidibus, et magis intenditur sternuendo, vel tussiendo. Sed et postquam suppuratio facta fuit, si quidem ulcus exiguum humorem fundat, non facile discernitur ab haemorrhoidibus, a quibus, etiam ubi nulla est exulceratio, subpurulentus humor consuevit destillare. Ut, quantum fieri potest, error omnis tollatur, ubicunque dolor est vehementior, et purulentum quid emanat, oportebit confugere ad chirurgum, cui, si detegatur vel inflammatio vel ulcus, tota curatio permittenda est; et quo maturius illius auxilium imploratur, eo magis iuvabitur aegrotus. Nam remedia idonea tempestive adhibita non sinunt altos fieri sinus, qui vel nunquam postea sanari possint, vel non sine ferro, et dolore non mediocri. Ulcus fistulosum in quibusdam permansit insanabile, et per se fudit, tanquam fonticulus, per triginta annos.

Inflammatio et exulceratio intestini recti modo habent initium a malo corporis habitu, atque humoribus acrioribus in hac partem incum-

bbentibus; modo a levibus iniuriis extrinsecus illatis ulcus nascitur, quod neglectum tandem omnes corporis humores corrumpit. Alterutra ex his causis efficere potest, quod saepe videmus, ut cum fistula in ano simul valetudo conquassata sit haec perdita. Igitur, sanato ulcere, vitium in alias partes verti consuevit, tum praecipue in pulmones; unde fiunt sputa cruenta, spirandi difficultas, et tabes. Quamobrem multi, non sine ratione, praecipiunt ulcusculum aliqua ex parte excitare, protinus ut fistula desierit, quo detur exitus humoribus vitiosis, sive nati fuerint ab exulceratione intestini, seu ipsi alterius causa fuerint. Intererea auxilio erit ista victus ratio, quae tabidis quoque convenit.

CAP. XLI.

De Fluore Albo.

Profluvium album nullo vitae anno non exerceet mulieres a primo usque ad extremam senectutem. Haec tamen infirmitas multo rarior est ante pubertatem.

Humor iste, quanquam plerumque albus, ut vulgo appellatur, et aquae similis; interdum tamen glutinosus est, et coloris subflavi; item subviridis, et mali odoris, atque tam acris, ut nisi partes in quas descendit saepe eluantur, levis inflammatio fiat, cum prurigine, et dolore, cuticula quoque deteratur, et urina reddi nequeat sine sensu pungentis caloris. Ex his quae dicta sunt, patet

opus esse non mediocri cura atque iudicio, ut discernatur hic affectus a malo Venereo, siquidem mulier illi obiecta fuerit. Ubi aliqua, quae antea vixerat libera a profluvio albo, vel id tantum levissime experta erat, postquam consuevit cum viro, continuo coeperit affligi dolore urinae, et humoris albi profusione copiosa, tum maxime si coloris flavi fuerit, aut viridis, iusta erit morbi Venerei suspicio. Molestum tamen est, quod mulieres statim post nuptias, si valetudo et habitus corporis sint infirmiores, non raro tententur profluvio quodam albo, ex quo falsae criminationes natae sunt. Itaque summopere cavendum est a praecipiti iudicio de natura huius mali. Ubi color humoris vel albus est, vel leviter flavus, et exiguus vel nullus urinae dolor, non erit locus suspicando morbum Venereum subesse, etiamsi nulla fuerit antea huius generis infirmitas.

Hoc vitium saepe quidem nascitur ex crebro vel partu, vel abortu. Quaedam illo primum tentatae sunt, dum gravidae essent. Contra uni contigit, dum ventrem ferret, minus eo laborare. Interdum rediit singulis mensibus, et menstruorum vicem implevit; item permansit sine ulla intermissione, quamdiu illa suppressa erant. Vetulas quoque adortum est, quas menstrua penitus deseruerant. Alias fluor albus et menstrua profusa eodem tempore exercent: debilitas forsitan utriusque causa fuerit. Labor durus, nisus ferendi onera viribus maiora, Venus

immodica, mentis perturbationes, et constitutio corporis infirma, vel strumosa, saepe fecerunt hunc morbum. Sed qualiscunque fuerit eius origo, simul semper accedit dolor lumborum gravis, qui non minima morbi pars est. Vix fieri potest, quin huiusmodi profluvium vires et valetudinem aliquantum minuat; nescio vero ecquid praeterea detrimenti inferat. Non paucae mulieres cum eo conflictatae sunt totam vitam, neque tamen impeditae sunt ne sanos liberos parerent.

Imbecillitas totius corporis in culpa esse potest, vel tantummodo resolutio glandularum quae hunc humorem excernunt. Proinde remedio uterentur vel quae corpus universum firmant, vel quae glandulas laxatas astringunt. Profuit pulvis bis quotidie sumtus, qui habet olibani et corticis aurantiorum Hispalensium, singulorum grana decem, corticis quercus grana quinque, cui superbibenda est aqua in qua cortex Peruvianus decoctus est. Convenit quoque aquam, in qua cortex quercus decoctus est, mane et vespere infundere in vaginam. Et cum his simul lavatio frigida utilis est. Fatendum autem est, hunc affectum, quanquam praesente periculo vacet, saepe difficillimum esse curatu, ubi aut inveteraverit, aut cum infirmo corporis habitu contigerit. Medicus vero munere officium non potest. In habitu corporis strumoso profluvium saepe videtur oriri non tam ex debilitate, quam ex humoribus noxiis hac via exitum sibi

molientibus; unde etiam nova nascitur difficultas: nam quae robur corpori addunt, si per se adhibeantur, plus detrimenti ferent, quam auxilii. Ubi enim ex harum rerum usu profluvium vel ex toto cohibitum fuerit, vel multum imminutum, aegrae continuo correptae fuerunt doloribus ventriculi, et universi corporis languore, quibus profecto magis laesae sunt, quam pristino suo malo. His igitur medicamenta astringentia non conveniunt: at dare oportebit quarto quoque mane vel aquas purgantes, vel salem aliquem purgantem dissolutum in aqua sive pura, seu in qua decoctus est cortex Peruvianus; et cum his tuto et utiliter sumi possunt quae corporis totius vim moliuntur. Aqua Bristolica plurimum celebratur adversus hunc morbum; sed famam eius usus mihi non confirmavit. Cognovi quibus cerussa acetata data est, et nihil profuit: ut autem maxime profuisset, tamen mala ex hoc metallo nata multo magis sunt metuenda, quam ipse morbus.

Dolores cruciantes in utero, coxis, et femoribus, cum profluvio cruento et sanioso, qui nascuntur ex ulceratione vel carcinomate uteri, satis distinguunt hos affectus a fluore albo.

CAP. XLII.

De Gonorrhoea miti, seu Fluore Urethrae.

Gonorrhoea mitis in viris similis est profluvio albo foeminarum cum natura, tum quoque curatione. Quicquid itaque de altero dictum est, fere

aequo iure ad alteram pertinebit. Huiusmodi debilitas multo rarior est in viris, quam in foeminis; et profecto vix reperitur, nisi ubi initium habuerit ab intemperantia, aut morbis Veneris. Bis autem eerve accidisse memini, ut ictus vehementior exceptus fuerit profluvio copioso et colorato, per omnia referente fluxum urethrae Venereum, excepto quod paucis diebus sua sponte finitum sit.

Ad hunc morbum raro vel nunquam medicamenta in urethram infundi debent; quippe horum usum crebriorem, tum praecipue acriorum, multi non iniuria suspicati sunt primam dedisse occasionem istis vitiis, sub quibus urinae iter intercluditur sic, ut sine summa difficultate, et vix patibili dolore, ea reddi non possit. Haec vitia saepe sunt insanabilia, aut etiam mortifera, ubi urina ex toto oppressa sit, vel inciderit gangraena. Quicumque in posterum cavet ab istis causis, a quibus gonorrhoea primum orta est, raro spe sua excidet curam vel sanandi, vel saltem adeo minuendi, ut molestudo nullum inde detrimentum capiat. Multi vero, quibus ingenium est paulo timidius, sine causa se mire excruciant, opinantes hunc morbum, praeter caeteris omnibus, nescio quae ingentia mala illi iam intulisse, vel mox illaturum esse. Et nunquam defuerunt homines nefarii, qui metus inanes iniicere, et augere, non veriti sint, et quaestum sibi facerent venditando libros fuitiles, et medicamenta perniciosissima.

CAP. XLIII.

De Graviditate.

Gravidæ multis malis sunt opportunae, quorum pleraque non nisi post partum finiuntur.

Mulieres forsitan promptius concipiunt paulo ante menstruorum cursum, quam alio quovis tempore.

Duo mariti mihi narrarunt uxores suas in Venerem fuisse frigidas, omni eius cupiditate et voluptate carentes; saepe tamen gravidas factas esse, et recte peperisse.

Mulier integrae valetudinis quinto graviditatis mense sensit humorem e papillis distillare, qui non substitit nisi biduo ante partum; dein mammae nihil fuderunt per sex dies; sed die a partu quarto lacte rite distendebantur.

Ex graviditate plerumque nascuntur nausea atque ardor ventriculi; quorum priorem, postquam multa frustra tentata fuerant, levavit linimentum saponis cum tinctura opii ventri illitum bis quotidie: ardorem autem stomachi sanavit acidum vitriolicum dilutum.

Quaedam, haud suspicata se concepisse, perstitit non solum in frigidam descendere per primos graviditatis menses, sed etiam potare aquam marinam sic, ut alvus bis vel ter quotidie deiiceret; atque tum primum libera fuit a nausea, qua vehementer fatigari solebat, quoties praegnans fuisset. Succus etiam aurantiorum, et limonum, aliorum-

que fructuum acidorum, profuit adversus hanc
nauseam.

Sanguis ex utero manavit quadraginta dies
circa sextum mensem, neque mulier abortum fe-
cit. Aliam cognovi, cui per totam graviditatem
menstrua fluere iusto tempore non desierant us-
que ad partum; quater autem pepererat.

Mulieres, quae phthisi pulmonis occupantur,
promte concipiunt, et dum gravidae sunt, tabes
eodem fere statu manet: quamprimum autem pepe-
rerint, morbus maiores vires sumit, et rapido
cursu aegras precipitat.

Urina difficilis, aut suppressa, interdum fit
ex pondere uteri in urethram incumbentis; cuius
catheter est praesens atque unicum remedium.
Postquam urina triduum suppressa fuerat, per
catheterem quinque librae effusae sunt.

Emplastra cantharidis foeminis praegnantibus
imposita, quae maiorem in modum erant stran-
guriae obnoxiae, eandem inducendo abortus pe-
niculum fecerunt.

CAP. XLIV.

De Haemorrhoidibus.

Venae intestini recti interdum distenduntur,
aut etiam rumpuntur, et sanguinem fundunt sine
dolo, perinde ac venae quae sunt in naribus.
Alias insigniter tument aut foris, aut intus, et non
rumpuntur, sed vehementer dolent, et dolor
manet etiam postquam venae apertae fuerunt, et

tumor subsidit. Quidam credunt hanc sanguinis profusionem esse salutarem, et proinde, si valentioribus remediis cohibeatur, subsequendos esse capitis dolorem, vertiginem, angores ventris, atque universam conquassationem; tanquam sanguis ille, qui exitum sibi per venas intestini moliebatur, intus retentus, magni alicuius mali causa fieret, inclinata in viscera materia. Quod si in sano corpore nihil opus est cursu sanguinis ex his venis, nescio an in aegro rectius dicatur signum, quam remedium, adversae valetudinis.

In nonnullis haemorrhoides non minus levibus de causis sanguinem fundunt, quam venae narium, et tuto negligi possunt. Multi sunt viscerum morbi, qui cum moras faciant sanguini, causae esse possunt, cur venae in ima intestinorum parte turgeant, et dehiscant. Itaque ad morbos iecoris saepe accedunt haemorrhoides, et brevi quidem auxilio sunt; tamen nequaquam illis mederi valent. Viscerum autem vitia saepe sunt insanabilia, et ubi haemorrhoides ex illis natae forte suppressae sint, exitus eorum vitiorum inevitabilis istius sanguinis defectioni falso tribuitur.

Quidam censent haemorrhoides profuisse adversus capitis et ventriculi dolores, asthma, vertiginem, atque vitia cutis in facie: rectene an secus iudicaverint, haud facile est dictu. Ad errorem certe haec res proclivis est. Quod si unquam acciderit, ut haemorrhoides essent utiles, hoc tamen tam rarum fuit, ut morbus, cuius incommodum

modum certum est, et incerta utilitas, nemini sit expetendus. At salutare sint necne, parvi interest; cum sanguinis profusio raro tanta est, quae vel praesens, vel futurum periculum intentet. Attamen novi ex venis anni tantum sanguinis quotidie per mensem effluxisse, ut vix fieri posset, quin corporis robur aliquantum minueretur. Hoc autem rarum est. Ubi fit, auxilio erit aquae in qua cortex Peruvianus decoctus est selibra quotidie epota; quae quidem, ut mihi videtur, non tam proficit vi quadam astringendi, quam quia occurrit malis ex immodica sanguinis profusione orituris.

Haemorrhoides utrique sexui pariter sunt infestae. Quidam anno aetatis quinto coeperunt his laborare: saepius aetas puerilis ab hoc morbo libera est. Mulieres praegnantes, et vetulae, quas menstrua nuper defecerunt, opportuniore sunt haemorrhoidibus. Aliae foeminae videntur minus illis vexari, quam viri.

In quibusdam corporis constitutionibus haemorrhoides familiares sunt, et cum brevibus intermissionibus per hominis aetatem manent. Nocet alvus vel dura, vel fusa. Non solum quoties venter exoneratur, sanguis exit; verum humor serosus diu perseveravit sponte sua iugiter effluere. Cruor haemorrhoidalis stercoribus quasi superfunditur, non autem cum illis miscetur. Dolor multum augetur, quoties alvus descendit, nec nisi post horas aliquot se remittit. Ardor urinae,

nausea, et dolor lumborum, fuerunt inter minus consueta haemorrhoidum signa. Plerique in hoc morbo fugiunt aloën, utpote venas ani praeter alia omnia purgantia irritantem; nec prorsus iniuria. Tamen hic effectus vulgi opinione ubique minor est; et non raro nullus. Proinde illos spes sua saepe frustrabitur, qui, cum persuasum habeant, haemorrhoides esse salutare, student per aloën eas inducere.

Ubicunque haemorrhoides vel dolent, vel sanguinem fundunt, alvus, ut res ipsa loquitur, servanda est paulo tenerior. Quem ad finem flores sulphuris ante omnia utiles esse censentur. Horum grana decem vel quindecim lenissime alvum movent, et praeterea, si vera est fama, dolorem leniunt, et sanguinis cursum moderantur. An vero sulphur plus valeat in hoc morbo, quam alia quae leniter purgant, adeo incertum est, ut loco eius commode dari possit vel electuarii sennae drachma, vel cochlearium olei e seminibus ricini, vel semuncia tincturae sennae cui adiecta fuerit olei amygdalarum uncia; quorum omnium utilitatem usus quotidianus comprobat.

Dolor ex haemorrhoidibus interdum tantus est, ut praesens auxilium postulet, quod praebet cataplasma panis ex lacte subacti cum exiguo modo olei: idem praestant unguenti adipis suillae unctae binae cum totidem scrupulis opii aqua emolliti; huius unguenti tantillum parti dolenti admovendum est. Nondum satis cognitum habeo,

opiumne sic adhibitum eas venas solas sublevet, an potius nervos universos permulceat; quam novimus esse huius medicamenti facultatem, simul ac ventriculum, aut intestina contingat. Dolor ex venis turgentibus lenietur, vel cessabit, quamprimum per scalpellum, vel hirudines, exinaniantur. Nonnulli, quos haemorrhoides male habebant, semel et iterum mihi narrarunt, aquae in qua buxi folia iniecta erant, libram mane et vespere epotam maximo fuisse auxilio; quod tamen aliis non imperavi, utpote neque citius, nec plenius aegrorum votis responsurum, quam remedia quae supra proposita sunt.

C A P. X L V.

De Hernia.

Medicamenta intus data in hoc morbo sunt merae nugae. Unicum remedium est fascia corpori aptata sic, ut intestinum descendere prohibeat.

C A P. X L V I.

De Hydrocephalo.

Capita nonnullorum infantum excedunt in nimiam magnitudinem, suturaeque dehiscunt, et membranae cerebri aqua distentae feruntur extra, unde fit tumor mollis eminens supra oras suturarum. Infantes infirmiores huic vitio obiiciuntur, quod per mensem integrum quotidie vires acquisivit: at ipsi indies magis stupent, torpentque, dum pulsus arteriarum non excedunt septuaginta duos

in sexagesima horae parte: sex septemve ultimis morbi diebus potiones vix, aut ne vix, ingeri possunt, vox nulla editur, et exanimes fere aegri iacent, nisi quod interdum artus leviter distendantur.

Inciso infantis cadavere, qui hoc morbo perierat, aquae selibra in ventriculis cerebri reperta est. Nulla alia tentavi remedia praeter purgationes et exulcerationes, quae quidem parum profecerunt.

Hydrocephalus praecipue occupat pueros et puellas a primo ad octavum aetatis annum. Capitis dolores, manus ad caput crebro admotae, clamores subiti, distentio nervorum, stupor, mentis perturbatio, motus venarum lentus, postremo caecitas, iustam huius morbi suspicionem iniiciunt, etiamsi capitis moles non fuerit aucta. Neque tamen perpetuum est, ut haec signa ex hydrope cerebri nascantur; etenim vidi ea omnia in puero, cuius cerebrum non nisi consueta humoris copia humectatum erat, teste peritissimo anatomico, qui cadaver inciderat.

Adultus quidam impatibili dolore capitis occupatus est, cupiditas cibi modo summa erat, modo nulla, delirabat, membra distendebantur, stupebat, et brevi extinctus est. Ventriculi cerebri adeo turgebant, ut, scalpello adacto, aqua in notabilem altitudinem exiliret.

CAP. XLVII.

De Hydrophobia.

Testis fui haud mediocris timoris aquae, vel

cuiusvis liquoris, ultra quam dolor devorandi intulisset, in aegro, cuius fauces inflammatae erant, et dein suppuratae. Hydrophobiam ex morsu animalis rabiosi nunquam vidi.

C A P. XLVIII.

De Hydrope.

Talorum aut crurum tumores, qui mane vel dissipantur, vel multum minuuntur, familiares sunt foeminis in coeli temperie calidiore, et in graviditate, et tam viris, quam foeminis ex morbis gravibus aut longis surgentibus; item senioribus, et arthriticis, et iis quorum crura laesa fuerint ictu, vel distortionem, vel exulcerationem, quaeve ob causam fere quamcunque doluerint. Huiusmodi tumores vel sponte sua finiuntur, vel sine periculo manent; ideoque nihil illis opus est medicina. At ubi longis morbis pulmonum, aut abdominis, superveniant tumores in cruribus, indicio sunt, grave aliquod malum subesse in pectore, aut ventre, et tumores assurrecturos esse in iustum hydropem, qui morte plerumque terminatur.

Hydrops non tam ipse morbus est, quam morbi alicuius signum, et plerumque capitalis; ideoque saepissime fit mortis praenuncius. Aqua saepe reperta fuit in thorace: sed haec, dum homo vivit, nulla certa nota, quantum scio, detegi potest. Natura thoracis impedit quo minus tumor aliquis extra appareat; et spirandi difficultas ex hydrope pectoris adeo per omnia similis est illi

quae ex aliis quoque causis nascitur, ut nullum manifestum huius mali indicium praebet.

Hydrops ventris, sive ascites, cognoscitur tumore, et aquae fluctuantis sensu, ubi venter altera manu pulsatur, altera premitur: nihil enim huiusmodi exhibet aut graviditas, aut inflatio, aut viscus morbo tumefactum. Neque tamen nullus est errori locus in hac re: vidi enim peritos medicos, et chirurgos, huic signo confisos, falsum de tumoris natura fecisse iudicium. In ascite aqua saepe continetur in tunica, quam glandula visceris vitiosi suppeditavisset. Ovaria saepe fiunt sedes hydropis in foeminis; et morbus in illis perseveravit plus decennium, cum haud maiori incommodo, quam quod ex mole tanta, tantoque pondere necessario natum est. Huius generis hydrops eo fortasse tutior est, quia ovarium non tam ad vitam necessarium est, quam reliqua viscera: in hoc autem aquam conclusam fuisse iudicavi, ubi tumor e regione ovarii primum deprehensus est. Humore saepe distenditur ovarium, et, nisi fallor, alia quoque viscera abdominis, sine ullo tumore crurum. Sitis fere insedabilis vexat plerosque ex his aegris, non autem universos. In omni hydrope, ubi aqua in tunica includitur, haud facile dictu est, quo pacto humor ad crura et femora descendat. Aiunt quidem hoc fieri vel per membranam cellularem, vel vi, quam habet corpus, absorbendi humorem ex uno loco, et in alium cogendi. In quibusdam nescio an aqua quae in

abdomine est, aliquid habeat commune cum illa, quae artus inferiores distendit. Horum utique tumor oriri potest ex universi corporis debilitate, quam morbus induxerit, atque anasarcam referre, et non derivari ab humore in abdomine collecto.

Ardua res est aquas hydropicas amoliri sive per alvum, sive per urinam, sudoremve. Quod si medicamenta optatum auxilium attulerint, et omnis aqua fuerit effusa; tamen multum supererit agendum, atque aeger in eodem periculo versabitur, nisi morbus, a quo pendebat hydrops, vel natura, vel arte sublatus sit. Illud vero admonendi sunt, quotquot purgatione alvi opem ferre his aegris student: eorum vires morbo suo multum fuisse imminutas, ideoque non esse perseverandum in medicamentis valentioribus, nisi manifestum fuerit, aegros inde levari, vel saltem non laedi. Ubi hydropicus par sit ferendo tam validum remedium, solitus fui dare elaterii granum unum, vel duo, quod commode sumitur ex chochleario spiritus vini tenuioris. Hoc, si nullos insolitos tumultus excitet, et venter multum aquae excernat, quarto quoque mane dare oportebit, donec omnis humor supervacuus exierit: at diebus a purgatione liberis medicamentum aliquod amarum et aromaticum erit sumendum. Hac ratione medendi quatuor vel quinque asciticos restitutos novi; e quibus unus vixit sanus quatuordecim annos. Idem fere valet gambogiae semiscrupulus. Quanquam magnitudo huius morbi mag-

num remedium postulet, id tamen saepenumero aegri vires sustinere non possunt: in quo casu confugiendum est ad ea quae lenius alvum solvunt, quaeque movent urinam. Ad hoc utilis est scillae radix, cuius tot grana sumenda sunt, quot stomachus sine nausea recipere valet. Aromata iucundiora, vel olea quae vocantur essentialia, vim eius movendi vomitus cohibebunt, reddentque maiorem modum satis tolerabilem. Huiusmodi medicamentum singulis noctibus sumendum est; singulis autem auroris, kali acetati drachma dissoluta in uncia tincturae sennae; vel salis Rupellensis, aut kali tartarisati, semuncia: omnes hi sales, qui vocantur neutri, quantum adhuc usu didici, urinam pariter movent.

Fieri potest, ut debilitas aegri, vel alvus eius fusior, locum purgantibus nullum relinquat; et proinde ab iis rebus quae movent urinam tota curatio petenda sit. Hanc quidem facultatem non paucis medicamentis tribuerunt medici veteres, eaque posteris suis hoc nomine commendarunt. Fatendum autem est, horum omnium effectus adeo leves esse, et incertos, ut quisquis iis multum confidat, spe sua saepe exciderit. In hoc numero sunt balsama acriora, quorum scrupulus bis quotidie sumtus est; item kali praeparati tantundem in aqua, aut in vino dissolutum. Hoc pulchrius multo remedium est, quam quod habet cineres herbarum ex vino liquatos; quippe eorum vis non continetur in terra fatua, verum in salibus alcali-

nis, quibus hi cineres abundant, cum aliqua simul
 portione salium neutrorum, quos multae plantae
 crematae exhibent. Parem facultatem habere exi-
 stimantur spiritus aetheris nitrosi, et tinctura
 cantharidis; huius guttae viginti, illius drachma,
 ter quotidie adhibetur. Succi etiam ex foliis ci-
 narum expressi cochlearium cum vini Rhenani coch-
 leariis tribus nonnullorum sermone celebratur.

Ubi haec, et multa alia quae vocantur diure-
 tica, frustra, ut plerumque fit, tentata fuerint,
 quidam conati sunt aquam educere incisus cruri-
 bus, vel super ea impositis emplastris cantharidis:
 interdum quoque sponte sua vesiculae in cruribus
 hydropicorum nascuntur. His auxiliis haud exi-
 guam aquae copiam elicitam vidi, morbum autem
 nunquam sanatum: at brevem moram iniecerunt,
 et aliquantulum aegrum levarunt. Odiosum est
 quod haec vulnuscula interdum fiunt ulcera sanatu
 difficilia, vel periculosa, quanquam bis aut ter
 quotidie pannis laneis ex aqua calida expressis fo-
 veantur. Fomenta quoque utilia sunt ad aquam
 copiosius evocandam. Non raro quoque oportet
 aquam ferro emittere; cum venter in tantam mo-
 lem assurgit, et humore adeo distenditur, ut fere
 rumpatur, et spiritus vix trahi possit. Licet vero
 ex hoc foramine omnis aqua exeat, tamen inter
 quamplurimos qui sic levati fuerunt, vix unum
 et alterum memini, quorum morbus non redierit,
 quive indies labefactatis viribus non extincti sint;
 quippe, ut antea dictum est, hydrops tantum-

modo signum est alterius, et plerumque pestiferi morbi.

Quibusdam contigit esse adeo felicibus, ut primo morbo incipiente ire in melius, fons hydro-
pici suppressus sit, et aegri ex valetudine ancipiti
assurrexerint. Inter ea etiam, quae raro, et prae-
ter omnium spem, in hoc morbo eveniunt, poni
debet incredibilis urinae copia, quae sua sponte
repente effusa interdum intra paucas horas tumo-
rem penitus solvit. Nimirum facultas est quae-
dam incognita in corpore animali insita, quae
humorem omnem in ventre conclusum absorpsit,
atque in renes vertit. Exitus huiusmodi a natura
sola profectus, potest quidem immeritum honorem
attulisse remediis, quibuscunque hoc tempore
aeger utebatur.

Nonnullos hydropicos cognovi, quos cepit
cupido ab omnigena potione abstinendi; quod fa-
cere sustinuerunt quadraginta dies, aut amplius.
Hoc tamen non adeo bene cessit, ut alios hor-
tari possim eandem curandi viam insistere. Quos-
dam etiam audivi ab omnibus potionibus tempe-
rasse per sex menses. Oleum olivae, aut semi-
num ricini, mane et vespere frustra illitum est ab-
domini multorum hydropicorum, propterea quod
unus aut alter, qui hoc remedium tentarant, mor-
bo suo, ut aiebant, liberati sunt. Hydropem reces-
sisse ultro in duobus cognovi, quorum alter incidit
postea in apoplexiam, alter delirus factus periit.

Asciticus quidam, subito urinae profluvio

abortu, omnem supervacuum humorem emisit:
 at crura non cessabant tumere, et aeger metuebat
 morbum rediturum: in hoc rerum statu factus est
 apoplecticus, protinus vero mens rediit; deinde
 vertigo erat, et creber apoplexiæ metus: sed vi-
 xit multos menses ab omni crurum aut ventris tu-
 more liber.

Hydrops, qui dicitur anasarca, sive inter cu-
 tem, saepe fit vel nulla, vel tantum levioze qua-
 dam valetudine antecedente; ideoque plerumque
 sanatur, et ex toto salus sequitur. Quanquam
 autem haec species ut plurimum vacet periculo,
 tamen diu trahere consuevit, et interdum non
 modo per aliquot menses, sed etiam per aliquot
 annos omnia remedia vicit. Iuniores, quique
 corporis integri sunt, in hunc morbum interdum
 incidunt; frequens etiam in gravidis est, sed post
 abortum mox subsidit. Cum hoc simul in quibus-
 dam insolita lacrymarum profusio fuit. Nulla
 aetas secura est ab hoc malo; foeminae vero, sae-
 pius quam viri, illo urgentur. Conveniunt quae
 alvum leniter movent, interpositis medicamentis
 amaris et aromaticis. Interdum cruribus incisis
 morbus solutus est. Opium etiam singulis nocti-
 bus sumtum, nescio an sudores eliciendo, praesi-
 dio fuit.

C A P. XLIX.

De Affectu Hypochondriaco et Hysterico.

Perpauci, seu potius nulli extiterunt, quibus
 incognitus est animi languor excrucians, quique

non aliquando sine ulla manifesta causa experti sunt eam mentis demissionem, quae nubila et tristitiam omnibus suis laboribus et studiis obducit, spes suas ubique fere in desperationem convertens non sine angore vix tolerabili. Hic animi humani status mihi videtur esse in viris hypochondriacus, in foeminis hystericus affectus. Ubi hic levis est, et cito finitur, et alios fugit, haud diu eius meminit etiam qui eum passus est. Quod si gravior fiat, et saepe repetat, diuque permaneat, nescio annon iure numeretur in maximis quas vita habet miseriis: neque enim alia magis omnes gaudii fontes supprimit, et corrumpit. Pestis haec veluti vigilantis somnium est, in quo homo, quanquam bene valeat, sibi videtur omnium morborum signis urgeri; et quanquam innocens, impletur terrore, tanquam omnium scelerum conscius esset.

Summa ignoratio in qua versamur, societatis quae corpori intercedit cum anima; tum modico quo haec duo se mutuo afficiunt; tum quoque facultatum in corpore animali naturaliter insitarum, quae longe distant ab iis quae in rebus inanimis reperiuntur, affert magnam difficultatem in omnium morborum investigatione; in huius autem maximam. Etenim mala hypochondriaca et hystERICA in his incognitis rebus tota sita esse videntur; dum corpus, quatenus sensibus nostris patet, integerrimum est in nonnullis quos hic affectus diu ac pessime habuerit. Nihilominus vix

e est ulla pars corporis, quae non interdum ex animi
 affectibus laesa fuisse videatur; nulla autem sae-
 pius aut gravius urgetur, quam intestina, quae in
 his aegris raro vacant doloribus, gravitatis sensu
 molesto, cruditate, acore, ardore, nausea, et in-
 flatione, quae fere strangulet, inferatque vertigi-
 nem, atque sensus omnes confundat: at cibi cu-
 ppiditas naturalis manet, vel etiam naturali maior.
 Urinā diluta esse consuevit, et copiosissima; hoc
 tamen non est perpetuum. Haud temere repe-
 rries quemlibet cordis ipsius affectum, qui palpita-
 tiones vehementiores excitet, quam hic de quo
 sermo est, licet cor interea sit sanum et illaesum.
 In iis etiam, quorum pulmones sunt integerrimi,
 spiritus fit non minus difficilis et angustus, quam
 in iusto asthma. Tum solent deludi falsis ima-
 ginibus veluti globorum in faucibus haerentium,
 et inani strangulationis metu. Lacrymae quoque
 sine dolore profluunt. Naresque et aures odori-
 bus sonisque fictis implentur. Oculi sine mani-
 fеста causa caligant. Vertigo, sensuum confusio,
 stupor, et animi inconstantia sunt, cum attentionis
 memoriaeque defectione; quae palam faciunt,
 facultatem aliquam deesse, quae moderetur et di-
 rigat corporis motus, mentemque esse sub pote-
 state aliena. Noctu etiam nulla fere miseriae in-
 termissio est; nam aeger parum dormit, et som-
 niis tumultuosis agitatur, et saepe expergiscitur.
 Ad haec accedunt iactatio, dolores vagi, ardores
 subiti, frigidi sudores, terror, tremor, leves mem-

brorum distentiones, atque torpores, quibus interdum adeo opprimitur, ut vel animo linquatur, et concidat; vel aegre, et magno conatu, valeat tandem se colligere *.

Omnia haec mala viros hypochondriacos, et mulieres hystericas pariter exercent. Sunt autem in his quaedam leviora, quaedam severiora, quam in maribus; alia etiam harum fere propria. Demissio, et infractio animorum, solent esse minores in foeminis, quam in viris; sed in illis multo saepius mentis facultates prorsus torpent; statuas esse diceres, gaudio aut dolore vix movendas. Animae defectiones magis familiares sunt in sexu muliebri, item distentiones quae vocantur hystericae, a quibus corporis robur maius potest viros defendere. Distentionum accessiones saepe excitantur levi quadam sensuum aut animi affectione, et incipere solent ab angore ventriculi, aut visce-

* Qualis sensuum confusio inferatur ab affectu hypochondriaco, intelligi potest ex sequente historia. Vir circa trigessimum aetatis annum, sine quavis manifesta causa, incidit in gravem animi languorem, quocum diutius conflictabatur. Tandem, nescio qua iudicii perversitate motus, novacula arrepta, penem scrotumque sibi abscidit. Postquam vulnus sanatum esset, ipse ultro aiebat, maxime mirum sibi videri, unde fieri potuisset, ut tam immane facinus auderet, qui alias semper timidi fuerat ingenii, sic ut venam incidi non mediocriter metueret, neque sine multa perturbatione tantulum vulnusculum sustinere posset: idem tamen ab omni metu liber fuit, dum amputationem praedictam aggrediretur doloris atque periculi plenam; quam porro, ut ipse mihi fassus est, ne minimus doloris sensus secutus est.

Similis historia legitur in libro cui titulus, *Medical Communications*, vol. II. p. 54.

rum; manent modo momentum temporis, modo semihoram, interdum altera alteram continuo sequitur per integrum diem; illud interea singulare est, quod, quamvis aegrae loqui nequeant, et videantur prope intermortuae, saepe tamen audiant, et intelligant quicquid ab assistentibus dicitur. Postquam aliquantum resipuerint, et vox redierit, propergent interdum loqui aliena per aliquot horas; cuiusmodi leve delirium nonnullas invadit, etsi nulla accessio hysterica antecesserit. Illud etiam in hoc morbo interest inter foeminas et viros, quod illae procliviores sunt ad lacrymas et ad risum sine voluntate. Post risum fere sequitur languor, lacrymae morbum levant. In foeminis quoque saepius aut vox supprimitur, aut clamor immodicus editur, tum fiunt singultus, oscitatio, pandiculatio, aliaeque leviores nervorum distentiones; postremo globus hystericus, qui fauces videtur impedire, foeminas saepissime infestat, viros autem vel nunquam, vel rarissime.

Vetus admodum opinio est hominis naturam contineri ex corpore, facultatibus naturalibus, et mente*. In foeminis hystericis facultates naturales praecipue perturbantur, et pervertuntur; in viris mens ipsa magis laborat. Itaque inter illas maxime dominantur nolentium vociferationes, defectiones animae, et distentiones omnis generis;

* *Σωμα, Ψυχη, Νους.* Antonin. lib. III. §. 16. Simplic. Comm. in Epict. p. 7. Hammond, Whitby, et Benson Comm. in Thessal. 1 Ep. V. 23.

inter viros autem tacita desperatio. Ea quoque causa esse potest, cur viri in hoc morbo crebrius, quam foeminae, eo insaniae adigantur, ut necem sibi consciscant.

Nonnulli, qui contendunt curas atque gaudia inter omnes homines aequaliter fuisse divisa, opinati sunt languorem animorum sortem esse divitum et otiosorum, et eorum felicitatem ita temperare, ut horum beatorum vita non sit magis expetenda, quam eorum qui labore sibi victum quaerunt. Attamen nequaquam verum est, pauperes, et laboriosos, et humili loco natos, ideo tutiores esse, minusque huic morbo obiectos. Interdum a parentibus traditur, et semina eius nobiscum simul nata iusto tempore non cessant erumpere, qualiscunque fuerit vitae conditio. Languor animorum haudquaquam incognitus est operoso colono, quem prohibet gustare ullam partem voluptatis, quae laboris finiti praemium esse debuit. Non corporis firma constitutio, non temperantia, neque negotia, neque, quod nonnullis videtur, arthritidis praestat homines securos ab hoc malo. Tamen illi proculdubio sunt opportuniores, qui se prorsus a rebus agendis abstrahunt. Nam otium non solum alet, sed etiam creabit affectum hypochondriacum: nec non idem facient nimia negotia. Immodicus usus Veneris, vini que perniciosus est in hoc morbo; neque utilis est nimia cibi abstinentia. Crebrae febres, alvus diu fusa, terror, atque tristitia, non raro initium dant huic affectui,

tai, etiam in iis qui non fuerint ad illum natura proclives.

Morbus hypochondriacus, pariter ac arthritidis, insania, et phthisis, non solet esse molestus ante pubertatem. Ex illo vero tempore usque ad senectutem nullus est annus, in quem primus eius impetus non incidit. Rarissimum est ut hi aegri peius se habeant vespere, quam mane. Nam plerique, tanquam qui aliis nervorum affectibus implicantur, somno utcunque exiguo laedi videntur; et quo diutius dormiunt, eo magis animo concidunt. Nonnulli, cum primum expergiscuntur, vix sunt apud se, et omnes corporis animique sensus confusos habent; aut si minus laborent, tamen nihil nisi luctuosa et acerba cogitant, cum hoc potissimum tempore tragoedias suas excitat hic morbus. In eodem fere statu aegri sunt, aut non multo meliori, usque ad prandium; tum demum incipiunt respirare, et aliquantum recreari; vespere autem animi in tantum reficiuntur, ut interdum nimii sint; quibus frui cupientes, et horrentes angorem, qui per quietem redit, non nisi sero et inviti lectum petunt.

Cognovi tres homines, qui in exploranda et olfacienda thea occupati, tremoribus atque aliis hypochondriacis malis afflicti sunt, quae omnia theae imputarunt; rectene, an secus, viderint alii qui ampliores nacti sunt occasiones perspicendi, quid in hac re verum sit.

Tempestates anni videntur nihil valere vel ad

exasperandum, vel ad levandum hunc affectum; qui etiam quamvis cognatus est epilepsiae, insaniae, et paralyti, haudquaquam tamen consuevit in illos morbos desinere.

Ea est conditio huius aegrotationis, ut qui ea laborant, semper desperent de recipienda sanitate: sed huic desperationi usus et ratio vehementer repugnant. Etenim, quantum sensibus nostris patet, singulae corporis partes inter tantas miseras integrae manent et illaesae. Mens quidem, et facultates naturales opprimuntur, iacentque; sed nulla accepta est iniuria, quae eas in pristinum statum restitui prohibeat. Tum hypochondriaci saepe prae se ferunt colorem vultumque sanorum, neque corpus, nec robur amittunt: ad haec, intermissiones sunt, in quibus fruuntur omnibus integrae valetudinis voluptatibus. Ingenium autem illis adeo non fit tardius, ut secundum Aristotelem omnes ingeniosi sint melancholici. Sponte quoque sua interdum finitur hic affectus; fueruntque hypochondriaci, qui viginti annos ab eo liberi vixerunt. Aeger vero certe est in bona spe, nec fiduciam illi deesse oportet, cum morbus periculo vacet, et nequaquam sit insanabilis; quo etiam finito, valetudo pariter erit integra, ac si vir nunquam aegrotasset.

In morborum longorum omnium curatione summa victus ratio habenda est, ne quid corpus detrimenti malique, quam maximum vero auxilii inde capiat: quo fiet etiam, ut facultas illa sui

conservatrix, in omnibus animalibus insita, totis viribus contendat morbum excutere. In nonnullis quidem morbis nihil ultra medicina efficere valet. Igitur in languore animorum opera quoque danda est, ut non tantummodo vitentur, quae morbum genuerint aluerintque, verum etiam quaecunque secundae valetudini adversentur.

Medicamenta purgantia et exinanientia aliena sunt in hoc morbo. Cum tamen alvus plerumque astricta sit, tuto dari possunt pillularum Rufi granatrua, vel talis modus cuiuslibet remedii, qui non plus semel ventrem moveat: hoc enim pacto prohibebuntur, vel levabuntur multa intestinorum mala. Neque inutilis erit vomitus, quoties ventriculus praegravetur, et nauseet. Omnia valentiora huius generis medicamenta sunt fugienda. Sanguinis detractio raro cessat omnia hypochondriacorum mala exasperare. Multum abest, ut podagra animos demissos erigere queat: quin saepius languorem auget. Verum tam parum in medicina positum est podagram vel creare, vel concitare, ut, meo iudicio, ludat operam quisquis studet affectum hypochondriacum per arthritidem fugare. Aquae Bathonicae mihi visae sunt prorsus inutiles, nisi ubi ventriculus maiorem in modum laboraret. Itaque iter illuc, et navigatio, vel peregrinatio, tum solum laudanda sunt, cum aeger locum mutando onus curarum, aut moeroris, negotiorumve deponere possit. Utiliores sunt lavatio marina, et aquae chalybeatae, quae valetudi-

nem firmiorem, et corpus robustius reddant. Gummi-resinae, et radix valerianae sylvestris, et ferrum habentur in numero remediorum ad affectus nervorum; quicquid autem illis tribuam, ex aliorum medicorum autoritate, potius quam ex usu, mihi cognitum est. Quoniam vero nervi ventriculi et viscerum caeteris corporis nervis quodammodo dominantur, et in eos imperium habeant; cum quoque in has partes praecipue incumbant hypochondriacorum et hystericarum mala, facile patet utilitas remediorum quae acorem, inflationem, dolores, et reliquos intestinorum affectus levant, vimque et robur eis addendo faciunt, ut omnia sua officia bene et naturaliter peragant. Sed nullo modo melius succurritur infirmitati intestinorum, quam per medicamenta amara et aromatica, quibus, ubi opus fuerit, adiici potest quod leniter alvum solvat. Ex his fiunt pilulae, guttae, tincturae, vel infusa; quae compositionum varietas, tum moles haud magna, impediunt ne quis huiusmodi remedia respuat, etiamsi necessarium sit in illis diutius perseverare.

Multi aegritudinem ex animis marcentibus vino et potionibus meracioribus cupiunt expellere; quod etiam ut faciant, amici, qui illis bene quidem volunt, sed male consulunt, haud raro hortantur. Vix dici potest quantum instet periculum, ubi aegri vel animo suo in hac re indulgent, vel amicorum improvidis consiliis parent. Breve quod sic nascitur solatium, nimis care emitur in-

cremento languoris mox subsecuturi: tum quoque vini modus indies augendus, ut animi pariter recreentur, totam valetudinem miserabiliter perturbat conquassatque. Quod si angor maior fuerit quam qui tolerari possit, et proinde opus sit praesente remedio, satius erit ex opio, quam ex vino, petere auxilium. Paucae guttae tincturae opii cum vino antimonii, aut cum tinctura asae foetidae, aut etiam per se sumtae, praesidio erunt animis languentibus multo tutiori quam vinum; neque si augeantur, valetudini perinde nocebunt, neque hominem rebus agendis omnino minus aptum reddent: ad haec, longe facilius est aegrum tandem ab opiatis remediis abducere; quod longo usu didici. Nemo nescit haec contra evenire vinolentis.

Quidam dolores hypochondriacorum et hystericarum risu potius, quam misericordia excipiunt, tanquam quos ipsi sibi fingunt sine ratione. Verum in hac re longe errant. Neque enim dubitare licet, quin huius aegrotationis, perinde ac alterius cuiuslibet, verae causae subsint. Confitendum tamen est, vim morbi fore eo minorem, quo magis in adversum aeger nititur, et quo fortius illi resistit: atque hoc, opinione magis, situm est in ipsius potestate. Quisquis hoc sibi persuaderi sinit, et proinde morbo suo non cedit, sed it contra audentior, nae ille proxime aberit a sanitate. Digna autem est causa in qua omnibus corporis animique nervis contendat; neque enim de

re parva certamen est, sed de vita ipsa, beatane futura sit, an misera.

C A P. L.

De Ictero, aliisque Iecoris Affectibus.

Inter frequentissimos iecoris morbos ille est, qui fit interclusis bilis viis; et est minime periculosus. Nondum constitit, ob quas causas bilis interdum concreseat, et calculos faciat. Hi calculi saepissime delitescunt intus in vesica fellea; et inde fortasse eorum plerique veniunt, qui in viis postea reperiuntur. Fieri tamen potest, ut bilis in ipsis viis primum coeperit concreescere, vel etiam in iecore, quamvis ictericorum iecur plerumque nullo vitio afficitur. Quoties calculi expulsi e vesica, seu in ipsis canalibus nati, vias impederint, refluit bilis in iecur, atque inde in sanguinem, et aureo colore inficit serum, cutem, oculos, et urinam *. Signa morbi consueta (qui dicitur icterus, aurigo, morbus arquatus, aut regius) sunt fastidium cibi, sensus gravitatis in ventriculo, nausea, vomitus, languor, desidia, vigilia, et macies insignis; atque haec quidem sunt aliorum morborum communia; proprius autem est icteri aureus color oculorum, cutis, et urinae, dum alvus pallida reddit. In quibusdam dolor ventri-

* Cuiusdam icterici urina saturrime fusca, paucas horas servata, viridem colorem induit; quemadmodum interdum fit in vomitu bilis flavae, cuius color post aliquam moram in viridem mptari solet.

culi vix tolerabilis fit aliquot ante icterum dies, pulsu interea non omnino concitato. Qui motus naturalis arteriarum distinguit hunc dolorem ab inflammationibus viscerum. Quamobrem in hoc casu medicus tuto potest iubere aegrum bono esse animo, cum dolor, vel medicinae vel naturae beneficio, brevis fiet, neque minimum periculum inferet. Dolor qui in nonnullis ictericis summus est, in aliis vix sentitur, vel etiam prorsus deest. Raro perseverat ultra biduum triduumve; in uno tamen aegro saeviit mensem integrum, nisi tum cum opio vinceretur: et quanquam plerumque antecedit luteum cutis colorem, cessatque protinus ut hic conspicitur; hoc tamen non est perpetuum: nam in quibusdam saepius repetit, aut vix prorsus conquiescit, quamdiu morbus manet.

Iure licet suspicari calculum haerentem in bilis viis, ubi omnes aliae icteri notae inveniuntur, etiamsi color non fuerit luteus. Quae suspicio non raro mihi confirmata fuit, vel quia calculus postea expulsus est, et omnia mala levata; vel quia una ex his accessionibus tandem desierit in icterum.

Quemadmodum suspicio esse potest calculi fellis, sine ullis eius signis in cute, aut in oculis; sic vicissim color interdum luteus esse dicitur sine calculo: nimirum quia duodenum adeo infarctum est, ut exitum bili neget; vel quia impeditum est spasmis hystericis. Quam vere haec dicantur, viderint alii. Plurimi certe medici, testes oculati, consentiunt febrem quandam in India occi-

dentali aegros icterico colore inficere; quod alii quoque de morsu viperæ affirmant.

Lucretius, quantum novi, primus dixit lurida fieri quaecunque tuentur arquati*; quod etiam omnibus in ore est. Tamen, quos vidi ipse arquatos, uno consensu hoc negarunt, præter duas foeminas, quarum testimonium multa levabant.

Tempus icteri est admodum incertum. In quibusdam finitus est intra paucos dies; in aliis perstitit annum. Interea tam longum bilis impedimentum valetudinem neququam adeo corruerat, quin protinus ut icterus recessisset, integra sanitas rediret. Cognovi quos hic morbus saepe occupaverat in annos viginti, et tamen inter accessiones recte valuerant.

Calculi modo tantæ magnitudinis sunt, ut totam fellis vesicam expleant; modo his minores, donec ad pulverem minutum descenderint. Ubi calculus maior fuerit, quam qui ductum subire possit, vix crediderim quin incommodi aliquid inde oriatur; verum quid sit illud malum, nondum satis compertum habeo. Multorum cadavera incisa vidi, quorum vesiculae abundabant calculis, et interdum satis magnis, quanquam neque icterus fuisset unquam, nec quodvis aliud malum, quod huic causae adscribi iure posset. In paucis vero suspicatus sum dolores saevos hypochondrii dextri profectos fuisse a calculis, qui post mortem in ve-

* Lib. IV. v. 353.

isica reperti sunt. Bilis viae in ictericis, non secus ac ureteres in calculosis, modo ubique dilatantur, modo in quibusdam tantum locis, ubi calculus aliquis grandior moram fecerit. Mulier, quae cum ictero multos annos saepe conflictata fuerat, tandem expulit calculum cuius minor ambitus erat pollicum duorum. Iecur ipsum prorsus sanum repertum est in multis, qui ictero saepe laboraverant.

Ex calculis bilis quos ipse examinavi, alii fuerunt aqua leviores, alii ponderosiores, et flammamas prompte conceperunt.

Nescio an cutis prurigo non peius angat ictericos, quam dolor; cum somnos pariter impediatur, ut maneat diutius, et sine ulla intermissione. Quamquam autem alii hoc tormento macerantur propter totum morbum; alii contra ab illo prorsus liberati sunt. Interdum cum ictero singultus est, sine iecoris ipsius vitio, et sine periculo. Non est perpetuum ut alvus in hoc morbo vel astricta sit, vel soluta; at semper facile movetur, qua nota discernitur ab ileo. Icterici nonnunquam inhorrescunt per horam integram; tamen is horror nec inflammationis, neque mali cuiuslibet indicium est; sed tum fortasse excitatur, cum calculus per canalibus angustias eluctetur. Quibusdam ictericis omnes cibi videntur amari; et interdum, sed rarius, prostrationes. Vidi foeminam quae ictero laborabat sesquimensis, et per totum hoc spatium lactabat infantem prosperrima, ut videbatur, valetudine;

atque ipsa mihi dixit lac fuisse coloris naturalis. Ab aliis autem medicis audivi lac ictericarum flavere. Lacrymae unius icterici, ut ipse mihi retulit, flavebant. Sitis insedabilis, et appetentia cibi naturali maior, unum tantum et alterum eorum quos curavi fatigabant. Acor, atque ardor ventriculi pluribus fuerunt molesti.

Infantes, et pueri, morbo regio perinde obnoxii sunt, ac adulti. Illi vero semper leviter laborant, et cito restituuntur. Mares quoque et foeminae pariter infestantur. Qui semel fuerunt icterici, eodem plerumque morbo iterum aegrotant; non solum quia eadem corporis constitutio novis calculis gignendis favet, sed etiam quia icterus saepe finitur calculo non expulso, sed in vesiculam relapso, unde iterum proveniat in ductum, et novam accessionem inferat.

Aurigo, quae ex bilis canalibus impeditis orta est integro hepate, vacat quidem periculo, et multos etiam a rebus agendis non abstrahit. Omnia autem hepatis ipsius vitia maximum aegris periculum intentant. Hoc viscus inflammationibus repentinis ac vehementibus opportunum esse videtur, quae vel paucis diebus occidunt, vel, supuratione facta, tardius, sed non minus certum, exitium afferunt. Hoc tamen rarius est. Multo saepius scirrhus in aliqua eius parte nascitur, prorsus uti fit in mammis foeminarum, qui modo conquiescit, modo inflammatur cum febre hectica, fastidio, macie, tussis, et singultu. Spatia inter

inflammationes in aliis alia sunt. Hi paucis mensibus moriuntur; illi annos aliquot supersunt: plerique paulo ante mortem fiunt hydropici. Iecur forsitan haud acutiore sensu donatum est, quam pulmones; quamobrem si hoc solum sit in morbo, et partes vicinae contagione non laedantur, obscurus, aut nullus dolor percipietur. Sic affecti vix nisi in latus dextrum cubant.

Morbis hepatis saepe accedit dolor humeri dextri. An idem quoque fiat ex simplice ictero, non compertum habeo.

Ubi hepar scirrhosum est, saepe fit sanguinis cursus ex naribus, gingivis, et umbilico; vomitus etiam sanguinis est, et alvus reddit cruenta.

Haud pauci moriuntur vitiis iecoris, quorum urina, et cutis, per totum morbum nunquam fuerant luteae. Nam is color tum solum accedet, ubi scirrhi sic siti sunt, ut bilem contendentem in intestinum impedian, retroque ferri in sanguinem cogant.

Iecur scirrhis induratum saepe manu extrinsecus deprehendi potest. Atque haud scio, an aliud certum huius morbi indicium sit, praeter ea quae supra proposita sunt. Venae concitatae singultus, nausea, et fastidium, communia sunt, iecinori, et aliis visceribus vitiosis. Sed parvi interest sollicite definire cui demum abdominis visceri inflammatio et scirrhus insideant: ubi ubi enim sint, vix ullis aliis auxiliis ^{Ulcus}erit, quam quibus utendum est in febris hecticae curatione. Veri non absimile est, ubi scirrhus exiguum iecino-

ris partem occupaverit, victu refrigerante, cura-
que sollicita fieri posse, ut vel tarde, vel non om-
nino vitium serpat.

Inflammatiō iecinoris interdum desinit in sup-
purationem. Si pars inflammata agglutinauerit
se intestinis, et rupto abscessu pus in ea feratur,
aeger illico vomit ac deiecit humorem atrum teter-
rime olentem, et intra paucas horas moritur. In-
terdum inflammationis sedes vicina fuit parieti ab-
dominis, cui tandem adhaesit, et abscessu facto
tumor assurrexit extrinsecus, quo rupto non exi-
gua copia humoris effluere perseveravit diutius.
Quaedam quinquagenaria graviter aegrotabat de-
cem dies cum dolore ventriculi, singultu, alvo
fusa, atque animae defectionibus, et aegre resti-
tuta est: post mensem tumor ortus est prope um-
bilicum, qui apertus multum humoris flavi profudit
in quatuor annos; deinde dolor auctus est cum nau-
sea et horrore, et post paucos dies exiit calculus
fellis tres pollices longus, totidemque ambitu,
quique pendebat grana CCXLV: humor tenuis
flavus copiosissime manabat per dies quatuor-
decim: brevi postea ulcus sanatum est, et foemina
satis commode valebat. Patet, vesiculam felleam
in hac aegra fuisse inflammata, et dein exulce-
rata. Ex iis quos suspicatus sum inflammatione
iecinoris laborare, quidam intra decem dies mor-
tui sunt, alii cum morbo suo conflictati sunt duos
menses. Leves mentis alienationes, et cutis modo
lutea, modo coloris naturalis, interdum pustulis

notata, his aegris fuerunt praeter communia februm signa.

Regione iecinoris graviter collisa, id viscus interdum induruisse novi. Idem vitium saepius ortum est ex eodem corporis habitu, a quo scirrhii in caeteris quoque partibus gignuntur; praecipue tamen fit ex immodico usu vini, et potionum meraciorum, quae proprie nocent iecori prae omnibus aliis visceribus. Hinc est quod viri, cum vino magis dediti sunt, vitiis iecoris saepius affligantur, quam foeminae. Aquae Bathonicae nusquam sunt utiliores, quam in medendis morbis ab ebrietate profectis: sed postquam hepar factum fuerit scirrhosum, et febris hectica indicet hos scirrhos proclives esse ad inflammationem, ibi istae aquae veneno peius sunt vitandae.

In curatione icteri simplicis ante omnia operanda est, ut dolor mitigetur, siquidem aeger eo, ut saepe fit, torqueatur. Unicum autem eius remedium est opium. Huius granum unum quamprimum sumere oportebit; idque bis vel ter tuto repeti potest intra duas horas, si dolor postulet. Qui accessionibus icterici doloris subiectiores sunt, ad manum habere semper debent duas huiusmodi pilulas, quibus ingruenti dolori sine mora occurratur. Proximo loco attendendum est ad vomitum, qui saepe in hoc morbo diu et vehementer aegrum exercet. Hic videtur esse conatus quidam naturalis, quo calculus loco suo moveatur, sive in duodenum intestinum descendendo, seu relabendo

in vesicam. Metuat forsitan aliquis, sicubi calculus fixus haereat et immobilis, ne vomitus dolorem intendat, vel etiam canalem membranaceum laceret; ideoque medicamenta quae vomere faciunt reformidet. Sed huiusmodi metum usu didicimus esse inanem; cum vomitus dolorem mitigare, potius quam augere deprehendatur. Quod si securi simus de periculo, omnino oportebit illum excitare, aut etiam bis facere, licet aeger sua sponte non vomat, quo scilicet calculus e canali expellatur. Postquam satis vomuerit, opio dato quies concilianda est.

Neque minus praesidii erit in purgantibus; quae motum intestinorum naturalem incitant, et cursum bilis copiosiore provocant. Medicamenta ex hydrargyro a nonnullis existimata sunt reliquis purgantibus praestare; cum vero argentum vivum, quantum novimus, propriam vim nullam habeat ad resolvendas bilis vias et calculum expediendum, meo quidem iudicio maxime convenient quaecunque facile tolerantur, et tuto repeti possunt diutius. Huius generis sunt aqua marina, fontes salsi, et varii sale dissoluti in aqua vel pura, vel in quam herba aliqua amara missa est. Haec quotidie, vel alter quoque die sumere licebit in multos menses sine minimo languore stomachi, aut virium, aut animorum. Pulvis etiam compositus e radice rhabarbari et herba qualibet amara his aegris idoneus est. Icterus puerorum medicamentis purgantibus facile cedit. Si icterici alvus

fusior sit, videndum est, ne purgatio nimia fiat; et propterea ventriculus sustinendus est medicamentis amaris. Saepe prurigo in tantum fatigat ictericos, ut haud minus quam ipse dolor, opio leniri postulet, sine cuius praesidio nec quies interdiu, neque noctu somnus sperari potest.

Sunt et alia remedia, quorum beneficio quidam confidunt calculos bilis dissolvi posse. Huius generis sunt aqua calcis, sales alcalini, aqua kali puri, et varii saponis. At frustra fui dum calculos aut in his, aut in acidis mineralibus liquare conatus sum. Aether, si bene memini, eos tandem tabefecit. Verum ponamus hos, vel alios quoslibet liquores, ubi calculo superinfusi sint, eum comminueri posse; tamen in ventriculum demissi, ad calculum in vesica latentem, vel haerentem in viis, nullo modo pertinere valebunt. Quamobrem illud remedium votis nostris solum respondebit, quod bilis naturam ita mutet, ut amplius non concreseat, aut, si concreverit, liquefaciat, et in bilem resolvat. Talia sane remedia venditata sunt; sed multum abest ut eorum facultates usus comprobaverit. Vir quidam saponis unciam quotidie devoraverat per septem annos, cuius vesica fellea nihilominus calculis referta est ne minima quidem parte exesis. Medicus solers, et in arte sua exercitatissimus, solitus erat ictericis dare salis cornu cervi scrupulum ter quotidie; ex quo egregios effectus se saepe expertum esse affirmabat. Rationi quidem consentaneum est,

sales alcalinos, et saponem, utiles esse adversus icterum, cum horum natura adeo accedit ad bilem, ut eius vicem quodammodo impleant in concoquendo cibo, et in detergendis intestinis. Cauto tamen opus est, ne nimium fidamus his rationibus: cognovi enim largos haustus succi limonum adeo profuisse ad icterum, ut famam remedii reportaverint.

Praetereo multa icteri remedia, quae iam merito neglecta iacent, et contempta; cum futilibus prorsus causis, atque erroribus saepe ridiculis famam suam debuerint. Aquae Bathonicae a quibusdam iactantur, tanquam quae plurimum ad salutem ictericorum conferunt. Hi aegri, ut dictum est, ubicunque vivant, plerumque convalescunt: sed, quantum potui intelligere, salus illis non facilius fuit, propterea quod biberint istas aquas. Cum tamen tutae sint, eas prohibere non oportebit, ubi ab icterico expetantur.

Inter varia corporis humani mala vix aliud frequentius est, quam ventriculi dolor; qui, nisi me omnia fallunt, haud raro initium habet a bile concrecente, vel coacta, quamvis canales nondum adeo impedierit, ut retro in sanguinem vertatur, et faciat icterum. Iam diu est quod multa me moverunt hoc suspicari, et in annos singulos haec suspicio confirmata est. Nam in multis quibus per aliquot menses, aut etiam annos, familiaris fuerat ventriculi dolor, vidi eum tandem desinere in icterum. Nullus itaque locus dubitandi

tandi de hac re mihi relictus est. Quare ubi huiusmodi dolor saepe repetat sine quavis alia manifesta causa, atque aeger simul queratur sensum gravitatis molestum, ibi bilis plerumque erit nimis crassa, et auxilium petendum erit ab iis, quae vomere faciunt, et ab aquae marinae potione, aut aliis medicamentis, quae alvum leniter solvunt.

CAP. LI.

De Ileo.

Ileus, sive inflammatio intestinorum, praecipue invadit adultos, tum maxime eos, qui hernia laborant, vel alio vitio earum partium; ex quo factum est, ut quidam diu vixerint colicis doloribus subiectiores. Aetas puerilis non prorsus segura est ab hoc morbo, quo septennes periisse novi. Et fieri potest, ut hoc sit unum ex istis viscerum malis, quibus tot infantes moriuntur ante quartum aetatis annum.

Incipit a dolore in aliqua parte intestinorum sito, qui vel repente et summa vi urget, vel ab exiguis orsus initiis sensim ad summum pervenit. In uno et altero postquam visus est minui per paucos dies, dein reversus est, nullis remediis cessurus.

Umbilicus, atque dorsum, ipsis aegris visa sunt sedes doloris, etiam illis qui hernia afflicti sunt. Quanquam vero hernia saepe fuerit causa, tamen, ut suspicor, non semper fuit inflammationis sedes; et in quibusdam nescio, an dolor aliquid habeat commune cum hernia, verum ad ali-

quam ex iis causis fortasse referendus sit, a quibus oritur etiam in illis qui nunquam fuerint ramicosi. Ructus, qui ileo saepe accedit, et tussis, dolorem vehementer exasperant.

Ileus semel atque iterum incepit ab angore, et sollicitudine, potius quam dolore; etiam ubi post mortem apparuit partem intestini gangraena fuisse occupatam. In iis qui coeperunt convalescere, dolor mutatur in eum qui tactu excitatur in loco leviter laeso; simul aeger se ubique levare sentit. In iis qui moriuntur, fit summa iactatio, atque omnia in peius ruunt. Morbus, sive spectet ad sanitatem, sive ad mortem, erit modo tardior, modo brevior, ut in omnibus inflammationibus, et fortasse prout maior, vel minor pars intestini fuerit affecta. Igitur alios secundo die, alios non nisi decimo quarto occidit. Constat ictum vehementiorem, aut acre venenum, istiusmodi inflammationem excitare posse, quae vel primo die, vel paucis horis interficiat.

Motus arteriarum permagni interest ad intelligendam naturam malorum, quae ileo communia sunt cum ictero et affectibus spasmodicis; nam in his vomitus et dolores non minus saeviunt, quamvis ne minimum periculum habeant. In hoc casu pulsus fere semper est naturalis, qui in ileo multum acceleratur. Tamen interdum fit, nescio qua de causa, in hac perinde ac in aliis inflammationibus et morbis acutis, ut arteriae omnino naturaliter ordinatae sint, et nullum futurae mortis indicium

ostendant: quod quidem ter in ileo contigisse memini.

Singultus, et sitis insedabilis, saepe non longe ab initio morbi incidunt, et per totum eius spatium aegros fatigant.

Stomachus adeo prompte reddit quicquid ingeritur, ut perdifficile sit invenire vel medicamenta, vel cibum, quae non statim vomentur. Crescente morbo liquor fuscus vomendo elicitur, quem multi aegri, et eorum famulae, dixerunt sibi, sensuum iudicio, stercus esse videri; de quo itaque vix possum dubitare, quanquam idem mihi nunquam visum est. Veteres quoque medici consentiunt in hoc morbo stercus per os reddi. Huius generis vomitus accessit primo vel secundo die; sed hoc rarum est: saepius tertio vel quarto die primum conspicitur, et interdum non ante octavum. Quidam libras quatuor quotidie vomuerunt per sex aut septem dies, licet toto hoc tempore nihil fere sumsissent. Hic liquor ex iisdem fontibus derivatur, ac ille qui copiosissime deicitur, ubi alvus fusa est. Itaque constat ileum interdum oriri non ex intestinis impeditis aut implicatis, sed ex motu eorum contrario: quam sententiam confirmat id quod ab aegris saepe audivi, nimirum, quae in alvum infusa sunt vomitu per os reddi. Quod etiam factum est ubi morbus initium habuit ab hernia in inguine, quae existimata fuit intestinum delapsum arcte comprimere, atque iter in utramque partem intersepire. In ipso mo-

riendi articulo, eiusdem humoris repentina profusio sursum et deorsum facta est. Huiusmodi vomitus, et venter simul quam maxime inflatus, intentusque, signa sunt capitalis periculi, ex quo neminem evasisse memini. Nec tamen in scriptis medicorum, tam veterum, quam recentium, desunt historiae aegrorum, qui etiam ex his malis salvi emerferunt.

Dolore cessante sine aegri allevamento, sequuntur angor et iactatio ipso dolore peiores: quanquam autem his accedat vigilia, atque omnes vitae vires concidant, raro tamen fit, ut hi aegri delirent.

Proprium et praecipuum indicium colicae cum inflammatione, etiam in ipso morbi initio, est alvus ex toto suppressa; quam movere semper difficile est, quaeque non raro omnia medicamenta vincit. Quamprimum alvus copiose fluxerit, protinus omnia mala fiunt leviora, et aeger cito convalescit. Verum non licet morbum putare superatum, ex una aut altera exigua deiectione: nam primo vel secundo die venter saepe excernit ea quae in recto intestino morabantur, longe a sede morbi, et ipse nihilo secius increscit. Neque magis proficitur, ubi ultimis morbi diebus exigua portio humoris, quo intestina replentur, viam sibi faciat in alvum, et deiciatur. Hoc novi contigisse paucas tantum horas, antequam extremae partes coeperint frigescere, morte brevi subsequutura.

Incisis quorundam cadaveribus ileo peremptorum, quaedam partes intestinorum arcte constrictae fuerunt sic, ut postquam ferro divisae sunt, eorum foramen omnino deleri videretur. In aliis repertae sunt intestinorum partes inflammatae, aut mortuae; nusquam vero aut constrictae, aut quovis modo impeditae. Vir, qui hernia in inguine diu laboraverat, ileo correptus periit; at, inciso cadavere, intestinum adeo laxè iacebat in inguine, ut duo digiti in idem foramen facile admitterentur; pars quoque intestini hoc annulo circumdata, multo minus laesa fuerat, quam quae in scrotum descenderat, quae nigra erat et emortua. Quantum illae post mortem mutatae sint, incertum est. In altero dimidius ambitus membranae coli exterioris, quinque pollices longus, nigri erat coloris, quamvis nullum impedimentum detegi potuit. In muliere, quae decimo quarto die extincta est, exigua pars tunicae intestini, extrinsecus oculos fugiens, in inguen delapsa erat, et gangraena occupata; sed nec stercus, nec quodlibet aliud impedimentum erat.

Ex iis quae dicta sunt, patet ileum esse istiusmodi morbum, in quo omnia calefacientia sunt aliena; ad quae tamen aegri et sponte sua, et amicorum hortatione, nimis saepe confugiunt. Curatio fit per eas res quae minuunt inflammationem, et alvum movent. Igitur sanguis toties detrahendus est, quoties dolor et inflammatio postulent, et vires sinant. Proximo loco tentandum est bal-

neum, et ad arbitrium aegri repetendum. Dolores, utcumque atroces, fere semper conquiescunt, quamdiu aeger in balneo remaneat. Fomenta, et vesicae aqua calida semiplenae, ventri admotae, remedia sunt balnei similia, sed minus valentia. Emplastrum cantharidis super abdomen impositum profuit non solum refrænando inflammationem, sicut in pleuritide, sed etiam coërcendo distentiones, quae vel impediunt, vel invertunt naturalem intestinorum motum.

Omnia haec auxilia reddunt alvum magis promptam ad parendum medicinae; ex quo vita aegri unice pendet. Odiosum est quod purgantium omnium sapor plerisque iniucundus sit, et nauseam moveat; ad quam etiam morbus sua natura semper proclivis est. Hinc oritur non mediocris difficultas inveniendi medicamenta, quae gustu tolerabilia ferri, et a ventriculo retineri possunt. Verum, qui non aversantur pillulas, commode devorabunt extracti colocynthidis compositi grana quinque singulis semihoris, donec alvus responderit. Duo cochlearia iusculi, vel aquae menthae piperitidis, in quibus dissoluta fuit sesquidrachma magnesia vitriolatae, nonnullis sunt satis tolerabilia, licet haec etiam repetenda sint singulis semihoris. Infusi quoque sennae par modus, eodem modo datus, vel etiam cochleari olei seminum ricini exitum habuerunt felicem. Hoc oleum diligenter infricatum abdomini in uno et altero visum est multum conferre ad ventrem

liquandum. Calomelas, et alia remedia ex hydrargyro, dicuntur augere vim purgantium, et ea reddere efficaciora: verum hanc argenti vivi facultatem usus mihi nondum satis confirmavit. Fieri potest ut, quibus id dederim, nullis remediis essent medicabiles; et fateor me rarius eo usum esse. Exiguum, seu potius nullum auxilium est in iis quae ab inferioribus partibus infunduntur, exceptis quae fiunt ex foliis nicotianae. In aquae ferventis uncias duodecim mittitur foliorum drachma, vel etiam drachmae duae, et humor colatus in alvum infusus vomitum non excitavit. Caput vero inde consuevit vertigine affici magis quam a fumo. Fumus immittitur per follem, qualis vulgo adhibetur ad suffumigandas arbores animalculis obsitas, et similis est istius quae describitur in Heisteri Chirurgia, nisi quod pyxis aenea, quam lignea, potior est. Fistula debet esse duos pollices longa; fundus habet tertiam pollicis partem, apex vero quintam partem. Huiusmodi tubus facile aptatur folli cuilibet, sic ut aër commodissime per nicotianam impellatur, fumum secum trahens in intestina. Nicotianam autem accendit charta nitro imbuta. Hoc remedium magnam vim habet ad coërcendos intestinorum motus inordinatos, ventremque exinaniendum. Interdum alvum momento temporis solvit; interdum non nisi postquam adhibitum fuerit quarta quaque hora per integrum diem; neque raro spem meam prorsus destituit. Fieri potest, ut una ni-

cotianae species altera sit valentior, quod tamen usu nondum satis cognitum est *.

Libra una argenti vivi ideo data fuit, ut pondere suo viam per intestina impedita aperiret; quod quidem pari ponderi aquae, vel iusculi, praestare existimatum est, tum quia minor eius modus facilius retinetur, tum quia argentum vivum propriam vim habet ad vomitus coërcendos. Tamen in aegris quos vidi, haudquaquam prospere cessit. Pundus certe prorsus inutile est, ubi impedimentum situm fuerit in parte intestini ascendente; et quamvis toto suo pondere in id incumbat, tamen vis illa, quae in hoc morbo vel constringit intestina, vel eorum motum invertit, longe maior est, quam quae huic, vel multo etiam graviori ponderi cedat.

Opium a quibusdam reiicitur in hoc morbo, quoniam omnia narcotica faciunt intestina torpere, et propterea hebetant facultatem remediorum, ex quibus aegri salus speranda est. Contra alii defendunt opii utilitatem, quia vomitum cohibet, sic ut stomachus possit retinere eum medicamentorum modum, qui multum superet torporem a narcotico profectum. Praeterea opium prodest distentiones moderando, motusque musculorum inordinatos compeſcendo. Et aegri vigilia fatigati, et angore confecti, perdurare vix possent sine

* Video eiusdem generis remedium ab Hippocrate memoratum esse inter Ileii auxilia: Φυσαν χαλκευτικην εσειεναι, και φυσαι ες την κοιλην. — Περὶ Νεφρων, XV. E.

benigno huius succi auxilio. Haec mihi perpendiculari ea sententia multo potior visa est, quae opium contra ileum prodesse statuit, quam quae nocere: eamque usus haud mediocriter confirmavit. Opii beneficio prospere dedi medicamenta, et plura, et valentiora, quam sine illo ventriculus tulisset: tum quoque vires aegri somno recreatae sunt; atque etiam ubi salus eius prorsus desperata fuerit, et angor summus cruciaverit, opium utique sollicitudinem aliquantum levavit. Mors quidem neque serius, neque citius venit, sed tamen minore cum cruciatu. Magnus ille verae philosophiae instaurator, Verulamus, queritur studium euthanasiae medicis haud satis cultum fuisse. Medici profecto munus est, aegrotis sanitatem reddere; cum tamen ex lege naturae erit tandem unicuique mortalium aegrotatio nulla arte medicinalis, benevolae huius artis professoribus conveniret, mortem inevitabilem, quantum fieri potest, terrore omni spoliare; et ubi non datum est praedam morti extorquere, sed vita necessario amittenda est, operam saltem dare, ut cum minima crudelitatis specie amittatur.

Ileus interdum fit cum hernia; in quo casu, siquidem id facile possit fieri, intestinum in ventrem reponi debet. Verum dubia res est, an multus labor huic operi impendendus sit. Incertum enim est, hernia necne sit sedes, vel causa inflammationis; cum ileus saepe incidit sine hernia, et hernia diu manere potest sine ileo. Itaque

inflammatio quoque cedere potest, licet hernia permaneat; quemadmodum saepe nascitur, ubi nulla fuerit hernia. Postremo ileus perseveravit, et in mortem desiit, etiam ubi intestinum rite fuerit repositum. Ut ut res est, omnis violentia in reponendo intestino vitanda est, quippe quae auget, potius quam minuet inflammationem. Abunde constat ramicem non necessario impedire purgantium effectum; et ubi is est copiosus, aeger securus esse potest sanitatis brevi rediturae.

Annulum, per quem intestinum descendit, ferro dividere raro convenit, cum propter multa, quae ante praecepta sunt, tum aliis quoque de causis. Nam metuendum est, ne remedium anceps adhibeatur iusto citius, vel plenum doloris iusto serius; et, puto, nobis nequaquam suppetunt documenta, quae ostendant quibus aegris, et quo morbi tempore, scalpellum proderit, et praeterea nihil.

C A P. LII.

De Inflatione et Ructu.

Plerisque morbis ventriculi et viscerum accedit inflatio; quae etiam raro deest inter innumera mala, quibus urgentur hypochondriaci; interdum quoque antecedit accessionem epilepticam. Inflatio fit modo cum cruditate, modo cum nausea, vomitu, aut levi difficultate devorandi, modo cum angore summo, qui suffocationem, nervorum distentiones, atque animae defectionem intentat,

modo cum vocis suppressione, vertigine, et cordis palpitatione.

Hoc malum saepe exasperatur alvo astricta: quod tamen non est perpetuum: et quanquam interdum levetur, saepius tamen augetur a cibis. Bathonia neququam est certum huius morbi praesidium; neque sane sperare licet idem ubique convenire remedium, ubi tot dissimiles causae fuerint. Si morbus principalis manifestus est, ad hunc curatio erit adhibenda. Quod si aeger nihil queratur praeter inflationem, auxilio erit medicamentum aromaticum, quod alvum leniter solvat, quale est quod habet florum chamaemeli contritorum semiscrupulum, piperis longi grana tria, aloës granum unum; idque singulis noctibus sumere oportebit.

Ructus reversi sunt quotidie vel incertis horis, vel certum habentes circuitum. Nascuntur quoque cum vertigine, ardore ventriculi, et singultu; et modo tam vehementes sunt, ut parum distent a convulsionibus. Vinum, et dulcia, nocuerunt. Acida iuverunt. Vomitus, et purgantia, nihil profecerunt.

CAP. LIII.

De Insania.

Animi sollicitudo ingens, a quacunque causa proficiscatur, plerumque initium dat insaniae, sive illi mentis alienationi, quae fit sine morbo acuto, et sine motu arteriarum concitato. Inter-

dum oritur ex aliis morbis, veluti lumbricis intestinorum, epilepsia, et multis capitis affectibus, quales sunt tumores scirrhusi, aut aqua in cerebro, aut ictus graviores, aut forsitan prava quaedam cerebri conformatio a parentibus insanis derivata. Vigilia, et sensus angoris in visceribus, qui saepe videtur ad caput ascendere, antecedunt potius, quam creant insaniam. Mulieres videntur opportuniores esse huic morbo, quam viri, tum maxime tempore partus.

Insania in illis morbis numeratur, qui vix unquam se produnt ante pubertatem. Semel tantum vidi insanum, qui decimum sextum annum nondum compleverat. Morbus haereditarius interdum latuit usque ad senectutem; et mens demum non nisi post sexagesimum annum turbari coepit.

Insedit in animis hominum opinio, insaniam a lunae facie pendere; quam opinionem nemo unus ex insanis, quos vidi, confirmavit.

Arthritis existimata est alios morbos omnes absorbere, et penitus in suam naturam mutare, ita ut vix ulla vestigia aliorum affectuum, praeter hunc, in corpore supersint. Quam vere de arthritide hoc dictum sit, viderint alii; nullus autem dubito me aliud eiusmodi in quibusdam insanis deprehendisse. Nimirum, in uno a febre gravi assurgente, languor virium summus erat, et valetudo admodum infirma; protinus autem ut insania accessisset, valetudo et vires integrae re-

stituebantur. Alium phthisi pulmonis implicatum, cum iam fere ad ultima ventum esset, insaniam occupavit, quae illico fugavit phthisin, atque aegrum, praeter omnium spem, ex mortis faucibus eripuit.

Credibile est noxam haud mediocrem cerebro illatam fuisse, cum quis fiat expers rationis, qua homines a caeteris animalibus maxime distant. Verum pars illa cerebri, quae vitam tuetur, parum aut nihil habet commune cum illa, quae est ad rationem necessaria. Itaque multi exstiterunt insani, qui caeteroquin secundae fuerunt valetudinis usque ad extremam senectutem.

Insani non raro colligunt se, et fiunt sani; morbus tamen ex quavis intemperantia, aut animi perturbatione, facile repetit. Quo factum est, ut nonnulli totam aetatem inter insaniam et rationem dividerunt. Qui nunquam ad se redeunt, fiunt vicissim furiosi et tristes; et modo in hoc, modo in illo statu, menses integros interdum agunt. Proxime absunt a ratione, cum tristes sunt. Vetus morbus interdum mutatur in stuporem, aut fatuitatem. De tempore praeterito haud magis sane, quam de aliis rebus iudicant: verum memoriam habent adeo imperfectam, ut quidam conquesti sint se iam duos menses in ea domo mansisse, in qua plus viginti annos fuerant conclusi.

Accedentem insaniam homines saepe augent, vinum intemperanter potantes, et inceptis novis, et nihil attinentibus, mire se sollicitantes. Ubi

ipso initio amentiae copia suo more vivendi insanis adimatur, positus non sub potestate amicorum, vel servorum suorum, sed custodum iis prorsus ignotorum, non raro evenit, ut brevi ad se redeant sine medicamentorum auxilio. Quod si alvus astrictior fuerit, seu corpus inutili victu, vinoque nimis calefiat, purgantia multum ad sanitatem conferent. Est quoque ubi opium animos mulcendo, et somnum faciendo, non mediocriter iuvat. Praeter autem haec pauca, nihil cognovi, quod aliquid opis in se habeat ad hanc tantam calamitatem levandam.

C A P. L I V.

De Intestinorum Dolore.

Dolores intestinorum cum nascuntur ex multis causis, quas cognovimus, tum forsitan ex aliis, quas nondum suspicamur. Cura opus est, ut semper, quantum fieri potest, vera eorum origo detegatur; etenim pro diversa natura, alia atque alia curatio postulabitur.

Morbi ovariorum, uteri, vesicae, renum, lienis, pancreatis, iecinoris, omenti, et intestinorum, omnes pariter vocantur viscerum morbi. A nobis ante dictum est calculum in viis bilis opinione crebriorem esse causam doloris in abdomine. Tumores scirrhusi, et ulcera, quibus omnia viscera sunt opportuna, lumbrici, maxime in pueris, et herniae in adultis, colica Pictonum, ileus, et pravae conformationes, in animo versanda sunt,

quoties aegroti de viscerum malis queruntur. Vitia uteri saepe tactu deprehenduntur, tum quoque de iis coniectura fieri potest ex sede doloris, et ex eo, quod aliquid habeant commune cum menstruis, graviditate, vel abortibus. Renum, et vesicae urinae affectuum, indicio erunt, praeter locum doloris, urinae color, odor, et crassitudo, cum cupiditate vel dolore meiendi: praeterea uteri atque renum vitia eo se produnt, quod parum aut nihil illis cum alvo commune sit. Ileus, seu inflammatio intestinorum, est morbus adeo acutus, et tot propria signa habet, ut vix errori locus sit. Herniae quoque, nisi aegrotorum pudore, celari non possunt. Mucus copiosus, vel lumbrici cum stercore deiecti, clare indicant naturam istius angoris, qui vel ex his oritur, vel ex ea intestinorum valetudine, quae lumbricis gignendis favet. Colicam Pictonum, nisi aegrotus noverit se a plumbo laesum fuisse, coniectare quidem possumus, sed interdum vix certo scire, donec paralysis superveniat. Ulcera, atque glandulae scirrhosae perturbabunt intestinorum officia, et interdum pus, vel cruor, deicietur. Sive intestina, seu alia ventris viscera, his vitiis occupentur, simul plerumque accedunt crurum tumores, motus arteriarum concitatus, macies, fastidium, et languor virium. Ut vero certissimi essemus scirrhos, ulcera, connexus, aut alias viscerum pravitates subesse; inde tamen vix essemus edocti amplius aliquid moliri, quam levare subinde

impetum malorum, quorum causam tollere non licet.

Praeter haec, et dolores intermittentes, ventriculus et intestina saepe urgentur angore, et molestia, ortis vel ex debilitate istius facultatis, quae concoquit et digerit cibos, et reliquias supervacuas expellit, vel ex cibis alienis, vel nimis, vel postremo ex cutis vitiis, aut doloribus capitis, artuumve, imperita curatione, vel sua sponte, in viscera traiectis. Nervis intestinorum quomodo-cunque infirmatis, subsequuntur nausea, vomitus, alvus fusa, tenesmus, inflatio, sensus gravitatis, venter intentus, borborygmi, dolores spasmodici, difficultas urinae, atque acor acerrimus, qui exedit cuticulam earum partium, per quas humores sive vomendo, sive deiciendo ferantur.

Ubi dolores viscerum repente invadunt, positiones meracae semper sunt alienae; ad quas tamen plerique homines protinus confugiunt. Quoties ex cibo nimio, vel minus salutari nascuntur, oportebit aut vomere, aut alvum ducere, prout huc vel illuc morbus spectet; quibus factis, si dolores et deiectiones poposcerint, opium adhibendum est; deinde medicamentum amarum et aromaticum mane et vespere per paucos dies sumtum, quicquid laesum fuerit, aut debilitatum, restituet. Dolores arthritici subito versi in viscera levantur opiato calefaciente, qualis est confectio opiata. Malis intestinorum levioribus, quae sanatis ulceribus veteribus, aut aliis vitiis cutis, quaeve doloribus

ribus artuum repulsis interdum nascuntur, comode medebuntur amara et aromatica. Videndum autem in his, et in aliis omnibus intestinorum affectibus, ut alvus quam tenerrima servetur. Doloribus intestinorum ab infirmo corporis habitu profectis saepe remedio erunt aquae Bathonicae, et vestis interior lanea; iuvabit etiam pulvis ex amaris et aromaticis semel vel bis quotidie sumtus; cui pulveri adiiciendae sunt, ubi alvus fusior est, tincturae opii guttae tres; ubi astrictior, radicis rhabarbari grana tria. Dolores leviores, qui vix opii auxilium postulant, satis levabunt pauca cochlearia aquae menthae piperitidis, vel pannus calefactus, aut vesica semiplena aqua calida ventri admota. Affectus ventriculi, et intestinorum, adeo per omnia similes sunt, ut quicquid fere de his dictum est, aut de illis postea dicetur, utrisque pariter convenerit.

C A P. L V.

De Ischuria, et Difficultate Urinae.

Ad difficultatem urinae quidam nati atque apti videntur, eique subiecti fuerunt ab usque pueritia; ubi nullus fuit locus suspicando aut calculum, aut malum Venereum subesse.

Pondus uteri gravidi iter urinae non raro intercludit; quod malum in aliis, corporis situ mutato, cessabit; in aliis autem, praecipue sub ultimis graviditatis mensibus, urina nunquam reddi potest sine cathetere. Calculus etiam vesicae uri-

nam interdum supprimit. Morbus Venereus varias urethrae noxas infert, unde graves et periculosae difficultates urinae oriuntur; quas candela saepe levatas, raro autem sanatas vidi. Haec mala, nisi fallor, identidem secuta sunt gonorrhoeas per quaedam infusa in urethram sanatas. In quadam adolescentula vomitus ter excitatus toties induxit ischuriam. Mulier quaedam post partum difficilem per triduum ne guttulam quidem urinae exprimere potuit; at cathetere immisso quinque librae urinae effluxerunt.

Difficultates urinae, quae modo memoratae sunt, sine vitio renum fiunt; periculosissima vero est ea morbi species, in qua renes ipsi prorsus otiantur, et nullum humorem ex sanguine eliciunt. In uno calculi renum insanabilem ischuriam intulisse visi sunt; quam tamen ab eadem causa provenisse in nemine alio suspicari potui: neque sane credibile est, ut saepe evenerit ambos renes, aut ambos ureteres eodem tempore calculis obturari, et omnem urinae transitum prohibere. In omni ischuria, etiam ubi vix dubitare liceat vesicam esse inanem, et morbum esse in renibus, tamen, ut nullus errori locus sit, praestabit vesicam immisso cathetere explorare.

Simul cum ischuria fiunt modo veternum, modo summa iactatio, vomitusque, et singultus, febris, et dolores lumborum. His malis in uno aegro accessit stranguria: alii omni meiendi cupiditate caruerunt. Unicus ex iis quos vidi, urinae

saporem in ore questus est. Puto renes non cesserat
 urinam excernere, quonquam exitus illi praec-
 clusus erat.

Urina ex toto suppressa fuit septem dies, et
 tamen aeger ex morbo emersit. Idem malum
 quarto die in mortem desiit. Plerumque vero fac-
 tum est, ut quos morbus occidit, sexto vel septi-
 mo die decesserint.

Medicamentum quod habet olei terebinthinae
 rectificati guttas viginti, vel triginta, datum est
 quinta quaque hora, et simul eiusdem olei, vel
 kali acetati, semuncia bis quotidie in alvum infusa
 est; cantharidum quoque semigranum sumtum
 fuit quarta quaque hora, et aeger in balneum de-
 scendit quoties libuit; verum non est dissimulan-
 dum, licet pauci quidam his auxiliis visi fuerint
 conservari, alios tamen iis omnibus frustra usos esse.

CAP. LVI.

De Linguae atque Oris Dolore.

Carcinomata linguae et oris incipiunt ab exi-
 gno tuberculo, vel ulcusculo, quod serpit cum
 pungentibus doloribus, quemadmodum fieri con-
 suevit, ubi alias corporis partes occupant. Haec,
 quibuscunque minantur, non iniuste terrent.
 Attamen ne quis vano metu se excruciet, scitu-
 m utile est, dolorem ardentem in ore et lingua inter-
 dum permansisse multos menses sine quovis malo
 subsequente. Sapor amarus, acidus, putris, vel
 caereus, inficiens omnia quae in os ingeruntur;

plerumque habet initium a ventriculo male se habente, vel a remediis mercurialibus. Viro cui-dam, qui nunquam hydrargyro usus fuerat, omnes cibi, quoscunque caperet, visi sunt inquinari sapore aeris adeo nauseoso, ut omnia fastidiret, et corpus viresque amitteret. Remedium ex testarum ostreorum semidrachma, radicis gentianae granis quatuor, pulveris aloës cum canella grano dimidio, mane et vespere sumtum, brevi restituit gustum et cupiditatem cibi naturalem.

CAP. LVII.

De Lipothymia, sive Defectione Animae.

Defectio animae est mors brevis; et saepe accedit lumbricis in puerili aetate, et tussi convulsivae in adultis. Eidem opportuni sunt paralytici, et epileptici, hypochondriaci, et hystericæ, atque praegnantæ. Febres interdum ab hac incipiunt. Foeminae autem ei multo subiectiores sunt, quam viri. Nonnullos ex improviseo invadit; in aliis accessionem antecedunt dolores, palpitationes, sensus plenitudinis a ventriculo ad caput ascendens, caligines, scintillulae, aut flammulae ob oculos, distentiones et dolores viscerum, vertigo, sudores gelidi, tremores, inflatio, et ructus crebri.

Qui diutius pedibus insistunt, maxime post exercitationem, tergo obverso igni luculento; quive genibus nituntur; qui res iniucundas contemplantur, aut olfaciunt; hi omnes, quamvis

integrae valetudinis, non raro concidunt, et animo
 relinquuntur. Proprium fere est epilepticorum, ut
 mane expergiscentes fiant intermortui, et exani-
 mati.

Interdum usu venit, ut idem saepius animo
 relinquatur, brevibus interpositis spatiis. Sunt qui
 vomendo ad se redeunt, vel deiiciendo, vel eruc-
 tando, quique ad breve tempus queruntur verti-
 gines: alii quamprimum resipiscant, omnino recte
 valent.

Remedia exinanientia cuiuscunque generis
 nocent iis qui obnoxii sunt huic affectui. Lavatio
 frigida profuit, ubi nullus alius morbus fuerit prae-
 ter animae defectionem: quod si initium habuerit
 ab alio morbo, hoc sanato ipsa finietur. Raro fit,
 ut anima diutius deficiat, et ut aeger sine auxilio
 se colligere nequeat. Sales volatiles naribus ad-
 moti; fricationes corporis per pannos calidos; et
 quaedam in alvum infusa, utilia erunt, ubi quis
 iaceat intermortuus. Sanguinis missio est
 prorsus aliena.

CAP. LVIII.

De Dolore Lumborum.

Lumbi sunt sedes multorum dolorum a mul-
 tis diversis causis oriundorum; in his numeran-
 tur arthritis, rheumatismus, distentio musculo-
 rum, repentina omnis motus impatiens, quae bi-
 num triduumve perseverat, gonorrhoea, pro-
 fluxum album, calculi atque ulcera renum, ul-

cera uteri, graviditas, et instans abortus. Cognovi quendam dolore huius partis quinquaginta annos vexatum; verum hic longus dolor non erat admodum saevus. Aliam curavi, quam dolor atrox lumborum cruciaverat integrum septennium, motu adeo auctus, ut aegra toto hoc tempore vix unquam curru vehi sustineret, et saepe non sine summo cruciatu ex uno conclavi in vicinum portaretur. Natura huius mali in obscuro erat; nullum enim vitium tactui aut oculis patebat; neque causa eius detegi potuit vel ex partium vicinarum perturbatione, vel ex effectu medicamentorum quae adhibita fuerant. Haec aegra tandem convaluit.

Auxilia huius doloris sunt vel quae conveniunt morbo, a quo dolor pendet, vel quae supra proposita sunt in capite, quod inscribitur *de Dolo-*
lore.

CAP. LIX.

De Lumbricis.

Praeter ascarides *, et lumbricos teretes, et duas species lumbricorum latorum, alia fortasse animalcula sunt, quae, cum cibis in ventriculum demissa, vivere intus in corpore, et genus suum multiplicare possunt.

Mala, quae ex his oriuntur, quaeque his expulsis finiuntur, sunt, dolores capitis, vertigo,

* De his dictum est cap. 10.

torpor, somnia tumultuosa, somnus terrore et clamore abruptus, distentiones nervorum, febricula, sitis, pallor, sapor malus in ore, anima foetida, tussis, spiritus angustus, prurigo nasi, dolores ventriculi, nausea, fastidium, cupiditas cibi nimia, macies, tenesmus, prurigo ani vespere, postremo pelliculae et mucus deiectus.

Taeniae, seu lumbrici lati, gravissima damna corpori afferunt: teretes, et ascarides, interdum laterent vix suspecti, nisi foret ani prurigo, et nisi in stercore ipsi reperirentur. Taeniam vidi quatuor ulnas longam, quae ex alvo expulsa erat. Lumbricus cucurbitinus videtur esse multorum series, quorum unus a reliquis disiunctus interdum vivus prodit. Lumbrici teretes usque in os ascenderunt; atque etiam vixerunt biduum tri-duumve postquam exiissent. In duobus, quos vidi, aegris, locus erat suspicando lumbricum cucurbitinum intulisse accessiones epilepticas, maniam et fatuitatem.

Molestum est quod remedia innumerabilia contra lumbricos circumferuntur; quod quidem documento est, nullum nobis cognitum esse, cui certo confidere possimus. Oleum terebinthinae rectificatum, aqua in qua folia nicotianae decocta sunt, et mercurialia, certo sunt exitio plerisque animalibus, quae extra corpus sunt; tamen eadem in alvum infusa nihil prorsus profecerunt ad ascarides; quas, uti reliquos intestinorum vermes, mucus copiosus, quo circumdantur, praestare vi-

detur a vi quorumcunque medicamentorum securas. Quamobrem, donec certius remedium adversus lumbricos inventum fuerit, nihil magis invabit, quam quae leniter alvum solvunt, et facile feruntur, et tuto sumi possunt diutius. Auxilio erunt amara quoque, vel cum his mista, vel interpositis spatiis data, non tam quia nocent lumbricis, quam quod ventriculi et intestinorum vires sustinent. Aquae libra, cui adiectum fuit salis marini quantum in aqua dissolvi maximum potuit, ad lumbricos expellendos semel atque iterum fuit efficacissima *.

CAP. LX.

De Glandulis Lymphaticis.

Emplastra cantharidis solent tumefacere glandulas lymphaticas vicinas parti, cui admota sunt; qui tumor plerumque brevi subsidit. Semel tamen brachium universum ex hac causa tumere diutius perstitit. Huiusmodi emplastrum capiti admotum in non paucis aegris adeo impedivit lymphae cursum, ut frons tota in tumorem ingentem assurrexerit biduum manentem; qui deinde sensim descendit in genas, mentum, et collum, priusquam ex toto desineret.

In vetula, quae valetudinis erat caeteroquin non incommodae, et cuius mammae nullo morbo tentabantur, lymphaticae glandulae in axilla coe-

* Vide Medical Transactions, vol. I. 54.

perunt tumere, et deinceps brachium universum et manus, in immensum tumuerunt; tamen nullum impressi digiti vestigium servabant: ipsa vero ex hoc casu brevi mortua est. Item iuvenis cuiusdam caput pectusque in magnam molem attollebantur, digito non cedentem; venae pectoris inflatae erant, maxillae dolebant, vigilia erat, et spirandi difficultas; vix sustinebat iacere, et post paucos menses extinctus est.

CAP. LXI.

De Mammis.

Lac non cessavit mammam alteram, vel utramque implere per menses quatuor, quinque, sex, et septem, atque etiam annum integrum, postquam infantes remoti fuerant. Quaedam nutrix incidit in variolas, et cum morbus ad summum pervenisset, lac mammas destituit; variolis autem inclinatiss, lac brevi ubertim restitutum est. Foeminae quadragenariae mammae coeperunt tumere, et mox lacte impletae sunt, quod per tres menses existillabat; protinus vero ut lac in mammas fluere desiisset, mulier haec e viro suo concepit, quae per sex annos gravida non fuerat.

Saepe fit in puerperis, et interdum in aliis, ut mammae inflammentur, et suppurent, et late exulcerentur. Cutis et membrana adiposa sunt sedes huius affectus, qui brevi, et facile sanatur, et prorsus diversus est ab illo, in quo glandulae fiunt scirrhosae, et spectant ad carcinoma.

Mammae intentae, cum exiguo vel nullo dolore, accedunt graviditati, et menstruis fluentibus, aut suppressis, aut aliter inordinatis. Interdum quoque dolent mammae cum exiguo vel nullo tumore, qui dolor, quamvis diutius maneat, tamen nullius est momenti, dummodo nulla fuerint tubercula. Ictus levis excitavit huiusmodi dolorem, qui deinde perseveravit decennium sine quovis alio malo. In non paucis accessit dolor sine quavis manifesta causa; et interdum post annos duodecim sua sponte finitus est. Videndum est, ne dolor exasperetur vestibus nimis arcte mammas constringentibus; et interea ut alvus satis tenera servetur.

Distillatio seri vel flavi, vel cruenti, excepta fuit carcinomate mammae: verum hoc non est perpetuum; nam humor exiguus, aut etiam sanguis, multos annos perstitit exire, et simul papilla intus retracta est, sine quovis malo subsequente. Scirrhus, seu tuberculum durum, utcuñque minutum, non sine metu in mamma percipitur: nunquam enim novi carcinoma, quod non ab hoc inceperit. Tamen contigit aliquando scirrhus, sine carcinomate subsequente, maxime ubi nullus fuerit dolor, aut tumor, aut distillatio e papilla. Saepe enim tuberculum casu deprehensum est, et forsitan diu latuerat in mamma, quae caeteroquin prorsus sana erat. Quamdiu scirrhus neque dolet, neque augetur, praestat abstinere ab omnibus extrinsecus remediis; neque iuvabit ca-

lore praeter consuetudinem mammam fovere. Medicamenta quoque intus data supervacua sunt; sed a victu salubri et moderato unicum praesidium petendum est. Tumor mammae scirrhusus interdum ultro subsidit; quod plus semel vidi. In quadam muliere ea erat scirrhi conditio, ut futuri carcinomatis metum incuteret; itaque re probe perpensa praestabilius visum est eum excidere: nescio quo casu interveniente, mora aliqua facta est, et tumor aliquantum minui et mollescere coepit; neque profecto cessavit, donec penitus consumtus est. Perpaucis vero contigit esse tam felicibus; quanquam scirrhus mammae in multos annos non raro tumore ac dolore vacet, maxime ubi natus est ante aetatis annum trigesimum. Circa annum quadragesimum, aut serius, tubercula dura frequentissime oriuntur in mammis, et plerumque non sine periculo. Memini tamen glandulam mammae in septuagenaria induruisse in scirrhum, qui neque dolebat, neque ullo modo molestus erat, nec videbatur quicquam habere commune cum morbo, qui finem vitae attulit. Binos curavi viros, in quorum mammis scirrhus factus est, prorsus similis illius, quem inter mulieres quotidie videmus. Alteri horum mamma fieri coepit carcinomatosa, et prospere abscissa est.

Cum tumor huius partis durus coeperit pungentibus doloribus urgeri, et crescere (quo quidem statu multos annos permanere potest, priusquam exulceretur), medicamenta et extrinsecus,

et intus, multa adhibita sunt, ut malum cohiberent, et tandem solverent. Verum in his omnibus, meo iudicio, parum aut nihil opis fuit, vel ad dolorem leniendum, vel ad solvendum tumorem. Tamen in una, atque altera, succus cicutae aliquid profecisse existimatus est. Quod si concedamus cicutam his aegris interdum profuisse; at procul dubio spem medicorum toties fefellit, ut nequaquam operae pretium fuerit in eius usu diu persistere, et sinere ut multum pretiosissimi istius temporis frustra abeat, postquam tumor spectaverit ad exulcerationem. Hoc enim est tempus opportunissimum ad excidendum tuberculum adhuc modicum, quod proinde fiet sine multo dolore, et cum magna spe vulnus facile sanandi; praesertim ubi, mamma nondum graviter affecta, valetudo corporis vix, aut ne vix, laesa fuerit. Ubi morbus est sanabilis, nisi me omnia fallunt, hoc erit praesentissimum auxilium. Quod si malum intra mammam sese non continuerit, verum totus corporis habitus affectus sit, haud tamen crediderim morbum vel citius, vel certius, vel maiore cum dolore in mortem desitutum esse, propterea quod hoc remedium, quod unum supererat, tentatum fuerit.

Sin aegrotae timiditas non sinit scirrhum tempestive excidi: vel si ob moram factam in experiendis remediis magni nominis, et nullarum virium, morbus spatium habuerit ad occupandam mammam universam, cum exulceratione, et do-

loribus mammae ipsius, tum reliqui corporis; si febris hectica sit, macies, fastidium, debilitas; ad quod malorum fastigium modo paucis annis, modo intra paucos menses pervenitur; sic aegrotantem salus ipsa, si cuperet, servare vix posset. In re tamen tam deplorata non est prorsus desperandum, modo scirrhi axillam non adeo occupaverint, ut excidi non possint: tempus admovendi scalpelli tantum non praeteriit: nam ex his periculis aegram ad chirurgi auxilium prosperè confugisse novi. Non dissimulandum est scalpellum tam sero invocatum plerumque esse supervacuum; cum saepe vulnus vel nunquam consanescat, vel postquam consanuerit, novi scirrhi nascentur. Nihilominus dolor abscindendae mammae pensabitur emolumento, quod et ipsa, et assistentes capient, sublata tam putri carne.

Ubi carcinoma altas egerit radices in axilla, totumque brachium, impedito lymphae cursu, intumuerit, cum cibi fastidio, macie, debilitate, spirandi difficultate, et aliis instantis mortis signis, nihil tunc moliri potest medicus, nisi ut remediis opiatis leniatur dolor, somnusque inducatur, et ulcus purum servetur. Ad hoc utile erit saepe quotidie ulcus abluere aqua aëre, qui fixus vocatur, plena, vel imponere cataplasma ex radicibus dauci hortensis, eodem aëre refertis. Notatu dignum est gradum doloris in diversis aegris esse admodum diversum; in aliis gravissimus videtur; in aliis levis, atque nullius momenti.

CAP. LXII.

De Menstruis.

Omnes norunt, quantum commercium habeat menstruum foeminarum profluvium cum valetudine. Quilibet morbus paulo gravior consuevit perturbare ordinem huius profluvii; quae perturbatio, aut suppressio, si diuturnior sit, et sine graviditate, valetudinem semper corrumpit. Crediderim tamen menstrua inordinata saepius esse effectum, quam causam aliorum morborum.

Menstrua plerumque incipiunt inter duodecimum, et decimum quintum annum: tamen levem sanguinis uterini cursum quaedam puellae expertae sunt nono, octavo, aut etiam quinto anno. Verum haec praecocia profluvia semel tantum, aut bis facta sunt: nunquam ea novi singulis mensibus redire, ubi coeperint ante decimum annum. Huiusmodi praematurae sanguinis eruptiones nihil nocent, neque ullum remedium postulant praeter quietem.

Quanquam menstrua iusta tempestate fluere inceperint, saepe tamen fit, ut per annum unum et alterum inordinate redeant, neque certum circuitum, nec modum servantia. Ubi hoc fit, aut ubi fluere morantur duos tresve annos post consuetum pubertatis tempus, praestat cunctari, et rem naturae permittere potius, quam praepropere ad medicinam confugere, ubi nullus morbus est. Etenim cum iam vires corporis in dies augeantur, spes est naturae ipsius beneficio ea in ordinem

reductum iri, priusquam valetudo coeperit vitari.
 Quinetiam postquam mulieres ad aetatem maturio-
 rem pervenerint, corpus universum perturbabitur,
 quoties menstrua sunt multum inordinata; levio-
 res tamen horum errores, nimirum ubi paucos
 dies vel serius, vel ocyus proveniunt, parum aut
 nihil officiunt sanitati.

Corporis interdum iste habitus est, ut non so-
 lum abortus, partusque crebri et difficiles, sed
 etiam terror, animi angor, et lenis exercitatio,
 immodicas sanguinis uterini profusiones faciant;
 quas etiam secuti sunt dolores graves in capite,
 dorso, et visceribus, et summa debilitas. Inter-
 dum quoque sine quavis causa manifesta, men-
 strua modum consuetum excedunt, vel quod ni-
 mis saepe redeant, vel quod diutius, aut copio-
 ssius ferantur. Huius generis profusiones menses
 aliquot perseverarunt, vel etiam tantae fuerunt,
 ut de vita ipsa metui coeptum sit. Verum, prae-
 terquam in gravidis, aut parturientibus plerumque
 plus terroris, quam periculi iniiciunt. Etenim
 inter innumeras foeminas, quas profluvio uterino
 laborantes vidi, binas tantummodo memini, qui-
 bus, licet non essent praegnantes, sanguis cohi-
 beri non potuit, donec vita cum eo effluxisset.

Menstrua plerumque minuuntur inter qua-
 dragesimum et quinquagesimum annum, et inter-
 dum per mensem unum aut alterum prorsus desi-
 derantur; cum vero ad hunc modum inordinata
 fuerint in annum, aut biennium, tandem ex toto

desinunt. Haec fere est norma naturalis, ad quam sanguis uterinus demum subsistit. Attamen interdum fit, ut menstrua et saepius, et abundantius fluant tum, cum prope sunt ad finem: neque sane alio tempore, si excipiamus graviditatem, sanguinis profusiones tantae, tamque periculosae ex utero fiunt.

Foeminae iuniores interdum experiuntur uterinum sanguinem et crebrius iusto, et copiosius fluentem; sed multo magis opportuna sunt menstruis parcioribus, et tardioribus, et suppressis.

In causis menstruorum suppressorum numerantur crebrae sanguinis missiones, et terror, et, si mulieres ipsas audiamus, pedes aqua frigida diutius madefacti menstruorum tempore. Post partus difficiles frequens est menstruorum profusio; interdum tamen ex hoc casu diu manserunt suppressa, maxime si lac non desinat in mammas fluere; quod interdum factum est multos menses postquam infans remotus sit, vel etiam ubi foemina infantem haud omnino lactaverit. Morbus aliquis, aut prava uteri conformatio, in quibusdam fortasse fecerint menstrua vel inordinata, vel suppressa, maxime in illis, quibus nunquam fluxerunt. Verum saepissime supprimi videntur ex quadam valetudine antecedente, unde vires vitae deficiunt, et corpus debilitatum, exhaustumque, utero sanguinem suppeditare non valet. Menstrua, quae singulis mensibus redire consueverunt, si febris incidat, fere semper supprimuntur. Quae etiam

etiam phthisi pulmonum occupantur, per aliquot menses antequam moriantur, nullum sanguinem ex utero effundunt.

Suppressis menstruis, nisi id ab aliis prorsus morbis pendeat, oriuntur dolores et pondus capitis, vertigo, pallida et simul tumidior facies, inflatio, nausea, fastidium, cruditas, dolores ventriculi et viscerum, graviditatem mentientes, dolores pectoris, lateris, dorsi, et genuum, tumores crurum, macies, torpor, subiti calores, lassitudo, animae defectio, tristitia, atque mala hysterica omnis generis. Interdum profluvium album vice menstruorum functum est, singulis mensibus constantissime rediens; interdum quoque, sed multo rarius, sanguis vomitur, vel a naribus distillat, et menstruum circuitum servat. Steriles sunt, quibus menstrua nulla proveniunt; quaedam tamen concepit, quae bis tantum in anno menstruis purgabatur.

Quanquam sanguis uterinus iustum modum servet, et ordinate revertatur, tantus tamen interdum dolor est, quantus nullo alio menstruorum vitio excitatur; verum adversa valetudo inde non contingit. Hic dolor primo die plerumque accedit, et nonnunquam intra sex horas finitur; adeo autem saevus est, ut mulier e lecto surgere prorsus non possit. Bis terve novi illum non ante secundum diem invadere. Quandam stranguria ultimo semper die vexabat. Dolores capitis, artuum, lumborum, ventriculi, et mamma-

rum (quae hoc tempore tument), cum nausea, tenesmo, et omnigenis malis hystericis, nonnullas mulieres exercent per totum menstruorum tempus.

Menstrua plerumque inter quadragesimum et quinquagesimum annum desinunt. In paucis id factum est ante annum quadragesimum; in una vero ante trigesimum; neque exitus hic intempestivus impediit, quominus valetudo bona esset usque ad senectutem. Nonnullae perrexerunt menstruis purgari usque ad annum sexagesimum. Menstrua facta sunt inordinata modo paucos menses, modo aliquot annos, antequam ex toto desierunt. Atque etiam postquam conquieverint tres aut quatuor annos, de integro fluere coeperunt. Corpus tum, cum menstrua parant in perpetuum abire, maiorem in modum videbatur laborare, et minus valet morbos aut veteres cohibere, aut depellere novos; qui proinde hoc tempore praecipue ingravescunt, curatuque difficillimi sunt. Itaque arthritis, et mania, et cutis vitia quae diu latuerant, hanc nacta occasionem, de valetudine iam infirma facile triumphant, et stabile imperium constituunt.

Credibile est menstrua in plerisque foeminis sic exarescere, ut neque alantur, neque gignantur, quivis affectus qui medicinae opem postulent. Attamen quaedam haud pauca mala experiuntur, dum natura molitur hanc insignem corporis muliebris mutationem. Etenim sanguinis ex utero profusiones nimiae non alio tempore magis exercent;

et, quanquam non sint illico mortiferae, tamen semper terrent; quin intulerunt tumorem hydropticum crurum, aut abdominis, aut corporis universi, et conquassatam valetudinem; ex quibus malis mulieres semper aegre, interdum nunquam emergunt. Neque raro accidit, ut cum his profluvium album conspiret ad vires exhauriendas. Denique tantam debilitatem veteribus, torpores, et resolutiones secutae sunt. Distentiones quoque membrorum, et vagi dolores hoc potissimum tempore molesti esse solent; nescio an tum praecipue cum multus sanguis effusus est: nam eadem mala ex aliis sanguinis profusionibus oriuntur. Ad haec saepe accedunt vertigo, et spirandi difficultas, et tota cohors hystericorum affectuum. Sed nulla corporis pars magis laborat in iis, quae incipiunt fieri vetulae, quam intestina, quae tunc saepe affliguntur doloribus, nausea, fastidio, ardore, inflatione, sensu plenitudinis, tenesmo, et haemorrhoidibus. Postremo crura inflammationi, et malis ulceribus opportuna sunt. Minime mirum est nonnullas tot tantisque miseriis fractas succumbere: veruntamen aliae, postquam paucos annos cum pessimis ex his malis conflictatae sint, feliciter assurrexerunt, et in integram sanitatem restitutae sunt. Quae, menstruis in perpetuum finitis, aut liberae fuerunt ab his malis, aut eas superarunt, nescio an non valetudinem firmiorem habeant, et diutius supersint, quam viri, quae eiusdem sunt aetatis.

Postquam menstrua tempore consueto defecerint, et per aliquot annos substiterint, exinsperato quasdam foeminas reviserunt sexagesimo, septuagesimo, atque etiam octogesimo anno; nimirum, ubi conquievissent viginti vel triginta annos. Interdum quoque singulis mensibus repetiverunt. Plerumque vero haec intempestiva profluvia neque ordinate revertuntur, neque modum ullum servant, et nonnunquam cum profluvio albo contingunt. Uterina purgatio praeter sortem senectae postliminio rediens, perseveravit septem annos, integra, ut visum est, valetudine. Verum non raro initium habuit ab ipsius uteri vitio. Si huiusmodi profluvio accedant dolores graves circa os pubis, coxas, et lumbos; et in eius decessionibus, mali odoris humor, coloratusque distillet; iusta erit suspicio ulceris uteri, quod mox fiet insanabile carcinoma.

Ubi sanguis oritur a secundis, vel foetu, uterum distendentibus, et impredientibus ne venae collapsae cursum eius cohibeant; tunc illud, quicquid sit in utero inclusum, ante omnia ocysime extrahendum est. At si nihil huiusmodi fuerit, quies imperanda est, cavendumque a calore ignis, aut cibus, potionibusve qualibuscunque calefacientibus; alvus tenera servanda est; et saepe sorbilla sunt quae habent succum limonum, vel acidum vitriolicum. Syrupi papaveris albi drachmae duae, aut plures, multum saepe conferent ad levandam iactationem, et sollicitudinem, quae

morbum haud mediocriter augent. Cortex Peruvianus praecipuum locum obtinuit inter remedia, quae contra hos affectus prosunt; item alumen, et gallae quercus, aut cortex eiusdem, modo cum cortice Peruviano, modo sine illo, dantur. Si profecto id persuasum haberem, famam horum medicamentorum ab usu natam esse; nihil morarer, quicquid ratio, utcunque speciosa, contra ostenderet: verum si ideo nobis commendata fuerint, quia sensuum iudicio habent facultatem astringendi; iure potest dubitari an ex ista facultate sperandum sit sanguinem cohiberi posse, cum ad ipsum locum pertingere nequeunt, donec multorum humorum copia mista fuerint ac diluta. At qualis demum illis restabit astringendi vis? cum medicamenta ipsa, contrita atque imposita super vulnusculum ab hirudine factum, sanguinis cursum sistere vix valent. Crediderim parum auxilii esse in sanguinis missione, ob rationes alio loco allatas*. Scrupulus aluminis saepe tuto datus fuit quotidie: memini tamen me vidisse quinquagenariam, cuius venter, et naturalia, ut audiui, admodum intumuerant, adeo ut vagina fere clauderetur; idque, ut ipsa suspicabatur, propterea quod ad sanguinem uterinum cohibendum semiscrupulus aluminis quotidie sumtus fuerat: verius forsitan ad adversam suam et conquassatam valetudinem, quam ad alumen tumor esset referendus. Ce-

* Medical Transactions, vol. II. qu. 4.

russae acetatae grana quatuor sanguinis uterini profusionem intra quatuor horas suppresserunt in foemina, quam ipse postea curavi colica Saturnina vehemente ac diuturna afflicta: propter quem certissimum plumbi effectum, omnes ab eius usu abhorrere debent. Alteri menstruis nimis laboranti datae fuerant tincturae Saturninae guttae triginta, quae mox eadem colica, verum mitiori, torqueri coepit, et diu male habuit. In haud paucis aquae chalybeatae profluvium auxerunt: idem fecerunt flores chamaemeli; atque etiam, quod non putavissem, in lecto conquiescere.

Morbus huic contrarius, nimirum ubi menstrua aut parciora sunt, aut ex toto suppressa, initium saepe habet ex aliis morbis, quorum remedia huic quoque vitio optime medebuntur. Verum ubi nulla alia adversa valetudo est, quam quae ex menstruis fit parcioribus, aut subsistentibus, ibi veterum medicorum et recentiorum experientia praecepit uti medicamentis acrioribus, amaris et aloëticis, quorum compositiones in omnibus medicinae libris reperiuntur. Radix hellebori nigri facultatem movendi menstrua sibi vindicavit, quam tamen nullo satis firmo argumento usus mihi confirmavit. Nullus autem dubito, quin flores chamaemeli in nonnullis foeminis, quanquam perpauca, menstrua ciere valeant. Etenim plus semel novi flores hos intus datos sanguinem ex utero utcunque alieno tempore, certissime elicuisse. Lavatio tepida, pedes in tepidam demissi, et vapor aquae

calidae naturalibus exceptus per horam quotidie, menstruas purgationes haerentes interdum expedierunt; easdem quoque movit electrificatio. Dolendum autem est menstrua tarda, parca, aut suppressa, his omnibus auxiliis saepenumero parum respondisse.

Dolores, qui menstruis instantibus, vel fluentibus, oriuntur, tuto leniuntur opio. Itaque mulieres, quae illis opportunaesunt, debent semper in promptu habere semigranum vel granum opii, sumendum protinus ut dolor ingruat, et, si opus fuerit, semel aut bis, interposita semihora, repetendum. Neque opium hoc modo datum purgationem istam cohibuit, aut omnino perturbavit. Quod si a stomacho aegre fertur, commode infunditur in alvum. Quinetiam tinctura opii ventri illita vi anodyna non fuit destituta. Lavatio tepida, et vapor aquae calidae naturalibus exceptus per paucos dies ante menstruorum accessionem, non contemnendo fuerunt auxilio; nec non utiles fuerunt aquae Bathonicae.

Siquidem menstrua iusta aetate deficient, et tandem ex toto cessent, atque interea mulier commode valeat, ab omni malo graviore libera, nihil opus erit medicina. Plerumque sane natura satis opis in se habet ad sanguinem uterinum, ubi tempus fuerit, amovendum, sine ullo tumultu, qui alienum auxilium postulet. Nemini vero in hoc casu nocebit ventrem servare teneriorem, sumto identidem medicamento aliquo leniter purgante.

Quod si quam menstrua ex improvise deserant, et vel ob hanc, vel ob aliam quamlibet causam, eo tempore invadant dolores capitis, vertigo, lethargus, vel torpores, et sensus gravitatis, oportebit sanguinis sex uncias detrahare per cucurbitulas super scapulas singulis mensibus impositas, quamdiu haec mala perseverent. Aliis morbis, si qui forte inciderint, propria sua remedia sunt adhibenda. In malo corporis habitu, ubi verenda sunt aut cutis vitia, aut carcinoma, vel resolutiones, utile erit ulcus, in aliis id tuto potest omitti.

Vetulas interdum revisit menstrua purgatio, postquam diutius finita esset; et est vel nimis profusa, vel signum ulceris, aut carcinomatis in utero; quibus malis auxilia, quae supra exposui, sunt admovenda. Quod si menstrua consueto tempore deficientia, et multos annos intermissa, coeperint renovari, circuitumque certum servent, et non inordinatae sint, res tota naturae permit-tenda est, nullis medicamentis interpellatae.

C A P. LXIII,

De Morbillis.

Collecturo mihi quae de morbillis annotaveram, in animo est, primum tradere historiam cuiusdam aegrae, quae hoc morbo maxime germano laborabat, et in qua propter cutis pulchritudinem licebat ruboris et macularum accessionem decessionemque accurate notare; deinde recensebo varietates, quae in aliis bene multis aegris observatae sunt.

Die primo. Aegra hodie coepit leviter in-
 horrescere; cibi cupiditas minor erat, non sine
 quadam nausea; pulsus erat concitatus; dolores
 quoque vagi erant, sitis nonnulla, tussis arida;
 nulla autem sternutamenta, nullae lacrymae, nul-
 lus palpebrae im rubor.

Die secundo. Aiunt noctem fuisse medio-
 criter tranquillam. Fastidium cibi manet; pul-
 sus idem ac heri, atque etiam tussis.

Die tertio. Nihil fere novi.

Die quarto. Maculae dilute rubentes mani-
 festae sunt infra mentum. Febris, iactatio, et
 fastidium augentur. Tussis haud peior. Oculi
 minus impatientes lucis. Vomitus nullus. Fa-
 cies ardet, et praeter consuetudinem rubet.

Die quinto. Maculae subrubrae rarae in
 mento et facie, multo autem magis rubrae in
 collo et pectore. Figura macularum nequaquam
 certa est et definita. Febris, et tussis manent.
 Nullae adhuc sunt notae morbi in brachiis et
 manibus.

Die sexto. Maculae faciei paululum super-
 tument eminent, sic ut tactu aspretudo levis sentia-
 tur. Hae maculae constant ex pluribus pustulis
 exiguis, semine milii minoribus. Nunc primum
 maculae in brachiis conspiciuntur. Febris, et
 iactatio, et morositas augentur. Tussis haud pa-
 rum molesta; tamen sine difficultate spirandi.
 Oculi sunt debiles, et palpebrae tument. Cibi
 omnes fastidiuntur. Vespere omnia mala exaspe-

rabantur, non sine levi spiritus angustia. Maculae faciei vivide rubent. Heri menstrua alieno tempore fluere coeperunt, et manserunt in horas quatuor et viginti. Hodie vena incisa est cum levatione morbi.

Die septimo. Nox hesterna paulo pacatior: febris tamen et iactatio sunt fere eadem. Maculae in facie minus rubent. Prurigo cutis accessit satis molesta.

Die octavo. Mala omnia minuuntur, et cupiditas cibi coepit redire. Notae morbi sunt pallidiores. Languor, et febris aegram subinde male habent.

Die nono. Nox tranquilla acta est; et robur corporis animique aliquantum instauratur. Febris tamen, et iactatio, et languor identidem incursant; quae omnia sanguinis missione levantur.

Die decimo. Nox satis pacata. Maculae ex toto abierunt; et vix ulla febris indicia restant.

Die undecimo. Tussis nondum prorsus conquiescit.

Die duodecimo. Somnus, et cibi cupiditas restituuntur. Tussis tamen levicula paucos dies mansit, quae sanguinis missione primum minuta, brevi postea finita est.

Absoluta huius aegrae historia, transibo ad varietates, quas in aliis non paucis eodem morbo occupatis observavi.

Principio, quibusdam morbillosis oculi sunt

lacrymis suffusi, et lucis minus patientes, biduum
 priusquam morbi signa in cute conspiciuntur;
 porro idem acer humor saepe depluit in nares, et
 movet crebra sternutamenta. Tussis plerumque
 incipit esse molesta duos tresve dies antequam
 pustulae nascuntur; interdum dies septem aut
 plures praecedit, qui mos erat hujus morbi anno
 1753, tum temporis epidemici. Dolores faucium,
 capitis, et dorsi, in signis morbillorum numerati
 sunt; et memini quendam summe excruciatum
 dolore dorsi, qui perseveravit biduum postquam
 pustulae prodierant. Nausea, et vomitus, et cibi
 fastidium accesserunt ipso morbi initio, nec multo
 ante finem ejus desierunt; hoc tamen rarum est.
 Nonnullis res adeo bene cessit, ut a febre, et ab
 omnibus fere malis liberi fuerint; neque se in
 morbo esse suspicati sint, donec illius notis cutis
 ruberet. Quo graviora fuerint signa antecedentia,
 et quo diutius manserint, eo peior fuit morbus.

Die primo. In uno atque altero morbilli ipso
 primo die brachia occupaverunt, paucis tantum-
 modo horis post faciem et collum. Cum tamen
 hoc tam raro contigerit, fieri potest, ut in paucis-
 simis illis, quibus hoc obtinere visum est, mor-
 billi revera faciem opinione diutius occupavissent.
 In quodam, nec tussis, nec sternutamentum ac-
 cessit, nisi ipso pustularum die. Morbillis exe-
 untibus aeger non levatur, quemadmodum fit in
 variolis. In quodam salivae profluvium hoc pri-
 mo die factum est, et biduum perseveravit, neque

ae-grum sivit interdium conquiescere, aut noctu dormire; tussis interea fere cessavit, et morbus cursum suum confecit sine quolibet signo graviore.

Die secundo. Raro, vel nunquam fit, ut notae morbillorum, quae secundo die in brachiis et manibus conspici solent, non ante diem tertium in his locis nascantur. Ubi hoc fieri visum est, crediderim erratum fuisse in definiendo die, quo coepissent exire. Semel atque iterum morbus brachiis pepercit, quae per totum eius spatium nec maculata fuerunt, neque rubuerunt. Hodie morbilli maxime vigent in facie: mala tamen inde non levantur, sed potius augmentur. Saepe cursus sanguinis ex naribus hoc tempore accedit, aut alvus fluit, quod, si non prosit, certe non est perniciosum. Interdum palpebrae adeo intumuerunt, ut per horas quatuor et viginti aperiri non potuerint.

Die tertio. Pustulae plerumque vigent in aliis partibus, in facie incipiunt minui. Nonnunquam tamen etiam in facie color macularum nondum mutatur. In aliis non solum morbi notae, quae in cute sunt, sed omnia fere eius signa decesserunt. Veruntamen tussis et febris in plerisque adhuc perseverant; et si pauci senserint se aliquantum recreari, alii contra magis languerunt. Ubi oculi lacrymis abundarunt, et palpebrae multum rubuerunt, et hae et illi in pristinum statum nondum restituti sunt. Semel vidi sternutationem hoc die incidisse molestissimam. Puer quinquennis, hoc

morbi tempore lethargicus factus, die postero extinctus est.

Die quarto. Notae in omnibus fere morbillosis fiunt pallidiores in facie; item in quorundam brachiis et pectore: in aliis brachia adhuc saturime rubent. In facie quoque unius et alterius color rubicundus permansit. Quibus vix ulla morbillorum vestigia supersunt, ii etiam caeteris in rebus belle habent: tussis vero et febris illos magis exercent, in quibus maculae nondum pallent. Modo tussis minuitur; modo tussis et febris admodum urgent. Lacrymae nunc fere subsistunt, praeterquam in illis, quorum oculi vel natura sunt debiliores, vel morbillis maiorem in modum laesi, diu postea male habent. Sternutamenta in hunc diem perseveraverunt, sed non nisi rarissime. Facies iam fit furfurea cum prurigine, quae prurigo brevi cutem universam infestat, et est praecipuum, vel unicum malum. Hoc die menstrua ante consuetum tempus profluxerunt.

Die quinto. Rubor macularum admodum dilutus est et in facie, et in brachiis; tamen in quibusdam facile percipitur; in aliis prorsus decedit. Cibi cupiditas redit, et morbus iam fere finitur. Quo magis pallent morbillorum notae, eo melius valent morbillosi. Tussis in plerisque mitior est, in quibusdam prorsus conquiescit: alios autem pergit vexare diu post morbum finitum. Menstrua etiam hodie tempore non suo fluere coeperunt.

Die sexto. Morbi vestigia adhuc manent in brachiis paucorum aegrorum, atque etiam in facie, non sine tusse, sternutamento, raucitate, et febre. Semel atque iterum vidi quasdam reliquias macularum etiam decimo die. Verum hoc sexto die omnes fere e morbo evaserunt, praeter infelices illos, in quibus febris circa hoc tempus adeo non mitescit, ut in horas crescat donec occidit. Qui ex hoc praesente periculo subtrahuntur, interdum pulmones in tantum afflictos habent, ut tussi diu fatigati in tabem tandem incidant. Oculorum debilitas, palpebrarum inflammationes, tumores glandularum, atque alia strumae signa, morbillos interdum secuta sunt. Incertum morbilline ea mala genuerint, an semina eorum, quae diu in corpore latuerant, hac data occasione exierint. Fieri etiam potest, ut struma hoc praecipue tempore manifesta, ad alias prorsus causas referri debeat, et, quamvis non fuissent morbilli, hominem nihilo secius occupavisset.

Sanguinem nullo non die morbillorum detrudere licet; et ubi aeger vehementius laborat, semper iuvat, tum maxime ubi accesserit spirandi difficultas, cui morbillosi per totum morbum subiectiores sunt. In sanguinis autem missione, et istis remediis, quae propria sunt malorum huic febrī cum omnibus aliis communium, tota morbillorum curatio continetur. Menstrua fluentia impedire non debent, quo minus vena incidatur, modo tussis et spirandi difficultas urgeant. In media

in muliebri purgatione sanguinem tuto detractum
 vidi; sed inflammato pulmone, spirituque inter-
 cluso, nemo unquam vidit hoc auxilium impune
 committi.

Mulieribus gravidis longe minus periculi est
 a morbillis, quam a variolis. Gravidae variolis
 correptae plerumque faciunt abortum, et saepis-
 sime moriuntur. Tales vero curavi consuetis
 morbillorum malis non mediocriter laborantes,
 e quibus nemo una partum elisit, aut propter gra-
 viditatem minus prospere e morbo assurgere visa
 est. Alia in re magis fortasse morbillis convenit
 cum variolis; nam hae eo peiores sunt, quo pus-
 tulae fuerint frequentiores; et eadem morbillo-
 rum videtur conditio.

Signa morbillos praecedentia accesserunt tre-
 dedecim dies postquam homo, quantum potuit iu-
 dicari, contagione fuisset afflatus. In duobus aliis
 dedecimo quarto die prodierunt. In quatuor aliis
 morbi semina se ostenderunt, cum jam decem
 omnino dies fuissent intus recepta.

Quaedam nutrix morbillis correpta lactavit
 infantem usque ad ipsum diem, quo pustulae in
 cute apparuerunt, neque tamen cum illo mor-
 boum suum communicavit. Igitur haec pestis,
 operinde ac variolae, contagiosa non est, nisi tum
 cum spectat ad maturitatem? Fieri quidem po-
 tuit, ut aliae causae puerum hunc morbillis im-
 publicari eo tempore vetuissent.

CAP. LXIV.

De Narium Haemorrhagia.

Sanguinis e naribus profusio fit potissimum in illis, qui vel adolescentiam nondum excesserunt, vel ad senectutem propinqui sunt. In pueris raro fit immodica; at in adultis saepe magno impetu fertur, et interdum cohiberi non potest, priusquam anima deficiat.

Pueri infirmi huic vitio subjectiores sunt, quam qui corporis habitu firmior gaudent. In aetate adulta, praeterquam quod oritur ex scirrhoso ebriosorum jecore, saepe quoque accedit arthritidi, capitis dolori, vertigini, torporibus, minisque apoplexiae, et valetudini quoquo modo perditae.

In muliere una atque altera cursus sanguinis ex naribus praecessit menstrua, et perseveravit donec illa desiissent; in aliis functus est vice menstruorum; in aliis semper substitit, dum illa fluerent, licet nunquam alias tot dies conquiesset.

Nescio an hic affectus signum sit potius, quam remedium mali in corpore latentis; nam mihi visus est morbos, quibus accesserit, non levare, ideoque non esse expetendus. Multum tamen abest, ut hoc profluvium sit certum indicium morbi gravioris vel praesentis, vel futuri; quippe perseveravit subinde redire multos annos etiam in senioribus, quibus valetudo interea fuit satis commoda. Vetus capitis dolor semel existimatus

est

est sanguine e naribus fluente levare; rectene, an secus, non habeo dicere; verum idem saepe aliis contigit sub iisdem doloribus, aliisque capitis morbis, neque omnino profuit.

Praesentissimum remedium est linamentum in nares demissum sic ut osculum arteriae aut venae patefactum comprimatur. Ubi hoc fieri nequit, nulla alia medendi ratio mihi potior visa est, quam quae alio loco a me exposita est*. Quod si habitus corporis istiusmodi sit, ut sanguis e naribus saepius profundatur, adultis convenit sal purgans tertio vel quarto quoque die sumtus sic, ut alvus ter descendat.

CAP. LXV.

*De Nausea**.*

Graviditas, arthritis, ebrietas, affectus hypochondriacus, vertigo, graves capitis dolores, tussis, maxime tussis convulsiva, lumbrici, calculus renum, menstrua inordinata, caput vehementius percussum, febris, et cibus modo vel genere peccans, solent ventriculum offendere, atque nauseam movere, quam saepe praecedit os aqua repletum. Nausea mane praecipue molesta est. Nervi ventriculi, perinde ac alii omnes, hoc tempore forsitan imbecilliores sunt. Idem malum interdum accedit tribus horis post cibum.

Quandoquidem hic affectus initium habet a

* Medical Transactions, vol. II. qu. 4.

** Vide quae infra praecepta sunt capite 99. de Vomitu.

tot diversis causis, facile coniectare licet, quod quidem usus comprobat, eandem medendi rationem non omnibus convenire. Vomere, cubare, aromatica et vinosa sumere, venter natura vel arte solutus, linimenta ex oleis chemicis et opio abdomini infricata, vel ex iisdem emplastra super stomachum imposita, succus limonum in ipso usu kali mistus et adhuc spumans epotus, postremo aqua in quam demissa est herba menthae sativae, vel sola, vel cum tinctura opii, saepe quidem, sed non semper, nauseanti ventriculo succurrunt. Aqua e floribus chamaemeli non raro auxilio est, vel vomitum movendo, vel stomachum confirmando. Ubi nausea ex aliis morbis pendet, quicquid his medetur, illam simul tollet. Aquae Bathonicae multas nauseantis ventriculi causas vel minuunt, vel ex toto summovent.

C A P. LXVI.

De Morbis Oculorum.

Oculi si vel levissime sint imbecilles, quamvis nullam morbi notam prae se ferant, aegre patiuntur ventum, ignem, pulverem, aut lectionem. Ubi imbecillitas maior est, tenui humore madent; qui concretior fit, et glutinosus, si tam lente defluat, ut spatium habeat coeundi in hanc crassitudinem.

Inflammationes palpebrarum strumosae longo spatio detinent, absque eo ut oculus ipse multum laboret, vel impatiens fiat lucis aut lectionis. Ubi

oculus ipse inflammatur, quod in eo album esse debet, fit rubrum, venis sanguine distentis. Sic affectis sensus est tanquam pulveris vel arenae in oculum illapsae. Lux, pulvis, calor, et ventus, intendunt dolorem et inflammationem. Inflammationes leviores sine multo dolore, quamdiu lux ab oculis arcetur, perseverarunt annum, vel diutius, neque caecitatem intulerunt: saepe tamen ortum dant unguibus oculorum, qui, si corneae praetendantur, hebetant visum, et ubicunque sint, oculum deformant. Post diuturnas vero et vehementes inflammationes lumen plerumque amissum est. Cum pili nascantur in interiore parte palpebrarum, atque oculum irritant, inflammationeque, unicum remedium est eos evellere.

Oculi subiecti sunt vehementi ac perseveranti dolori sine ulla morbi nota. Isque dolor paucos dies permansit; item fundum oculi cruciavit annum integrum, acie eorum illaesa. Plerumque tamen istiusmodi casus non vacat periculo; quippe intra biduum induxit caliginem, et post breve spatium caecitatem. Similis dolor subinde infestabat oculum, qui post sex annos caecus factus est.

Interdum evenit, ut oculi sensim hebetati fuerint, et tandem prorsus occaecati intra paucorum dierum spatium, propter resolutionem, ut visum est, nervorum optidorum. In uno aegroto hoc malum ortum est ex quodam fungi simili in cerebro nato, quod nervos opticos comprimebat.

Caecitatem modo antecedit vertigo; modo species ob oculos versantes, velut iridis circa candelas, vel flammularum, vel muscarum, vel pilorum in aëre volitantium (quae nigrae sunt in luce, et igneae in tenebris), vel rerum multicolorum, vel multiplicatarum. Meminisse tamen oportet has omnes visus perturbationes contigisse, et ex iis nonnullas decem annos perseverasse, integra videndi facultate, oculisque prorsus illaesis.

Caecitas accessit et post paucas horas decessit, quod identidem factum est, sed inordinate, nullis certis spatiis interpositis; eoque dissimilis nyctalopiae, quae singulis noctibus eadem ferme hora redit. Vidi paucas huiusmodi caecitates, quae tandem omnes prospere finitae sunt, oculis in pristinum statum restitutis. Vir quidam, dextro oculo captus, post quatuordecim dies recreatus est; at laevus oculus protinus caecus factus est, et ad mortem usque permansit.

Suffusionem, sive cataractam, praecedit caligo, quasi oculis tenue velum obductum esset. Signum huius vitii est pupilla colorata, quae debet esse nigra.

In quadam oculorum imbecillitate aegris saepe omnes res videntur duplicatae; cuidam autem videbantur quadruplicatae.

Pupilla, quam maxime fieri potest, dilatata quae quoque admoto sublatove lumine haud omnino movetur, dicitur gutta serena; et videtur esse nervorum opticorum resolutio. Modo sen-

sim incedit, modo fit repente, et cum vehemente capitis dolore. Initio hoc vitium occupat alterum ex oculis; at saepe post paucorum annorum spatium ambos occaecat. Gutta serena vacat dolore; et tantillum interest uno, an duobus oculis res cernamus, ut tres quatuorve homines cognoverim, qui casu deprehenderunt se altero oculo captos esse; quanquam lumen, ut cum ratione coniciebamus, multos ante menses amissum erat. Hoc contigit et in gutta serena, et in suffusione; sed in hac rarius, quia caligo sensim obrepens aegrum vix potest latere.

Istius generis caligines oculis interdum offunduntur, in quibus modo maculae nigrae in aëre videntur volitare; modo dimidia tantum pars rerum cerni potest: quae cum duraverint circiter tertiam horae partem, desinunt in vehementem capitis dolorem multas horas saevientem; simul quoque in quibusdam nausea et vomitus sunt. Angor harum accessionum vix est tolerabilis, periculum autem prorsus nullum, quantum coniicio ex iis, qui vixerunt annos viginti saepe tentati hac aegrotatione, et tamen cessante dolore satis commode valuerunt. Hoc malum nulla certa tempora redeundi servat; nec invenire potui quibus de causis repetat, quibusve remediis sanetur, aut etiam leniatur; nisi quod cubanti in lecto dolor citius finitur, et impetus eius aliquantum minuitur. Aestate, et regionibus tepidioribus, rarius est; item in aetate provecta vel multum minui-

tur, vel prorsus finitur. Vomitus parum aut nihil iuvat: sunt qui putant eum nocuisse.

Vertigo vehementior subito istam oculorum perturbationem fecit, ut remotae tantummodo res distincte cerni possent, quemadmodum fit in senectute. Binas cognovi mulieres, quae postquam multos annos sine vitris convexis legere non potuissent, in ultima senectute, oculis sponte sua restitutis, vitrorum usum haud amplius desiderabant. Vertigo subito fecit quendam strabonem; simul res omnes visae sunt duplicatae: utrumque hoc vitium post viginti dies finitum est. Idem singulis auroris alteri contigit, protinus ut expectatus esset, et aliquantisper duravit.

Nonnullis persuasum est exulcerationem per cantharidas diu servatam oculos debilitare. Tamen in variis oculorum morbis novimus emplastra cantharidis utiliter esse admota; et certe imbecillitas oculorum locum non habet inter effectus cantharidum, quos usu cognitos et compertos habemus. Postremo multi huiusmodi exulcerationem servarunt decem annos sine ulla oculorum iniuria. Veruntamen tot aegrorum animos subiit haec suspicio; et nonnullorum, quibus iterum iterumque oculi laborarunt impositis cantharidibus, et his remotis sani facti sunt; ut haec opinio, si prorsus esset inanis, vix nasci et in tantum crebrescere potuisset.

Variae partes oculorum opportunae sunt ulceribus, et carcinomati,

Imbecillis, et aqua suffusis oculis saepe auxi-

lio sunt aquae, quae purgandi vim habent quarto quoque mane epotae, et eodem tempore aquae in qua cortex Peruvianus decoctus est unciae duae bis quotidie sumtae. Multa collyria dicuntur prodesse adversus imbecillitatem et dolores oculorum, quae habent zincum vitriolatum, vel calcinatum, aut tutiam, aut cerussam acetatam, aut denique spiritum vini lacte et aqua mistum. Quae omnia, ut interdum profuerint, multo saepius aegrum frustrantur.

Inflammationes palpebrarum strumosae, ubi oculus ipse vix laeditur, sanguinis missionem haud postulant; quod si oculi ipsi inflammentur, maximum praesidium est in crebra sanguinis detractio-
ne, quae convenientissime fit per hirudines temporibus, vel post aures, admotas septimo vel etiam quarto quoque die, quamdiu inflammatio maneat.

Cataplasmata e conserva rosarum, vel pomis coctis, vel interiore parte panis lacte subacta, tenui linteo inclusa, et super oculos singulis noctibus imposita, mihi visa sunt plus profecisse ad discutiendam inflammationem, quam quaelibet collyria. Ubi inflammatio postulaverit, cataplasmata octava quaque hora admoveri debent. Cortex Peruvianus, et aquae purgantes, valent adversus hos, et omnes alios dolores oculorum. Ubi palpebrae inhaerescunt, singulis noctibus oportebit margines earum inungere adipe suillo aqua emollito, ne mane glutinentur, et vi quadam diducendae sint, unde dolor et inflammatio inten-

dentur. Setacea, fonticuli, et vesicatoria, saepe non contemnendam opem praebent ad hos morbos summovendos, et ad praecavendum ne repetant.

Adversus guttam serenam omnigena nervorum remedia, pulveres sternutamenta moventes, exulcerationes, emplastra cantharidis, et argentum vivum datum sic ut salivam excitet, nihil omnino profecerunt. Aiunt electrificationem interdum fuisse utilem.

Ad cataractam unicum remedium est humorem crystallinum vel deprimere, vel extrahere.

Veteres medici ocularii, ut ex Celso discimus, collyriis suis fere semper admiscuerunt lacrymam papaveris. Quod si perpendamus opii potestates, quae sensibus patent, tum vires medicas, quas usu cognitas habemus, vix praesidii aliquid ex opio adversus morbos oculorum licet sperare. Acor huius succi manifestus dolori parum convenit; et vis eius anodyna, nisi intus, et in visceribus, meo iudicio nulla est. Quid quod antiquorum autoritas haud potuit impedire ne collyria opiata iamdiu exoleverint? quod non leve est argumentum contra eorum utilitatem. Usu tamen recenti aiunt fuisse compertum tincturae opii guttas tres oculis quotidie instillatas contra obstinatas inflammationes multum profuisse.

Ungues oculorum saepe sponte sua sensim decedunt. An manu, aut medicamentis quae erodendi facultatem habent, felicius tollantur, non possum affirmare.

De Nyctalopia.

Vir natus triginta annos verno tempore implicitus est febre intermittente, quae diu traxit, propterea quod satis corticis Peruviani non sumserat. Itaque in frigidam bis descendit, et ex illo febris nunquam repetiit. Triduo post ultimam accessionem, dum in navi quae in portu erat occuparetur, circa solis occasum res omnes coeperunt colore infici coeruleo, qui sensim increvit in speciem nubis, et brevi postea oculi adeo caligabant, ut candelae lucem cernere vix posset. Crastino mane acies oculorum restituta est. Cum vero advesperasceret, lumen simili modo amissum est: et eodem ordine perrexit amitti, et recipi, duodecim dies. Dein navem reliquit, et nyctalopia paulatim minuta est, et intra triduum cessavit. Post mensem cum iam aliam navem conscendisset, quarta nocte eadem caecitate occupatus est, quae perseveravit novem noctes, scilicet quamdiu in navi mansit. Egressus iterum convaluit. Non ita diu post in tertiam navem intravit, ubi restitit decem dies, et bis tantummodo morbo laboravit; quo nunquam postea tentatus est. Idem vir bis inciderat in resolutionem mammarum a plumbi tractatione ortam.

CAP. LXVII.

De Ozaena, sive Exulceratione Malae.

Pus multos annos manavit e cavo, quod antrum Highmori vocant. Crebra ablutio sordium

per aquam chamaemeli in cavum infusam, visum est unicum huius mali allevamentum.

C A P. LXVIII.

De Palpitatione Cordis.

Infantes interdum nascuntur palpitatione cordis occupati; atque his plerumque pectoris quaedam deformitas, vel alia adversae valetudinis indicia sunt. Verum in nulla non aetate reperitur hoc malum, quod etiam inferunt asthma, affectusque hypochondriacus et hystericus, podagra, vitia cutis, occupationes nimiae, inflatio, vertigo, defectiones animae, importuna cupiditas urinae, et illa universae valetudinis conquassatio, ubi omnes vitae vires languent. Aegris his arteriae fere semper inordinate moventur, et palpitatio interdum tanta fuit, ut sonum quoque aliquem effecerit.

Hic affectus manifesta cognatione coniunctus est cum istis morbis qui existimantur nervorum proprii esse, quique sanguinis missione augentur; hoc igitur remedium plerumque omittendum est, licet id semel atque iterum vidi impune saltem, si non (quod aegro visum est) utiliter adhibitum. Unus iacendo levatus est: caeteris omnibus in lecto morbus auctus est, tum praecipue molestus fuit expergiscentibus; nocet etiam venter cibo potuque onustus.

Si animadvertamus quam celeriter nonnulli ex his aegris ad ultima veniant; quamdiu autem

cordis palpitatio trahat in aliis, cum satis levi
 sanitatis perturbatione; tum longas eius intermis-
 siones; postremo palpitationem vel in sanissimis
 excitari posse sola cogitatione; ex his omnibus
 manifestum est eam ex variis causis oriri, ratione
 periculi multum inter se diversis. Ubi remediis
 locus est, ea sunt adhibenda, quae conveniunt
 affectibus hypochondriacis: verum palpitatio
 cordis plerumque est istiusmodi, ut vel nullam
 medicinam postulet, vel omnem vincat.

CAP. LXIX.

De Paralyti et Apoplexia.

Paralysis et apoplexia sunt tantum diversi
 gradus eiusdem morbi. Quicquid hominem re-
 pente occidit sine causa manifesta, vocatur vulgo
 apoplexia; quanquam mors subita saepe illata
 fuerit ab arteriis aut venis intus in corpore ruptis;
 vel a pituita, aut pure, pulmones replente, et
 spiritus vias intercludente; vel ab aliis causis dis-
 simillimis eius cui vera apoplexia debetur.

Paralysis est debilitas repentina musculorum
 quibus movendi facultas continetur. Quod si
 musculi universi, praeter illos qui ad cor et pul-
 mones pertinent, fiant inutiles, et sensus omnes
 simul extinguantur, morbus dicitur apoplexia;
 cuius causa interdum est adeo potens, ut cordis
 quoque et pulmonis motum deleat, et mortem
 momento temporis arcessat.

Facultas movendi per musculos, sive qui vo-

luntati subiecti sunt, seu qui non sunt sub eius imperio; tum variae perceptiones a sensibus profectae; postremo illae mentis facultates dictae memoria, imaginatio, attentio, iudicium, cum affectibus animi; nervorum beneficio exerceri videntur; et proinde debilitantur, perturbantur, vel prorsus pereunt, pro modo iniuriarum cerebro, medullae spinali, vel nervis illatarum; sive illae fiant a propriis nervorum morbis, nobis parum cognitis; seu a vi aliqua, vulneribus, ulceribus, distortionem, aut veneno. Veruntamen cum amissa facultas movendi evidens est, et maxime insignis conditio huius morbi, inde factum est, ut in hac tota eius natura contineri vulgo existimetur; et profecto interdum evenire videmus, ut unum, vel plura membra resolvantur, dum nervi qui sunt instrumenta sensuum mentisque, officiis suis rite funguntur. Alias tamen accidit, quanquam paulo rarius, ut unus, vel plures sensus hebetentur, aut pereant, vel ut mens evadat socors, obliviosa, et fere stupida, viribus muscularum integris manentibus, et illaesis. Multo saepius animus, et sensus, et corporis vires, simul laborant, ubicunque paralysis gravior inciderit. Debilitas sensuum animique, prout maior sit, vel levior, dicitur carus, coma, aut lethargus. Intellectus, et ratio paralyticorum, modo adeo hebetantur, modo adeo perturbantur, ut fiant tristes, fatui, vel prorsus insani. Modo insania et paralysis eundem vicissim occupaverunt. In nonnul-

illis epilepsia tam prope abest a paralyti, ut difficile
 addictu sit ad utrum morbum signa sint referenda.

Idem pari iure dici potest de *Chorea Sancti Viti*.

Paralysis maxime invadit illos, qui aetate sunt
 inclinata, quorumque vires senectute, vel mor-
 bis fractae fuerunt. Neque tamen iuniores securi
 sunt ab hac peste, praecipue si a maioribus para-
 lyticis orti sint, vel curis, aut intemperantia va-
 letudinem corruperint. Pueri et puellae a natu-
 rusque ad pubertatem interdum membris capti sunt;
 verum horum valetudo vel semper fuit infirma,
 vel crebris distentionibus, accessionibusve epilep-
 tictis, aut chorea Sancti Viti conquassata. Arthri-
 tides homines apoplexiae opportunos reddit, vel quia
 vires omnes debilitat, vel quia morbi utriusque
 causae cognatione quadam inter se iunguntur.
 Nervi hypochondriacorum et hystericarum non-
 nunquam adeo atteruntur, frangunturque, ut re-
 solutioni paralyticae proximi videantur. Verum,
 ut usus docuit, longo intervallo proximi sunt,
 cum perquam raro factum est, ut hi morbi in para-
 lysin desinant. Longus rheumatismus, et arthri-
 tides vaga, postquam diutius aegros detinuerint, red-
 diderunt membra imbecilla, ac pene mortua; sed
 haec resolutionis species ultra artus vix procedit;
 sensus et animi integri manent, vigentque. Ar-
 tus quidem inferiores saepius resolvuntur ab ar-
 thritide, et rheumatismo; colica Pictonum manus
 et brachia potissimum debilitat. Mulieres valetu-
 dinis alioquin secundae, dum gravidae fuerint,

aut puerperae, toties inciderunt in mala paralytica, ut vix liceat dubitare quin graviditas et puerperium faveant accessioni huius morbi. Memini puerperam hoc modo affectam, quae biennio post vix restituta fuit: hoc autem rarum est: pleraeque enim sic aegrotantes brevi tempore veniunt ad sanitatem, neque morbus solet repetere. Infans sanus validusque natus est ex matre, quam gravidam occupaverat paralysis.

Resolutio membri unius, vel corporis dimidii, saepe incipit ab apoplexia, sive subita virium et sensuum extinctione, quae perseveravit modo horas multas, modo exiguam horae partem; atque hoc malum homo interdum adeo non praesentit, ut per aliquot horas, vel etiam paucos dies ante eius adventum, sibi solito melius valere visus sit. Multo tamen saepius hic morbus sensim obrepit, absque eo ut aegrotus subito conciderit motu et sensibus destitutus. Porro eius accessio haud impedit quo minus nonnulli, mentis integri, artus sibi resolvi senserint. Vox balbutiens et inexplanata, veternus, memoria labans vel amissa, leve delirium, oculi caligantes, vel sic affecti ut res omnes cernant duplicatas, tremor, torpor sensim ad caput ascendens, crebra oscitatio, debilitas, oris distortio, animae deficientis metus, sunt illa signa, quorum nonnulla paucas horas, vel etiam paucos dies paralytin antecesserunt. Quinetiam debilitas vel unius membri, vel corporis dimidii, per multos menses, aut etiam per ali-

quot annos paulatim aucta, tandem desiit in consummatam hemiplegiam. Veternum, et visum adduplicem cum vehemente capitis dolore, et sensu ut tanquam fasciae illud comprimentis, post biduum consecuta est sensuum vocisque privatio; tertio autem die aeger extinctus est. In quodam aegro, primo die manus torpuit, secundo lingua facta est inexplanata, tertio accessit paralysis. Historia medicinae plena est huiusmodi exemplis. Minae paralyseos invasurae accesserunt et recesserunt identidem per aliquot horas, tanquam certatio quaedam esset corpori cum morbo, priusquam vel minae illae finitae sint, vel nervi resoluti. Pondus capitis, vel dolor gravis, vel sensus fasciae in caput comprimentis, vertigo, torpores, aures intus sonantes, et crebri cursus sanguinis ex naribus in adultis aut senioribus, possunt quidem oriri ex infimo gradu cuiusdam causae paralyticae; verum haec omnia per hominis aetatem fuerunt sine quovis malo graviore subsequente; ut igitur locum aliquem cautioni, nullum autem terrori dare debent. Flammulae, vel maculae nigrae, ob oculos visae, interdum praecesserunt apoplexiam, proplerumque tamen parum, aut non omnino pertinent ad hunc morbum; sunt enim saepissime solius oculi affectus, dum reliquum corpus recte valet. Excrucians dolor lumborum saepe antecessit resolutionem artuum inferiorum.

Ubi stirps et communis origo nervorum laesa fuerit, ibi omnia eorum officia perturbantur. Ner-

vis autem, qui proprii sunt partis alicuius ad vitam minus necessariae, saepe fit iniuria, caeteris omnibus inviolatis. Iis qui inter aegrotos versantur, contingit videre innumeros gradus resolutionis nervorum ab usque torpore seu debilitate articuli unius digiti ad consummatam apoplexiam, in qua sensus et motus per universum corpus pereunt: atque infinita est series paralyticorum maiorum, quae haec duo extrema interiacent. Musculi labii inferioris resoluti fuerunt, dum reliquum corpus similis mali prorsus esset expertum. Idem interdum patiuntur palpebrae alterius, vel utriusque oculi. Multo saepius laborant musculi loquelae, unde vox fit balbutiens, et inexplicita, vel ex toto suppressa. Nervi quoque alterius partis faciei soli ex omnibus saepissime resolvuntur; in quo casu labii angulus affectus depressior fit, quam angulus sanus; item cibus aegre manducatur, haeret enim ad istam genam quae mortua est; tum cibus et potio ex ore saepe elabuntur. In uno aegroto, cum resolutione dextrae partis faciei dolor fuit acutissimus post aurem eiusdem lateris; in alio similis dolor post aurem sinistram, ubi paralysis erat a parte faciei sinistra. Paralysis modo occupat solos musculos deglutitionis, aut linguae, modo alterum brachium, manum alteram, vel unicum digitum. Musculi femorum et crurum saepe fuerunt sedes huius morbi, et simul sphincteres ani et vesicae, quibus resolutis urina et stercus nolentibus elabebantur. Contra ubi nervi inferiori-

feriorum artuum affecti sunt, interdum stercus et
 urina non sine summa difficultate excerni potue-
 runt, cum musculi qui haec expellere deberent,
 magis debilitati sint quam sphincteres. Haud alia
 species resolutionis frequentior est, quam hemi-
 plegia, in qua motus dimidii corporis minuitur,
 aut perit, a vertice capitis usque ad imum pedem.
 Dextra et sinistra pars pariter opportuna est huic
 affectui; hoc saltem ita visum est ex non paucis
 hemiplegiacis, ubi huic rei diligenter attendebatur.
 Causa paralyseos, qualiscunque fuerit, levissima
 re impellitur, hoc potius quam illud corporis latus
 occupare; etenim octies contigisse novi, ut qui
 ex hemiplegia evaserant, postea correpti fuerint
 resolutione oppositi lateris.

Quinque sensus externi omnia fere obscure
 et confuse percipiunt in paralyticis. Unum tamen
 curavi, cuius olfactus adeo non hebetatus, ut
 longe acutior factus esset, et occasiones molestiae
 et offensae, satis interdum ridiculas, perpetuo
 praerberet. In alio ex lethargo vigilia erat, et si-
 mul omnes sensus externi praeter consuetudinem
 vigeabant, et acuebantur. In reliquis omnibus,
 quos vidi, universae facultates quae a nervis pen-
 dere existimantur, siquidem omnino mutatae fue-
 rint, languidiores factae sunt, nisi quod in non-
 nullis cibi cupiditas aucta est.

Torpor, sive imminutio sensus tactus, satis
 familiaris est huic morbo: tamen non nisi rarissi-
 me ex toto perit. Ex ingenti numero paraly-

ticorum, quibus adfui, septem omnino fuerunt, in quibus hic sensus prorsus extinctus est. In tribus ex his motus aliquis supererat. Alteri tactus nunquam restitutus est, etsi motus aliquis rediisset. In quinto tactus post semiannum receptus est. In duobus reliquis, quantum intellexi, neque sensus, nec motus unquam recuperatus est*.

Nulla est animi facultas quam paralysis infirmare non possit: ea autem quae moderatur affectibus et memoriae, prae caeteris omnibus debilitari consuevit. Neque tamen valde ausim affirmare affectus et memoriam opportuniores esse iniuriis, quam imaginationem et iudicium: verum innumerae occasiones arguunt memoriam amissam, vel puerilem istam animi impotentiam, quae sinit hominem dedere se lacrymis, vel ira aut gaudio inaniter efferri; dum vires imaginationis et iudicii rarius exercentur, neque sane earum debilitas tam manifeste apparet. Itaque detrimentum haud mediocre his animi facultatibus inferri potest diu antequam deprehendatur.

Infiniti fere sunt gradus imbecillitatis, quos animus, perinde ac corpus, paralyticorum experitur. Nonnullis ex sinistra parte corporis laborantibus, quibus vox etiam perierat, mens adeo constitit, ut, cum dextra manus esset incolumis,

* Ramazzini refert se olitorem quendam curavisse paralyticum, in cuius altero crure extinctus omnis motus erat, illaeso sensu, in altero abolitus sensus, movendi potestate integra manente. *De Morb. Artif.* p. 286. E.

scribendo satis declarare valerent, quid sentirent, et quid sibi fieri vellent. In aliis autem ratio et intelligentia adeo perturbatae sunt, et confusae, ut et verba sensibus exprimendis defuerint, et ipsae formae literarum e memoria excidisse visae sint. Alii inter duos priores quasi medii fuerunt, et, quod loqui non potuerunt, potuerunt scribere, etsi paulo confusius. Denique idem homo diversis diebus, vel diversis horis eiusdem diei, prout vis morbi maior fuerit vel minor, modo verba satis apte descripsit, modo chartis ille vit notas rudes, et prorsus non intelligendas. Mens horum aegrotorum adeo interdum conquassata est, ut non solum impares fuerint describendis verbis affirmandi et negandi, verum cum haec ab assistentibus scripta fuissent, non potuerint vel digitum ad haec vel illa intendere sic, ut sensus suos explicarent. Impotentia loquendi oritur quidem interdum ex resolutione musculorum vocis propriorum; interdum vero ex aliis causis. Etenim nonnullis paralyticis omnis memoria etiam vernaculae suae linguae excussa est, adeo ut nulla verborum aut literarum notitia in mente supersit. Quam quidem notitiam alii celeriter arripiunt, alii tarde et sensim redintegrant. Igitur paucarum literarum vocabula, et quae usu maxime trita sunt, primo discunt, et diu est quod verba, quae vellent, ad manum non habent; sed eorum loco aliena prorsus efferunt, tanquam qui sermone utuntur vel sibi parum cognito, vel cuius longa

desuetudine fere obliti sunt. Iuvenis capite graviter colliso aliquot dies attonitus iacuit; tandem resipiscens omnem etiam vernaculae suae linguae memoriam amiserat, quam aegre, et sensim, iterum discebat; forma tantummodo literarum, a quibus nomen et cognomen suum in ceperunt, in animo manserat; reliquarum notio adeo penitus excussa fuerat, ut iis legendis et scribendis non secus operam daret, ac si eas antea prorsus nesciisset.

Brachio resoluta interdum tam gravis dolor fuit in humero eiusdem lateris, ut aegris persuaderi vix posset quin os aut fractum esset, aut excidisset. Alvus paralyticorum solet esse astrictior; urina autem solito copiosius fertur. Incisis quorundam hemiplegiacorum cadaveribus, deprehendi modo partem illam cerebri, quae respondebat lateri affecto, modo oppositam partem, vi aliqua, vel morbo vitiatam.

In iis qui assurgunt ex hemiplegia, motus cruris plerumque recuperatur prius, quam brachii: hoc tamen non est perpetuum. Linguae leviter resolutae sensus idem fuit, ac si aqua fervente perfusa esset. Apoplexia raro discutitur sic, ut nullum membrum relinquatur paralyticum. Prima accessio apoplexiae, aut paralyseos, raro est mortifera. Quisquis autem hanc vel illam semel expertus sit, ille posthac eidem malo vivet opportunior: et quo saepius hi affectus reversi sint, eo citius nova accessio erit expectanda.

Contigit tamen aliquando, ut homines e gravi hemiplegia emergerint, et deinde liberi fuerint ab omnibus eiusdem generis malis quatuordecim, octodecim, aut etiam viginti annos. Fatendum autem est, hos casus felices raro evenire: etenim gravis paralysis, quanquam videatur ex toto recessisse, fere repetit intra paucos annos, et nonnunquam intra paucos menses.

Paralysis levis exiguae partis corporis, qualis est resolutio dimidiae faciei, saepe finitur illaesa prorsus valetudine. Iuvenes istiusmodi affectu tentati fuerunt, qui ad extremam senectutem pervenerunt expertes eiusdem recidivi. Qui semel occupatus est gravi paralysis, saepe experitur leviores morbi accessiones, quae, cum noctu, vel per quietem invadant, facile latent eos, qui aegrotis famulantur. Harum vero iustissima erit suspicio, ubi ea mala, quae secuta sunt accessiones priores, denuo intra paucas horas plurimum ingravescunt. Nusquam autem maius instat periculum morbi recrudescentis, quam per paucos dies post gravio-rem accessionem, donec vires coeperint recolligi, et valetudo aliquantum fuerit confirmata. Paralysis gravis, quanquam non repeta, saepe sola sufficit debilitandis omnibus facultatibus quae a nervis pendent. Valetudo, quantum sensibus nostris manifesta est, non semper respondet magnitudi-
tudi morbi. Qui enim, cum primum hominem invadat, satis mediocris visus est; eum intendam consecuta est summa et insanabilis corpo-

ris animique infirmitas. Qualiscunque vero nervorum resolutio plerumque infert capitis dolores, vertiginem, attentionis impotentiam, memoriam labefactatam, veterum, mentis alienationem, vocem inexplanatam, singultum, tremores, debilitatem, distentiones, et risus fletusque sine voluntate. Inter plurima autem mala, quae secum ferunt affectus apoplectici, aliquid inde boni semel visum est oriri: nam epilepticus quidam, attonitus factus, deinde revixit, et veterem suum morbum nunquam postea expertus est. Contra, aliis contigit, ut ex hemiplegia assurgentes, tum primum coeperint cum epilepsia conflictari. In puero etiam chorea Sancti Viti orsa est ex hemiplegia. Virum quendam, cuius dextra manus diutius tremere et quassari solita fuerat, occupavit hemiplegia sinistra; et protinus rediit robur et firmitas dextrae, adeo ut iterum literas belle et eleganter describere valeret, qua laude olim excelluerat.

Incerta prorsus res est, ubi quis paralyisi aut apoplexia corripitur, quot dies intercessuri sint, priusquam vel morbo victus succumbat, vel incipiat ad se redire. Iusta apoplexia, in qua nulla vitae signa supersunt praeter motum cordis et pulmonis, raro fit nisi paucis horis ante mortem. Imperfectior accessio, in qua tamen sensus omnis, et vox, et facultas devorandi perierant, non nisi decimo die morte finita est. Hemiplegia occidit modo paucis mensibus, modo paucis diebus, vel

etiam intra paucas horas desiit in apoplexiam. Attamen qui initio correptus est hemiplegia, vel qui in eam emersit ex apoplexia, ille plerumque sensim se recolligit a multis morbi sui malis, et interdum, sed rarissime, ex omnibus. His aegris morbus incipit recedere modo intra exiguam horae partem, modo non nisi post paucos dies, vel etiam post aliquot menses; interdum valetudo propperxit ire in melius per paucos annos. Octogemarius quidam ex hemiplegia restitutus fuit intra duos menses. In sene motus crurum, qui amissus fuerat, sensim rediit, donec post novem menses ambulare valeret. In uno hemiplegiaco robur partium affectarum fine demum secundi anni coepit redintegrari. Binae accessiones paralyticae recesserunt nulla sui vestigia relinquentes in sene asthmatico, qui deinde plus decem annos sanus superfuit. Plurimi qui ex hemiplegiacis facti sunt pene attoniti, noctes atque dies brachio suo insano nihil aliud egerunt, quam vestes detrudere, et pectus tali onere levare. Si hemiplegiacus mormetur experiri an manum resolutam movere possit; nemo est, qui non manum mortuam sanam manu continuo apprehendat, et susque deque moveat. Verum tristissima huius morbi facies tum demum est, cum, viribus animi et corporis admodum debilitatis, et affectibus fere ad insaniam effraenis, homo sibi ipsi quasi supersit, ad summam miseriam redactus, si modo suam miseriam non morit; quippe non amplius valet stare, aut loqui,

verum digitis alienis cibum capit, et alvum et urinam sine voluntate reddit, dum mors cessat venire, ab omnibus aegroti amicis invocata.

Apoplectici, qui prope absunt a morte, inspirando ambas buccas inflare solent.

Credibile est plerosque paralyticos et attonitos, corporis ipsius viribus, in aliquam partem sanitatis restitutum iri; vix oritur haud mediocris difficultas aestimandi veros effectus qualiumcunque remediorum, quibus aegrotus usus sit; donec ea crebro repetita eundem semper exitum habuerint. Invadente apoplexia aut paralyti, continuo laxare oportet omnes istas circumstantium partes, quae collum cingunt; id enim nonnunquam his morbis advenientibus adeo tumet, ut ab arctiore quovis vinculo strangulationis periculum instaret.

Sanguinis missio vulgo existimatur esse praesentissimum attonitorum auxilium; et profecto ubi aeger florente sit aetate, et sanguine abundet, et lautioribus epulis assuetus fuerit, vena sine mora est incidenda. Veruntamen largae et repetitae sanguinis detractiones omnibus apoplecticis et paralyticis, nullo delectu habito, utiliter aut tuto adhiberi certe non possunt. Etenim iuniores, et robusti, non tam obnoxii sunt his morbis, quam pueri infirmi, et effoeti senes, in quibus vires nutriendae sunt, et excitandae, potius quam minuendae; dum multa sanguinis profusio, quemadmodum in submersis fieri dicitur, omnes naturae conatus reprimit, et tenues vitae reliquias pe-

nitus extinguit. Quod si consulamus experientiam, haec, quantum possum iudicare, testatur copiosas sanguinis missiones saepe locuisse, easque in non paucis aegrotis tutius fuisse praetermissas.

Nonnullis persuasum est, apoplexias omnes initium habere a nimio sanguine, qui venis et arteriis distentis, vel ruptis, cerebrum comprimit; neque aliam quamlibet huius morbi causam admittunt. Attamen huic opinioni parum favet infirma, ac perdita v. letudo p'rorumque in quos affectus apoplectici incidunt. Tum quoque multa venena nervorum vires perturbant, aut abolent, eodem prorsus modo ac apoplexia; quorum tamen effectus a sanguine cerebrum comprimente proficisci vix possunt. Potest quidem apoplexia interdum fieri ex arteria aut vena in cerebro rupta; verum non video qui fieri possit, ut homo ex isto casu non moriatur; et tamen novimus per paucas apoplexias illico fuisse mortiferas.

Si nonnullos audiamus, febris haud mediocriter prodest paralyticis, quam igitur vel gaudent invenire, vel student excitare. Huic certe doctrinae parum convenit cum illorum placitis, qui omnem horum morborum curationem in purgatione alvi, et sanguinis missione contineri opinantur. Sed, ut verum fatear, iam diu est quod usus mihi ex animo delevit hanc opinionem de febris utilitate; neque enim hic, nec alibi usquam, febris utilis visa est. Quo magis aegrotus febrici-

tat, eo semper gravius est malum, cuiuscunque id generis sit, sive extrinsecus, seu intus in corpore latens: et quo magis naturaliter ordinatur arteriarum motus, eo res erunt meliores.

Arthritis paralyti superveniens ne minimum adiuvit, sed misere delusit spem aegrotorum, qui nescio quid magnum ex eius adventu sibi polliciti fuerant. Nemini autem mirum videri debet arthritidem, quae saepe gignit apoplectica mala, eorundem remedium non esse.

In nulla huius morbi specie vomitum elicere oportet per vehementius medicamentum quam aquam ex carduo benedicto; atque haec tum solum expedit, cum nausea aegrum fatiget: tunc enim eius beneficio nausea discutietur, et quicquid ventriculum gravabat, summovebitur. Medicamentum leniter purgans, vel, ubi hoc devorari non potest, aliquid infusum in alvum proderit intestina exinaniendo, pariterque excitando. Medicamenta autem valentiora sunt aliena. Emplastra cantharidis super caput, scapulas, artusque resolutos, imponenda sunt.

Ubi facultas devorandi restituta fuit, vel nunquam amissa, opitulantur illa remedia, quae vires languenti corpori reddant, quale est quod recipit olei cinnamomi, vel caryophyllorum, guttam unam cum tantillo sacchari tritam, decocti vel infusi corticis Peruviani sesquiunciam, spiritus lavendulae compositi drachmam, quod etiam dandum est quarta quaque hora. Moschus quoque, et ra-

radix valerianae sylvestris, et camphora laudantur, tanquam quae proprie nervis amicae sunt, quorum motus languidos excitant, et inordinatos moderantur. Radix valerianae saepe data est sine quovis evidente effectu; cognovi tamen nonnullos, quorum animos semper reddidit mire agitados; ut illare pateret eam nequaquam esse fatuam, et omni potestate destitutam. Praeterea feles odore huius admodum delectantur, et tandem quasi mente innotae in ludos abnormes aguntur. Feles autem promptissime sentiunt vim earum rerum quae nervos vehementer movent; et nescio an sit ullum animal parvis magnitudinis, in quod tantos effectus edunt venenatae barbararum gentium sagittae, nicotiana, opium, spiritus vini, et caetera huius generis venena.

Postquam impetus morbi transierit, et aeger paulatim amplius in aperto periculo versetur, opera illanda est, ut reliquiae eius dissipentur, et aeger a nova accessione securus praestetur. Quem ad finem quidam putant plurimum conferre aquas Bathonicas. Medici autem de hac re inter se dissentiunt: cum enim unus usus harum aquarum aliis videtur esse praesens paralyticorum praesidium; alii sine ulla dubitatione declarant eo ipso modo homines ex paralyticis fieri apoplecticos. Quantum ego met usu didici, Bathonia quidem his aegrotis neque prodest, neque nocet. Alii dum illic vivunt paulatim recreantur; alii nova accessione correpti pereunt: prorsus uti factum fuisset quovis

alio loco. Quamobrem nequeo suadere iter ad Bathoniam; quod si illud ab aegris ipsis, vel ab eorum propinquis expetatur, per me licet eant. Lavatio frigida vix ampliolem commendationem meretur. Novi bene multos qui ex paralyysi emergentes sperarunt se inventuros esse remedium ad vertiginem, et debilitatem, atque alia mala ex hac valetudine orta, si in mare descenderent. Et quidam, ut ipsis videbatur, levati sunt; aliorum valetudo in peius ruens frigidae imputata est. Verior forsitan sententia esset, hanc neque nocuisse, nec multum profuisse. Medici igitur, qui in reprehensionis periculum incurrere nolunt, cavebunt a suadenda lavatione frigida, cum paralytici, quicquid fecerint, tam obnoxii sunt morbo recidivo. Quod si vel inter lavandum, vel brevi postea fiat nova accessio, in illam causam, utcunque immerito, omnis culpa conferetur.

Somnus est imprimis necessarius ad renovandas vires animosque, labore et curis exhaustas; et tamen procul dubio hominem opportuniorem reddit omnibus illis affectibus, qui ex nervorum infirmitate oriri existimantur; in quibus quoque numeranda est apoplexia, quae saepe per quietem crescit, vel tum primum invadit. Illos itaque omnes qui in his morbis sunt, et cupiant amoliri praesentia mala, vel futura praecavere, oportet abstinere a nimio somno: optimus eius modus erit, qui minimus salva valetudine capi potest.

Exulceratione ex emplastris sanata, fonticu-

sis in collo fieri, et per reliquam vitam servari
 debet. Vertigo levabitur missis sanguinis sex un-
 ciis per cucurbitulas alternis mensibus scapulis ad-
 notas; quae sanguinis detractio bene fertur ab
 illis, quae venam incidi non sustinent. Saepe sa-
 lutare fuit hoc remedium; tum praecipue in foe-
 minina nata octo et sexaginta annos, quam vertigo
 adeo gravis identidem arripuerat, ut illico conci-
 deret, et in summo apoplexiae periculo versaretur.
 Idem demum vitae anno coepit uti cucurbitulis, quae
 deinde admovebantur singulis sesquimensibus us-
 que ad annum quintum et octogesimum, quo de-
 cessit. Nunquam autem illi opus fuit monitore:
 etenim si forte paucos dies dilatum esset hoc reme-
 dium, apertissime sentiebat se minus recte valere,
 atque eius desiderium diutius ferre sine periculo
 non posse. Huius beneficio per septendecim po-
 strimos vitae annos vertigo non nisi raro et leviter
 reversa est. Finem autem vitae attulit paralysis,
 qua, ut mihi videbatur, cucurbitulae eam mul-
 tos annos securam praestiterant.

Cum iuvenis adhuc essem, et medicinam ex
 febris praecipue haussem, abhorrebam ab opio
 paralyticis usando. Doctrina enim, veri certe
 poeciem prae se ferens, in medicorum scholis tra-
 dita, reiicit opium tanquam prorsus alienum, ubi
 languentes et semimortuos nervos cupimus exci-
 tare: quippe cuius vis omnis cernitur in refrae-
 nando et consopiendo vires animales. Hanc tamen
 opinionem, utcunque speciosam, usus mihi ex

animo excussit. Cognovi enim aegros, qui a paralyysi convalescentes multum opii sumserant, et deinde sibi indulserant tincturae opii guttas triginta singulis noctibus per haud paucos annos. Hi interea bene valuerunt; et si opium praesidio non fuit, at certe non obfuit sanitati. His doctus exemplis, ubi iactatio postulaverit, paralyticis saepe dedi opiata, cum non minore fructu, quam in alia quavis aegritudine*.

Quantum valeat electricitas ad paralytin sanandam, nondum usu satis compertum habeo; haec tamen procul dubio aliquam vim in nervos exercet.

Inter febris intermittentis signa semel atque iterum vidi mala quaedam paralytica; verum haec omnia, simul cum febre, cortici Peruviano cesserunt.

Historia Foeminae Catalepticae.

Die Iunii 26^{to}, anno 1764. In nosocomio S. Thomae vidi foeminam sex et triginta annos natam, accessione cataleptica congelatam. Pulsus erat plane naturalis. Placide spirabat. Aspectus oris erat, qualis illorum qui inæntis oculis et immotis palpebris aliquid contemplantur; non qualis moribundorum, aut aegrotantium, aut cum dolore aliquo aut moestitia conflictantium. Om-

* M. Chapelain, médecin de Montpellier, avoit guéri un homme en apoplexie par un grain de laudanum. *Ac. R. Sc.* 1703. *Hist.* p. 57.

nia membra istum situm servabant, quem adstantes cuique dedissent, utcunque incommodum. Extendi brachium, et vidi illud extentum permanere in tertiam horae partem: audivi id antea ita permansisse ultra horam; quod vix quisquam sanus facere valeret. Immo fertur extenta manu septem librarum pondus sustinuisse. Si aegra in erectum constituta fuisset, recta maneret, neque levi impulsu concideret. Sediti ambo crura extenta sunt, et a terra sublata, quae in hoc situ incommodo restabant, quasi ex argilla sequaci aut cæca facta fuissent. Os clausum est, neque ulla vi potui maxillas diducere. Palpebrae apertae fuerunt; aut si vi clauderentur, cessante hac vi, illico diductae sunt. Nictavit, sed levissime, ubi digitus oculo repente adroveretur; semper alias palpebrae immotae fuerunt. Admota candela pupilla oculi sese contraxit. Vi compressis naribus, post nisum aliquem, et quasi luctam, labra aperta sunt ad spiritum transmittendum. Audivi illam hoc morbo impeditam fuisse per aliquot menses. Mane et vespere fere quotidie redibant accessiones, et manebant modo horam, modo tres horas; et famula affirmavit quandam duodecim horas perseverasse. Morbus repente solebat invadere, nullo signo antecedente.

C A P. L X X.

De Dolore Pectoris.

Pectus saepe fit sedes dolorum, minus qui-

dem periculosorum, quam quos peripneumonici et tabidi experiuntur, verum admodum molestorum, cum propter vehementiam, tum praecipue propter moram. Etenim in quibusdam permanerunt sex, in aliis octo, vel novem, vel quatuordecim annos. Non defuerunt exempla, ubi certum habuerunt circuitum, singulis noctibus revertentes; aut ubi invicem modo hi, modo capitis dolores vexarunt. Varie appellati sunt, prout ad arthritidem, rheumatismum, aut distentionem propius accedere existimati sunt. Cum autem febre prorsus vacent, nihil est, quod aeger ab illis metuat, aut vitae suae, aut valetudini.

Praesentis doloris molestia, praesertim si noctu saeviat, et somnos abrumpat, saepe postulat leniri exiguo opii; cui si visum fuerit, licebit adiacere vel pillulam purgantem, vel calcem antimonii, vel gummi foetidum. Auxilio fuit parti dolenti admoveere emplastrum cantharidis sesquipollicis amplitudine, et diutius servare exulcerationem; item contegere eam partem emplastro cimini amplo per mensem integrum. Quosdam etiam iuvabit linimentum ammoniacae, vel saponis, bis quotidie pectori infricatum; et lavatio frigida sive in aqua dulci, sive in vari.

Verum dolores pectoris quos supra proposui sunt leviculi: superest alius, qui propter conditiones suas minime quotidianas, tum propter exitum singularem, paulo fusius exponi meretur;

quo

quo pectus adeo angitur, ut non immerito angina pectoris appellari possit.

Qui hoc morbo tenentur, occupari solent inter ambulandum (tum maxime si per acclivem locum ambulent, et statim post cibum) ingratisimo pectoris angore, vitae extinctionem intente, siquidem auferetur, vel perseveraret. Quamprimum autem gradus sistatur, totus angor momento conquiescit.

Initio huius aegritudinis caetera omnia homines valent; et seorsim nulla tenentur spirandi difficultate, a qua hic pectoris angor prorsus est diversus. Dolor saepissime pertinet a pectore usque ad cubitum laevum. Mares praecipue tentantur hoc morbo, qui annum quinquagesimum excesserunt. Sedes eius est modo suprema pars, modo media, modo ima ossis sterni, non raro tamen inclinatio ad sinistrum, quam ad dextrum latus. Arteriae eorum, qui in hoc dolore sunt, naturaliter prorsus moventur.

Postquam haec pestis annum, vel diutius inhaeserit, non adeo protinus quiescit, cum aeger constitit; tum quoque invadit non solum ambulantes, sed etiam cubantes, maxime autem qui in sinistrum latus iacent, et proinde saepe cogit aegros e lecto surgere. In nonnullis, verum non in omnibus, ubi malum inveteraverit, angor inducitur ventione in curru, aut in equo, item devoratione, tusse, solutione alvi, loquela, aut mentis perturbatione.

Haec, quam modo descripsi, usitatissima est morbi facies. In nonnullis vero quaedam varietates inveniuntur. Nam non solum ambulantes, sed et stantes, et sedentes, et expergiscentes ex somno, correpti sunt hoc malo; quod porro ad dextrum pariter ac laevum cubitum pertigit, atque etiam usque ad manus; sed hoc rarius evenit; rarissimum autem est, ut brachium simul torpeat et tumeat.

In aegro uno aut altero dolor permansit aliquot horas, aut etiam dies; nimirum cum iam vetus fuerit, et altius in corporis habitu insederit. Memini tamen in quodam dolorem vel prima sua accessione totam noctem perseverasse.

Crediderim me vidisse non pauciores quam centum hoc morbo aegrotantes; in quibus numeravi tres foeminas, et unum puerum duodecennem, qui aliquid simile huius affectus experti fuerant. Caeteri omnes fuerunt viri, qui vel prope accedebant ad annum quinquagesimum, vel eum exarserant.

Qui ambulare perseverarunt, donec angor quater, aut quinquies reversus esset, iis vomitus interdum excitatus est.

Vir quidam sexagesimum annum agens coepit inter ambulandum affligi ingratisimo sensu angoris in brachio sinistro: qui, postquam decem annos molestus fuisset, tertia aut quarta quaque nocte invasit cubantem, adeo ut aeger necesse haberet sedere in lecto per horam, aut diutius; prius-

quam dolor adeo mitigaretur, ut liceret recubare. Caetera erat sanissimus, et valetudo semper fuerat secunda; pectus autem nunquam doluerat. Hoc malum, si sedem eius excipias, per omnia referebat anginam pectoris, eodem modo sensim ingravescens, et iisdem omnibus causis exasperatum, et levatum. Porro hic vir, cum haberet quinque et septuaginta annos, repentina morte periit.

Hae sunt exceptiones, et varietates, quas inter aegrotos interdum reperi, aliquantulum discedentes ab usitatiori morbi historia.

Exitus huius affectus est perquam memorabilis. Qui enim eo tenentur, siquidem, nullo casu interveniente, angina pectoris ad *ακμην* pervenerit, omnes repente corruunt, et fere momento pereunt. Cuius quidem mortis non obscuras significationes dant crebri metus deliquii, et perceptiones quasi vitae iamiam defecturae, his aegris familiares.

Angina pectoris, quantum adhuc illius naturam intellexi, ad distentionem, non autem ad inflammationem videtur pertinere.

Nam, primo, subito accedit, et recedit.

Deinde, longas habet et integras intermissiones.

Tum, non contemnendam opem praebent vinum, et potiones meraciores, et opium:

Tum, perturbatione animi augetur.

Tum, multos annos molesta est sine alio valetudinis detrimento.

Tum, principio non excitatur unctione in

curru, aut in equo, ut fieri solet, ubi scirrhus aut inflammatio est.

Tum, in ipsa accessione pulsus non concitatur.

Postremo, nonnullos adoritur post primum somni tempus; quod in morbis ex distentione frequens est.

Non tamen dissimulandum est me ex uno atque altero audivisse, pus et sanguinem subinde exscreatum esse, et ab ipsa doloris sede visum esse proficisci. Porro ex uno, qui subito concidit, et extinctus est, odor pessimus, tanquam ex rupta vomica, adstantium nares feriebat.

Inciso cadavere hominis, qui hoc morbo subito perierat, expertissimus anatomicus nullum vitium deprehendere potuit in corde, aut in valvulis, aut in arteriis, venisve vicinis, praeter exigua rudimenta ossea in aorta. Neque porro in cerebro ulla morbi indicia reperta sunt. In hoc autem homine, sicut in aliis eodem morbo peremittis, sanguis per biduum triduumve post mortem perstitit esse fluidus, neque in partes crassas tenuesque divisus est, verum lentus fuit, tanquam cremor lactis. Hinc factum est, ut ex vena quae paulo ante mortem, vel forsitan paulo post eam aperta est, sanguis non cessaverit distillare, quamdiu cadaver fuit inhumatum.

Quod attinet ad remedia huius affectus, parum aut nihil habeo quod praecipiam: neque sane sperari potest nos multum profecisse ad sanandum morbum, qui vix adhuc locum, aut nomen in

medicorum libris invenit. Quies, et tepor, et spiritus vini, aegrotos fere deficientes recreant, et angorem, ubi diutius manet discutiunt. Opium hora somni datum impedit ne morbus noctu invadat. Memini unum ex his aegris laborem sibi imperasse dividendi serra ligna per semihoram quotidie, et tantum non sanatum fuisse. Unicum vidi, in quo hoc malum sponte sua finitum est. Sanguinis missio, vomitus, et purgantia, mihi visa sunt aliena.

Recens scriptor itineris per Alpes facti haec habet: „Qui Alpes scandunt, cum iam pervenerint ad loca, quorum altitudo maris superficiem prope ter mille passus superat, eos saepe occupat ingratisissimus sensus quasi lassitudinis, adeo ut prorsus non valeant quatuor amplius passus ambulare; et si pedem proferre contendant, continuo anima deficiat. Sin gradus sistatur modo vigesimam horae partem, quamvis non consederint, omnis iste vitae deficientis sensus transit, et vires redintegrantur*.” His certe non mediocris intercedit similitudo cum affectu de quo sermo est.

* *Saussure, Voyages dans les Alpes, tome I. p. 482.* Cælius Aurelianus, solus quantum scio antiquorum, pauca habet quae ad hunc morbum pertinere videntur: „Erasi- stratus memorat paralyseos genus, et *paradoxon* appellat, quo ambulantes repente sistuntur, ut ambulare non possint, et tum rursum ambulare sinuntur.” *Chron. lib. II, c. I. p. 348. Ed. Amman.*

CAP. LXXI.

De Morbo Pediculari.

Die Augusti 23^{io}, anno 1762. Hodie mihi narravit Edwardus Wilmot Baronettus, se vidisse virum morbo pediculari implicitum. Tumores exigui sparsi erant per cutem, in quibus motus quidam facile cernebatur, et ingens erat prurigo, Ubi acu aperti fuissent, inventi sunt pleni pediculis, per omnia referentibus pediculos vulgares, nisi quod albiores erant. Doctor Wilmot extrinsecus admoveri iussit medicamentum quod habuit spiritus vini, olei terebinthinae rectificati, singulorum uncias quatuor, camphorae drachmas sex.

Augusti 24^{to}. Idem medicus hodie retulit omnes pediculos fuisse necatos attactu huius liquoris, et omnem pruriginem fuisse sublatam.

CAP. LXXII.

De Phthisi Pulmonis.

Si qua fides rationi mortuorum quae Londini quotannis vulgatur, tabes in illa urbe longe maximas strages edit; quarta enim pars hominum, qui ad adultam aetatem perveniunt, illa feruntur perire. Veruntamen horum omnium mors phthisi pulmonis nequaquam est imputanda. Quotquot enim cum obscuro, aut probroso morbo diu conflictati, tandem macie confecti sunt, in numerum phthisicorum referuntur, quanquam pulmones omni vitio caruisse.

Phthisis pulmonum fere incipit a tussicula

arida, quae, cum videtur parvi interesse, negligitur, donec spatium habuit aliquod, et paulatim aucta periculi metum incutere coepit. Huiusmodi tussis duravit aliquot annos sine aliis malis; immo interdum penitus conquievit, et post intermissiones modo breviores, modo longiores, reversa est. Aeger autem, postquam inter spem metumque diutius traxit, tandem novorum malorum accessione infestatur; quae quoque interdum ipsum primum tussis adventum prope sequuntur. Haec autem sunt, spiritus creber, rau-
citas, fastidium, macies, debilitas, dolores pectoris, sudores effusi per quietem, sputa cruenta et purulenta, horrores, et postea calores, ardores faciei, manuum, et pedum, pulsum numerus superans nonaginta in sexagesima horae parte, crurum tumor, et menstrua in foeminis suppressa. Calculus exiguus interdum extussitus est; et cum ad ultima ventum est, saepe supervenit alvus fusa, quae tenues virium vitaeque reliquias praecipitat.

Sputum cruentum nonnunquam fuit primum incipientis morbi indicium: attamen hoc, ubi solum reperitur sine quovis alio malo, plus interdum terroris, quam periculi adfert, etiam ubi cruor certissime ex ipsis pulmonibus effluxerit; notissimum vero est, sputa saepe sanguine tingi, qui a naribus, gingivis, aut faucibus distillaverit, dum pulmones fuerint integerrimi. Verum sanguis exscreatus, siquidem alia tabis signa non defuerint,

naturam morbi clarissime indicabit *. Sputa quoque purulenta vix ullum dubitandi locum relinquerent, modo pus ab ulcere manans discerni posset ab humore purulento qui ex membrana inflammata effunditur. Sed in hac re error non semper vitari potest; et cognovi expertos et sagaces medicos falsos fuisse.

Signa morbi periculosissima sunt spiritus creber, et motus arteriarum concitatus. Vidi tabem mortiferam, ubi pulmones inventi sunt penitus corrupti, et tamen per totam aegrotationem sanguis nullus exscreatus erat, nullus fuerat pectoris dolor, neque ulla difficultas in utrumlibet latu cubandi.

Omnes alias phthiseos notas, praeter sputa cruenta et purulenta, memini me vidisse in muliere, in qua glandulae mesenterii post mortem repertae sunt scirrhosae, et pulmones integri fuerunt. Huiusmodi exempla sunt quidem tam rara, ut haud multum dubitare liceat de vitio pulmonis, ubi caetera signa fuerint, licet haec duo desiderentur.

Tabes in illis morbis numeratur, qui a parentibus procul omni dubio saepe derivati, raro tamen se produnt ante pubertatem. Ab hoc tempore ad annum trigesimum praecipue pestifera est. Sed nonnulli iam quadragenarii ea coeperunt occupari, et perierunt, postquam cum signis huius

* De Sputis cruentis vide quae infra praecepta sunt cap. 84.

morbis consuetis quatuor vel quinque annos conflictati fuerant. Alios tussis fatigavit amplius viginti annos, qui tandem quinquagenarii facti vera phthisi pulmonis, cuius omnia signa prae se tulerunt, mortui sunt. Usitator quidem exitus est, aut quos iuvenes et adultos longa tussis vexaverit, eos in senectute reddat astmaticos. Fieri potest, aut morbilli graviores, vel peripneumonia, vel tussis convulsiva, vel alia adversa valetudo, latentia tabis semina excitent, vel etiam gignant, tam in ultima senectute, quam in pueritia; cuius rei exempla ubique obvia sunt.

Illi maxime obiciuntur phthisi pulmonum, qui parentibus tabulis nati sint, aut qui in aetate puerili occupati fuerint glandulis lymphaticis tumidis et induratis. Corporis animalis leges nondum satis nobis perspectae sunt, ut dicere possimus, quare glandulae maxillarum, colli, axillarum, inguinis, et mesenterii, ad vitia pronae sint in pueritia; et quare in iuvenibus et adultis glandulae pulmonum sint morbi opportuniore; dum inclinata aetate glandulae mammarum et uteri in foeminis, in viris autem prostata, et in utrisque viscera abdominis praecipue laborent. Mulieribus tabidis graviditas videtur tussim, et reliqua phthiseos mala properare, quae in dies singulos intenduntur usque ad partum; perdurant enim tamdiu, et deinde brevi moriuntur.

Quaenam sit natura tussis, et quid in ea periculi, nullo alio indicio clarius significatur, quam

arteriarum pulsu. Nam gravis tussis, siquidem illae tarde moventur, non impedit quo minus aeger sit in bona spe: levis autem cum pulsu concitato haudquaquam vacabit periculo. Iuvenis octodecim annos natus biennium emacuerat, tussi, sputis cruentis, difficultate spirandi, vomitu, doloribus pectoris, et sudoribus nocturnis occupatus: pulsus interea erat vix, aut ne vix, iusto concitator: atque illi valetudo intra tres annos in integritatem restituta est. Neque hoc est unicum huius rei exemplum, quod mihi contigit videre. Sanitatem his aegris redditam tribuerim non tam medicamentorum auxilio, quam constitutioni corporis firmae, quae a parentibus tabidis non derivata fuit, neque strumosa labe inquinata: itaque rebus illis accidens, vix discrepat a vulnere sani hominis pulmone inflicto; quod, quamquam multa phthiseos mala accesserint, posse tamen ad integram sanitatem venire usu didicimus. Sic quoque in gravi peripneumonia, inflammatio pulmonis, et tussis, et sputa cruenta, non impediunt, ne aegroti ex tam ancipiti morbo assurgant, et prorsus convalescant.

Phthisin contagione cum aliis communicari posse, nonnullis Europae gentibus persuasissimum est; verum Britanni vix unquam sibi cavent a consuetudine tabidorum, sive quod isti opinioni fidem non habent, seu quod huiusmodi cogitatio nunquam eorum animos subiit. Quid in hac re verum sit, viderint alii: equidem nondum usu

magistro eo progressus sum, ut aliquid certi de
 ea mecum statuere potuerim: fateor autem me
 viderisse nonnullos tabe pereuntes, quorum morbus
 non aliud probabilius habuit initium, quam quod
 assidue una fuissent, aut etiam dormiissent cum
 tabidis,

Quamquam hic morbus quotidie nascatur, et
 omnis generis remedia tentata sint, quae vel ratio,
 vel temeritas, vel spes, vel desperatio, vel super-
 stitio potuerint excogitare, tamen parum profe-
 cimus in sananda vera pulmonis phthisi. Neque
 mirum videri debet pulmonem tabidum a parenti-
 bus acceptum, aut ubi corpus strumoso vitio con-
 taminatum est, aegre, vel non omnino cedere
 medicinae. Quamobrem ea remedia fere sola his
 aegris succurrent, quae poterunt importuna quae-
 dam mala phthisi saepe accedentia levare, unde
 si vita non fiat longior, morbus saltem sit tolera-
 bilior. Lac asininum suavem tabidis cibum prae-
 bet, qui febris hecticae calorem temperat, et cor-
 pus viresque amissas reparat. Acidum vitrioli-
 cum dilutum decocto corticis Peruviani instilla-
 tum praesens est remedium nocturni sudoris, et,
 quantum mihi visum est, tuto dari potest quoli-
 bet morbi tempore. Spiritus angustia non debet
 impedire ne aeger utatur hoc remedio, vel etiam
 copio, quod tussim praeter omnia alia medicamenta
 compescit, et, si detur cubituro, efficit ne diem
 taedii plenum vigilia nocturna sequatur. Urgens
 dolor lateris postulat detractionem quinque uncia-

rum sanguinis, et huic plerumque cedit. Quod si dolor hebes sit, et diuturnitate sua potius, quam vehementia fatiget, emplastrum cantharidis parvum super ipsum locum impositum satis efficax remedium erit. Alvo fusae supervenienti raro non medebuntur tincturae opii guttae tres post singulas deiectiones sumtae. Ad raucitatem, crurum tumorem, aut menstrua suppressa, nihil opus est remediis; cum haec semper fiant in morbo pulmonis, tracheaeque, et in extenuato exhaustoque corpore; et proinde ante summoventi non possunt, quam ipse morbus fuerit sanatus. Febris et inflammatio adeo graves esse possunt, ut non nisi sanguinis missione solvendae sint; verum crebrae sanguinis detractiones, quantumvis exiguae, tabidis videntur nocere, et ruentes eorum vires praecipitare.

Incisis phthisicorum cadaveribus vidi pulmonem refertum glandulis tumefactis, quarum aliae inflammatae erant, aliae suppuratae, aut etiam ruptae. Quae, quanquam haud multum discedere videntur a strumosis tumoribus glandularum lymphaticarum in collo, aliisque partibus exterioribus, longe tamen sunt periculosiores; quoniam pulmonis officium est ad vitam tam necessarium, ut gravem iniuriam subire sine summo discrimine non possit.

Varia remedia strumosorum malorum nobis a maioribus tradita fuerunt, quae omnia usus adeo parum comprobavit, ut verear ne adhuc deside-

retur medicamentum, quod tumores pulmonis vel
 nascentes discutiat, vel sanet suppuratos, vel im-
 ppediat quo minus novi subnascantur. Quamob-
 rem in hoc morbo, sicut in aliis omnibus, quo-
 rum certa remedia nondum inventa sunt, aeger
 contentus esse debet iis praeceptis, quae docent,
 qualis vitae victusque ratio fugienda sit, qualis-
 que eligenda, ut totius corporis valetudini quam
 optime consulatur. Quippe his rite institutis, vis
 illa sui conservatrix omnibus animantibus innata
 maxime vigebit, et pulmoni laboranti felicissime
 subveniet. Neque debet quisquam desperare de
 bono huius curationis exitu. Mammae mulierum,
 pperinde ac pulmo, glandulis plenae sunt, neque
 scio an facilius sanentur, ubi induruerint in tuber-
 cula scirrhusa; attamen haec, nihil non mali mi-
 nitantia, vidi, dolore sensim mitigato, tandem
 conquiescere, aut etiam penitus discuti; et per
 vias corporis naturales, victumque salutarem
 morbus vel funditus sublatus fuit, vel omni fa-
 cultate nocendi spoliatus. Idem obtinere posse
 in pulmonis quoque tuberculis scirrhusis veri haud-
 quaquam dissimile est. Etenim nonnulli iuvenes
 neque pauca, nec levia phthiseos indicia experti,
 restituti fuerunt, et ad senectutem incolumes per-
 venerunt. Quidam adolescens sedecim annos na-
 tus per multos menses conflictatus est cum phthisi
 pulmonis; et cum iam ad ultima, ut videbatur,
 ventum esset, magna copia puris erumpente fere
 suffocatus est; sed post paucos dies excreta tunica

unde id effluxerat, vires et corpus brevi recollegit, athleticæque valuit, et robustus senex factus est, auctus multis liberis et nepotibus bene valentibus. Attamen levi quacunq̄ue de causa tussi opportunus erat, et sæpiuscule quotannis cruenti aliquid exscreavit. Summus etiam ille medicus Edwardus Wilmot, cum nondum vigesimum complevisset annum, tabe adeo graviter aegrotabat, ut, quod ipse mihi narravit, non solum propinqui, sed etiam expertissimi medici de salute eius desperarent; vixit tamen, vixitque nonagesimum annum egressus. Quotidianum est, ut mala phthisica leniantur, vel conquiescant, per totam aetatem, vel etiam per paucos annos; et deinde frigore sæviente, aut temperantiae legibus parum servatis, revertantur, et brevi hominem necent. Quod si hæc irritamenta sollicite fuissent vitata, non video cur morbus per totam vitam non siluisset. Quam rem non mediocriter confirmat historia cuiusdam, tabe hæreditaria occupati, qui in regionem tepidiorem profectus convaluit, et viginti annos sanus vixit, neque scio an morbus unquam redierit.

Optime provisum est, ut quæ partes corporis ad vitam necessariae, vel summopere utiles sunt, eae modo valde amplae factae sint, modo duplices, ita ut si ex his una, vel pars aliqua, casu morbove laedatur, supersit tamen quantum ad usus nostros non male suppeditet. Huius providi benevolique consilii exemplum habemus in pulmone: qui cum in partes duas fere aequales dividatur, altera exte-

nuari, et fere in nihilum redigi potest, altera si-
 mul haud mediocriter labefactari; ut patuit inci-
 sis tabidorum cadaveribus, et factum fuisse credi-
 bile est aliquamdiu priusquam morerentur. Mul-
 ti quoque tussiunt, et vehementer spirant, et sub-
 ande cruorem exspuunt, per totam aetatem, qui
 non solum vivunt, sed etiam vita fruuntur. Unde
 incredibile fit, vitam posse consistere, atque etiam
 consuetudinem non magnopere perturbari, licet bo-
 na pars pulmonis aut inutilis facta fuerit, aut per-
 eierit. Itaque postquam tubercula strumosa pul-
 monem vitiaverint, partesque nonnullas cum aliis
 conglutinauerint, quasdam etiam penitus absum-
 serint; homo tamen vivere, et non incommode
 valere posset, modo daretur remedium, quod
 morbum intra certos fines contineret. Phthisis,
 quae ex labe Venerea orta est, saepe gravissimas
 vias intulit, et vitam in propinquum discrimen
 adduxit; adhibito tamen proprio istius veneni re-
 medio, aeger praeter omnium spem convaluit,
 quanquam pulmo omnia tulerit signa vitii non le-
 uioris, quam quod factum est in deplorata tabe
 strumosa. Posteris utinam ad virus strumosum
 neque certum remedium aut det ratio, aut fors
 obbiiciat! Interea multa sunt, quae tabidum de
 salute desperare vetant; modo victus ratio bene
 constituitur, et sollicite vitentur quaecunque aut
 vires corpori demant, aut morbo addant.

Frigus asperum, et venti brumales, valentis-
 simos pulmones tentant, et tusses movent; ideo-

que summopere vitanda sunt ab iis, quorum pulmones sunt infirmiores. Nonnihil iuvabit amictus tepidior, qualis est vestis interior lanea; utilissimum autem, si fieri potest, ex frigido in mitius coelum transire. Tabido praeter omnia loca conveniret insula haud magna, in qua montes nulli excelsi sunt, quae etiam procul remota est a montibus nivalibus aliarum terrarum, et cuius denique ea est temperies, ut mercurius in thermometro Fahrenheitano raro excedat gradum nonagesimum, aut infra sexagesimum descendat. Per quatuor aestivos menses is est Britannici coeli tempor, ut tabidus frustra quaereret aliud sibi convenientius. Itaque nemo Britannus e pulmone laborans solum vertere debet a mense Martio usque ad Octobrem, per reliquos menses ire iuvabit in locum, qualis modo propositus fuit. Exercitationis genus illud eligendum est, quod ipsi aegro maximam ferat delectationem, et lassitudinem minimam.

Tabidum oportet imprimis abstinere a vino quocunque, et ab omni potione meraciore, item, quantum commode fieri potest, carnem cibo subtrahere; cum vero nonnullis odiosa sint quae e terra gignuntur, aliquid concedendum est sive consuetudini, sive naturae, ne forte si caro ex toto sublata sit, vires aegroti magis minuantur, quam ipse morbus. Quamvis enim cibi cupiditati non semper indulgendum sit; tamen aegrotantium vota non sunt nimis severe reiicienda, aut
 prorsus

prorsus negligenda. Potui aptissima erit aqua pura, qualem praebent fontes montis Malvernensis, vel distillata. Quae vero copiam magnam habet calcis, et acidorum mineralium, veneno peius est vitanda; cum huiusmodi aqua, ut mihi videtur, corpori praecipue inimica est, glandulas lymphaticas impediendo, et exulcerando, etiam in adultis, et qui ab omni labe strumosa liberi sunt. Porro haec vitia, nisi fallor, vidi aquae purioris usu discuti.

Navigatio longa a quibusdam, quos curabam, tentata fuit, et, ut ipsis videbatur, non sine morbi levatione: tamen aliis certe parum profuit. Tuta quidem semper est; neque ausim maius quicquam ex illa polliceri. Nonnulli, qui sanguinem quotidie exscreabant, in navi fuerunt sesquimensem, et licet nausea summa fuisset, et vomitus tota via nunquam cessasset, tamen sputa cruenta non aucta sunt.

Sensus nescio quis in faucibus, tussim assidue movens, interdum est admodum molestus; et varia remedia excogitata fuerunt ad hoc importunum malum deliniendum: sicut uvae passae comestae, et lente devoratae: vel aqua ex glycyrrhiza; vel humor eius decoctus; vel succus sambuci, aut ribesiorum spissatus; vel aqua in qua semen cydonii decoctum est, cum syrupo aliquo iucundo mista; vel mel cum succo limonis; vel sacchari frustum tinctura opii camphorata madefactum: plurima alia eiusdem generis sunt; quibus omni-

bus parce utendum est, cum breve quidem praebeant auxilium, sed nihil conferant ad morbi sanationem; et quanquam gustui iucunda, ventriculo tamen parum utilia sunt.

C A P. LXXIII.

De Colica Pictonum.

Colicae Pictonum duae videntur species esse; quarum alteram recte vocaveris acutam, alteram longam. In priore dolor ventriculi et viscerum subito invadit, et vehementer urget, cum alvo astrictissima, et interdum cum stupore, vel amentia; tum saepe desinit in resolutionem manuum, vel in mortem. Angor, iactatio, et vigilia, fatigant aegrotos haud multo minus, quam ipse dolor. In lecto nunquam conquiescunt, et assidue inambulant, ubi a lecto abstinere possunt. Ad haec saepe accedunt dolores universorum musculorum, maxime prope scapulas, languor summus, singultus, fastidium, vomitus, et umbilicus intus ad viscera retractus. Delirium leve, et loquacitas in quibusdam manent aliquantisper, postquam impetus morbi transierit.

In longa specie alvus non semper dura est; tum morbus incipit ab hebetere dolore viscerum, qui modo exiguus est, vel nullus, modo fit tantus, quantus in hominem maximus cadere potest. Hae vehementes accessiones durarunt vel paucos dies, vel mensem, item redierunt tertio vel quarto quoque mense, modo per annum, modo per decem

annos, priusquam manus resolutae sunt. Morbo autem crescente, et viribus corporis minutis, accessiones doloris fiunt crebriores, et etiam per intermissiones languor non mediocris manet. Urgente hac colica pulsus opinione minus concitatur. Purgata alvo aeger nonnihil quidem, sed haud multum levari se sentit. Quidam hoc morbo iam iam perituri visi sunt, qui tamen intra triduum tantum restituti sunt, ut foras exire potuerint. Contigit interdum, ut qui colica Pictonum laborabant, repentina morte perierint: siquidem visilla plumbi venenata, nervis inimicissima, quae manus et brachia fere semper resolvit, interdum cor ipsum invadat, motumque eius, et simul vitam subito extinguat.

Postquam manus paraliticae factae fuerunt, tam in acuta, quam in longa specie, assurgere consuevit in dorso alterius, vel utriusque manus, prope initium ossis metacarpalis medii digiti, tumor ad nucis parvae magnitudinem, sine dolore, vel coloris mutatione. Verum hoc non est perpetuum. Ubi dolores atrociores finiti sunt, et paralysis accessit, obscurus dolor in ventriculo remanet, cum vagis doloribus universi corporis; simul cupiditas cibi languet, et non raro nausea est, aut vomitus. Corpus et vires sensim amittuntur, praecipue vero extenuatur musculus qui pollicem adducit. Paulo ante mortem aegri delirant, et fiunt caeci. Crura ad breve tempus interdum resolvuntur; et in quibusdam, sed perpau-

cis, vidi crura haud minus quam manus perenni resolutione occupata. Inciso cadavere hominis hac colica peremti, nullum vitium intus in corpore deprehensum est, quod ad hunc morbum pertinere, mortemque inferre potuisset.

Plumbum in pulverem comminutum, vel ex quovis humore liquatum, procul omni dubio hunc morbum gignere potest. Acuta species fortasse nascitur, ubi multum plumbi intra breve spatium sumtum fuerit: contra, si quis parum sumserit, et diutius idem facere consueverit, tum fit morbus longus. Usus aëte bis mille annos homines docuerat hanc venenatam plumbi facultatem; et quanquam fuerit suspicio alias quoque res eadem vi praeditas esse, nondum tamen certo cognitam et exploratam habemus quamlibet aliam huius morbi causam. Quam etiam sententiam video placere Georgio Baker baronetto, qui doctissime huius morbi naturam illustravit*. Illud vero animadversione dignum, quod in eadem domo, in qua etiam cuncti eodem victu utuntur, morbus saepe unum aliquem arripiat, caeteris omnibus intactis. Ex quo tamen evinci non potest plumbum non fuisse in culpa; quoniam idem argumentum contra causam qualemcunque extrinsecus illatam aequè valeret. Cum vero dici vix possit, quantillum huius metalli morbo gignendo sufficiat; inde oritur non levis difficultas investigandi aditum

* Medical Transactions.

eius in ventriculum. Cerussae acetatae grana tria singulis diebus sumta per quatuor dies, initium dederunt alvo astrictissimae, fastidio, et torminibus. Colica Pictonum, tandem quidem sanata, sed quae diu molesta fuerat, orta est ex tincturae Saturninae guttis triginta quotidie sumtis per mensem; plumbi autem pondus in his guttis triginta vix crediderim excedere unum granum; quae tamen res aegre potest certo definiri. Vasa cuprea vix unquam stanno sic obducuntur, quin simul aliquid plumbi admisceatur: quare si quispiam, saepius quam reliqui eius convictores, vescatur iis quae in his vasis cocta sunt, tum maxime si quid acidi est, consequetur eum, vel solum, vel praecipue colica occupari. Aceta etiam, et quae aceto condiuntur, si serventur in fictilibus plumbo illitis, semper inquinantur hoc metallo; quae condimenta cum aliis iucundissima sint, aliis vero displiceant, itaque iisdem in aedibus illi torminibus plectentur, a quibus hi prorsus liberi sunt. Idem etiam venenum latere potest in uno genere potionis, non autem in reliquis, quae eisdem mensis bibenda apponuntur; et dispar erit convivarum sors, nisi parem omnes venenati liquoris modum biberint: ne dicam venena omnia, quae nervis officiunt, varios admodum effectus in variis hominibus edere. Aiunt vinum album plumbo saepius vitari, quam rubrum; et proinde eius potores opportuniore esse huic colicae; quod ipse in quibusdam aegris suspicatus fui: horum certe unus

tum demum morbo suo liberatus est, cum vinum album Ulyssiponense bibere desierat.

Acutam colicae speciem nunquam mihi videre contigit, nisi inter pictores, et plumbarios, atque alios artifices qui plumbo, vel eius fumo, obiecti fuerant,

In longa specie plumbum secreto itinere in ventriculum se insinuat: quod quidem est calamitosum, et facit summam, et saepe ineluctabilem difficultatem hos aegros sanandi. Qui enim nec sciunt, nec suspicantur, quo pacto haec pestis in viscera illabatur, ideoque ab illa cavere non possunt, eos, nisi fors quaedam intercedat, quo minus causa mali assidue renovetur, nulla ars, et nemo medicus in pristinam sanitatem restituere poterit. Non est itaque mirum, quod homines ex hoc casu plerumque moriantur. Inter alia intestinorum mala quibus infantes conflictantur, colica Pictorum forsitan non ultimum locum tenet; quam scilicet contrahunt, dum crepundia sua, minio, aut cerussa fucata, ori, ut fit, saepe admovent, et lingunt. Artifices horum crepundiorum interdum curavi eodem morbo tentatos.

Prima accessio acutae colicae non semper desinit in paralytin. Illi itaque qui tali admonitione edocti in posterum sibi sedulo cavent ab eius causa, quanquam periculosissime laborassent, postea tamen vivere possunt liberi ab hoc malo.

Urgente dolore colico, dare oportet medicamentum purgans, quod viam sibi faciat per inte-

stina spasmis contorta et astricta; atque etiam opium, ubi dolor praeter solitum saeviat. Pro sunt quoque balneum, et emplastrum cantharidis super ventrem impositum. Postquam impetus morbi transierit, conveniunt aromatica, et amara, cum ad concoctionem moliendam et ventriculum confirmandum, tum ad praecidendam paralyticae debilitatis causam, vel etiam ad paralytin, iam factam, sanandam. Aqua Bathonica ventriculis infirmis amica est, et non contemnendum auxilium his aegris pollicetur: quod si nonnullis haud multum opitulata est, alii tamen Bathoniae convalescerunt, et ideo forsitan citius, quia istis aquis intus et extrinsecus usi fuissent. Quin alium usum capient aegroti ex itinere ad Bathoniam, cum non tantummodo locum, sed potionem quoque mutant, et cibus aliis vasis coquatur, et condimenta alia apponantur: itaque sperandum est, omnes plumbi aditus fore interclusos, contra quos, utpote ignotos, aegroti non poterant defendi, dum domi manerent.

CAP. LXXIV.

De Pituita.

Pituita fauces implens, et prope strangulans, multos exercet, maxime tempore matutino; illos vero praecipue, quorum vires et valetudinem, vel senectus ingravescens, vel morbi conquassaverint.

Vomitum multum prodest pituitosis, minuendo pituitae copiam: dein vero causae mali occur-

ritur dato quotidie radicis colombae in pulverem contritae semiscrupulo, adiectis grano uno et altero vel piperis longi, vel radicis zingiberis: aloës etiam granum cum his commode adhibetur, ubi venter est astrictior; haec enim ventris conditio in hoc vitio est prorsus aliena.

C A P. L X X V.

De Prostatae Scirrho.

Prostatae scirrhus est morbus adultae, vel potius inclinatae aetatis, Signa sunt, tenesmus, dolor in expellendis duris stercoribus, et cupiditas crebrae urinae, quae redditur cum dolore ab extrema urethra usque ad renes pertinente. Ubi scirrhus suppuraverit, mucus etiam cruentus post urinam exit, et testiculi tument. Ulcus huius partis in intestinum rectum interdum penetravit; unde factum est, ut spiritus per urethram exierit.

Malis ex hoc vitio ortis magna intercedit similitudo cum illis, quae fiunt ex calculo vesicae; nec ubique facile est alterum morbum ab altero discernere. Ad hoc scitu utile est dolorem ex prostata sentiri initio meiendi; in calculo autem non nisi sub fine: tum ventione in curru, vel in equo, mucus cruentus non augebitur in prostatae morbo, neque dolor intendetur; quod utrumque contra fit, ubi vesica calculo laborat.

Cum suspicio huius morbi oborta fuerit, chirurgus arcessendus est, qui manu plerumque scirrhum prostatae deprehendet, si tumor et du-

rities sint maiusculae. At ubi initio morbi haec signa sint obscura, et dubia, facile fieri potest, ut, exploratione facta, non eadem sit diversorum chirurgorum sententia de natura mali *.

Parum opis est in medicina ad solvendum prostatae scirrhum. Medicamenta ex hydrargyro nocent. Decoctum corticis Peruviani cum foliorum cicutae quantum sine vertigine ferri potest, tutum saltem remedium est. Utilissimum vero est aquae uncias sex cum tincturae opii guttis triginta, vel pluribus, in alvum infundere. Hoc certissimum doloris remedium singulis noctibus adhiberi debet; unde nox fiet tranquilla, et plerumque somnus movebitur. Idem etiam interdum commode iteratur, si angor postulet. Praeter haec auxilia vix est quod medicina efficere possit amplius. Neque enim aegri monitore opus habent, ut discant summam in victu moderationem servandam esse, et abstinendum esse ab omnibus cibis et potionibus calefacientibus, et, quantum fieri potest, etiam a perturbationibus animi.

C A P. L X X V I.

De Cutis Pruritu.

Naturalia foeminarum, et virorum scrotum, saepe tentantur prurigine molestissima, quae interdum plures annos occupat. In foeminis hoc malum saepe accedit profluvio albo, et interdum

* *De Calculo Urinae* supra dictum est capite 16.

forsitan ex illo nascitur, siquidem acer humor, non satis ablutus, exsiccetur, et cuti adhaereat.

Scapulas quoque, vel universam cutem, prurigine tentari contigit, licet nec icterus, nec quaelibet manifesta cutis vitia fuerint. Hoc malum praecipue exercet senes, et illos quorum valetudo et vires morbis fractae sunt; quos interdum male habet, et noctu dormire prohibet.

Usus docuit parum auxilii esse his aegris in balneo. Spongia spiritu vini madefacta, et cuti admota, aliquando pruriginem per horam unam solvit. Aqua in qua radix hellebori albi decocta est, quo modo propositum fuit in capite de cutis vitiis, hunc morbum in nonnullis prorsus sustulit. Profuit etiam loca affecta lavare aqua vel marina, vel picea, vel in qua alumen dissolutum est. Interdum utile fuit ulcusculum in ima et interiore femoris parte excitatum. Vix locus est medicamentis intus datis.

CAP. LXXVII.

De Puerperio.

Omnes norunt ex partu difficili fieri solere summam debilitatem, et febrem, et valetudinem adversam. Pustulae ad magnitudinem seminis milii, quae in febribus puerperarum interdum nascuntur, unice debentur, ut multis videtur, calori nimio, quæ famularum sedulitas, victusque, vestesque, et aër conclusus, in his mulieribus excitant. Pustulae istae interdum oriuntur, et pau-

ocos dies manent, quamvis febris, et omnis adversa
valetudo absit. Exacto mense uno, vel sesquimen-
se, a partu, femur alterum in quibusdam coepit do-
lore, et dein in magnum durumque corpus intumuit,
ita ut crus extendi non potuerit. Huius-
modi tumor vix post integrum mensem adeo subse-
derat, ut sua femori movendi facultas redderetur.

Paralysis, et insania, quibus mulieres brevi
post partum sunt opportunae, celerius finiuntur,
et rarius revertuntur, quam ubi iidem morbi ex
quavis alia causa habuerint initium. Febres puer-
perarum similes sunt aliis febribus, et similem
remedendi rationem postulant. Principio saepe
convenit venam incidere.

CAP. LXXVIII.

De Purpureis Maculis.

Cutis puerorum interdum ubique distinguitur
maculis purpureis, similibus earum quae in quibusdam
febribus nascuntur. Tamen his adversa
valetudo nulla est, neque praecessit, neque subsequitur.
Aliae pustulae vix sunt semine milii
maiores, aliae sunt tres pollices amplae. Post
paucos dies cunctae sine medicamentorum auxilio
sua sponte plerumque recedunt. In quodam pue-
ro sic affecto, si modo digitus leviter cuti impri-
meretur, continuo sanguis ex vasis vicinis effun-
debatur, et sugillatio, tanquam in collisis, fieret.

Simul cum his maculis vidi tumores in artu-
bus inferioribus oriri eiusdem coloris ac reliqua

cutis, et sine dolore, nisi tum cum membrum moveretur. Hi tumores post decem dies subderunt; at notae purpureae paucos adhuc dies superfuerunt.

Puerum quinquennem huiusmodi tumores et dolores pessime habuerunt. Penis adeo intumuerat, ut urina aegre reddi posset. Ad haec, tormina interdum erant, cum vomitu, et simul stercora lineis cruentis notabantur, urina quoque sanguine colorabatur. Dolore crura occupante, aeger non poterat ingredi, et brevi post doloris accessum crura punctiunculis cruentis referta erant. Post intermissiones paucorum dierum, tumores, et notae cruentae reverti solebant. Haec mala diu puerum fatigabant. Quae alvum leniter moverunt, videbantur aliquantulum iuvare. In decocto corticis Peruviani parum, aut nihil erat auxilii.

In quodam sexagenario femora, et mox crura, hic illic purpurascebant, et simul cutis durior et crassior fiebat, cum magno dolore ubi stare conaretur. Post sesquimensem cibi cupiditas, somnusque minuebantur, pulsus concitabatur, accedebat spirandi difficultas, et paucis post diebus aeger extinctus est. Alios vidi eodem pene modo laborantes, sed multo acutius, sic ut paucos tantummodo dies superfuerint.

CAP. LXXIX.

De Rheumatismo.

Multi dolores, quibus nomina nondum pro-

ppria imposita sunt, quanquam inter se distent, ex
 ccasis longe diversis orti, tamen ad rheumatis-
 mum pariter referuntur. Quem morbum non
 semper facile est discernere a quibusdam aliis,
 qui etiam certam appellationem classemque obti-
 nuerunt. Etenim non raro locus est dubitandi
 aegrorum dolores ad arthritidem, lumen Vene-
 ream pertineant, an ex illis sint qui strumae quo-
 que interdum accedunt.

Rheumatismi duae species sunt, acuta altera,
 altera longa vel chronica. In acuta, iactatio est
 ingens, membrumque affectum brevi tumet, et
 quoties movetur impatibili dolore cruciatur. Tum
 rubor aliquis fere subluet; interdum calor vix
 mutatur. Magnitudo febris rheumaticae, siqui-
 dem ex arteriis aestimanda sit, minus nocet om-
 nibus facultatibus mentis et corporis, quam aequae
 febris ex quovis alio morbo orta. Nam isti
 motus arteriarum qui cogunt alios desipere aut
 furere, adeo parum officiant rheumatico, ut ne-
 que languorem afferant insignem, neque semper
 tibi cupiditatem tollant. Dolores et tumores,
 contra ac fit in arthritide, in ipsa prima accessione
 omnes corporis partes aliam ex alia invadunt,
 nunquam diu manentes in una sede; atque hoc
 modo vagantur interdum amplius duos menses.
 In his aegris sudor multus oriri consuevit, neque
 morbum levat. Est ubi lecti tepor rheumaticos
 dolores vehementer auget; sed hoc non est perpe-
 tuum: alias enim, tum praecipue in longa specie,

idem tepor artus dolentes blande fovet re-
creatque.

Rheumatismus acutus, qualis mihi videbatur, in uno et altero rediit semel vel bis in anno per complures annos. Nonnulli forsitan, ob hanc ipsam conditionem, talem morbum contendunt fuisse arthriticum; et fateor huic certum circuitum rarissime accidere, et multo saepius fieri, ut qui una accessione liberatus fuerit, ille nunquam experiatur secundam. Rheumatismus certe propinqua cognatione coniunctus est cum arthritide, et solet seorsim invadere pueros arthriticis maioribus ortos, tanquam esset *τα μικρα της ποδαγρας μυσηρια*. Nec longa eius species minus affinis est paralyseos: nam sequitur fere diuturna debilitas cum tremore et torpore membri affecti, donec artus interdum resolvuntur, et fiunt prorsus inutilis. Rheumaticus dolor mulieris cuiusdam humerum occupabat, musculosque vicinos sensim adeo debilitabat, ut vix superesset facultas brachium movendi: post septem menses brachium coepit aliquantulum moveri, et aditis aquis Buxtonicis tandem integre restitutum est.

Habitus corporis strumosus non raro reddit homines obnoxios tumoribus et doloribus, qui vel sunt rheumatici, vel certe omnibus notis rheumatismum mentiuntur. Huiusmodi tumores, et dolores, modo antecesserunt abscessus strumosos, modo cum illis simul facti sunt. Inflammationes quoque oculorum strumosae nonnunquam com-

mutatae fuerunt cum doloribus membrorum rheumaticis. Tumor et dolor inhaerentes in aliqua corporis parte, et in aliam nunquam versi, raro dici debent rheumatici; quin potius ad distentionem referendi sunt, vel ad distortionem, vel ad astrumam. Sciatica tamen, quanquam eandem locertam sedem usque occupet, est vere rheumatica. Lumbago pertinet potius ad spasmum, vel ad distortionem.

Rheumatismus longus, sicut acutus, ex alio in alium articulum facile transit. Sed in hoc exigua vel nulla febris est, dolor fere obscurus, rubor nullus; tumores vero diu manent, et morbus nonnullos detinet per plures annos: saepius accessiones nullis certis spatiis interpositis revertuntur, donec miserrimam tandem debilitatem intulerint, aut valetudinem penitus corruperint. Quibus motis longa species ab acuta discernitur. Utrumque morbi genus tam foeminas quam mares, tam pauperes quam divites infestat.

Haud insolitum est pueros circa nonum aetatis annum in rheumatismum incidere; et meminisse curasse quadrimum cum hoc morbo conflictantem: qua quidem re plurimum distat ab arthritide. Hac enim afflictum ante pubertatem vidi neminem.

Plerumque fit, ut dum rheumaticorum artus gravissimis cruciatibus torquentur, viscera interea omni dolore vacent. Tamen nonnullos curavi, in quibus rheumatismus fines consuetos transsiliens in ventriculum, aut cerebrum, versus fuit. Cum

autem inter quamplurimos rheumaticos hoc tam raro evenerit, fieri potest, ut me natura morbi fefellerit, et ut ille revera fuerit strumosus, vel arthriticus, vel ad longum potius quam ad acutum rheumatismum pertinuerit. Vomitus assiduus, iactatio ingens, et summum cibi fastidium, in mortem tandem desinentia, virum quendam exercebant, cuius morbus multis nominibus rheumaticus potius quam arthriticus dici merebatur.

Nec usus docuit, neque ratio excogitavit certa rheumatismi remedia; quo, non minus quam facie sua, nimis similis est arthritidi. Hoc licet ex aliqua parte illis tribuere, qui diversis malis idem nomen imposuerunt. In acuta specie plerisque medicis placuit venam incidere; quod in cognato morbo arthritico adeo reformidant. Et procul dubio iis imperandum est qui florentis sunt aetatis, corporisque robusti, quique morbum suum, quo modo alios morbos cum inflammatione, contraxerint, maxime ubi corpus labore calefactum frigido aëri diutius obiectum fuerit. Veruntamen usu mihi comprobatum est copiosas et iteratas sanguinis detractiones plerisque in hoc casu haudquaquam convenire. Memini gravissimum rheumatismum in quendam incubuisse paulo post ingentem sanguinis ex naribus profusionem, quae hominem pene exhauserat, et vitam in summum discrimen adduxerat. Idem propemodum alteri quoque contigisse novi.

Linum catharticum, et alia quae vehementer
alvum

alvum movent, a populo in rheumatismi remediis numerata fuerunt; quae tamen adeo parum profecerunt, ut iam diu est quod in desuetudinem abierunt. Medicamenta etiam sudorem moventia adhibita sunt et in acuto, et in longo rheumatismo; et interdum prodesse visa sunt: nemo autem nescit hos aegros sua sponte proclives esse in nimios sudores, neque inde iuvari. Balneum multis visum est nocere; ne uni, quantum iudicare potui, opitulatum est. Lavatio frigida modo nullum attulit auxilium, modo non mediocriter iuvit. Emplastrum cantharidis levavit dolores inveteratos longi rheumatismi; ad quem etiam profuerunt linimenta volatilia, et saponacea, partibus affectis infricata. Motus vehiculi adeo non auget hos dolores, ut saepe cognoverim aegrotos graviter afflictos, qui melius habuerunt, dum in curru veherentur, quam domi in sedili conquiescentes.

Medicamenta ex argento vivo mixto cum purgantibus, vel cum opio, saepe data fuerunt rheumaticis: quam medendi rationem reprehendere nolo, quia video eam peritis medicis placere; laudare tamen non possum, quoniam mercurialia medicamenta, saepe tentata, nunquam non coniecerunt nonnullos in rheumatismum: unde etiam fit, ut morbum Venereum in quibusdam corporibus semper sequatur rheumatismus; quem scilicet argentum vivum alterius causa adhibitum invexit.

Cortex Peruvianus, gummi guaiaci, pulvis

Portlandicus, remedia ex antimonio, nitrum cum sale volatili mixtum, trifolium paludosum in pulverem tritum, vel aqua in quam id immissum est, item herbae aliae amarae, existimata sunt vi propria valere contra rheumatismum. Verum haec omnia censenda sunt, tanquam quae candidatorum partes sustinent, nondum in numero remediorum efficacium reponuntur. Sydenhamus opio uti prohibet in hoc affectu; pace tamen tanti medici dixerim dolores sic impune leniri, et somnum tuto invitari. Praeterea, meo iudicio, opium non tantummodo importuni mali praesidium est, sed multum confert ad ipsum morbum tollendum. Vires autem eius antirrheumaticae, cum in sudoribus eliciendis poni non videntur, aequae valebunt in simplici medicamento, ac ubi in Doveri pulvere adhibetur, vel mixtum cum antimonialibus.

Dolores coxarum saepe initium habent ab inflammatione, aut exulceratione vicini articuli: quod vitium prorsus diversum est a rheumatismo*.

CAP. LXXX.

De Semine Virili.

Qui Venereis voluptatibus praeter modum dediti sunt, poenas dant huius intemperantiae haud mediocri languore corporis animique afflicti.

* Vide supra cap. 21.

Semen his solet nimis promte elabi, interdum etiam sine sensu, et noctu, et interdium. Lavatio frigida aliquantulum prodest. Praecipuum autem huius affectus praesidium est vita casta, quae longe fugit omnem occasionem libidinis inflammandae: huic remedio qui fidunt, rarissime spe sua destituentur. Memini duos mihi narrasse semen suum fuisse coloris fusci; quod forsitan factum est ex venula quadam rupta. Qualiscunque autem fuerit causa, hic color diutule perstitit, illaesa horum virorum valetudine.

C A P. LXXXI.

De Singultu.

Singultus et longis et acutis morbis aliquando accedit. Interdum praecessit accessiones epilepticas, et cum paralyti simul factus est; raro etiam abest ab hepate scirrroso, et nonnunquam reperitur in ictero simplice, in quo ductus biliferi impediuntur, quanquam hepar ipsum integrum est. Morbi etiam ventriculi et viscerum solent accessere hoc malum, sive oriantur ab herniis, scirrhis et ulceribus, sive a medicamentis acerbis et exedentibus, sive a venenis. Singultus ex omnibus his causis interdum factus est; et permansit non solum plures menses, sed etiam aliquot annos, modo assiduus, modo spatiis incertis interpositis. Unus et alter fatigati sunt hoc incommodo multos menses sine quibusvis aliis adversae valetudinis signis.

In morbis acutis singultus saepe indicat febrē haud levem esse, neque prorsus vacare periculo. Accessit ipso primo morbi die, et duravit septem omnino dies, nimirum quamdiu aegrotus vixit, omnia consueta remedia vincens. Alius minus vehementer febricitans, qui tamen morbo tandem succubuit, perrexit singultire totos viginti dies.

Sanatio huius mali saepe non expectanda est, nisi sanato morbo a quo pendet. Mixtura moschata ante alia valere existimatur ad coërcendum hunc affectum: opium vero remedium est multo efficacius.

C A P. LXXXII.

De Siti.

Sitis insedabilis, non secus ac hydrops, et diabetes, quibus saepe accedit, vix ipsa morbus dicenda est, tamen raro deest inter signa morborum periculosorum, aut immedicabilium, quibus viscera abdominis urgentur. Morbus vero, qui etiam hominem tandem occidit, interdum tam lente crescit, ut aeger non nisi triennio post occumbat; et toto hoc tempore peius multatur siti, quam aut febre, aut difficultate spirandi, aut macie, aut debilitate, quae in plerisque simul fiunt.

Est itaque metuendum hoc malum, neque tamen semper mortiferum. Etenim morbus, a quo pendet, quanquam saepissime omnia medi-

camenta vincat, tamen interdum solvitur, et aeger assurgit. Verum ubi vitium est insanabile, hoc quoque malum, sicut alia ab eodem fonte oriunda, minui quidem et leniri potest, vix autem ex toto summoverti. Sitis visa est augeri in iis qui poculis indulgent, et aliquantum levari momento salis nitri linguae imposito.

C A P. LXXXIII.

De Spasmo, sive Distentione Nervorum.

Nervorum distentiones, sive convulsiones, et spasmi, fiunt ubi artus moventur et agitantur sine voluntate, et muscoli, qui animi imperio subiici debent, ultro sese contrahunt. Musculos omnes exteriores distentionibus obnoxios esse cernimus; et verisimile est idem obtinere in musculis qui intus sunt. Huiusmodi morbidae musculorum actiones interdum rumpunt exiguam venam aut arteriam, sic ut sanguis exprimatur, cutemque inficiat colore livido, qualis conspicitur in collisis.

Distentiones, et membrorum motus sine voluntate, familiares sunt in arthritide, et affectu hysterico: saepe etiam praecedunt paralysin, aut cum illa simul fiunt; et sunt magna pars malorum quae secum ferunt epilepsia, et chorea Sancti Viti. Causae horum motuum inordinatorum sitae esse videntur nunc in nervis partis affectae, nunc in cerebro, vel medulla spinali. Distentio, quae chorda penis dicitur, praecipue nascitur, ubi virus acre morbi Venerei nervos penis irritat; tamen

aliae quoque horum nervorum offensae idem malum inferre possunt; etenim duos homines curavi chorda penis occupatos, qui ab omni labe Venerea liberi erant. Assidua iactatio brachii et cruris sinistri, initium duxit ex corpore purulento in quod dextra pars cerebri conversa erat. Huiusmodi exempla multa sunt, in quibus modo pars ipsa, modo origo nervorum in cerebro, aut medulla spinali, morbo, aut vi laesa fuit.

Quidam, postquam a febre periculosa aegre convalesceret, solebat a somno identidem excitari distentionibus crurum vehementibus. At biduo triduove priusquam illae accederent, assurgebat circa mediam tibiam tumor exiguus mollis ad pisi magnitudinem, qui certissimo semper indicio fuit distentionis mox invasurae.

Exciso testiculo scirrhuso, sexto die accessit difficultas quaedam devorandi, seu potius sensus suffocationis; biduo postea maxilla facta est immobilis; et aeger brevi periit. Idem fere malum vidi in foemina hysterica, quamvis nulla esset exulceratio, et nullum vulnus. Haec aegra extincta est decimo morbi die, opio et balneo incassum tentatis.

In aetate puerili non tantummodo febres continuatae, sed saepe etiam intermittentes, faciunt caput ad alterum humerum inclinari. Quanquam non raro mihi occurrerit huiusmodi capitis inclinatio, nunquam novi eam permanere febre finita. In quibusdam vetulis, quae caeteroquin recte vale-

bant, caput sua sponte voluta fuit ita, ut facies ad humerum spectaret. Hoc in aliis fit ad laevum, in aliis ad dextrum humerum; et diu plerumque perseverat. Vis autem, quae trahit faciem, adeo lenis est, ut facillime superari possit. Itaque caput, dum in pulvinar reponitur, fit rectum.

Febres in insulis Americanis, ut fama refert, mire perturbant cerebri officia, et excitant istos terribiles visu spasmos, qui dicuntur emprosthotonus, et opisthotonus. Hi rarissimi sunt in Anglia; neque ausim dicere febres, quas ipse vidi, multum valuisse aut ad gignendas, aut ad augendas distentiones. Etenim si alii post ancipites febres distentionibus occupati fuerint; alii tamen hoc ipso tempore ab illis praeter consuetudinem liberi fuerunt.

Somnus distentionibus amicus est, ut et omnibus malis quae ex nervorum affectibus oriuntur. Itaque hae quoque noctu praecipue molestae sunt. Alios invadunt in somnum labentes, alios expergiscentes, multos etiam dormientes excitant. Potus acidi nonnullis visi sunt distentiones intulisse.

Distentiones leves solvuntur mutando membri situm. Nonnullis praesidio fuit spiritus vini subtilissimus suris infricatus. Item tincturae opii guttae quinque cum tincturae asae foetidae guttis quadraginta hora somni sumtae, summoventur distentiones quae singulis noctibus redire consueverant diutius. Interdum accedente podagra distentiones existimatae sunt aliquantum conquiescere:

multo saepius ex illa novas vires acquisiverunt. Manus mulieris, quae multos menses fuerat distentione clausa, et nulla vi aperiri potuit, digitis adeo fortiter compressis, ut ungues in volam manus penetravissent, in balneo protinus soluta est. Eiusdem quoque mulieris corpus cum simili modo fuerat incurvatum, eodem auxilio in erectum situm restitutum est. Balnea Bathonica nescio an solo calore aegris ibi lavantibus opitulantur; etenim nihil videtur interesse, in has aquas, an in alias quascunque aequae tepidas descendant. Lavatio frigida in his morbis inutilis fuit.

CAP. LXXXIV.

De Sputis cruentis,

Sputa cruenta, ubi sanguis e pulmonibus fertur, et tussiendo eiicitur, non iniuste terrent. At cura opus est, ut ab illo morbo discernatur, in quo cruor sine tusse a stomacho vomitur, vel e naribus in fauces destillat. Impuberes raro occupantur hoc malo. Etiam qui tabidis parentibus nati sunt, et ipsi tabe pereunt ante vigesimum aetatis annum, saepe liberi sunt ab hoc, et quolibet alio signo phthiseos pulmonis, usque ad pubertatem. A pubertate autem usque ad senectutem, nullus est annus, quo sputum cruentum non incidit.

Periculum eo maius erit, quo plura et graviora tabis signa accesserint, et quo aeger minus aetate provector sit. Sputa cruenta interdum fiunt

ssola, sine quibusvis aliis adversae valetudinis signis; neque maiorem conatum postulant, quam pituita, quae facillime exscreatur. Et fit aliquando sicut sanguis paucus exeat e trachea, vel pulmonibus, ubi hae partes sunt satis sanae; et proinde periculum non maius est, quam si ferretur e venis haemorrhoidalibus, vel e naribus, praesertim si hoc fiat in senioribus. Novi septuagenarium secundae valetudinis, qui per annos quinquaginta raro biennium liber fuit a sputo cruento. Alii quoque per eundem fere spatium eum morbum subinde experti sunt. Peripneumonici, morbo iam inclinato, mucum cruentum exscreare consueverunt, et tamen convalescunt sine ullo tussis, aut cuiusvis iniuriae vestigio. Ex his nonnulli, quorum morbus diutius traxit, et qui conflictati sunt cum tusse, et respirandi difficultate, et macie, convalescerunt tamen, et multos annos integri vixerunt. Gravia vulnere sanorum hominum pulmonibus inflicta fuerunt, quae neque mors, nec tabes secuta est: etsi tenuis pulmonum fabrica, et ingens vasorum sanguiferorum numerus, tum motus eorum assiduus, et sedes, ad quam pertinere remedia non possunt, metum incuterent, ne largior sanguinis profusio nulla arte esset medicabilis. Credibile tamen est huiusmodi vulnere consanuisse*; quo-

* Vide *Transactions of a Society for the Improvement of Medical and Chirurgical Knowledge*, vol. II. p. 169. Corpus incisum est, in quo vulnus pulmonis glutinatum erat. E.

niam per annos quadraginta sanguis non rediit. Illud etiam memorabile est, quod inter quamplurimos, quos vidi sanguinem exspuentes, unus tantummodo fuit, qui ingente et repetita profusione exhaustus periisse videbatur. Quidam superstes fuit biennium, et forsitan diutius, qui exscreaverat libram sanguinis quotidie per mensem integrum. Non modo pulmonis motus naturalis fertur sine notabili sanguinis augmento, sed etiam vomitus in nave assiduus per sesquimensem non omnino exasperavit hoc malum.

Quae iam dicta sunt, non sinunt omnes hos aegros de salute sua desperare. Verum non est dissimulandum sputa cruenta plerumque desinere in tabem brevi mortiferam; vel saltem inferre tussem et spirandi difficultatem, quae singulis hiemibus in peius vertuntur.

Quantum intelligo ex iis, quae de hoc morbo annotavi, nihil singulare mihi obvenit, quod usitatae medendi rationis auctoritatem vel confirmet, vel levet. Constat abstinendum esse ab omni motu vehementiore, et calore, ideoque vitanda esse vinum, fercula lautiora, conclave calidum, alvum nimis astrictam, et qualemcunque vocis, aut virium contentionem. Iuvat subinde sorbere infusum rosae; et interdum opus erit tinctura opii. Si tantum tribuam opinioni populari, ut non repugnem quo minus exiguus sanguis bis aut ter mittatur, ubi morbus non fuerit gravis; attamen summe cavendum esse censeo a larga et crebra san-

guinis detractone, quae cum morbo conspirabit ad aegrotum exhauriendum.

CAP. LXXXV.

De Steatmate.

Tumores steatomatosi, qui magnitudine sua deformes et incommodi sunt, tuto exciuntur, et vix aliam admittunt curationem. Interdum sponte sua suppurati consumuntur.

Duo pueri, alter quatuor, alter octo annos natus, ubique per corpus universum ferebant tumores, alios nucis parvae, alios nucis moschatae magnitudine, qui ad steatomata referendi videbantur. In altero ex his pueris cibi cupiditas erat naturali maior: ambo erant tenuis, seu potius nullius valetudinis, et indies infirmiores facti, brevi perierunt.

Tumores molles ad magnitudinem pisi, aut paulo grandiores, et sine dolore, nunc in brachiis fuerunt, alias in malleolis, cubitis, et genibus, non sine suspitione labis Venereae. Vidi huiusmodi tumores in brachiis, qui post sex annos recesserunt; in aliis autem decem annos perseverarunt.

CAP. LXXXVI.

De Stranguria.

Stranguria, sive crebra et urgens cupiditas urinae, cum summo dolore, interdum fit ex gravitate, saepe ex morbis uteri, prostatae, aut vesicae; initium quoque ducit ex stercoribus duris

rectum intestinum implentibus, et ab iniuriis urethrae factis a recentibus, vel crebris, vel male curatis gonorrhoeis.

Quinetiam nonnulli cibi ortum dederunt huic malo, et quaedam medicamenta; cuius generis sunt piper, semen sinapios, radix raphani rustici, et alia acria quae e terra gignuntur, item vina aspera. Kali acetati drachmae sex excitarunt hunc dolorem, quod fere semper fecit drachma olei terebinthinae rectificati. Omnes norunt cantharides hac facultate donatas esse, non solum intus sumtas, sed etiam ubi extrinsecus imponuntur. Quae quidem res, sicut aliae non paucae, documento est, quam parum cognitam habemus corporis animalis naturam: prorsus enim nescimus quo pacto fiat, ut cantharides viam sibi faciant ad vesicam per tot canales, et quidem tam tenues, sine minimo eorum detrimento, quanquam vesica ipsa miserabiliter crucietur, lacereturque; quemadmodum ex emplastro cantharidis nimis saepe fieri experimur. Neque minus mirum videtur, uno emplastro imposito stranguriam gravem fuisse excitatam; postea vero in eodem homine, et in eadem agrotatione, quinque simul admoveri potuisse impune. Quinetiam postquam cutis exulceratio per cantharides septem annos servata fuerat sine difficultate urinae, tanta subito stranguria orta est, ut non nisi sanatione exulcerationis potuerit leniri.

Ita comparata sunt nonnullorum hominum

corpora, ut levissima de causa incidant in stranguriam. Emplastrum cantharidis per diem unum et alterum cuti admotum excitavit stranguriam quae multos menses perseverabat esse molesta. Alii per totam aetatem ab infantibus saepe hoc malo cruciati fuerunt, tum praecipue quoties aegrotaverint, quanquam neque cantharides, neque alia quaelibet manifesta huius doloris causa fuerit. Hoc vitium familiare est utrique sexui in senectute, et non immerito forsitan in malis arthriticis numeratum fuit.

Adversus stranguriam, ut mihi videtur, parum utilia sunt quae intus sumuntur. Haud valde negaverim oleum, et gummi Arabicum, aliquantulum iuvare; camphora autem, pariter ac alia resinosa, aptior est ad eam gignendam, quam ad tollendam. Uvae ursi vires ad hunc affectum incertae sunt; neque tamen diffitendum est hanc herbam quodammodo afficere posse istas corporis partes, quae urinam excernunt; etenim cum saepe data esset cuidam calculoso, urinam eius semper infecit colore viridi. Urinae difficultatem a Venereis malis ortam candelae in urethram immissae multum levant potius, quam tollunt. Oleum in urethram infusum, vapor aquae calidae naturalibus exceptus, fomenta tepida, et emollientia perinaeo et pubi admota, saepe utilia fuerunt ad mitigandum hunc dolorem. Optimum vero remedium est, aquae tepidae uncias sex cum tincturae opii guttis viginti, vel, si opus sit, sex-

aginta, in alvum infundere; quod exoptatissimum praebet solatium in affectibus, qui licet sint insanabiles, levare tamen ad breve quoddam tempus non recusant.

C A P. LXXXVII.

De Struma.

Iste corporis habitus appellatur strumosus, in quo glandulae lymphaticae tument cum exiguo, vel nullo doloris sensu. Hoc fit saepissime in collo, interdum in axillis, rarius in inguine. Glandulae quoque mesenterii eidem vitio opportunae sunt, et fortasse omnes aliae huius generis glandulae quae intus in corpore sitae sunt. In his aegris labra etiam, et nares solent tumere, et palpebrae saepe inflammantur, et exulcerantur. Quibus malis interdum accedunt cutis vitia, et cursus puris exauribus. Huc quoque referendae sunt istiusmodi tonsillae quae diutius tument cum quadam devorandi molestia, vel quae subinde inflammantur ad breve tempus non sine febre.

Aetas puerilis maiorem in modum opportuna est affectibus strumosis, tum ii praecipue qui sunt imbecilliores, et quorum cutis est coloris candidioris ac venusti. Exactis annis pubertatis, tumores glandularum, et palpebrarum inflammationes minui incipiunt, et in media aetate saepe prorsus finiuntur. In nonnullis autem haec vitia relictis partibus exterioribus intus vertuntur, et pulmonem invadentia tabi insanabili ortum dant.

Tumores glandularum exteriores, et inflammatio-
 nes, praecipue quidem dominantur in pueros, non
 tamen in illos solos; etenim vidi circiter decem
 homines valetudinis, ut videbatur, secundae, in
 quibus glandulae lymphaticae non nisi post trige-
 simum aetatis annum intumescere coeperunt; in
 uno etiam et altero iam fere sexagenario tumor
 primum conspectus est. Origo huius mali in illis,
 qui bonam aetatis partem sani egerunt, tribuenda
 videtur mutationi victus in minus salutarem. Aqua
 impura, ac saponis impatiens, unum saltem ex
 his adultis in strumam coniecisse iure censebatur.
 Hic enim vir plus triginta annos vixerat integer
 ab omni labe strumosa, cuius signa tum demum
 venerunt in conspectum, cum huiusmodi aquam
 paucos annos bibisset. Glandulae vero lymphati-
 cae in collo et axilla pergebant tumere, et inter-
 dum suppurabant, quamdiu his aquis utebatur:
 verum postquam puriorem bibere coeperat, tumo-
 res paulatim recedentes, tandem omnes consumti
 sunt; neque post triginta annos redierant *. Gland-
 ulae thyroidis tumor frequens est in quibusdam
 Angliae locis, quem equidem aquis insalubribus

* Incolae cuiusdam urbis Gallicae (Rheims), dum aquis pu-
 tealibus utebantur, adeo afflicti erant malis strumosis, ut
 nosocomium haberent solis his aegris destinatum: verum
 aqua e fluvio vicino ad urbem deducta in usum incola-
 rum, numerus sic aegrotantium minui coepit, et post tri-
 ginta annos dimidio minor factus est. *Soc. Reg. Med.*
Paris, vol. II., Hist. p. 280.

deberi crediderim. Alpes eiusmodi tumoribus infames sunt. Errant autem longe, mea quidem sententia, qui tumidum Alpium guttur nivis imputant; etenim vix aliud praesentius huius vitii remedium excogitari possit, quam potus aquae nivalis, eximiae scilicet puritatis.

Praeter illam strumae speciem quae continetur in modo memoratis glandularum tumoribus, alia est quae incipit in artubus ab exiguo tumore, qui interdum biennium permansit, priusquam coeperit exulcerari. Virus autem huius ulceris in quibusdam aegris adeo acre est et exedens, ut erosio cartilaginibus, et ossibus carie corruptis, membrana fiant inutilia, vel etiam, dissolutis articulorum nexibus, digiti pedum manuumque excidant. Ad hanc strumae speciem pertinere videtur malum illud puerile, quod articulo femoris superiori insidet, et tandem insanabili ulcero facto, lenta tabe aegrum consumit. Inferior quoque femoris articulus, ubi cum tibia committitur, non dissimili vitio interdum laborat; quod multo diutius trahere consuevit, et non raro manet usque ad senectutem: aeger interea, genu tumefacto, et interdum dolente, aliquantulum claudicat, et subinde male habet; licet non paucae intermissiones sint, in quibus satis commode valet. Utrique affectui saepe accedunt signa strumosi habitus consueta.

Contigit interdum mala strumosa sequi morbillos et variolas; unde nonnulli suspicati sunt hos morbos

morbos nescio quam noxam corpori imprimere, quae neglecta tandem adolescit in strumam. ~~Haec~~ ^{Haec} opinio-
nem usus mihi satis incertam reliquit; quam tamen aegroti, et eorum propinqui eo avi-
dus amplectuntur, quia malunt existimare hoc
vitium fuisse adventitium, quam innatum, et
haereditarium.

Struma et lues Venerea nonnunquam eundem
hominem simul occupant: quod ubi fit, altera al-
terius nocendi vim plurimum auget.

Tumores glandularum lymphaticarum in col-
lo et axillis manserunt viginti annos immutati,
nisi quod aliquantulum grandiores facti sunt, quo-
ties frigus fuisset collectum. Attamen hoc rarum
est. Saepius, vel paulatim minuti, modo post
aliquot menses, modo post paucos annos, finiun-
tur; vel inflammantur, et suppurant. Tumores
grandiores, priusquam se subducant, fatiscunt,
et in complura tubercula parva resolvuntur, cum
levi prurigine. Tumores minores primum mol-
lescunt, dein subsidunt, et in statum naturalem
revertuntur. Exempla horum omnium quotidie
occurrunt. Quod si glandulae tumefactae coepe-
rint rubere et inflammari, longe abest ut cito in
bonum pus concoquantur: lentissime enim, et im-
perfecte suppurant, atque ita tabescentes tandem
consanescunt. Has glandularum exulcerationes
nunquam vidi fieri carcinomata in puerili aetate,
et non nisi bis terve in adulta.

Nullus, ut mihi videtur, locus est cataplas-

matibus, emplastris, aut vestimento tepidiori, ubi glandulae strumosae nondum ruptae sunt. Dolor enim multo levior est, quam ut tale auxilium requirat; et parum constat iis inesse vim aliquam tumores discutiendi. Quod si quis calorem, et remedia extrinsecus adhibeat eo consilio, ut pus moveat; nae ille id molitur efficere, quod ne fieret, summis viribus contendere deberet: neque enim temere reperies magis infaustum huius morbi exitum. Fit tamen aliquando ut glandulae vitiosae sponte sua spectent ad suppurationem, quam nullo modo vitare licet: sub quo casu res tota naturae permittenda est, quae sine ferro, vel ustione, ulcus rite aperiet, et, modo lenissimo quovis emplastro contegatur, ad sanitatem perducet.

Inflammationes palpebrarum et oculorum strumosae interdum sanguinis missionem postulant, quem per hirudines detrahare convenientissimum est; quatuor, vel plures, temporibus sunt admovendae quarto, vel septimo quoque die, in mensem integrum, vel diutius. Plurima collyria celebrantur, et veterum, et recentiorum medicorum scriptis, quae omnia spem meam plerumque destituerunt. Optimum autem remedium, ut mihi videtur, ad levandum dolorem, et ad inflammationem mitigandam, est cataplasma ex interiore parte panis, vel ex seminibus lini contritis, duplici linteo inclusum, et super oculos impositum. Neminem poenituit margines palpebrarum exulce-

ratarum adipe stillo emollito singulis noctibus inungere; quod nisi fiat, palpebrae sibi invicem noctu agglutinabuntur, et vi quadam mane diducendae erunt, cum doloris et ulcerationis incremento.

Medicamenta ex argento vivo sunt aliena in morbis strumosis: et nescio an hi praecipue intendantur a lue Venerea, propter remedia ad huius curationem necessaria. Lavatio in mari, potus aquae marinae, succus spissatus cicutae, cortex Peruvianus vel per se, vel ex aquis purgantibus datus, spongia usta, sal sodae, fonticuli, et aliae exulcerationes diu servatae, sunt praecipua strumosi habitus praesidia; quae quidem omnia usus docuit tuta esse, et interdum utilia. Quod si cui desit ista animi constantia, qua opus est ad diutissime perseverandum in usu horum remediorum, ille non male sibi consulet, dum summae in cibis temperantiae unice confidat, et nullo alio potu utatur praeter aquam purissimam, qualis est quam praebent fontes collis Malvernensis.

C A P. LXXXVIII.

De Tenesmo.

Tenesmus, seu frequens desidendi cupiditas, dum interea parum aut nihil deicitur, ex variis causis oritur: nam primo illum excitant stercore dura intestinum rectum implentia, et non nisi aliena ope expellenda: deinde scirrhus sive uteri, seu intestini recti, seu prostatae: tum stranguria,

seu fiat a calculo vesicae, sive a cantharidibus: denique debilitas musculorum ani, vel sensus eorum nimis acer, qui interdum accedit colicae Saturninae, aut intestino prolapso, et non raro sequitur apoplexiam, et partum difficilem, et dysenteriam.

Tenesmus exasperatur stando, aut ambulando; et levatur sedendo. Tinctura opii in alvum infusa, et plerumque praesentissimum huius mali remedium, vel saltem allevamentum; nam ubi ab alio malo pendet, finiri non potest priusquam ille fuerit sanatus.

C A P. LXXXIX.

De Testiculorum Vitiis.

Testiculi tument non solum ex ictu, et malis Venereis, sed interdum quoque ex febre intermittente, quacum tumor simul accedit, deceditque, et febre sanata protinus finitur. Hoc plus vice simplici contigisse memini. Idem in nonnullis intulit gravedo ex frigore collecto. Prostata scirrho laborans testiculos tumefecit, atque etiam calculi, et alii renum affectus. Interdum tumor occupavit testiculum sine quavis manifesta causa, et post paucos menses sponte sua desedit: in aliis perrexit augeri per aliquot annos, et tandem in scirrhum desivit, qui modo annis viginti, modo multo citius, carcinomate facto, hominem occidit. In testiculo scirrroso ulcus fistulosum interdum factum fuit, quod aegrum diu fatigavit.

Medicamentis purgantibus lenioribus locus

nonnunquam esse potest; validiora sunt aliena. Ubi dolor est vehementior, cataplasmata adhibere oportet. Ubicunque vel dolor, vel tumor est, scrotum sacco idoneo sustineri debet. Unicum remedium est testiculum scirrhosum excidere, modo chorda spermatica integra sit; sin haec quoque malo eodem vitiata fuerit, nullus remedio locus est. Hydrocele, ut habeat aliquid incommodi, periculo tamen vacat; sed quoties opus fuerit, ferrum tuto adhiberi potest, et fere sine dolore. Chirurghi interdum utuntur curatione, quae prohibet ne aqua iterum renascatur; de quo eorum libri sunt consulendi.

CAP. XC.

De Torpore.

Torporem dicimus, ubi sensus tactus hebes est et obscurus. Nulla quidem corporis humani pars est, quae non interdum torpet; maxime autem artus huic casui sunt opportuni. Quanquam innumeri sunt torporis gradus, rarissime tamen fit, ut tactus ex toto amittatur, et penitus pereat, etiam in paralyticis deploratis.

Torpor saepe oritur ex causis omnino levibus, velut ex situ membri incommodo, et mox discutitur, nullum periculum intendens: nonnunquam initium ducit ab istis nervorum vitiis, quae valetudinem subruunt; et praecessit distentiones nervorum, paralytin, et apoplexiam. Senectus videtur subiectior huic affectui, tam in viris, quam

in sexu debiliore: in iuventute foeminae cum eo conflictantur saepius, quam mares. Noctu praecipue membra solent torpere, tum quia per quietem diutius manent in eodem situ, tum quia somnus favet omnibus illis malis quae ad nervos pertinent.

Torpores familiares sunt valetudine conquassata, et illis, qui a parentibus paralyticis nati sunt. Modo antecesserunt, modo secuti sunt paralyseos et apoplexias, interdum quoque cum his simul facti sunt; et iure numerantur in signis horum morborum. Cumulo malorum hypochondriacorum et hystericarum vulgo accedit artuum torpor, qui et in his, et in aliis permansit non solum multos menses, sed etiam annos non paucos, et tandem illaesa valetudine se subduxit. Sinistra pars corporis in quodam torpuit quinque et viginti annos.

Quaenam sit natura, et qualis futurus sit exitus torporis, optime intelligitur ex eius sociis. Si enim cum aliis malis paralyticis accesserit, et non exiguam corporis partem stupefecerit, maxime in iis qui parentibus nati sunt paralyticis, subest procul dubio periculum, et ad paralyseos praesidia sine mora confugiendum est. Ubi autem minima quaedam pars laboret, et vel nulla alia mala sint, vel ea tantum, quae hypochondriacorum et hystericarum propria sunt; praestabilius erit negligere hunc affectum, quam medicinam adhibere. Si quis tamen, nescio quid metuens, nequeat sibi temperare a medicina, illum scire oportet emplastra quae exedunt, et balnea, ali-

quoties profuisse; lavationem frigidam, et sanguinis missionem fuisse alienas; arthritidem esse inutilem; vires autem electricitatis nondum usu satis esse compertas.

CAP. XCI.

De Tremore.

Caput, et manus, interdum tremunt, et speciem aliquam paralyseos prae se ferunt; usu autem comperimus huiusmodi tremores maiorem vitae partem perseverasse sine quolibet alio morbo subsequente. Quamobrem, si forte aliquantulum spectent ad paralytin, procul tamen ab ea distant: et profecto incommodi plus est, quam periculi. Hypochondriaci saepe hoc vitium experiuntur; ebriosi ab eo raro liberi sunt: idem quoque in senectutis malis frequentissimum est.

Hic, perinde ac alii nervorum affectus, mane post somnum consuevit molestissimus esse; et quolibet mentis perturbatione augetur. Thea herba, baccaeque coffaeae faciunt nonnullorum manus tremere; sed hoc nequaquam est perpetuum. Cognovi virum, qui aquam ex his baccis biberat fere quotidie per quadraginta annos, cuius manus etiam in ultima senectute ne minime tremuerunt. Quamplurimis aliis hae potiones impune bibuntur: quod ni ita esset, Sinenses, Turcaeque, omnes ad hunc modum laborare deberent. Verum historia horum populorum non ostendit artus trementes esse morbum istarum regionum proprium.

Quae paralyticis, et hypochondriacis affectibus medentur, eadem, si qua postulantur, tremoribus quoque convenient.

C A P. X C I I.

De Tusse.

Tussis modo ortum suum habuit a nimio vel nimis acri humore destillante in tracheam, sine vitio pulmonis; modo a morbis ventriculi, aut intestinorum, quales sunt lumbrici, et glandularum mesentericarum tumores; quod nos docuit cadaverum incisio. Non raro tamen fit a pulmonis inflammatione, scirrho aut ulceratione: atque ea est interdum pulmonis conditio, ut morbus totum intra breve spatium corripiat, corpusque immedicabili tabe celeriter consumat: in aliis vitia pulmonis videntur in eodem fere statu permanere, viginti, vel triginta, vel etiam quadraginta annos; interea corpus impletur, et aeger satis commodae valetudinis est, vix aliud malum querens praeter tussim. In aliis morbus pulmonis serpit quidem, sed tardissime; et quanquam tussis singulis hiemibus ab usque iuventute fiat paulo molestior, pulmo tamen non adeo laborat, ut gravis spirandi difficultas accedat, nisi matura iam senectute. Sed et pulmonis ulcus, ut coniectare fas erat ex humore purulento, et cruore exscreatis, multos annos intra veteres terminos sese continuit, vel eosdem lentissime superavit. Interdum ulcus tunica inclusum fuit, quam tandem aeger extussit

non sine magna contentione, et strangulationis periculo; quo facto, pulmo videtur consanuisse.

Nervorum distentiones, et perturbationes hystericae, quemadmodum caeteros omnes corporis musculos exercent, sic quoque musculos spirandi; unde fit tussis vi sua molestissima; pulmo interea non magis violatur, quam aliae corporis partes, quae postquam gravissime fuerunt convulsae, vel statim, vel brevi, ad pristinum statum revertuntur. Huius generis tusses, ut et illae quae a destillatione nascuntur, vehementiores sunt, et magis sonorae, quam quae fiunt ex tabe, sive incipiente, seu deplorata. Idem dici potest de ista tusse, quae proficiscitur a corpore quovis duriore in tracheam delapso. Memini tussim saevam, et indomabilem menses aliquot ursisse hominem, in cuius tracheam particula ossis deciderat, qua tandem extussita, illa protinus conquievit.

Tussis nonnullos nunquam cessat occupare, quamdiu liberi sunt ab oculorum inflammatione, podagra, tinea, atque aliis vitiis cutis. In animo semper tenendum est, longas tusses haud procul abesse a periculo tabis, et proinde postulare victum refrigerantem, ne forte pars sana pulmonis vitiatae contagio corrumpatur. Haud defuerunt exempla eorum, quos tussis in annos viginti exercuerat, quique alios forsitan viginti annos perdurare potuissent satis commode valentes, nisi gravis quidam error in ratione victus, aut frigus

collectum, eos in phthisin praecipitaverat, et citam mortem intulerat. Saepe difficile dictu est, tussis phthisica sit, an levis, et nullius momenti. Pleraeque omnes tusses quodammodo spectant ad phthisin; in quam profecto nonnullae tam rapido gradu feruntur, ut exitus nemini dubius esse possit; aliae vero non paucae sunt, de quibus nemo medicus sine dubitatione pronuntiare potest, nisi antea sciverit aegrum vivendi ratione salutari semper usurum esse, et semper tutum fore a colligendo frigore, et a peripneumonia.

Venam incidere, et opium adhibere, pro ratione morbi, victu tenui uti, et ex alio in alium locum transire, optima praesidia sunt, vel ad tussim molestam leniendam, vel ad prohibendum, ne fiat periculosa.

C A P. XCIII.

De Tusse convulsiva.

Tussis convulsiva praecipue fit in aetate puerili, et est procul dubio contagiosa. Hic morbus diu trahit, saepe menses haud paucos manens; et quanquam interdum levis sit, et omni periculo vacet, interdum tamen occidit. Pituitae abundantia; vel vomitus, et vehementia accessionum, et intermissionum integritas, ipso initio hanc tussim ab aliis satis plerumque distinguunt: postea autem errori nullus est locus, cum tussis perseverat, donec aegri pene deficient, priusquam spiritum attrahere possint; quod cum inusitato quo-

dam sono fit, proprio huius tussis indicio, unde etiam nomen apud nonnullas gentes impositum est. In quodam puero tussis fuerat tres menses, priusquam hic sonus accessit. Prae vehementia tussis, saepe sanguis e naribus exprimitur, vultus nigrescit, et interdum oculis ea vis infertur, quae reddit eos semper in posterum imbecillos. Hic affectus raro eundem plus semel invadit; attamen curavi nonnullos, qui mihi fidem fecerunt se bis eo fuisse implicitos.

Senectus minus quidem opportuna est huic morbo, nec tamen prorsus segura. Vidi foeminam septuagenariam, et senem octogenarium hac tusse occupatos. Puer advenientem praesentit, et ad matrem, vel famulam, accurrit; at adulti, accessione victi, momento temporis, velut attoniti concidunt; illico vero resipiscunt; atque hoc est proprium huius affectus signum in adultis. Qui enim praeter solitum tussiat, et nuper versati fuerunt inter aliquos tusse convulsiva laborantes, siquidem morbo concidunt, nullum relinquunt locum dubitandi de natura aegrotationis. Aegri de quibus sermo est, maiorem in modum queruntur inflationes.

Usu didicimus mutationem coeli maxime valere ad vim morbi leniendam, et finem eius accelerandum. Ventriculus adeo laborat pituita, et inflatione, ut rheum purgando, et amara confirmando, non possint non esse utilia. Tussis convulsiva cognata est aliis nervorum distentioni-

bus, ideoque verisimile est opium mixtum cum moscho, lacte ammoniaco, et vino antimonii, contra eam profuturum. Nondum tamen eos horum medicamentorum effectus vidi, ut certum auxilium iis inesse confidam. Multa quidem ubique iactantur huius pestis remedia, ut fieri solet adversus morbos, quorum nulla certa remedia inventa sunt. De talibus auxiliis vetus illud nimis verum est, *ω φιλοι, εδεις φιλος.*

C A P. X C I V.

De Valetudine conquassata.

Morbi graves, et multae aliae causae, vires vitae labefactant, et valetudinem damno nunquam resarciendo mutant, quae ex illo quotidie it in peius. Valetudinis sic afflictæ et conquassatae haec fere signa sunt: pallor, facies modo tumidior, modo macie extenuata, sitis, difficultas spirandi, palpitationes cordis, inflationes, fastidium, nausæa, frequens cupiditas urinae, stercus et urina sine voluntate reddita, crurum tumores, dolores vagi, distentiones corporis, et virium amissio, lassitudo, prurigo cutis, tremores, torpores, febricula, languor, animae defectiones, veternus interdiu, vigilia noctu, mens obliviosior.

C A P. X C V.

De Variolis.

De summa variolas inoculandi utilitate, tum

de ratione curandi inoculatos, iam inter omnes medicos Britannos convenit; et nihil habeo quod addam illis, quae nuper tradita fuerunt de his rebus in multorum medicorum libris, qui in omnium manibus sunt. Scrupulus autem aliquis mihi restat de securitate eorum, in quibus pustulae vel nullae eruperint, vel nunquam rite maturuerint, licet in loco inoculato ulcus factum sit cutem erodens, et non nisi post multos dies sanatum. Vidi enim foeminam variolis numerosis occupatam, quae solito more suppuraverunt, et exaruerunt; quamvis mihi fidem fecit se ante annos decem fuisse inoculatam, et post quinque dies febricitasse cum quodam capitis dolore, quem secutae sunt pustulae paucae, cito quidem recedentes sine suppuratione; at pars inoculata alte exulcerata fuerat per decem dies, et dein lata cicatrice notata, quam ipse vidi.

Quae de bene multis aegrotis annotaveram, qui non fuerant inoculati, sed variolas fortuito contraxerant, ea omnia non in librum cum caeteris morbis, verum in chartas seorsim conieceram, quae fere omnes nescio quo casu interciderunt. Amisissis his, cogor abiicere consilium tradendi primo historiam variolarum usitatissimam, deinde varietates earum, et dissimilitudines. Paucae quae supersunt chartae praecepta sequentia suppeditarunt.

Multa me exempla docuerunt eos qui nunquam passi sunt variolae, tuto posse versari, at-

que etiam dormire cum infectis per duos tresve primos pustularum dies. Tandiu enim ab his aegrotis nihil videtur periculi esse. Mulier quaedam puerum lactabat biduum postquam variolae in cute ortae erant; deinde vero puer amotus est, et evasit incolumis: at ille certe infici poterat, quoniam sesquianno exacto in eum morbum incidit.

Parentibus aliquibus visum est, siquidem unus ex liberis in variolas incidisset, non amovere reliquos, sed sinere ut omnes una manerent in eadem domo, aut etiam in eodem cubiculo. At sexto plerumque die postquam morbus ad *ακμην* pervenerit, sani pueri coeperunt aegrotare; unde verisimile fit, hoc potissimum tempore variolas fieri contagiosas, atque idem spatium intercedere ante initium aegrotationis, ac fieri novimus in ple-risque inoculatis. Veruntamen aegrotandi principium longe magis incertum est in his, quam in illis qui inoculantur; quippe non omnes qui in eodem conclavi sunt, aequè obiiciuntur halitibus variolosis, aut contrectationi vestium aut linteorum. Memini binos pueros, qui cum altero variolis aegrotante conclusi fuerant, neque tamen hoc morbo, nisi post mensem, correpti sunt. Quotidianum est, ut ii qui, ut videtur, eodem tempore contagioni obiecti fuerint, multum diverso tempore incipiant aegrotare.

Dolorem lumborum acutum semper fere sequuntur periculosae variolae; et quo peior fuerit

dolor, eo morbus quoque periculosior est. Multo tutior est dolor inter scapulas: tutissimum vero, ubi nullus per totum dorsum dolor sentitur.

Vomitus vehementior ab ipsa morbi accessione usque ad exitum pustularum, haudquaquam praenuntiat mites variolas: quod si pustulis omnibus enatis vomitus perseveret, eventus morbi anceps erit, quanquam variolae non fuerint confluentes; quod in plus uno aegroto expertus sum.

Nervorum distentiones, dum pustulae parant exire, non raro antecedunt mitissimas variolas in pueris, et interdum, sed rarius, in adultis; ideoque non nisi inexpertos terrent.

Variolae vim aliquam inferunt canalibus sanguiferis, e quibus menstrua effunduntur; et cum morbus fuerit admodum periculosus, profluvium uterinum immodicum tempore alieno factum est biduum ante exitum pustularum, et perseveravit diutius. In nonnullis cursus sanguinis e naturalibus fuit ipso primo pustularum die. Verum haec sunt rariora. Maxime usitatum est in plerisque omnibus foeminis, ut sanguis ex utero tum ferri incipiat, cum pustulae omnes exierint, et ut fluat modo unum, modo quinque dies. Hoc profluvium, quanquam naturali copiosius, non videtur maturitati pustularum obfuisse, neque vires aegrotis subduxisse; ideoque nihil moliri oportet ad sanguinem suppressendum, etiamsi nobis suppeterent remedia, quae certo et tuto id efficere valerent.

Urina cruenta, quae iure numeratur in pessimis variolarum signis, accessit die quinto ab initio aegrotationis: pustulae interea vix eminuerunt super reliquam cutem, nisi leviter, et in paucissimis locis; in plerisque aliis corporis partibus cutem tantummodo notaverunt maculis purpureis, aut vibicibus. Venter in his aegrotis reddit cruenta; et ipsae lacrymae interdum fuerunt sanguine tinctae. Quod si cutis alicubi forte detrita sit, sanguis e vulnusclo multos dies exstillavit, et aegre cohiberi potuit. Huiusmodi aegri deplorati omnes, quotquot vidi, tertio vel quarto pustularum die decesserunt. Verum ubi omnia alia infausta signa abfuerunt, urina interdum fusca, vel nigra, impune reddita est, etiam in illis qui ab arena aut calculo liberi fuerunt. In variolis, quae inter bonas malasque mediae erant, urina quinto pustularum die nigra fuit, nec ad colorem naturalem, nisi post quatuor dies, rediit. In alio urina atra erat secundo die ab accessione morbi, et quod ex ea desidebat, pulverem atrum referebat. Ambo hi aegri ex morbo recreati sunt, sine quovis sinistro, aut insolito casu interveniente. Pustulae interdum vix diversae fuerunt ab iis quae in mediocribus variolis conspici solent; attamen earum interstitia notata fuerunt maculis rotundis purpureis, et tertio die ab exitu pustularum aegri extincti sunt.

Supra memoratum est virus variolosum propriam habere vim menstrua movendi; atque hinc fieri

fieri potest, quod gravidæ variolis correptæ septimo, vel octavo die ab initio pustularum plerumque abortum faciant, et intra biduum triduumve moriantur. Foetus sic elisos saepe contemplatus sum attentissime: cutis eorum fuit multum mutata, hic obscure rubra, illic purpurea, et in quibusdam locis color fuit pene naturalis: sed nunquam potui deprehendere vel minima vestigia pustularum variolosarum. Quasdam etiam gravidas curavi, quae variolas expertae sunt, et non fecerunt abortum, sed iusto tempore pepererunt: at neque in his infantibus ullas pustularum cicatrices vidi; quin a testibus fide dignis accepi eorum nonnullos variolis postea fuisse tentatos. In ciso adolescentulae cadavere, quae variolis confluentibus perierat, viscera, et partes corporis interiores attentis oculis perlustravi; nusquam vero reperienda erant vel minima variolarum indicia, licet corpus extrinsecus ubique illis contectum esset. At profecto foetus in utero matris vix differt ab aliis partibus interioribus; et siquidem haec nunquam fiant sedes variolarum, haud verisimile est eas in foetu deprehendi posse. Alii vero de hac re aliter sentiunt.

Difficultas spirandi accedens circiter quintum pustularum diem, haud multum spei locum relinquit; hi enim aegri plerumque morbo succumbunt. Haec interdum adeo gravis est, ut aegri nequeant iacere, et vix pauca verba loqui possint, antequam spiritus illis deficit.

Tumor faciei repente desidens, sic ut oculi aperiri queant; salivae cursus repressus; frequens urinae cupiditas, licet parum excernitur; corpus fere omnis mali odoris expers; et crebri horrores, sunt quidem indicia non mediocri periculi, quamvis non semper mortifera. Vesiculae aqua flava, sive sero plene, quales ab emplastro cantharidis fieri consueverunt, interdum inter pustulas oriuntur, et ostendunt morbum a regula tutarum variolarum aliquantum aberrantem, et forsitan periculo vicinum; hi tamen aegri saepe evadunt.

Inclinato iam morbo, cum pleraeque pustulae arefactae excidissent, bis vidi subnasci in volis manuum, et in plantis pedum, pustulas paucas aqua plenas, vacuas ab inflammatione, aut rubore, quae ad modum variolarum consuetum maturuerunt. In puero etiam quodam pustulae erant maiusculae, paucaeque, per quatuor dies, dein numerosae et parvae prodierunt, et puer aegre a morbo emersit. In alio puero raras pustulae principio ortae sunt; at mansit iactatio, et aeger male habuit; deinde primis exsiccatis aliae exierunt, et maturuerunt; post has etiam una atque altera eruperunt. Puer hic obiit, quanquam omnes pustulae, si simul corpus occupavissent, adeo paucae erant, ut neminem alium variolis occisum meminerim, qui non pluribus laborasset. Haec sunt sola exempla quae mihi observata sunt secundae messis, ut dicitur, variolarum.

Tres homines variolis aegrotantes vidi, qui

morbo iam adeo inclinato, ut propositum esset intra biduum carnem cibo adiacere, et dare medicamentum purgans, repente facti sunt tristes, et suspiciosi, et vix biduo exacto, insani prorsus et furibundi morte occubuerunt.

Salivae profluvium copiosissimum, quod in variolis confluentibus solet contingere, et maxime prodest, in nonnullis finito morbo impune perseveravit plures dies.

Lac mulieris, quae infantem lactabat, minui coepit prius paulo quam morbus ad summum pervenisset, et deinde prorsus defecit; interiectis vero paucis diebus, iterum ubertim fluxit.

In morbo quocunque spes salutis iure videtur augeri, si aeger ab omnibus aliis morbis liber sit, et firmi corporis habitus sit: tunc enim vires maxime vigeant, et nulla re impediuntur, quo minus totae incumbant in hunc unum affectum debellandum. Veruntamen variolae aliis etiam gravibus affectibus supervenientes, non ideo visae sunt peiores, neque vi nocendi maiore praeditae esse; neque aeger cum iis minus fortiter, aut minus feliciter conflictatus est. Variolae saepe accesserunt lue Venereae, et nihilo minus mites fuerunt; nec profecto ubi pestiferae fuerint, aeger visus est aut gravius solito affligi, aut periculosius aegrotare. Vidi quosdam variolis occupatos, cum iamiam tabe strumosa essent perituri, qui tamen mitem experti sunt morbum, et eum feliciter depulerunt; neque idcirco, quantum po-

tui iudicare, veteri suo morbo citius succubuerunt.

In urbem quandam, quo tempore febres intermittentes frequentissimae erant, accidit variolas invectas esse, multosque corripere qui febre intermittente laborabant. In his omnibus febris sponte sua conquievit, protinus ac variolae incidissent; at his finitis denuo reversa est. Alter horum morborum in alterum nullam aliam vim exercere visus est.

Paucissima certa morborum remedia hactenus humano generi tributa sunt. Inter plurimos alios, ad quos proprium remedium desideratur, variolae quoque adhuc destituuntur medicamento, quod privatim valeat adversus hanc pestem: quod igitur, si quid tale sit, posterorum vel fortunae, vel ingenio, acceptum referendum erit. Quidam multum sibi polliciti sunt a cortice Peruviano, antimonio, aut argento vivo. Verum usus docuit has spes fuisse fallaces, et vanas. Quamobrem ratio victus et curationis in variolis, haud diversa erit ab illa, quae omnium febrium communis est. Mala quaedam, et incommoda, quae subinde accedunt, iisdem auxiliis levanda sunt, viresque perinde nutriendae, ac in aliis febribus ardentibus. Illud autem admonere oportet, alvum astrictam non esse minus inutilem in variolosa, quam in alia quavis febre; quanquam contraria sententia olim vicerit, et vix adhuc satis explorata sit.

CAP. XCVI.

*De Variolis Pusillis; nos vocamus The
Chicken-Pox.*

Variolae pusillae in quibusdam oriuntur sine febre, aut ullo signo antecedente; in aliis fit levis horror, lassitudo, vigilia, dolores vagi, fastidium cibi, et quaedam febricula; rarius dolor dorsi, lumborumve, aut vomitus. Pustulae primae fere conspiciuntur in dorso.

In eodem aegro variae sunt magnitudinis: pleraeque habent eandem, ac variolae verae, quibus initio prorsus similes sunt; nonnullae his minores sunt. Nunquam eas valde numerosas vidi, nedum confluentes. Vix unquam numeravi ultra duodecim in facie, aut ultra ducentas in corpore universo.

Principio rubrae sunt; postridie in plerarumque apicibus exigua vesicula est, ad milii seminis magnitudinem, plena humore modo aquae simili, modo flavo, qui continetur inter cuticulam et cutem veram. In quibusdam pustulis plus humoris subest, qui interdum flavescit, et pus refert, adeo ut secundo, vel certe tertio die ab exitu pustularum, hae variolae videantur ad maturitatem pervenisse; et quae humor flavo maxime turgent, prorsus tales sunt, quales verae variolae die quinto vel sexto. Saepe fit, ut eodem die quo nata est haec vesicula, vel postridie, tenuis eius cuticula rumpatur, partim vestium attritu, partim scabendo (nam pruritus fere est), et crusta levis succedat:

reliqua autem pars pustulae subsidit, et nunquam, sicut in veris variolis, in pus mutatur. Proinde quinto pustularum die crusta tenuis plerasque ex his pustulis occupat. Paucae quaedam non ruptae humorem suum spissescere, et exarescere, sinunt. Cum vero hic humor non, quemadmodum in veris variolis, ex cute ipsa suppurata oriatur, sed, ut credibile est, ex vasis cutis serosis inter cuticulam cutemque effundatur; itaque non mirum est, si vel secundo die appareat, vel rupta cuticula tam cito in crustam desinat. Tum vero cicatrices nullae relinqui possunt, cum cutis ipsa non afficitur, nisi forte in una aut altera pustula, in quibus humor acrior factus ulcusculum excitaverit.

Per totum morbi spatium interdum vix ulla incommoda aegri patiuntur, si excipias languorem quendam virium et animorum, et cibi cupiditatem minorem, somnumque minus altum; quae omnia magna ex parte debentur commorationi in cubiculo.

Hic morbus mihi videtur prorsus alius a variolis veris. Qui variolas passi sunt, huic tamen opportuni sunt: qui autem semel experti sunt hunc morbum, ab eius contagione in posterum securi sunt: quanquam ab inexpertis facillime contrahitur. Filum linteum, humore variolarum pusillarum concocto madidum, insertum fuit vulnusculo facto in brachio cuiusdam qui olim hoc morbo laboraverat; et neque vulnusculum propterea tardius sanatum est, neque ullae prorsus venenati vulneris notae secutae sunt.

Mater duorum puerorum, qui variolis pusillis implicati erant, octavo vel nono die a maturitate pustularum, coepit eodem morbo aegrotare. Spatiumne igitur idem semper intercedit inter contagionem, et morbi initium?

Curatur hic morbus quiete animi et corporis, et abstinencia a carne, vinoque.

Verae variolae, cum paucae sunt, et distinctae, quales semper mihi visae sunt variolae pusillae, ab his discerni possunt tribus potissimum conditionibus. Nam primo, verae nunquam ante quartum diem exeunt: deinde, in earum apicibus nullus humor est secundo, tertiove die: nec denique crustae sunt quinto.

C A P. X C V I I.

De Ventriculi Morbis; et primo de Ardore et Acore.

Nulla corporis pars saepius laborat, quam ventriculus. Unus ex eius morbis, isque non minimus, est acor ad os assurgens: cui fere accedunt nausea, et vomitus, dolor seu potius angor, sensus gravitatis, cupiditas cibi modo naturali maior, modo nulla, inflatio, capitis dolor, pituita; denique qui hoc vitio tenentur, saepe expergiscuntur cum terrore.

Si chemicos audiamus, nihil videtur facilius, quam acidum corrigere et extinguere, cum promptus ad id aditus est, ita ut ei, quodcunque libitum fuerit, liceat adiicere. Verum stomachus vivus,

et vas inanimatum adeo inter se distant, ut quod chemici putant esse facillimum, medici interdum deprehendant fieri prorsus non posse. Unde evenit, ut quidam per annos viginti vexati fuerint acore ventriculi nullis remediis cedente. Aqua calcis, magnesia, pulvis e testis piscium, et sales alcalini, saepe votis aegrorum parum responderunt.

Lac, olus, pisces, pinguia omnia, et ventriculus cibo onustus, maxime si homo statim a plena mensa exercitetur, acido ventriculo parum conveniunt, et acorem augent. Potus acidi, praeter opinionem, non semper nocent his aegris; nonnunquam etiam auxilio sunt. Vomitus, et aqua Bathonica, aliis profuerunt, aliis fuerunt supervacua. Pulvis e testis piscium, et rhabarbarus, plerumque iuvant. Alvus astricta semper est aliena. Foemina, cuius ventriculus indomabili acore afficiebatur, omnigenis medicamentis tentatis, tandem his duobus contenta fuit; nempe singulis auroris sumsit testarum ostreorum in pulverem tenuissimum contritarum unciam, singulis autem vesperis vomitum movit per aquam tepidam, cuius congium partitis haustibus bibebat. His, quibus in multos annos usa est, acor aliquantum levatus est, et valetudo caeteroquin non fuit incommoda. Rhei etiam pauca grana adiecta sunt, quoties alvus coepit esse tardior.

Sensus ardoris iniucundus cum acore ventriculi fieri consuevit; et interdum molestus est, quanquam nullus fuerit acor. Remedia huius

mali sunt fere eadem, ac superioris. Saepe quoque haud minus sanatu difficile est. Simul interdum nascuntur singultus, ructus, et insolitus salivae cursus. Ardor ventriculi saepe fatigat gravidas, et non raro accedit arthritidi; neque icterus semper ab eo liber est. Haec molestia nonnullis per totam fere aetatem adhaesit. Idem homo invicem modo cutis vitia, modo ardorem stomachi expertus est. Foemina quaedam, dum ventrem ferret, gravissime conflictabatur cum hoc malo, adversus quod cum remedia consueta nihil profecissent, acidum vitriolicum tentatum est, et brevi illud sanavit.

§ 2. *De Dolore Ventriculi.*

Inflammationes, scirrhi, et carcinomata iecinoris, lienis, et pancreatis; dolores denique omnes siti inter pectus et umbilicum, pariter ad ventriculum referuntur; qui porro, praeter ista mala, quae sui propria sunt, saepe cum aliis multis corporis partibus simul dolet. Arthritis, et fortasse rheumatismus, vagi dolores artuum, et interdum qui uni loco diutius insederunt, ulcera etiam, et cutis vitia, saepe vel prima sua sede relicta in ventriculum incubuerunt, vel mala sua cum ventriculo communicarunt. Vertigo, et capitis dolores, saepe quidem fuerunt causae, saepius forsitan effectus ventriculi minus recte valentis. Uteri affectus fere omnes ventriculo nocent; qui proinde raro vacat vel dolore, vel fastidio, ubi

menstrua non bene respondent. Affectus hysterici et hypochondriaci, graviores animi perturbationes, et lumbrici, etiam illi qui solum in crassioribus intestinis reperiuntur, ventriculum in societatem malorum fere semper assumunt.

Quod si nulla ex causis praedictis in culpa fuerit, et dolor non oriatur a veneno, neque a cibo minus salutari; si interdum sit fere impatibilis, at multas habeat nec breves intermissiones, si denique valetudo caeteroquin bona sit; illic iustissima erit suspicio calculi in bilis canalibus haerentis. Saepe equidem vidi dolores ventriculi, postquam multos annos, interdum non pauciores viginti, molesti fuerant, tandem vel in icterum desiisse, vel calculo fellis deiecto finitos esse; ut dubitatio omnis de eorum causa esset sublata. In aliis autem, qui inciderant in icterum, quem praecesserat dolor saevissimus, et nunquam obliviscendus, sensus eiusdem doloris inordinate rediit modo cum ictero, modo sine eo, per duodecim annos, aut amplius. Nonnulli per maximam aetatis partem identidem experti sunt obscurum dolorem in ventriculo, vel in eius vicinia; post quorum mortem in vesica fellea calculus repertus est. Hic forsitan dum leviter in vesica moveretur, vel minus commode situs esset, dolorem illum obscurum inferre potuisset; et tamen cum in canalem biliferum nunquam impulsus fuisset, ideo icterum, et atrocissimum dolorem nunquam excitasset.

Multi, ut vidimus, dolores ad ventriculum falso referuntur; et causae eorum qui revera ad illum pertinent, sunt multum diversae. Hinc igitur petendum est, cur facies horum malorum tam varia sit, et cur eadem medendi ratio tam diversos exitus habeat.

Aquae Bathonicae, vinum, calefacientia, victus ex frugibus et fructibus quos terra gignit, purgantia, vomitus, graviditas, arthritis, acida, antihelminthica, et emplastra quae erodunt super stomachum imposita, modo profecerunt, modo nocuerunt, et interdum fuerunt supervacua. Postquam attente inquisitum fuerit in naturam doloris; si ille revera a ventriculo oriatur, et neque inflammatio sit, nec scirrhus, saepe utile est primo vomere, deinde sumere vel aquam Bathonicam, vel pulverem amarum et aromaticum, aut, si aegro iucundius fuerit, aqua in quam eadem herbae missae sunt, cui, ubi opus est, adiici potest vel rheum, vel aloë, sic ut alvus tenera servetur. Tincturae quoque cuiuslibet aromaticae guttae sexaginta, vel bis totidem, ex aquae cochleario sumtae statim post prandium, stomacho laboranti saepissime fuerunt auxilio.

Bene quidem factum est, quod huiusmodi remediorum copia non exigua reperitur in omnibus medicamentorum libris: quippe ex tanto numero haud difficile erit eligere quae plerisque stomachis convenient, et vel satis iucunda sint, vel tolerabilia. Remedia stomachi maxime utilia sunt

in arte medica; et eorum compositiones plures ad manum semper esse debent; non solum quia huius visceris morbi quotidie nascuntur; verum etiam quia in morbis obscuris, aut incognitis, aut in quibus nullus locus est exinanientibus, et nulla certa remedia inventa sunt, nihil superest agendum, nisi ut corporis vires nutriamus, maxime per eas res quae facultatem habent ventriculum reficiendi.

§. 3. *De Morbis Lienis.*

Vir quinquagesimum annum agens coepit amittere corpus, et vires, non sine quadam febricula. Modo leviter, modo vehementer inhorruerat per totum morbum; horrores vero nullum certum habuerant circuitum. Cibi cupiditas perierat. Nullus erat vomitus. Alvus erat naturalis, nisi per duos postremos vitae menses. Urina neque colore, nec copia peccabat. Pulsus rarissime erat iusto concitator. Venter non erat intentus. Secundo aegrotationis mense ventriculus dolore torquebatur. Dolores lumborum, coxarum, et dorsi, subito solebant invadere, vix semihoram manentes. Dextera manus in dies paucos tumebat, et dolebat. Sura laeva in biduum adeo dolebat, ut tangi non sustineret; tamen nullus erat calor, nec rubor, nec tumor. Dextra pars ventris dolebat. Per duos postremos vitae menses alvus erat sine modo fusa, et nullis remediis comprimenda. Mors finem horum malorum fecit sexto morbi mense. Lien late exulceratus erat, et reliqua eius

pars in sanie nigram versa: item praeter naturam adhaerebat peritoneo. Nulla alia corporis pars videbatur esse vitiosa.

Vir duos et quadraginta annos natus, multos menses occupatus fuerat fastidio, inflatione, deiectionibus modo albis, modo cruentis, urina fusca, tenesmo, nausea, vomendi cupiditate, maxime si stomachus esset ieiunus, iactatione summa, vigilia, cursu sanguinis e naribus, siti, et delirio, quamvis febris non magna esset. Tandem vomitus sanguinis accessit, qui vix quinque horas substiterat, priusquam rediit, et finem vitae attulit. Lien erat insolitae magnitudinis, sine duritie. Interior eius pars tota tabefacta erat in sanie cruentam. Glandulae mesenterii eadem sanie distentae erant. Hepar erat sanum. Stomachus, qua lienem contingit, inflammatus erat; et signa inflammationis in reliquis quoque visceribus reperti sunt.

Foemina quaedam sex menses aegrotaverat. Cibi cupiditas minuta erat, et sinistra pars ventris intumuerat. His accedebant nausea, ventriculi dolor, fastidium, alvus fusa cum dolore, quae non potuit cohiberi, et ingens iactatio; quae mala alios sex menses perseverarunt. Lien pendebat duas et quinquaginta uncias; non tamen erat exulceratus, nec scirrhusus.

§. 4. *De Morbis Pancreatis.*

Mulier diu quæsta fuerat dolorem ventriculi,

qui per ultimum vitae annum maiorem in modum saeviebat. Cibi cupiditas nulla erat; et quicquid sumtum fuerat, statim vomebatur. Vigilia fere perpetua erat. Pancreas erat scirrhosum.

Pancreas etiam repertum est scirrhosum in foemina, quae septem annos conflictata fuerat cum doloribus ventriculi, et intestinorum, et coxarum. Femur quoque, et crus torpuerant, cum sensu frigoris. Cupiditas cibi perierat; et acida saepe vomebantur*.

C A P. X C V I I I.

De Vertigine.

Vertigo utrumque sexum infestat. Senectuti quidem est maxime familiaris; iunioribus tamen, praecipue foeminis, non est incognita.

Hic morbus mihi visus est istiusmodi, quem crediderim saepe oriri ex offensa quadam ventriculi, saepius ex affectu capitis, saepissime autem a totius corporis infirma atque adversa valetudine. Quantum intellexi ex aetate et constitutione aegrorum, atque ex iis, quae vel nocuerunt, vel opitulata sunt; perpaucae sunt vertigines, quae a sanguine nimio, et habitu pleno nascuntur. Quam-

* Vir quartum et vigesimum annum agens, per quinque menses afflictus erat doloribus ventris, quibus conquiescentibus intumuit ventriculus, cruditas fuit, urina parca, et debilitas sensim aucta, denique alvus fusa quae cohiberi non potuit. Mense tertio a tumore ventriculi extinctus est. Pancreas in magnitudinem enormem auctum erat et exulceratum. E.

obrem in iis, quibus sanguis abundare videatur, caute agendum est, et principio quae leniter tantummodo exinaniunt sunt tentanda, ex quibus documentum capiendum est, quam valida remedia adhibere liceat, et quoties repetenda sint.

Fastidium, cruditas, inflationes, dolor, et sensus gravitatis in ventriculo, nausea, vomitus, alvus astricta, et lumbrici, modo antecedunt vertiginem, modo cum illa simul facta sunt. Ubi haec sunt vel sola, vel praecipua mala praeter vertiginem, credibile erit morbum ventriculi primum fuisse, et vertiginem secundum locum obtinere.

Dolores capitis atroces, surditas, aures intus sonantes, rerum omnium ante oculos duplicatio, caecitates breves, caligines, maculae nigrae, vel flammulae versantes ob oculos, cursus sanguinis ex naribus, mala hypochondriaca et hysterica, minae vel accessiones paralyseos, spasmi et nervorum distentiones, sunt manifesta capitis laborantis signa; et ubi nonnulla ex his, ut saepe fit, cum vertigine nascuntur, vix dubium erit, quin morbus in cerebro situs sit.

Vertigo modo fuit cum languore, tremoribus, animae defectionibus, et palpitationibus; modo supervenit arthritidi vetustae, longis febribus intermittentibus, asthmatis inveterato, profusionibus sanguinis, aut alvi, et aliis morbis diuturnis; saepe etiam reperta est in magno illo malorum concursu, quae accedunt valetudini per-

turbatae, seu fiat a menstruis, vel haemorrhoidibus suppressis, sive ab humore ulcerum et vitiorum cutis intus verso, seu denique intemperantia, morbis, aut senectute penitus conquassata sit. Quinetiam vertigo interdum sola incidit sine quibusvis aliis adversae valetudinis signis.

Siquidem certa res sit vertiginem ex alio morbo pendere, ad hunc tota curatio procul dubio erit dirigenda. Non tamen est dissimulandum, signa in vertigine adversa interdum adeo esse perplexa, ut difficile sit iudicare, ad quam potissimum causam vertigo sit referenda; vel rationem reddere cur eadem omnibus in similibus casis non opitulentur.

Ex iis quae de hoc affectu annotavi, video vomitum, et alvum fusam, sponte sua supervenientes, semper fuisse auxilio; ea autem quae sequuntur semper nocuisse: nimirum, pulverem ex nicotiana naribus haustum, occupationes nimias, defatigationem, turbam hominum, somnum, corporis inclinationem, stare diutius, ambulare, corporis situm in lecto mutare, calorem coeli, ieiunia longa, et pleraque remedia exinanientia.

In numero praesidiorum contra hanc aegritudinem habentur cucurbitulae admotae cum ferro, haemorrhoides, sanguinis detractio per hirudines, vel incisa vena, emplastra cantharidis, vitia cutis, vomitus, ulcuscula, lavatio frigida, et arthritis. Sed molestum est quod pleraque ex his saepe spem aegrorum destituerunt, maxime arthritis, et emplastra

plastra cantharidis. Venae incisio, et quae vehementius purgant, saepius fuerunt detrimento, quam auxilio; vel saltem parum profecerunt. Vix ausim affirmare aquas Bathonicas non esse alienas: at certe nunquam mihi visae sunt profuisse. Cucurbitulae saepe nihil profecerunt ad praesentem vertiginem; sed multis insigni fuerunt praesidio, vel prohibendo, vel mitigando accessiones, ubi alternis mensibus admotae sunt sic ut sanguinis sex unciae detraherentur.

Periculum intentatum a vertigine, et difficultas ei medendi, aestimanda sunt ex genere, et numero malorum accedentium. Siquidem haec pauca fuerint, et a stomacho solo orta, multo facilius erit morbo succurrere, quam si signa sint capitis graviter affecti, cuius curatio est taedii plena, et incerta. In affectibus hypochondriacis vertigo nullum periculum habet, quanquam promte summoverti nequeat. Quod si unum tantummodo ex plurimis malis sit, quae corpus morbis et annis fractum ad sepulchrum deducunt, nihil spei reliquum erit aut in medicina, aut in natura.

Ubi vertigo per se sola fit, saepe videtur oriri ex causis omnino levibus, quae valetudinem corporis haud multum perturbant, nedum in periculum adducunt. Cognitioni iuvenes tam vehementer laborantes, ut fere conciderent, in quibus morbus sua sponte recessit, nec impedit quo minus ad summam senectutem pervenirent; aliis quoque identidem molestus fuit triginta annos, qui caete-

ris in rebus satis commoda valetudine fruebantur.

C A P. X C I X.

De Vomitu *.

Facultas vomendi admodum diversa est in diversis hominibus. In quibusdam vomitus nullo modo excitari potest; in aliis movetur aegre, et non sine magno dolore; dum alii promptissimi sunt ad vomendum levissima de causa, et cum minima contentione. Unum vidi in quo ruminatio quaedam contigit similis illius, quae fit in pecoribus; et cibus siquando nimis diu in stomacho maneret priusquam in os ascenderet, solebat acescere, et nauseam facere, et tandem vomebatur.

Vomitus videtur adeo naturae adversari, ut, nisi crebro usu edocti essemus, vix credibile esset eum impune moveri posse bis terve quotidie per multos annos, quod factum novi. Foemina quaedam omnia, quae sumserat, vomere videbatur per triginta annos. Quinetiam interdum, quanquam omnis cibus vomit apparuerit, homo tamen commode valuit, aut etiam impletus est. Gravidis non paucis visum est illud quod vomunt, superare modum cibi potusque, idque diutius, incolumi matris et foetus salute.

Ebriosi, et praegnantes, matutino tempore praecipue nausea tentantur. Idem malum sobrios

* Vide quae de *Nausea* supra praecepta sunt.

interdum exercet: sed in his frequentius est, ut vel statim, vel paucis horis a cibo nausea fiat, quae deinde brevi desinit in vomitum.

Ventriculus saepe laborat malis non suis, simul dolens cum aliis corporis partibus. Multis etiam vitiis sibi propriis opportunus est, quae prohibent cibum vel capere, vel retinere. Nonnulla ex his in cadaveribus deprehenduntur, qualia sunt scirrhi, qui cardiam, aut pylorum impediunt. Alii huius visceris morbi pendent ex nondum cognitis eius facultatibus, et nullum sui vestigium sensibus obvium post mortem relinquunt; quemadmodum nec relinqueretur ab ista nausea, quam movet nuntius tristis, vel res foeda, oculis aut memoriae subiecta. Memini virum, qui annos non paucos vomendo reddidit fere quicquid devorarat, et praeterea multum cruoris; cuius tamen ventriculus et intestina post mortem nullum morbi indicium ferebant, quod duo expertissimi ac sagacissimi anatomici possent detegere.

Ventriculus modo reddit cibum crudum, modo humorem salsum, vel acidum; interdum pituitam; et post magnos conatus bilis quoque in stomachum propulsa vomitur. Nescio quid pingue, et in igne flammam concipiens, nonnunquam post cibum pergat ad breve tempus e ventriculo in os ascendere. Postremo sanguis, vel cruentum aliquid, a quibusdam vomitum est quotidie per multos dies; ex quo magna debilitas secuta est. Idem malum in aliis semel et iterum

quotannis reversum est; et quanquam dolorem ventriculi aliquantum levarit, semper tamen signum fuit vitii nec levis, nec periculo vacantis. Copia cruoris, qualis videtur, plus terreret, si quidem totus purus putus sanguis esset, qui fortasse exigua tantummodo pars est eius quod vomitur. Huius generis vomitus, quem alii quotannis subinde experti sunt diutius, alios intra triiduum sustulit. Stercora in his aegris vel cruenta, vel atra sunt.

Non aliam huius casus curationem novi, quam quae a me alio libro exposita est *. Quantum autem praesidii sit in quiete, et animi tranquillitate, et refrigerantibus, praeclare intellexi ex quadam aegrota, in qua vel minimum vini sumtum, vel aqua tepida manibus iniecta, vel accessio prope ad ignem, vel lectus tepefactus, vel emplastrum cantharidis, vel solutio alvi, et qualiscunque mentis perturbatio, profusionem sanguinis semper induxerunt.

Vomitui longo, qui sine sanguine fit, purgantia, equitatio, et pingua omnia sunt aliena: quod stomachus ultro reddit, nihil profecit; et vomitus medicamento excitatus modo fuit supervacuum, modo forsitan perniciosus. Unus ex his aegrotis mihi retulit se ea fuisse constantia, ut vomere perseverasset circiter quadragies, sine minimo auxilio. Neque tamen idcirco in his casibus

* *Medical Transactions*, vol. II. qu. 4.

semper abstinendum esse censeo ab hoc remedio; quin potius ubique ab eo incipere oportebit. Ad nauseam recentem remedium praesentissimum est vomere cogere; et vix definire possumus, quo demum tempore morbus incipiat esse inveteratior, quam ut eo modo levare possit. Tum vero noxam, si qua sit, in vomitu movendo, crediderim semper esse perquam levem. Aquae Bathonicae vi propria valent adversus vomitum matutinum ebriosorum: ad aliorum nauseam saepe non profuerunt. Medicamentum, quod habet linimenti saponis partes tres, tincturae opii partem unam, ventri illitum, multis fuit utilissimum. Emplastrum quoque cantharidis impositum proxime ventriculum his aegris subvenit. Aliis auxilio fuerunt acida, aliis sales alcalini, et pulvis e testis piscium, vel creta. Abstinencia a pane cuidam fuit utilis: alium iuvat aqua glacie refrigerata. Dolendum autem est stomachum, et vicina viscera, vitiis insanabilibus saepe tentari, ex quibus vomitus nascitur eiusmodi, ut nullus medicinae locus sit.

C A P. C.

De Voce.

Vox sine quovis dolore, aut valetudine adversa, interdum fit adeo summissa, ut audiri vix possit. Ubi haec susurratio levis est, in ridendo sonus naturalis eliditur: in affectu graviore sonus tam risus, quam vocis, supprimitur.

Qui hoc semel experti sunt, eidem recidivo sunt subiectiores. In quibusdam vox subito perit sine quovis signo praecedente; nec minus subito restituitur sine quavis causa manifesta. Decem vidi sic laborantes, in quo numero novem fuerunt foeminae, et pleraeque hystericae, vel infirmiores.

Impotentia clare loquendi duravit modo plures menses, modo aliquot annos; tum in quibusdam semper fuit eadem; in aliis mane tantum, in aliis vespere molesta fuit; denique singulis annis rediit, et paucos menses permansit.

Lavatio frigida, et exulcerationes, nonnullis visae sunt profuisse. Medicamenta irritantia, et purgantia, et, ut verbo dicam, omnia alia, meo iudicio fuerunt supervacua.

Haec subita vocis mutatio in susurrum, de qua iam sermo est, prorsus diversa est a raucitate, quam spirandi difficultas, et destillationes, secum ferunt.

C A P. C I.

De Urina *.

Urinae cupiditas praeter consuetudinem a variis causis proficiscitur, quarum nonnullae supra expositae sunt. Idem vitium interdum oritur ex scirrho lienis, et ex morbis hystericis, et paralyticis, et iure habetur in malis senectutis. Alios noctu tantum vexavit, somnos molestissime

* Consulantur capita *de Calculo, Graviditate, Ischuria, et Stranguria.*

abrupens; alios peius habuit interdium, et noctu fere conquievit.

Urinae difficultas non solum fit ex causis ante recensitis, sed etiam ex resolutione musculorum qui illam expellere debent. In quodam urina sine cathetere reddi non potuit per biennium, quo tempore elapso, vires partium resolutarum restitutæ sunt, et morbus finitus est.

Urina coloris lactei fuit in prostatae morbis, et in aliis quoque casibus, adiecto, ut videtur, pure.

Multi multa loquuntur de facultate corpori tributa resorbendi pus ex ulceribus dissitis, et transferendi in renes. Semel tantum mihi contigit videre aliquid huiusmodi in iuvene, cuius tonsilla inflammata fuerat, et dein suppuraverat. Per triduum enim quoddam in urina subsidebat puri simile; rupto vero abscessu, et pure effuso, purulentum hoc in urina non amplius conspiciebatur.

In nonnullis, qui valetudinis erant conquassatae, ac perditae, urina nunquam reddi potuit, quin statim incideret haud mediocris languor cum nausea.

Ulcus uteri saepe viam sibi facit in vesicam, et in intestinum, adeo ut spiritus, et stercus, simul cum urina exeant. Idem viris contigit ab ulcere prostatae. Semel mihi suspicio fuit alvum pertinaciter clausam id effecisse, ut paries inter intestinum et vesicam ageret rimam, et similem calamitatem inferret.

Calculus vesicae, morbus prostatae, profluvium album, abortus crebri, et potus acer irritansque, insignem urinae ardorem excitaverunt, ubi nullus fuit locus suspicando morbum Venereum.

Natura, cavens ne urina laedat vesicam, totam eius faciem interiorem mucositate illevis; qui irritamentis a quacunque causa profectis ita augetur, ut cum urina simul copiosissime exeat, et interdum matulae fundo adhaereat, instar amyli aqua diluti; longe autem alius est a pure, quod in urina subsidet, velut cremor lactis. Attamen nec mucus ille, neque humor purulentus semper indicat aliquid in viis urinae exulceratum; utrumque enim nasci potest ex irritamento vehementiore, aut levi inflammatione, sine suppuratione; ut saepe fit in illis qui crebris malis Venereis tentati fuerunt, quive arena, aut calculo infestantur. Ren, et prostata, plerumque sunt sedes ulcerum; quae tum coniiciuntur subesse, cum multum sit humoris purulenti male olentis, et lineis cruentis notati. Quod si prostata nullum chirurgo exploranti morbi indicium praebet, ren erit in culpa. Sententia tamen de hac re caute ferenda est, utpote dubia semper, et obscura.

Urinae incontinentia periculo quidem vacat, verum admodum incommoda est, et molesta. Pueritia, et senectus, illi maxime opportuna sunt. Pueris quibusdam infirmioribus adhaesit ab infantibus usque ad pubertatem. Puellae vero et saepe

pius, et diutius hac infirmitate tenentur; et nonnullae, quibus caeteroquin bona est valetudo. Foeminis omnibus urina sine voluntate ferri videtur promptius, quam viris. Risus, et tussis, saepius illam invitis expellunt; et nonnullas vidi, quae, caetera sanae, nunquam per totam vitam potuerint urinam continere. Quamobrem in morbis foeminarum ancipitibus hoc signum minus terere debet, quam si viris pariter aegrotantibus contingeret. In causis huius vitii numerantur cuncti morbi qui vias urinae occupant; sicut calculi extractio, seu fiat secando vesicam, sive dilatando urethram; item partus difficilis, prolapsus vaginae, morbi Venerei, epilepsia, paralysis, et quicquid denique vel corpus universum, vel has tantummodo partes debilitat.

Decoctum corticis Peruviani, et lavatio frigida, vires corpori addendo, aliquid conferre possunt ad hoc incommodum summovendum. Emplastrum cantharidis super lumbos impositum, partibus ipsis affectis auxilio erit. Ubi his nihil proficitur, aliquid forsitan in natura spei sit, vix quicquam in medicina. Interea ad levandos eos qui sic laborant, fibula quaedam excogitata fuit, quae urethram sic comprimeret, ut urinam distillare prohiberet. Nemini eorum, quos vidi, arrisit hoc inventum; quin potius, post usum brevem, ipso morbo molestius visum est. Quamobrem maluerunt interdiu penem vesicae immittere, in quam urina destillaret; quae quidem commodior

est, sed minus munda, quam vas stanneum, quod itaque aliis magis placuit. Noctu vero multo commodissimum fuit matulam parvam secum habere in lecto, in quam penem et scrotum immittant dormituri, quo lintea sua ab urina secura sint. Omnes, postquam huic paululum assuefacti sunt, se haud minima calamitatis parte liberatos existimarunt.

Urina nigra, vel manifeste cruenta, quantum intellexi, raro habuit initium, nisi a calculo haerente alicubi in viis urinae. Quapropter, ubi sanguis cum urina fertur, illico ad hanc causam respicio; et si consueta calculi indicia simul accesserint, nullus mihi dubitandi locus relinquitur.

Stranguria, utcunque excrucians, quae oritur a cantharidibus intus datis, seu extrinsecus impositis, non nisi diluto rubore urinam inficit, aut mucum eius paucis lineis cruentis distinguit.

Glandula quae vocatur prostata, scirrhusa facta, et exulcerata, interdum cruentat urinam; verum sanguis ab ea exstillans admodum exiguus est, neque augetur equitando, aut ambulando. Tum vero hanc urinae cruentae causam indicant prostatae magnitudo, et durties, digito explorantis satis manifestae. Carcinomata quoque alia, ad vias urinae pertinentia, eam quidem paucis sanguine tingere possunt; verum horum natura non obscure apparebit ex hoc ipso paucis sanguine; ex constantia doloris; ex eo, quod nec dolor, nec cruor, motu augetur; ex muco male olente, vel

sanie, quae cum urina exit; postremo, quod desiderantur omnes notae quae ex calculo fieri consueverunt.

Lumbis vehementius ictis, interdum sanguis e renibus fertur; et par est credere arteriam aut venam in renibus aut vesica rumpi posse non multo maiore vi, quam saepe fit in naribus; quanquam nullum huius rei exemplum vidi. Memini tamen bis evenisse, ut venae vel arteriae in urethra sponte sua dehiscerent, nullo morbo aut ictu antecedente, sanguinem profuderint, sine ulla cupiditate urinae assidue manantem. In altero ex his aegris sanguis saepe rediit per biennium; interea valetudo indies gravescebat, et fine secundi anni mors accessit. Concretus cruor saepe implebat urethram, et aegre expellebatur.

In pessimis variolis, omnes norunt sanguinem saepe ubertim fluere, cum ex aliis corporis partibus, tum etiam ex viis urinae.

In libris medicorum multae aliae causae urinae cruentae numerantur; quae verae sint, necne, viderint alii. Inter aegros, quos ipse vidi, tales certe nunquam inciderunt.

Quies, et frigus, et alvus solutior, sunt praecipua huius mali auxilia.

CAP. CII.

De Morbis Uteri.

Ubi vagina, aut uterus prolabitur, non nisi

pessario sanari potest. Huic vitio fere accedit incontinentia urinae.

Foeminis quibusdam contigit repentinum, neque exiguum aquae ex utero profluvium; quod etiam in eadem saepius rediit. Hoc fit plerumque statim post menstruorum tempus, et cum illa prope sunt ad finem. Vires inde multum labefactantur.

Interdum in utero, aut vagina, nascitur caro pyriformis, cuius pars angustior cum utero cohaeret. Haec tandem adeo augetur, ut dum alvus cum aliqua contentione solvitur, pars eius extra naturalia descendat. Vagina atque utero sic diductis, fit iugis distillatio cruoris, non cohibenda donec haec caro sublata fuerit. Vir artis obstetriciae peritissimus mihi fidem fecit se viginti foeminas hoc vitio liberasse, filo comprehensa angusta eius parte quam proxime uterum cui annectebatur. Hoc facto, post paucos dies caro excidit, et reliquiae eius in utero putrue-runt, et abscesserunt: neque aliud remedium postulatum est, praeter aquam ex floribus chamaemeli saepius infusam. Hanc curationem, quam aiebat periculo vacare, ipse vidi fuisse efficacem.

Furor uterinus non semper initium ducit a vitio uteri, sed interdum nihil distat ab insania vulgari; in qua, cum mens haud amplius sit sui potens, istiusmodi cogitationes subeunt, quae modo libidinem, modo ambitionem, iramve, aut

alios affectus accendunt: tum in omni insania lingua potest verba proferre, quorum mens non conscia est. Furorem certe, quem vocant, uterinum, non solum novi invasisse iuniores, sed etiam vetulam moribundam, quae diu fuerat tenuis, aut nullius valetudinis, et cuius mores pudici, et aetas grandis, cupiditatum ardorem, ut fas est credere, iam olim restinxerant, et Veneris voluptates oblivione deleverant. Praeterea homines insanos oestro Venereo haud minus percitos videmus, quam metu, ultionis amore, et aliis animi perturbationibus.

Uterus, haud secus ac mammae foeminarum, tumoribus scirrhosis interdum infestatur, in carcinomata desinentibus. Haec mala tam uterum, quam mammas, eodem fere aetatis tempore tentant; nimirum, post annum quadragesimum. Primum huius pestis signum est profluvium uterinum revertens, postquam diutius substitisset: neque tamen hoc certum est indicium. Menstrua enim longo post tempore redeuntia, non semper ex utero scirrhoso, sed ex aliis quoque causis proficiscuntur *. Principio, nonnullae mulieres experiuntur cursum e naturalibus, vel mucii lenti, vel humoris dilutioris, similis profluvio albo; qui manat modo annum, modo biennium, priusquam mala quaevis graviora incidant. Haec vero sunt, febris hectica, cupiditas

* De his supra praeceptum est capite 62.

vana desidendi, dolores uteri, inguinum, lumborum, alterius vel utriusque coxae, et femorum; porro neque alvus solvitur, nec urina redditur, sine dolore; et venter saepe distenditur, cum sensu inanitatis. Quod ex utero fertur, fit postea luteum, viride, vel atrum, et mali odoris. Tandem dolores impatibiles oriuntur, qui non nisi opio leniri possunt; vix tamen augentur in vehiculo. Interdum, sed rarius, ulcus uteri viam sibi facit et in intestinum rectum, et in vesicam. Sed haec signa non omnia semper fiunt in eadem aegrotata: verum ubi ex his pauca sunt, satis indicabunt morbi naturam, quanquam obstetrix uterum nondum exploraverit, et omnem dubitandi ansam sustulerit.

Folia cicutaë arefacta et in pulverem contrita, vel succus eius spissatus, cum aqua in qua cortex Peruvianus dedoctus est, tuto dari possunt: verum haec, et alia omnia medicamenta, quantum me usus docuit, parum, aut nihil profecerunt, vel ad medendum carcinomati, vel ad impetum eius cohibendum. Quandam autem curavi, quae visa est multum levari, dum sumeret cicutam, et simul aquam in qua ea decocta erat in vaginam infunderet: dolores enim fere conquiescebant, et uterus per annos aliquot adeo vacabat molestia, ut nec vitae muniis obeundis, nec solitis oblectamentis fruendis, mulier haec impar esset. Plerisque aliis opium unicum solatium fuit.

Haec fere sunt, quae usu magistro didici de natura morborum, et remediorum. Fateor equidem ea esse rudia, inchoata, et manca: cuius rei culpa, ut maximam partem in me recidat, partim tamen in ipsius artis conditionem erit reicienda. Nemo naturae studiosus nescit in quantis tenebris etiam brutae huius telluris scientia iaceat, et quam parum adhuc profecerimus in cognitione rerum inanimatarum. At vero in corporis humani scientia, et eadem omnia, et multa praeterea, quae sunt animantium propria, nos latent. Etenim corporis leges sunt multo plures, et longe aliae, quam quibus res inanimatae subiiciuntur; neque harum modus, et conditiones, ad actiones vitales explicandas sufficiunt, aut ad animantia recte transferri possunt. Quamobrem usum, tardum sane ducem, fere solum huc usque secuta est ars medendi *; et nulla illustria incrementa ex ratione vel cepit, vel captura est, donec humano generi a Deo immortali tributus fuerit vir, qui, quemadmodum Newtonus inanimata, sic animantia contemplando, principium illud vitae detegat, a quo omnes naturales actiones pendent, et gubernantur.

Operae pretium fuisset comparisonem instituere inter hos commentarios, et ea quae in aliorum medicorum libris continentur; et sicubi dis-

* Ευριφων ὁ ἰατρός ἐρωτηθεὶς τὸν διδασκαλόν, παρ' ᾧ ἐπαιδευθῆναι, παρα τῷ χρόνῳ, εἶπεν. *Stobaei Eclog. Phys. lib. I. pag. 19.*

cordia esset, de ea aliquod ferre iudicium. Nec inutilis foret labor subiicere quae ex cadaveribus didicimus de causis ac sedibus morborum. Verum spatium vitae, iam fere decursum, me ab huiusmodi incepto monet absistere.


Datum 15^{to} Augusti 1782.



I^{er} TABLEAU.

ANIMAUX

VERTÉBRÉS.	MOLLUSQUES.	ARTICULÉS.	RADIAIRES OU ZOOPHYTES.
<p>Système cérébro-spinal renfermé dans un étui osseux, dont l'extrémité antérieure présente les organes des sens, et l'orifice du tube intestinal.</p>	<p>Point de système cérébro-spinal, point d'axe osseux partageant symétriquement l'animal; masses nerveuses non symétriques, dispersées dans divers points du corps, d'où partent les nerfs des sens, des muscles et des viscères.</p>	<p>Résultant d'anneaux articulés symétriquement sur un seul axe. Corps vermiforme. D'autres ayant des séries d'anneaux divergentes dont chaque couple forme une paire de pieds dont le nombre peut aller jusqu'au-delà de 75, et n'est jamais moindre de six. Deux cordons longitudinaux formant un anneau au commencement de l'intestin, subissent d'espace en espace de doubles nœuds ou renflements d'où naissent des nerfs distribués à tous les organes. Mâchoires toujours latérales.</p>	<p>1°. <i>Echinodermes</i> à peau fibreuse, souvent endurcie, avec une cavité intérieure où flottent des viscères. Quelquefois des épines mobiles.</p>
<p>Sexes séparés sur des individus différents.</p>	<p>Peau nue et muqueuse, ou incrustée de sels formant les valves simples, doubles ou multiples des conchyfères.</p>	<p>Respiration aquatique, ou aérienne, celle-ci par des trachées.</p>	<p>2°. <i>Intestinaux</i> dont quelques-uns ont des sexes séparés, quoique manquant de tout organe respiratoire ou circulatoire et de nerfs.</p>
<p>Tête distincte du corps, jamais plus de quatre membres ou appendices latéraux.</p>	<p>Sexes séparés sur des individus différents, d'autres hermaphrodites avec nécessité de fécondation réciproque, d'autres sans sexes apparents reproduisant d'eux-mêmes.</p>	<p>Tête distincte dans tous les insectes.</p>	<p>3°. <i>Acalephes</i> à masse charnue dans le parenchyme de laquelle les intestins sont creusés, et contractile en tous sens. Sans nerfs.</p>
	<p>Les uns respirent l'air, d'autres respirent l'eau.</p>		<p>4°. <i>Polypes</i>; corps entièrement gélatineux, n'ayant qu'une seule cavité à orifice unique. Susceptibles de se multiplier par division.</p>
	<p>Sang blanc, organes digestifs constamment pourvus de foie.</p>		<p>5°. <i>Infusoires</i> à corps gélatineux et transparent comme les méduses; sans aucun orifice apparent.</p>
	<p>Tête non distincte; point d'appendices divergentes ou de membres pour se mouvoir.</p>		



II^{me} TABLEAU.

VERTÈBRÉS

MAMMIFÈRES.	OISEAUX.	REPTILES.	POISSONS.
<p>Les <i>hémisphères cérébraux</i> et les <i>lobes du cervelet</i> réunis par une commissure ; <i>lobes optiques</i> toujours solides.</p> <p>Une ou plusieurs paires de mamelles.</p> <p><i>Sept vertèbres cervicales</i>, excepté une espèce de bradype.</p> <p><i>Dents</i> seulement aux maxillaires supérieures, inter-maxillaires et maxillaire inférieur.</p> <p>Un <i>diaphragme</i> musculaire et mobile séparant la poitrine du ventre.</p> <p><i>Embryon</i> développé et devenant fœtus dans une matrice, ou bien passant à l'état parfait sans forme intermédiaire, sur la tétine de la mamelle.</p>	<p>Un <i>ventricule</i> à la partie lombaire de la moelle. <i>Lobes optiques</i> creux.</p> <p><i>Lobes olfactifs</i> rudimentaire. <i>Lobes cérébraux</i> creux.</p> <p><i>Moelle épinière</i> étendue dans un canal aussi long que la colonne vertébrale.</p> <p>Un seul <i>ovaire</i>; les œufs fécondés doivent subir une incubation extérieure.</p> <p><i>Poumons</i> communiquant avec le squelette.</p> <p>Couverts de <i>plumes</i>; les deux membres antérieurs ne servent jamais à la marche.</p> <p>Point de <i>dents</i>. <i>Mâchoires</i> enveloppées de cornes ou becs.</p> <p>Point de glandes parotides, linguales, maxillaires, etc.</p> <p>Jamais plus de 4 doigts aux pieds.</p>	<p><i>Lobes cérébraux</i> creusés d'un ventricule.</p> <p><i>Cervelet</i> rudimentaire. <i>Lobes optiques</i> ordinairement creux.</p> <p>Suivant les ordres, <i>dents</i> au vomer, aux <i>ptérogoldiens</i>, et aux <i>palatins</i>, outre celles qui sont situées comme chez les mammifères.</p> <p>Jamais de <i>poils</i> ni de <i>plumes</i>; peau nue ou écailleuse.</p> <p><i>Poumon double</i> ou unique, mais toujours vésiculeux.</p> <p><i>Œufs</i> ordinairement pondus, mais éclochant sans incubation, d'autres éclochant dans l'oviducte.</p> <p><i>Dents</i> aiguës et allongées incapables de broyer la proie; point de glandes parotides, maxillaires.</p> <p>Un ordre de cette classe subit une métamorphose avant l'état parfait, la respiration est alors aquatique.</p>	<p>Encéphale susceptible de recevoir des <i>lobes surnuméraires</i> derrière le <i>cervelet</i>. <i>Moelle épinière</i> sans aucun renflement sur sa longueur, bornée quelquefois au 50^e de la longueur du canal vertébral.</p> <p><i>Lobes cérébraux</i> solides, et réduits à la couche optique; ou même nuls; d'ailleurs moins développés que les <i>lobes optiques</i>, <i>olfactifs</i>, et souvent même que le <i>cervelet</i>; quelquefois aussi les <i>lobes surnuméraires</i> sont les plus gros de l'encéphale.</p> <p>Organe de l'ouïe ayant des canaux demi-circulaires membraneux non adhérents au crâne, et baignant dans un liquide.</p> <p>L'<i>inter-maxillaire</i> constamment plus développé que le maxillaire, et mobiles l'un sur l'autre.</p> <p>Respiration par <i>branchies libres</i> ou <i>adhérentes</i> sur le pourtour extérieur de leur circonférence.</p> <p>Ceux dont les <i>branchies libres</i> les ont recouvertes de grands battants ou valves osseuses formées au plus de 5 pièces.</p> <p>Les seuls cyprins, les scars et quelques autres ont une mastication.</p> <p>Deux <i>ovaires</i>; œufs éclochant sans incubation après la ponte, ou bien éclochant dans l'oviducte.</p>

Nota. On divise aussi les vertébrés en vivipares, comprenant les mammifères, et en ovipares, comprenant les trois autres classes. Le caractère général des ovipares est de n'avoir jamais de commissures au cerveau ni au cervelet; point de diaphragme; leurs vertèbres cervicales sont en nombre variable.

Il faut que les
lois soient
justes, et
qu'elles soient
appliquées
à tous.

Il faut que les
lois soient
justes, et
qu'elles soient
appliquées
à tous.

Il faut que les
lois soient
justes, et
qu'elles soient
appliquées
à tous.

Il faut que les
lois soient
justes, et
qu'elles soient
appliquées
à tous.

Il faut que les
lois soient
justes, et
qu'elles soient
appliquées
à tous.

MANIFESTE

DE LA

LIBERTÉ

Le peuple français
se souvient
qu'il a été
le premier
à se donner
une constitution
et qu'il a
voulu que
cette constitution
fût la base
de sa liberté
et de sa gloire.
Il a voulu que
le pouvoir
soit exercé
par ses
représentants
et que ces
représentants
soient élus
par le peuple
et responsables
devant lui.
Il a voulu que
la loi soit
la même
pour tous
et que la
justice soit
faite sans
distinction
de personnes.
Il a voulu que
la liberté
de la presse
soit garantie
et que la
liberté de
conscience
soit respectée.
Il a voulu que
la propriété
soit sacrée
et que la
sécurité
soit assurée
à tous.
Il a voulu que
la France
soit une
république
et que la
liberté
soit la base
de son
gouvernement.

Il faut que les
lois soient
justes, et
qu'elles soient
appliquées
à tous.

SUITE DU III^e TABLEAU.

MAMMIFÈRES

EMBRYOPARES,

ou

ACCOUCHANT

D'EMBRYONS.

MARSUPIAUX.

Ayant tous, mâles ou femelles, à bourse ou sans bourse, deux os surnuméraires articulés sur le pubis par une extrémité, et flottants par l'autre; ces os, quoiqu'indépendants de la bourse, ont été nommés Marsupiaux, ainsi que les animaux qui en sont pourvus. Sans dilatation des oviductes en matrice, et sans rétrécissement ou col à la terminaison de l'oviducte au vagin, d'où suit que les embryons n'ont pas d'existence utérine, mais passent de suite aux mamelles, où se termine leur dernier développement.

1^o. MARSUPIAUX CARNIVORES.

Longues canines, et six à dix petites incisives aux deux mâchoires, toujours plus nombreuses à celle d'en haut, les arrière-molaires seulement hérissées de pointes, machelières tranchantes, cerveau lisse.

2^o. MARSUPIAUX FRUGIVORES.

Deux longues incisives plates et proclives en bas, six en haut, canines supérieures longues, inférieures rudimentaires et caduques, pouce presque dirigé comme aux oiseaux et sans ongle, les deux doigts suivants réunis par la peau.

3^o. MARSUPIAUX HERBIVORES.

Jambes postérieures trois ou quatre fois plus longues que les antérieures; manquent de pouces, et ont les deux premiers doigts réunis jusqu'à l'ongle; la queue énorme, formant un troisième levier pour la marche à laquelle les deux membres antérieurs sont étrangers; cinq machelières partout couronnées de tubercules ou de collines transverses; deux incisives supérieures proclives, et six en haut.

4^o. MARSUPIAUX RONGEURS.

Deux grandes incisives croissantes à chaque mâchoire, molaires à deux collines transverses; cinq ongles aux pieds de devant, quatre à ceux de derrière où un tubercule remplace le pouce.

5^o. MARSUPIAUX ÉDENTÉS.

Ayant, outre la clavicule ordinaire, une clavicule impaire commune aux deux épaules, comme les lézards; outre les cinq doigts des quatre pieds, les mâles ont à ceux de derrière un ergot fixé sur l'astragale.

Ces caractères, s'il est bien constaté que ces animaux n'ont pas de mamelles et qu'ils pondent des œufs éclorant par ou sans incubation, devront faire de cet ordre une cinquième classe de vertébrés.

1^o. *Sarigues* ou *Didelphes*. Cinquante dents en tout, pouces des pieds de derrière opposables et à ongle plat, langue hérissée sur les bords, queue nue et prenante.

2^o. *Dasyures*. Huit incisives supérieures, six inférieures, en tout quarante-deux dents, queue partout velue, non prenante, pouce postérieur rudimentaire, et non opposable.

3^o. *Peramèles*. Dix incisives supérieures, six inférieures, en tout quarante-huit dents; trois doigts seulement aux pieds de derrière, dont les deux extérieurs réunis par la peau; cinq doigts aux pieds de devant, dont les intermédiaires sont armés de grands ongles.

1^o. *Phalangers* à queue toujours prenante, quelquefois en partie écailleuse.

2^o. *Phalangers volants*, à peau des flancs étendue entre les jambes, queue non prenante et velue.

3^o. *Koala*. Deux incisives inférieures sans canines, six en haut, dont les moyennes plus longues, et deux petites canines. Doigts des quatre pieds divisés en deux groupes, pour saisir, comme dans les Perroquets; le pouce manque aux pieds de derrière.

1^o. *Kanguroos-Rats*, ayant de plus deux canines en haut, et la première molaire longue et dentelée.

2^o. *Kanguroos*, sans canines, et à molaires uniformément pareilles.

Phascotomes.

1^o. *Échidnés* à langue extensible comme aux Fourmiliers, point de dents.

2^o. *Ornithorinques*, à mâchoires cornées et dentelées comme celles des canards, une dent de chaque côté au fond de la bouche.

17. 1844

This is a copy of the original
document and is not to be
used as evidence in any
court of law.

18. 1844

This is a copy of the original
document and is not to be
used as evidence in any
court of law.

SUITE DU III^e TABLEAU.

MAMMIFÈRES
EMBRYOPARES,

ou
ACCOUCHANT
D'EMBRYONS.

MARSUPIAUX.

Ayant tous, mâles ou femelles, à bourse ou sans bourse, deux os surnuméraires articulés sur le pubis par une extrémité, et flottants par l'autre; ces os, quoiqu'indépendants de la bourse, ont été nommés Marsupiaux, ainsi que les animaux qui en sont pourvus. Sans dilatation des oviductes en matrice, et sans rétrécissement ou col à la terminaison de l'oviducte au vagin, d'où suit que les embryons n'ont pas d'existence utérine, mais passent de suite aux mamelles, où se termine leur dernier développement.

1^o. MARSUPIAUX CARNIVORES.

Longues canines, et six à dix petites incisives aux deux mâchoires, toujours plus nombreuses à celle d'en haut, les arrière-molaires seulement hérissées de pointes, machelières tranchantes, cerveau lisse.

2^o. MARSUPIAUX FRUGIVORES.

Deux longues incisives plates et proclives en bas, six en haut, canines supérieures longues, inférieures rudimentaires et caduques, pouce presque dirigé comme aux oiseaux et sans angle, les deux doigts suivants réunis par la peau.

3^o. MARSUPIAUX HERBIVORES.

Jambes postérieures trois ou quatre fois plus longues que les antérieures; manquent de pouces, et ont les deux premiers doigts réunis jusqu'à l'ongle; la queue énorme, formant un troisième levier pour la marche à laquelle les deux membres antérieurs sont étrangers; cinq machelières partout couronnées de tubercules ou de collines transverses; deux incisives supérieures proclives, et six en haut.

4^o. MARSUPIAUX RONGEURS.

Deux grandes incisives croissantes à chaque mâchoire, molaires à deux collines transverses; cinq ongles aux pieds de devant, quatre à ceux de derrière où un tubercule remplace le pouce.

5^o. MARSUPIAUX ÉDENTÉS.

Ayant, outre la clavicle ordinaire, une clavicle impaire commune aux deux épaules, comme les lézards; outre les cinq doigts des quatre pieds, les mâles ont à ceux de derrière un ergot fixé sur l'astragale.

Ces caractères, s'il est bien constaté que ces animaux n'ont pas de mamelles et qu'ils pondent des œufs éclochant par ou sans incubation, devront faire de cet ordre une cinquième classe de vertébrés.

1^o. *Sarigues* ou *Didelphes*. Cinquante dents en tout, pouces des pieds de derrière opposables et à angle plat, langue hérissée sur les bords, queue nue et prenante.

2^o. *Dasyures*. Huit incisives supérieures, six inférieures, en tout quarante-deux dents, queue partout velue, non prenante, pouce postérieur rudimentaire, et non opposable.

3^o. *Peramèles*. Dix incisives supérieures, six inférieures, en tout quarante-huit dents; trois doigts seulement aux pieds de derrière, dont les deux extérieurs réunis par la peau; cinq doigts aux pieds de devant, dont les intermédiaires sont armés de grands ongles.

1^o. *Phalangers* à queue toujours prenante, quelquefois en partie écailleuse.

2^o. *Phalangers volants*, à peau des flancs étendue entre les jambes, queue non prenante et velue.

3^o. *Koala*. Deux incisives inférieures sans canines, six en haut, dont les moyennes plus longues, et deux petites canines. Doigts des quatre pieds divisés en deux groupes, pour saisir, comme dans les Perroquets; le pouce manque aux pieds de derrière.

1^o. *Kanguroos-Rats*, ayant de plus deux canines en haut, et la première molaire longue et dentelée.

2^o. *Kanguroos*, sans canines, et à molaires uniformément pareilles.

Phascotomes.

1^o. *Échidnés* à langue extensible comme aux Fourmiliers, point de dents.

2^o. *Ornithorinques*, à mâchoires cornées et denticulées comme celles des canards, une dent de chaque côté au fond de la bouche.

Faint, illegible text at the top of the page, possibly a header or title.

Second block of faint, illegible text.

Third block of faint, illegible text.

Fourth block of faint, illegible text.

Fifth block of faint, illegible text.

Sixth block of faint, illegible text.

Seventh block of faint, illegible text.

Eighth block of faint, illegible text.

IV^{me} TABLEAU.

HOMMES.

1 ^{re} . CELTO-SCYTH-ARABES.....	<p>Cheveux lisses, soyeux, bien fournis; angle facial ouvert; dents incisives verticales; pommettes peu saillantes et peu larges; peau et cheveux variant du noir au blanc suivant le climat.</p> <p>Habitent toute l'Europe, moins ses contrées polaires, l'Asie, jusqu'au Gange; et jusqu'aux sources de l'Irtisch, la région Atlantique de l'Afrique, l'Égypte et l'Éthiopie.</p>	<p>1^{re}. <i>Celts</i>, cheveux noirs. Habitants primitifs de l'Europe à l'ouest du Rhin et des Alpes jusqu'à l'océan; et ses îles.</p> <p>2^{re}. <i>Srythas</i>, cheveux blonds. L'Europe centrale, et l'Asie jusqu'aux sources de l'Irtisch, les monts de Belur et l'Himalaya.</p> <p>3^{re}. <i>Arabes</i>, cheveux toujours noirs. L'Afrique Atlantique, et l'Asie au sud du Caucase jusqu'au Gange.</p> <p>4^{re}. <i>Atlantiques</i>. Fosse océane de l'humérus percée comme dans les Austro-Africains; cheveux noirs, châtain et blonds. Guanches, ancien peuple des Canaries.</p>
2 ^{re} . MONGOLES.....	<p>Cheveux lisses, mais roides et rares; barbe grêle; yeux étroits, relevés obliquement en dehors; pommettes saillantes, incisives verticales; peau jaune et cheveux noirs, couleur invariable sous tous les climats; nubilité précoce.</p>	<p>Le Groenland, les côtes polaires de l'Europe et de l'Amérique, sous les noms de Lapous, Samoisés, Esquimaux, etc.; toute l'Asie à l'est du Gange, des monts de Belur et de l'Irtisch.</p>
3 ^{re} . ETHIOPIENS.....	<p>Cheveux laineux; crâne comprimé et front déprimé; nez écrasé; partie faciale de l'inter-maxillaire et menton obliquement inclinés l'un sur l'autre, ainsi que les incisives; peau et cheveux noirs, sous tous les climats.</p>	<p>L'Afrique, depuis le Sénégal, le Niger et le Bahr-el-Azrek, jusqu'un peu au-delà du tropique austral. Séparés des Euro-Africains par une chaîne de hautes montagnes courant parallèlement au rivage de la mer des Indes.</p>
4 ^{re} . EURO-AFRICAINS.....	<p>Cheveux laineux, peau noire, crâne moins comprimé qu'aux Éthiopiens, et front presque aussi saillant qu'aux Européens; incisives verticales, nez peu déprimé. Vulgairement, Nègres de Mozambique.</p>	<p>La côte orientale d'Afrique sur l'océan indien.</p>
5 ^{re} . AUSTRO-AFRICAINS.....	<p>Cheveux laineux, et os du nez soudés ordinairement en une seule lame écailleuse comme aux macaques, et beaucoup plus épate et large que dans les autres Africains; cavité orbitaire de l'humérus percée d'un trou; incisives et menton beaucoup plus obliques qu'aux Éthiopiens. Peau d'un jaune bistre.</p>	<p>L'Afrique au-delà du tropique austral, moins la partie correspondante de la côte orientale.</p> <p>1^{re}. <i>Hottentots</i>, <i>Bushimans</i>, <i>Houssouans</i>, etc.</p> <p>2^{re}. <i>Malgaches</i> de la côte orientale de Madagascar; cheveux courts et laineux; peau de couleur cuivre foncée; orbites écartées plus qu'à aucuns Nègres.</p>
6 ^{re} . MALAIS OU Océaniques.....	<p>Crânes conformés comme ceux des Européens; pommettes un peu plus larges, dents tout-à-fait semblables, cheveux lisses et noirs; peau olivâtre ou brune, dans le même climat, où l'Arabe indien est noir comme le nègre.</p> <p>Le littoral de l'Indochine, tout l'archipel asiatique et l'Océanie jusques à Madagascar.</p>	<p>1^{re}. <i>Carolinens</i>, formes régulièrement belles, taille plus svelte et plus élevée que la moyenne d'Europe; caractère doux, conception facile.</p> <p>2^{re}. <i>Dayaks</i> et <i>Bidjays</i> de Bornéo, et plusieurs des <i>Harafous</i> des Moluques; les plus blancs des Malais.</p> <p>3^{re}. <i>Javans</i>, <i>Sumatrans</i>, <i>Timoriens</i> et <i>Malais</i> du reste de l'archipel indien; lèvres généralement grosses; nez épate; pommettes saillantes; taille plus petite que la moyenne d'Europe; caractère perfide et féroce.</p> <p>4^{re}. <i>Polynésiens</i> proprement dits; taille généralement grande comme celle des Caroliniens, mais forme du visage comme aux Javans, Sumatrans, etc.</p> <p>5^{re}. <i>Ovas</i> de Madagascar, habitant la zone intermédiaire au rivage oriental et aux montagnes; taille ordinaire de 5 pieds 6 à 7 pouces; couleur olivâtre claire; orbites grandes et carrées; menton d'un ovale très-long transversalement; nez presque européen.</p>
7 ^{re} . PAPOUS.....	<p>A peau de nègre; cheveux noirs, demi-laineux, très-touffus, frisant naturellement; barbe noire et rare; physiologie tenant du nègre et du malais, mais à dents déjà un peu proclives; ouverture nasale plus évasée encore qu'aux Guinéens.</p>	<p>Habitent les petites îles autour de la nouvelle Guinée, Waigion, et la nouvelle Guinée.</p> <p>Ont peuplé ou peuplent encore le nord de l'Océanie occidentale, quelques petits archipels de la Polynésie, une grande partie de l'archipel indien, et quelques contrées de l'Indochine et les îles adjacentes.</p> <p>1^{re}. <i>Moy</i> ou <i>Meyer</i> des montagnes de la Cochinchine; <i>Samang</i>, <i>Dayak</i>, etc., des montagnes de Malacca; peuplent aussi l'intérieur de Formose, l'archipel d'Audamann et anciennement le midi de l'île de Nippon, d'après l'Histoire japonaise.</p> <p>2^{re}. L'intérieur de Bornéo et de quelques-unes des îles Philippines, l'intérieur de Célèbes, et quelques-unes des Moluques (anciennement l'intérieur de l'île de Java, <i>List. Javanais</i>).</p> <p>3^{re}. Ils peuplent exclusivement dans l'Australasie, la Nouvelle-Calédonie, l'archipel de Saint-Espirit, et la terre de Diemen, où ils ont une longueur et une largeur des membres disproportionnés au corps, comme chez les <i>assous-pithèques</i> dans le genre des gurnous.</p> <p>4^{re}. Les <i>Fincimbours</i> des montagnes de Madagascar, de que ses populations d'animaux rattachent également au système d'organisation de l'Océanie.</p>
8 ^{re} . NÈGRES OcéANIENS.....	<p>Couleur tout-à-fait noire; crâne comprimé et déprimé; cheveux courts très-laineux, et recouillis; nez écrasé à la racine et très-épate; lèvres grosses; angle facial très-aigu; en tout très-rapprochés des nègres de Guinée.</p> <p>La nouvelle Guinée, l'archipel de Saint-Espirit, les Audamann, Formose.</p>	<p>Nouvelle Hollande.</p>
9 ^{re} . AUSTRALASIENS.....	<p>Cheveux lisses noirs; barbe et poils rares; peau noire; membres grêles et de longueur disproportionnée au corps; dents verticales; nez très-élargi; front déprimé et comprimé.</p>	<p><i>Tebatis</i>, de la pointe nord-est de l'Asie; les <i>Colombiens</i> occupent toute l'Amérique septentrionale, tous les plateaux et pentes des Cordillères depuis le Chili jusqu'à Cumana et l'archipel caraïbe inclusivement.</p>
10 ^{re} . COLOMBIENS..... (*)	<p>Tête allongée; nez long, saillant et fortement aquiliné; front comprimé et aplati; hauteur des mâchoires; teint rouge de cuivre, sous tous les climats; cheveux noirs ne grisonnant jamais et barbe rare; front plus déprimé qu'aux Mongols; nubilité précoce; imagination vive et fiète; caractère moral énergique.</p> <p>Ces caractères appartiennent surtout aux peuples de l'Amérique du nord, et des plateaux des Cordillères, jusqu'à Cumana.</p>	<p>1^{re}. <i>Omaguas</i>, <i>Guaranis</i>, <i>Coroados</i>, <i>Paris</i>, <i>Ataris</i>, <i>Omaguas</i>, etc., ventre gros, poitrine velue et barbe fournie; taille au-dessous de la moyenne des Espagnols; peau d'un bistre terne sort obscure; moral indolent, imprévoyant; tête d'un volume disproportionné au corps, aplatie au sommet, enfoncée entre les épaules; toute l'Amérique méridionale au sud de l'Amazonie et de l'Orénoque, à l'est des Andes et de la Plata. Les <i>Guaranis</i> et les <i>Coroados</i> sont sans barbe et sans poil sur la poitrine.</p> <p>2^{re}. <i>Botocudas</i>, peau brun clair, quelquefois presque blanche; chez <i>Guaites</i>, à taille très-petite, à peau très-blanche, habitant près les sources de l'Orénoque sous l'équateur.</p> <p>3^{re}. <i>Mbayas</i>, <i>Charruas</i>, etc., peau d'un brun presque noir, sans nuance de rouge; front et physionomie couverts; nez étroit déprimé à la racine; yeux petits et bridés; dents verticales, cheveux longs, noirs et roides; pieds et mains plus petits à proportion et mieux faits qu'aux Espagnols; taille supérieure à l'Espagnol. Habitent le Paraguay.</p> <p>4^{re}. Les <i>Puelches</i> et les <i>Tebuellets</i> ou <i>Patagons</i> au sud de la Plata jusqu'au détroit de Magellan; taille au-dessus de 5 pieds 6 pouces; cheveux longs, constitution sans analogie avec celles d'aucune des espèces précédentes.</p>
11 ^{re} . AMÉRICAINS.....	<p>Tête généralement sphérique, front large mais déprimé comme aux Mongols; arcades surcilières relevées en dehors; pommettes saillantes; nez épate et déprimé à la racine; cheveux longs, gros, roides et droits; peau ni noire, ni jaune, ni cuivrée; lèvres très-grosses; intelligence généralement obtuse et caractère moral extrêmement best.</p>	

(*) Colomb ayant découvert les Lucayas, et Andrieu la côte de Cumana, nous croyons pouvoir sur ces motifs établir ces deux noms, qui d'ailleurs ne sont que des noms d'Africains pour les Nègres. Il n'est pas douteux que les Colombiens, et non pas les Américains, ne soient divisés chacun en plusieurs espèces aussi différentes entre elles que celles d'Afrique.

N.B. Les peuples Mongols du Nord de l'Amérique et du Groenland, c'est-à-dire les Eskimoux, les Tchoungtches, les Komis, etc., parlent les langues et ont les formes grammaticales les plus semblables à celles des Mexicains, des Péruviens, des Aztèques, etc.; ces mêmes formes se retrouvent dans le Royaume d'Europe, et dans le Congo en Afrique. De ces faits, et d'autres analogues, il résulte que les ressemblances et les différences de langues qui existent toujours de l'Inde et de la différence des peuples, ne peuvent caractériser les espèces. Voyez l'Atlas Ethnographique du globe, par M. Adrien Balg.

